


సజ్జాతామరూపా
పవిత్రాకాశా



The Holy Bible in the Reli language of India: సజ్జాతా
మరూపాపవిత్రాకాశా (Bible)

సాత్త్వ పురుషురొ పవిత్తొ కొత

The Holy Bible in the Reli language of India: సాత్త్వ పురుషురొ పవిత్తొ కొత (Bible)

copyright © 2023 The Word for the World International and Reli Translation Samiti, Vishagapatnam, Andra Pradesh

Language: Reli (Reli)

Contributor: The Word for the World South Asia

సాత్త్వ పురుషురొ పవిత్తొ కొత
నో నిబంధన, 2023

The New Testament in Reli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 11 Mar 2026 from source files dated 26 Jun 2025

46416fd4-e5d1-555f-9e24-8bbc94e50bd9

Contents

మత్తయి	1
1కొరింధి	51
2కొరింధి	70
గలతీ	83
ఎఫేసీ	90
పిలిప్పీ	97
కొలస్సీ	103
1 తెస్సలోని	108
2 తెస్సలోని	113
1 తిమోతి	116
2 తిమోతి	122
తీతు	126
పిలేమోను	129
హెబ్రీ	131
1 యోహాను	148
2 యోహాను	154
3 యోహాను	155
యూదా	157
ప్రకటన	159

మత్తయి రాసిన యేసుక్రీస్తు సువార్త మత్తయి రాసిలా యేసుక్రీస్తురో సువార్త అగరో కొత

నో నిబందనరె యేసుక్రీస్తురో జీవితచరిత్ర కొయిలా చార సువార్తలురె మత్తయి సువార్త గుటె ఈనె సొబ్బి పుస్తకాలుకూ సువార్త పుస్తకాలు బులి డక్కునె సువార్త బుల్నే బొల్ల వార్త మత్తయి, మార్కు, లూకా, యోహాను యెడానె యేసు క్రీస్తు మొరిజిల్లా తరవాతరె రాసిసె. మత్తయి సువార్త కెబ్బె రాసిసేవో కచ్చితమైలా తారీకు పండితులుకంకా తెలిసిని. ఈనె యేసుక్రీస్తు జొర్నెలా తరవాతరె క్రీ స సుమారు చోటదొస్ట బొచ్చొరోనెరె రాసిసె బులి కుండెలింకెరో ఉద్దేసం. సాకిరాక యే పుస్తకం కే చోటురె రాసిసేవో కచ్చితంగా తెలిసిని, ఈనె కుండెలింకె ద్రుస్టిరె యే పుస్తకం పాలస్తీనా ఇంకా యెరూసలేము పట్టుంరె రాసిసే బులి కొయిగిత్రోసె.

మత్తయి సువార్త గ్రందకర్తకు యేసుక్రీస్తు తాకు సిస్యూడుగా నాడక్కిలా అగరె యెయ్యె పన్నునె వొసూలు కొరిలా తా. తాకు లేవీయుడు బుల్లా నా అచ్చి. మత్తయి పన్నెండులింకె అప్టోస్తులురె జోనె. మత్తయి యూదునెకోసం రాసిసె. యెడ పుర్వనిబందనరె అరవై ఆదారాలుకు కచ్చితంగా దిగదూసి. తా ఉద్దేసం కిరబుల్నే యేసుక్రీస్తుకు మెస్సయగా దిగదీవురో, పురువాక రక్కుకుడు బులి కొయిలా ప్రవచన పూర్నుడు. పురువురో రాజ్యం కోసం బడె వినయోనె రాసిసె. మెస్సయ రాజ్యపరమైలా రొజాగా ఆసిబులి యూదునెరో ఉద్దేసం. ఆత్మసంబందమైలా పురువురో రాజ్యం కోసం గుటె గొప్పవినయంకు బోదించితె సవాలుగా కడిగిచ్చి.

నో నిబందన ప్రారంభించితె అగరె మత్తయి సువార్త గుటె బొల్ల పుస్తకం పనికిరి అచ్చి. కిరకుబుల్నే యెడ పుర్వనిబందన పుస్తకాలుకు మూలమైకిరచ్చి. యెడ పుర్వనిబందనకు నోనిబందనకు సందికొరికిరి అచ్చి. పుర్వనిబందనరె మోసే రాసిలా పాట పుస్తకాలుకూ ఆదారం కొరిగికిరి రాసిసె బులి అం పండితులురో ఉద్దేసం. పొరొతంపరె యేసుక్రీస్తురో ప్రసంగం మత్తయి 5-7 ఇంకా పురువు మోసేకు దర్మసాస్తం దిల్లీసిబులి పొల్చికిరి 19:3-23; 25 కొయిసి.

సంగతీనె

1. యేసు క్రీస్తురో జొర్నె కోసం ఇంకా తా సువార్త సేవ ప్రారంభించువురో 1-4
2. యేసు క్రీస్తురో పరిచర్య ఇంకా తా బోదానె వివరించువురో 5-25
3. ఆకరుగా గొప్ప పరిచర్య ఇంకా మొర్నొ, పునరుద్ధానం గురించి 26-28

యేసు క్రీస్తురో వంసావలి (లూకా 3:23-38)

- 1 యేసు క్రీస్తు వంసావలి యాకిరి రొయితవ్వె, ఎయ్యె దావీదు రొజా యింకా అబ్రాహాము వంసంలింకు చెందిలాలింకె.
- 2 అబ్రాహాము పో ఇస్సాకు. ఇస్సాకు పో యాకోబు. యాకోబు పో యూదా ఈనె తా అన్నబయినె.
- 3 యూదా తామారు వల్లరె పో పెరెసు ఈనె జెరహు. పెరెసు పో ఎస్రొము పో ఆరాము
- 4 ఆరాము పో అమ్మీనాదాబు. అమ్మీనాదాబు పో నయస్సొను. నయస్సొను పో సల్మాను
- 5 సల్మాను పో బోయజు. బోయజు మా రాహాబు. బోయజు పో ఓబేదు. ఓబేదు మా రూతు. ఓబేదు పో యెస్సయి.
- 6 యెస్సయి పో రొజా యిలా దావీదు. దావీదు పో సొలోమోను.*
- 7 సొలోమోను పో రెహబాము. రెహబాము పో అబీయా. అబీయా పో ఆసా.
- 8 ఆసా పో యెహోసాపాతు. యెహోసాపాతు పో యెహోరాము. యెహోరాము పో ఉజ్జియా.
- 9 ఉజ్జియా పో యోతాము. యోతాము పో ఆహాజు. ఆహాజు పో హిజ్కీయా.
- 10 హిజ్కీయా పో మనస్సే తా పో ఆమోను. ఆమోను పో యోసియా.
- 11 యోసియా పో యెకొన్యా ఈనె తా బయినె. యంకె తల్లాబెల్లె ఇస్రాయేలీయులు బబులోను గాకు బందీలుగా రొయితవ్వె.
- 12 బబులోను గాకు జెల్లా తరవాతరె వంసం యాకిరి అచ్చి, యెకొన్యా పో సయల్తీయేలు. సయల్తీయేలు పో జెరుబ్బాబెలు.

* 1:6 సొలోమోనురో మా పూర్వం ఉరియారొ నెయిపొ .

13 జెరుబ్బాబెలు పో అబీహూదు. అబీహూదు పో ఎల్యాకీము. ఎల్యాకీము పో అజోరు.

14 అజోరు పో సాదోకు. సాదోకు పో ఆకీము. ఆకీము పో ఎలీహూదు.

15 ఎలీహూదు పో ఎలీయాజరు. ఎలీయాజరు పో మత్తాను. మత్తాను పో యాకోబు.

16 యాకోబు పో యోసేపు. యోసేపు నెయిపా మరియు. మరియు పో యేసు. తాకు క్రీస్తు బులుసె.

17 ఈనె అబ్రాహాము దినోనె దీకిరి దావీదు జాంక పద్నాలుగు తరాలు. దావీదు తీకిరి యూదునె బబులోను గాకు బందీలుగా తల్లా దినోనె జాంక పద్నాలుగు తరాలు. బబులోను చెరకు జెల్లా దినోనె దీకిరి క్రీస్తు వరుకు పద్నాలుగు తరాలు.

యేసు క్రీస్తు జొరైవురో

(లూకా 2:1-7)

18 యేసు క్రీస్తు జొరైవురో యాకిరి అచ్చి, యేసు క్రీస్తు మా మరియుకు, యోసేపు బుల్లా మనమ సంగరె ప్రదానమైకిరి అచ్చి. బ్యాకు అగరె పురువు ఆత్మసక్తి సంగరె మరియు పెట్టో సంగరె అచ్చి.

19 ఈనె తా గొయిత యోసేపు బొట్టమనమ సడకు సెయ్యె తాకు సార్లికె బిత్తరె అవమానం కొరిలాని. కాకు నా బుజ్జికుంటా తాకు సడదిమ్మంచి బులిగిచ్చి.

20 సెయ్యె సా బులిగిల్లా తరవాతరె, దేవదూత తాకు సొప్పొరె దిగదీకిరి, దావీదు పో యీలా యోసేపు మరియు పురువు ఆత్మ సంగరె పనిదీగిచ్చి. తాకు తో నెయిపొగా అంగీకరించితె దొరితెనా.

21 మరియు జోనె వొండ్ర పొకు జొరొదూసి. సెయ్యె తా మనమానుకు తంకు పాపోనె దీకిరి రక్సింఛుసి. సడకు తాకు యేసు బులికిరి నా లోగు బులి కొయిసి.

22 ప్రబువు తా ప్రవక్త సంగరె పలికిలా కొతా నెరవేరిలాపనికిరి యడల్లా జరిగిసి.

23 ఈనె కన్యక పనిదీగికిరి వొండ్ర పొకు జొరొదూసి. తంకె తాకు ఇమ్మానుయేలు బులి నా సంగరె డక్కుసి.

“ఇమ్మానుయేలు బుల్నే పురువు అముకు తోడు బులి అర్దం.”

24 యోసేపు గుమ్మొదీకిరి ఉటికిరి దేవదూత తాకు ఆజ్ఞాపించిలాపని కొరిసి. మరియుకు బ్యా కొరిగీకిరి తా గొరొకు కొనిగీకిరి జేసి.

25 ఈనె, సెయ్యె పో జొరైవులా జాంక మరియు దీకిరి మిసిలాని. సెయ్యె సే వొండ్ర పొకు “యేసు” బులి నా లోగిసి.

2

తూర్పు దెసా మనమానె దర్సింఛితె అయివురో

1 రొజా యీలా హేరోదు దినోనె బెల్లె యూదయ దెసారె బేల్లెహేమురె యేసు జొరైవులా ఎంట్లాక ఇదిగొ తూర్పు దెసాలింకె యెరూసలేముకు అయికిరి.

2 “యూదునెకు రొజా జొరైవులాట కేట? తూర్పురె అమె నక్సిత్తం దిక్కిరి తాకు పూజించితె అయింఛో” బులి కొయిసె.

3 రొజా యీలా హేరోదు యే కొతా సునిలా బెల్లె సెయ్యె, తాదికిరి తల్లా యెరూసలేమురో మనమానల్లా కలవరం పొడిసె.

4 ఈనె హేరోదు *ప్రదానయాజకూనెకు, మనమానె బిత్తరె తల్లా †సాస్త్రీనెకు సొబ్బిలింకు సమకూర్చికిరి, క్రీస్తు కేట జొరైవు? బులి తంకు పొచ్చురిసి.

5 తంకె “యూదయ దెసో బుల్లా బేల్లెహేమురె” బులి సమాదానం కొయిసె. ఎడగురించి ప్రవక్త యాకిరి రాసిసి.

6 యూదా దెసారె బేల్లెహేము! తూ యూదయ పాలకులకన్నా తక్కువ ఈలాటను! కిరుకుబుల్నే,

తోబిత్తరెతీకిరి జోనె పాలకుడు అయివాసి.

సెయ్యె మో మనమానె యీలా ఇస్రాయేలుకు జొగిలోతాగా తాసి.

7 సే తరవాతరె హేరోదు తెలివిలింకు రహస్యంగా డక్కిపించికిరి సే నక్సత్తం తంకు దిగదిల్లా కలో తెలిసిగిచ్చి.

8 తంకు బేల్లెహేముకు పొడదీసి. “సే జొరైవులా పిల్ల గురించి పూర్తిగా తెల్సిగిండి, సే పిల్లాసుకు దిగిలా తరవాతరె మెత్తె అయికిరి కొండి, సెల్లె మియ్యంకా అయికిరి ఆరాదించుంచి” బులి కొయిసి.

9 తంకె రొజా కొతానె సునికిరి తంకె బట్టరె తంకె బాజీసె. తంకె తూర్పు దిక్కురె దిగిలా నక్సత్తం తంకు అగరె జేకిరి సే పిల్లాసా రొల్లా గొరొ ఉంపరె టారిసి.

10 తంకె సే నక్సిత్తముకు దిక్కిరి బడే సంతోసించిసె.

* 2:4 24 గుంపునె కలిగిలా యూదునెరో యాజకూనెకు నాయకులు అంకు సర్దుకయులు బులికిరి కూడా డక్కుసె † 2:4 మోసే దిల్లా దర్మసాస్త్రంకు చదివికిరి ప్రజానెకు వివరించిలా నాయకులునె

11 గొర్రె బిత్తరుకు జేకిరి సే సన్నిపిల్లాసుకు తంకె మా మరియ దీకిరి తవ్వరో దిగిసె. తంకె తా అగరె మోకరించికిరి పురువుకు ఆరాదించిసె. సే తరవాతరె తంకె దన్నెలా మూటానె పిటికిరి తాకు విలువైలా కానుకానె సున్న, సాంబ్రాని, బోలం, పురువుకు సమర్పించిసె .

12 పురువు తంకు హేరోదు పక్కు జేతెనాబులి సే తెలివిలింకెకు హెచ్చరించిసి. సడకు తంకె దెసాకు తంకె ఇంగుటె బట్టరె బాజేసె.

ఐగుప్తుకు బాజెవురో

13 తంకె బాజెల్లా తరవాతరె దేవదూత యోసేపుకు సొప్పారె దిగదీకిరి, “ఉటు! హేరోదు పిల్లాసాకు మొరదిమ్మాసిబులి తా కోసం కుజ్జిలీసి. మా, పిల్లకు దరిగీకిరి ఐగుప్తు దెసాకు బాజా! మియి కొయిలా జాంక సెట్టాక రో” బులి కొయిసి.

14 యోసేపు ఉటికిరి మా, పిల్ల దీకిరి సే రత్తిరాక ఐగుప్తు దెసాకు బయలుదేరిసి.

15 యోసేపు హేరోదు మొరిజిల్లా జాంక సెట్టాక రొయిజిసి. సెత్తెలె ప్రబువు ప్రవక్త దీకిరి, “మియి మో పోకు ఐగుప్తు దీకిరి డక్కించి” బులి కొయిలా కొత సొత్తయిసి.

సన్నిపిల్లాసుకు మొరదిమ్మరొ

16 జ్ఞానులు హేరోదుకు మోసం కొరిసె బులి రగ్గో సంగరె సిజ్జిజేసి. సెయ్యె తంకె కొయిలా కొత దీకిరి బేత్తెహేమురె, సే పక్కరె గానై దీట బొచ్చురోనె దీట బొచ్చురోనె కన్నా సన్ని వయస్సు రొల్లా వొండ్రపో పిల్లానుకల్లా మొరిదీపేండి బులి ఆజ్ఞాపించిసి.

17 యాకిరి యిర్మీయా ప్రవక్త దీకిరి ప్రబువు కొయిల ఏ విసయం సొత్తయిసి.

18 “రామా బుల్లా పట్టనంరె బడే దుక్కం తీకిరి కంద సుందిసి.

రాహేలు తా పిల్లానె కోసం కందిలీసి.

ఓదార్చితె కేసె నింతె.

తా లింకె కేసె మిగిల్లానింతె.”

ఐగుప్తు తీకిరి బులికిరి అయివురో

19 హేరోదు మొరిజిల్లా తరవాతరె దేవదూత ఐగుప్తురె రొల్లా యోసేపుకు సొప్పారె దిగదీకిరి,

20 “ఉటు! పిల్లాసుకు పొర్నొ కడిమాబులి దిగిలాలింకె మొరిజిసి. ఈనె మాకు, పిల్లకు దరిగీకిరి ఇస్రాయేలు దెసాకు జా” బులి కొయిసి.

21 సడకు యోసేపు ఉటికిరి మాకు, పిల్లకు సంగరె ఇస్రాయేలు దెసాకు అయిసి.

22 ఈనె యూదయ దెసాకు హేరోదు చోటురె తా పో అర్కెలా పాలించిలి బులికిరి సునికిరి సెట్టికు జేతె డొరిజేసి. తాకు గుటె సొప్పొ అయిసి. సే సొప్పారె ప్రబువు తంకు బోదించిలందరె సెయ్యె గలిలయ ప్రాంతముకు జేసి.

23 సెట్టికి జేకిరి నజరేతు బుల్లా గారె రొయితవ్వె. సెల్లె “సెయ్యె నజరేతురె రొల్లా మనమబులి” డక్కుసె బులి పురువురో ప్రవక్తనె సంగరె కొయిలా కొత సొత్తయిసి.

3

బాప్తీసం దిల్లా యోహాను బోదించివురో

(మార్కు 1:1-8; లూకా 3:1-18; యోహాను 1:19-28)

1 సే దినోనై బాప్తీసం దిల్లా యోహాను, యూదయ దెసారె బొనొరె వాక్యం ప్రకటించితవ్వె.

2 సెయ్యె పురువురో రాజ్యో అముకు పక్కరాక అచ్చి ఈనె తొమె చెడుపైటిసె సడదేండి బులి కొయిసి.

3 యోహాను గురించి పురువు యెసయా ప్రవక్త సంగరె యాకిరి కొయిసి.

“ప్రబువు కోసం బట్టో నిద్దం కొరుబులికిరి,

బట్టో బొలుకొరుబులికిరి,

బొనొరె గుటె గొలాసుందిసి.”

4 యోహాను పొగ్గిల్లా కొన్నానె ఒంటురో బల్లొనె దీకిరి కొరిలాంచ. వొంటకు సొమ్మొ దొగుడి బందిగీకిరి, తా కద్ది మిడతానె, బొనొతేనె కైకిరి జీతె.

5 మనమానె యెరూసలేము తీకిరి, యూదయ, యొర్దాను వొడ్డొ పక్కరెతల్లా గాండ్రెతీకిరి యోహాను పక్కరకు అయికిరి.

6 తంకె కొరిలా పాపోనె ఒప్పిగినికిరి యోహాను సంగరె యొర్దాను వొడ్డొరె బాప్తీసం కడిగిచ్చె.

7 యోహాను బాప్టీసం దిల్లబెల్లె సెటుకు పరిసయ్యునె, సద్దూకయ్యునె, అయినె సెల్లె యోహాను “తోమె సప్పొవనా మనమనే! పురువురో రగ్గతీకిరి తప్పించిగిత్తే తోముకు బుద్ది కొయిలాలింకె కేసె?

8 తోమె పాపోనెకు సడదీకిరి తోమె మనుసు మార్చిగీకిరి యెడానె కొరండి.

9 ‘అబ్రాహాము అం బొ’ బులి కొయిగీకిరి తోమె యే సిక్సతీకిరి తప్పించిగిమాసి బులి కొయిగిల్లీసానా? ఈనె ఏ పొత్తొనె దీకిరి పురువు అబ్రాహామురో పిల్లానె ఈలాపనికిరి కొరిపారి బులి మియి కొయిలించి.

10 ఉంచినాక గొడ్డలి గొచ్చొనె సెరోనె ఉంపరె అనితె అచ్చి. బొల్ల పొగలానె నాదిల్లా ప్రతీ గొచ్చుకు అనిపేకిరి నియ్యరె పొక్కదివ్వొ.

11 తోమె మారుమనుసు పొందిసా గనుక మియి తోముకు పని సంగరె బాప్టీసం దిల్లించి. ఈనె మో తర్వాతరె అయితల్లాట మో కన్నా సక్తి యాలాట! తా చెప్పిలీనె బొయితె కూడా మియి సారుపొడుని. సెయ్యె తోముకు పవిత్రాత్మ దీకిరి, నియ్యదీకిరి, బాప్టీసం దూసి.

12 తా కుల్ల తా అత్తరె అచ్చి తా కొలకు బొలికొరికిరి తా దన్నొకొట్టురె పొక్కిరి, పొట్టుకు నానూజిల్లా నియ్యరె పొక్కిరి పుడ్డిపీవొ” బులి కొయిసి.

యేసు బాప్టీసం కడిగివురో

(మార్కు 1:9-11; లూకా 3:21-22)

13 యేసు గలిలయ తీకిరి యొర్దాను వొద్దొ పక్కు అయికిరి సే సమయంరె యోహాను అత్తరె బాప్టీసం కడిగిత్తె అయిసి.

14 ఈనె యోహాను తాదీకిరి, “తో సంగరె మియి బాప్టీసం కడిగిమాసి, ఈనె తువ్వ మో సంగరె బాప్టీసం కడిగిత్తె అయివురో కిడా?” బులి కొయికిరి యేసుకు ఆపితె ప్రయత్నించినె.

15 యేసు సమాదానం దీకిరి, “ఉంచునుకు ఎడ యామురో. నీతి కోసం యాకిరి కొరువురో అముకు బొట్టాక!” బులి కొయిసి. ఎడకు యోహాను ఒప్పిగిచ్చి.

16 యేసు బాప్టీసం పొందిగీకిరి ఎంట్లాక, పనిబిత్తరె తీకిరి దోరకు అయిసి, యిత్రో మెగొ పిటిగిచ్చి, పురువురో ఆత్మ గుటె పావురం పనికిరి వొల్లికిరి తా ఉంపరకు అయివురో యేసు దిగినె.

17 ఈనె యిత్రో యెయ్యొక మో యిస్టమైలా పొ, ఆ ద్వారాక మీ ఆనందించిలించి బులి గుటె సబ్బం మెగొతీకిరి అయిసి.

4

యేసుకు అయిలా సోదన

(మార్కు 1:12; 13; లూకా 4:1-13)

1 సే తరవాతరె అపవాది దిల్లా సోదనానె ఎదిరిగిమ్మాసి బులికిరి, పురువురో ఆత్మ యేసుకు బొనొ ప్రదేసంకు కొనిగిజేసి.

2 సెట్టె యేసు నలపై దినొనే రత్తిదూసు ఉపాసం కొరిసి. సే తరవాతరె తాకు బొక్కొ లగినె.

3 అపవాది తా పక్కు అయికిరి, “తూ పురువురో పొ యానె ఏ పొత్తొరోనుకు రొట్టెలుగా ఆజ్ఞాపించు” బులి కొయిసి.

4 యేసు సమాదానం దీకిరి, “మనమకు జిపించిలాట కేవలం కద్దాక నీయి. ఈనె లేకనానె తల్లాపనికిరి పురువు కొయిలా ప్రతీ కొత వలరె జిపారి బులి రాసికిరి అచ్చి” బులి కొయిసి.

5 సే తరవాతరె అపవాది పురువుకు పరిసుద్ద పట్టుం ఈలా యెరూసలేముకు కొనిగిజేసి. సెట్టె మందిరం ఉంపరె గుటె సికరమంపరె టారదీకిరి,

6 తువ్వ పురువురో పొ యానె తొల్లుకు గెంతు, కిరుకుబుల్నే “తోత్తె సహాయం కొరుబులికిరి, పురువు తా దూతానెకు కొయివొ. తంకె అయికిరి తో పాదంకు కే పొత్తొ నాబయికుంటా తొత్తె తంకె అత్తొనె దీకిరి టెక్కికిరి కొగ్గునుసె బులి రాసికిరి అచ్చి” బులి కొయిసి.

7 యేసు తా దీకిరి, “తో ప్రబుయాల పురువుకు పరిక్సించినాసి బులికిరంకా లేకనాలె రాసికిరి అచ్చి” బులి కొయిసి.

8 అపవాది తాకు బడె డెంగరొల్లా గుటె పొరోతొ ఉంపురుకు కొనిగి జేకిరి తాకు దెసొనెరో రాజ్యాలకు, సడానో మహిమకు దిగదీసి.

9 “తూ మో అగరె ముడుకూనె పొక్కిరి మెత్తె పూజించినె ఎడల్లా తొత్తె దూంచి బులి” అపవాది కొయిసి.

10 యేసు సమాదానం కొయికుంటా, “అపవాది! మో అగరెతీకిరి బాజా, కిరుకుబుల్నే ‘తో ప్రబుయాల పురువుకాక మొక్కిమంచి. తా సేవ మాత్రమాక కొరుమంచి’ బులి కూడా లేకనాలె రాసికిరి అచ్చి.”

11 సెట్టె అపవాది తాకు సడదీకిరి బాజిసి. తర్వాతరె దేవదూతానె అయికిరి యేసుకు పరిచర్య కొరిసె.

యేసు గలిలయరె తా పరిచర్య ప్రారంభించువురో

(మార్కు 1:14; 15; లూకా 4:14; 15)

12 సెల్లె యోహాను చెరసాలరె అచ్చిబులికిరి సునికిరి యేసు గలిలయకు బుల్లికిరి అయిసి.

13 సెయ్యె నజరేతుకు నడదీకిరి, సెట్టతీకిరి కపెర్నహూము బుల్లా గాకు జేకిరి సెట్టె రొయితవ్వి. కపెర్నహూము, జెబూలూను ఇంకా నష్టాలి గానె పక్కరె ఒడ్డో ఒడ్డురె అచ్చి.

14 యెయ్యె కొరిపురో వల్లరె పురువు యెసయా ప్రవక్త సంగరె కొయిల కొతానె సొత్తయిసి. యెసయా ప్రవక్త యాకిరి కొయిసి,

15 జెబూలూను ప్రాంతము,

నష్టాలి ప్రాంతము, సొంద్రో పక్కరె రొల్లా యే మనమానె,

యొర్దాను ఒడ్డుకు తెనాడె పొక్కరె రొల్లా గానె!

యూదునెనీలాలికె తంకె రొల్లా ఓ గలిలయా!

16 మొందారె రొల్లా మనమానె గొప్ప వెలుతురు దిగునె!

మొర్నొ పొడిల గానె రొయితల్లా మనమానె వుంపరె వెలుతురు అయిసి.

17 సెల్లె తీకిరి యేసు, “పురువురో రాజ్యో పక్కరాక అచ్చి. ఈనె మారుమనుసు పొందిగిండి!” బులి వాక్యం ప్రకటించువురో మొదలు కొరిసి.

యేసు చార్లింకు మచ్చర్లింకు డక్కవురో

(మార్కు 1:16-20; లూకా 5:1-11)

18 యేసు గలిలయ సొంద్రో ఒడ్డురె సలుకుంటా పేతురు బులి డక్కితల్లా సీమోనుకు, తా బయి అంద్రెయకు దిగిసి. తంకె సెల్లె సొంద్రో బిత్తరె వల పొక్కుంటా అచ్చె; తంకె మచ్చర్లింకె.

19 యేసు తంకు దిక్కిరి, “మెత్తె అనుసరించొండి! తొముకు మనమానుకు దరిలాపని కొరిమి” బులిసి.

20 ఎంట్లాక తంకె వలలకు నడిదీకిరి తా పొచ్చాడె జేసె.

21 యేసు సెట్టె దీకిరి జేకుంటా దీలింకు దిగిసి. తంకె కూడా బయినె. జొనెరో నా యాకోబు, యింకజొనెరో నా యోహాను. బోరో నా జెబెదయి. సే అన్నబయినె తంకె బో దీకిరి మిసికిరి పడవరె బొసిరికిరి వలానె బొలికొరిగిల్లిసె. యేసు తంకు డక్కీసి.

22 తంకె ఎంట్లాక పడవకు, తా బోకు నడదీకిరి తా పొచ్చాడె జేసె.

యేసు బోదించువురో, ప్రకటించువురో, బొలికొరువురో

(లూకా 6:17-19)

23 యేసు యూదునెరో ప్రార్దన స్థలమురె బోదించుకుంటా పురువురో రాజ్యం గురించి నువార్త కొయికుంటా గలిలయ ప్రాంతముల్లా బుల్లిలీసి. సెయ్యె మనమానొ ప్రతి రోగము యింకా జబ్బునుకు బొలికొరిసి.

24 తా కీర్తి సిరియా దెసల్లా యే వార్త వ్యాపించిసి. మనమానొ రకరకాల రోగోనే రొల్లాలింకు, బాదపొడిలాలింకు, బుత్తోనె దరిలాలింకు, మూర్చ జబ్బులింకు, పక్కవాత జబ్బులింకు, తా పక్క డక్కీగికిరి అయిసె సెయ్యె తంకు బొలికొరిసి.

25 గలిలయ తీకిరి, దొస్ట పట్టనమూనె తీకిరి, యెరూసలేము తీకిరి, యూదయ తీకిరి, యొర్దాను ఒడ్డో తెనాడె రొల్లా ప్రాంతమునె తీకిరి మనమానె గుంపునె గుంపునెగా తాకు అనుసరించిసె.

5

పర్వతమంపరె బోదించువురో

1 ఈనె యేసు బడె మనమానుకు దిక్కిరి పొరోతో ఉంపరకు జేకిరి బొసిరిసి. సే తరవాతరె తా సిస్యునె తా పక్క జేసె.

2 యేసు యాకిరి ఉపదేశించివురో మొదలు కొరిసి.

సొత్తెలా సంతోసం

(లూకా 6:20-23)

3 ఆత్మ వినయమురె దీనులుగా తల్లాలికె దన్యానె;
పురువురో రాజ్యం తంకట.

4 దుక్కొపొడిలాలింకు పురువు ఓదార్చుసి.

ఈనె తంకె దన్యూనె.

5 నెమ్మది మనస్సు తల్లాలింకె బూమికి వారసులూసె.

ఈనె తంకె దన్యూనె.

6 నీతి న్యాయం కోసం ఆసక్తి రొల్లాలింకె దన్యూనె.

సడ వల్లరె తంకె త్రుప్తి పొడివె.

7 పొదర్లొంకంపరె కనికరం తల్లాలింకె దన్యూనె. పురువురో

కనికరం పొందివె. ఈనె తంకె దన్యూనె.

8 పవిత్ర హృదయం కల్గిలాలింకె దన్యూనె,

తంకె పురువుకు దిగుసె.

9 సమాదానపర్చిలాలింకె దన్యూనె;

తంకు పురువురో పోనె బులి డక్కుసె.

10 పురువురో ఇష్టంకు జరిగించితె హింస పొడిలాలింకె దన్యూనె;

పురువురో రాజ్యం తంకట.

11 మెత్తె అనుసరించువురో వల్లరె మనమానె తొముకు నిందించుసె, హింసించుసె, తొమంపరె విరోదంగా నిందానె పొగిలా బెల్లె తొమె దన్యూనె.

12 సంతోసించొండి ఆనందించొండి, తొముకు పరలోకంరె తొం పలం బడెట వూసి. ఈనె తొమె దన్యూనె. యాకిరి తొముకు హింసించిలాపనికిరాక తొముకన్నా అగరె తల్లా ప్రవక్తానెంకా హింసించబొడిసె.

నున్నో, బొత్తి

(మార్కు 9:50; లూకా 14:34,35)

13 తొమె యే లోకంరె నున్నోవనాలింకె, ఈనె నున్నోరె తల్లా గునొ జెన్నే సడకు నున్నోగా క్యాకిరి కొరిపారో? సడ కిరుకు నాపైటికైకుంటా ఈజుసీ. మనమానె సడకు మండిపేకిరి సలుసె.

14 తొమె యే లోకంరె హల్లో వనాలింకె. పొరోతో ఉంపరె తల్లా పట్టుంకు మరుగు పరుచువురో సాద్యమైసి.

15 మనమానె బొత్తికి పుడ్డికిరి కుంచ తొల్లె లొగినింతె ఈనె సడ గొరో బిత్తరె తల్లాలింకల్లా హల్లో దీతండుకు బొత్తి స్తంబమంపరె లొగివె.

16 సాకిరాక తొం జికానె హల్లోదీకిరి ప్రకాసించుమాసి. సెల్లె పొదరలింకు తొమె కొరిలా బొట్ట పైటినె దిక్కిరి పరలోకంరె తల్లా తొం బో స్తుతించబొడివో.

దర్మసాస్త్రం గురించి బోదించువురో

17 మియి దర్మసాస్త్రంకు ఈనన్నా, ప్రవక్తనెరో కొతానెకన్నా రద్దు కొరితె అయించి బులి కొయిగితెనాండి. మియి సడకు రద్దు కొరితె అయిలాసి. సడకు కొరితాక అయించి.

18 మెగొ బూమి గతించుసి గాని, దర్మసాస్త్రమురె సన్ని అక్సరం ఈనెను, పొల్లు ఈనెను గుటె సున్నా ఈనెను తప్పిజెన్నీ బులి కచ్చితంగా తొముకు కొయిలించి.

19 ఈనె యే ఆజ్ఞానెరె కే సన్నీట ఈనెను సారాక మిసికిరి, సెయ్యె పొదరిలింకు సాకిరి కొరుబులికిరి బోదించిలా మనమ పురువురో రాజ్యంరె తక్కువ మనమపనికిరి బచ్చుసె. ఈనె సే ఆజ్ఞానె సొబ్బీ పాటించికిరి సడకు బోదించిలాట పురువురో రాజ్యంరె గొప్పీటపనికిరి బులుగుచ్చె.

20 కిరుకుబుల్లీ, తొమె సొస్త్రీనెకన్నా పరిసయ్యునెరో నీతి కన్నా తొం నీతి ఎక్కువగా నారొన్నె పురువురో రాజ్యం బిత్తురుకు జెన్నారొ బులికిరి తొం సంగరె కొయిలించి.

రగ్గో కోసం బోదించువురో

21 సే కలోనురె బొడిలింకె కొయిలాట తొమె సునిసొ నీనా మొరదిన్నాసి మొరదిల్లాలింకు సిక్కు పొడుసి.

22 మియి కొయిలాట కిరబుల్లీ, తా అన్నబయి ఉంపరె రగ్గోపొడిల ప్రతి మనమకు సిక్కు తప్పిని. తా అన్నబయి పైటి నాఅత్తరైలా మనమ బులి కొయిల ప్రతి మనమ మహాసబరె సమాదానం కొయిమంచి. తా అన్నబయికు మూర్కుడా బులి కొయిలా ప్రతి మనమ సరకంరె నియ్యపాలు వూసి.

23 ఈనె తు, తో కానుక బలిపీటం పక్కరె లొగిల అగరె, తో అన్నబయికు తోఉంపరె కిరన్నా కారనంరె రగ్గో అచ్చి బులికిరి గుర్తు అయినె,

24 తో కానుక సెట్టాక బలిపీటం పక్కరె నడిదీకిరి బాజా. జేకిరి తో అన్నబయిదీకిరి అగరె రాజీపొడు. సే తరవాతరె అయికిరి తో కానుకకు అర్పించు.

25 “తూ తో ప్రతివాది దీకిరి బట్టరె తల్లబెల్లక తాదీకిరి రాజీ పొడు”. ఈనె సెయ్యె సాకిరి నాకొరినె తోముకు న్యాయాదిపతికు అప్పగించుసి. సే న్యాయాదిపతి తోముకు బటుడుకు అప్పగించుసికివో, సే బటుడు తోముకు చెరసాలరె పొక్కదివోచ్చు.

26 యెడ సొత్తాక తోమె దివ్వలిసిలా చివరికాసు దిల్లాజాంక తోమె సే చెరసాలరె దీకిరి పొదరకు అయినారో.

దర్పిపైటి కోసం బోదించివురో

27 దర్పిపైటి కొరితెనాండి బులి కొయిలాట తోమె సునిసొ నీనా.

28 ఈనె మియి కొయిలాట కిరబుల్చె, జోనె తిల్లపిల్ల ఆడుకు కామం దీకిరి దిగినె, వ్రుదయంరె తాదీకిరి దర్పిపైటి కొరిలాపనికిరాక.

29 తు పాపం కొరితె తో కైలాఅంకి కారనంయినె నడకు కడికిరి పొక్కదేండి. తో దే అల్లా నరకంబిత్తరె పొడిలకన్నా తో దేరె గుట బాగం వొరదీగిన్నె బొల్ల.

30 తు పాపం కొరితె తో కైల అత్తో కారనంయినె నడకు అనికిరి పొక్కదేండి. తో దే అల్లా నరకం బిత్తరె పొడిలాటకన్నా తో దేరె గుట బాగం వొరదీగిన్నె బొల్ల.

విడాకులు గురించి యేసు బోదించివురో

(మత్తయి 19:9; మార్కు 10:11,12; లూకా 16:18)

31 తా నెయిపొకు విడాకులు దివ్వలిసిలాట కేసన్నా తా నెయిపొకు విడాకులు పత్రం దిమ్మంచిబులి కొయిసి.

32 ఈనె మియి కొయిలాట కిరబుల్చె నైపో ఉంపరె దర్పిపైటి కారనం నీకుంటా గొయిత తాకు విడాకులుదిన్నె సెయ్యె దర్పిపైటి కొరిలాపని పరిగనింపబోడితె సెయ్యె కారనం ఉసి. సాకిరాక విడాకులు పొందిలా తిల్లపిల్లకు బ్యా కొరిగిన్నె దర్పిపైటికొరిలపనికిరి పరిగనింపబోడుసె. దర్పిపైటి కారనంసంగరాక తా నెయిపొకు విడాకులు దిమ్మంచి గాని ఇంగుట కారనం నీ.

మొక్కుబడి కోసం బోదించివురో

33 సే మొక్కుబడి కొత తప్పితెనాండి. ప్రబువు దీకిరి కొరిలా మొక్కుబడి నెరవేర్చిగిండి, బులి సే కలొనె మనమానుకు కొయిలాట తోమె సునిసొ నీనా.

34 ఈనె మియి కొయిలాట కిరబుల్చె, కెడవుంపరె మొక్కుబడి కోసం ప్రమానం కొరితెనాండి, మెగొ పురువురో సింహాసనం ఈనె మెగొ ఉంపరె ప్రమానం కొరితెనాండి.

35 బూమి పురువురో పాదపీటం ఈనె యెరూసలేము మహారొజారొ పట్టనం యికిరి అచ్చి.

36 తో ముండో ఉంపరె తల్లా గుట బల్లో కూడా దొగలైకిరి గాని, కలియేకిరి గాని, మార్చినారో. ఈనె తోమె ముండో ఉంపరె ప్రమానం కొరితెనాండి.

37 తో కొతా వై బులి బులిమా బులిరొన్నె వై బులి కోండి. సీ బులి బులిమా బులి రొన్నె నీబులి కోండి. ఈనె ఎడకు మించికిరి కెటువంటి కొతన్నా తో తీకిరి అయినె నడకు కారనం సే దుస్ట ఆత్మాక.

పగ తీర్చిగివురో గురించి బోదించివురో

(లూకా 6:29,30)

38 అంకికి అంకి, దంతోకు దంతో కడిపిమంచె బుల్లా కొతా తోమె సునిసొ నీనా.

39 ఈనె మియి కొయిలాట కిరబుల్చె విరోది హానికొర్చె తాకు ఆపితె ప్రయత్నం కొరితెనాండి. తోముకు కేసన్నా కైల చెంపంపరె మరినె తో దీటో చెంపంకా తాకు దిగదె.

40 కేసన్నా తోమంపరె కొలీ లగినె తో కొన్నానె కూడా జింకిగిమ్మాసి బులి దిగినె, తో కండువాంక దీపొండి.

41 కేసన్నా తోముకు తంకె దీకిరి గుట మైలు దూరు ఆయిబులి బలవంతం కొర్చె, తాసంగరె దీట మైలు జాండి.

42 మగిలాలింకు దేండి తో పక్కరె అప్పు కడిగిమాబులి బులిగీకిరి అయిలాలింకు దిక్కిరి సీబులితెనాండి.

సత్రువూనెకు ప్రేమించిమాసి

(లూకా 6:27,28,32-36)

43 జట్టుకారీనెకు ప్రేమించండి. సత్తుమానెకు ద్వేసించండి బులి కొయివురో తోమె సునిసోనీనా.

44 ఈనె మియి ఉంచినె కొయిలాట కిరబుల్నే తొ సత్తుమానెకు ప్రేమించండి తోముకు హింసించిలాలింకు కోసం ప్రార్థించండి.

45 సెల్లె తోమె పరలోకంరె తల్లా తొ బోరో పిల్లానె యిపారో. కిరుకుబుల్నే పురువు చెడ్డలింకు కోసం, బొల్లలింకు కోసం సూర్యోదయం కలిగించిసి. చెడ్డలింకు కోసం, బొల్లలింకు కోసం బొరస పొడదిల్లీసి.

46 తోముకు ప్రేమించిలాలింకు తోమె ప్రేమించినె తోముకు ప్రతిపలం కలిగినీ? పన్నునె వోసులు కొరిలాలింకె కూడా సాకిరాక కొరివెనీనా!

47 తోమె తొ అన్నబయినెకాక అబివందనము కొర్నే పొదర్లింకె కన్నా గొప్ప కిర? పొదరెలింకె కూడా సాకిరాక కొరివెనీనా!

48 పరలోకంరె తల్లా తొ బో పరిపూర్నుడు యిలాట. తొమ్ముకా తా పనికిరి తమ్మాసి.

6

దానం కోసం బోదించివురో

1 “జాగర్! తోమె కొరిలా బక్తిపరమయిలా నీతి పైటీనె పొదరిలింకె దిగిలా పని కొరితెనాండి. సాకిరి కొర్నే పరలోకంరె తల్లా తొ బో తోముకు ప్రతిపలం దిన్నీ.”

2 సడకు తోమె దానం కొరిలాబెల్లె చాటింపు పొగ్గీకిరి సార్లింకూ బుజ్జలాపనికిరి కొరితెనాండి. కపటలింకె సమాజం బిత్తరె, సెయినె, మనమానె గొరవించిమాసిబులికిరి సాకిరి కొరుసె. యెడ సొత్తాక, తంకు మిలివలిసిలా ప్రతిపలం సెల్లాక పూర్తిగా మిలుసి.

3 ఈనె, నీలాలింకు తోమె దానం కొరిలాబెల్లె తో బత్తో కయిల అత్తో కిర దిల్లీవో తో బాఅత్తోకు తెలిసిపించినాసి.

4 సెల్లె తో దానం కాకు నాఅరకైకుంటా తాసి. సెల్లె తోమె రహస్యంగా కొరిలాంచకు దిక్కిరి తో బో తొత్తె ప్రతిపలం దూసి.

ప్రార్థన కోసం బోదించువురో

(లూకా 11:2-4)

5 ఈనె తోమె ప్రార్థన కొరిలాబెల్లె వేసదారునె పనికి ప్రార్థించితెనాండి. తంకె సబాస్థలం, సెయినె, పాకలురె టారీకిరి సార్లింకె దిగిమంచిబులికిరి ప్రార్థన కొరువురో తంకు ఇస్థం. ఈనె ఎడ సొత్తాక తంకు మిల్లా పలితం సెల్లె తంకు పూర్తిగా మిలుసి.

6 ఈనె తోమె ప్రార్థన కొరిలాబెల్లె గొరొబిత్తరకు జేకిరి తట్టినె పొగ్గీకిరి రహస్యంగా తొ బోకు ప్రార్థన కొరిండి. సెల్లె రహస్యంరె తల్లా తొ బో తోముకు ప్రతిపలం దూసి.

7 ఈనె తోమె ప్రార్థన కొరిలాబెల్లె నాపైటికైలా కొతానె పొదరెలింకె పనికిరి కొరినాసి. సాకిరి బొట్ట ప్రార్థన కొరిలాబెల్లె పురువు సునువో బులి తంకె బులుగునుసె.

8 తోమె తంకెపనికిరి కొరితెనాండి. తోముకు కిర కావాలో తోమె నాపొచ్చర్లా అగరాక తొ బోకు తెలుసుసి.

9 ఈనె తోమె యాకిరి ప్రార్థించిమంచె,
పరలోకంరె పురువైలా మో బో,

తో నా గొరవించబోడుమాసి.

10 తో రాజ్యం అయిమంచి, పరలోకంరె తో ఇస్థం నెరవేరిలాపని

యే లోకంరె కూడా నెరవేరిమంచిబులి అమె ప్రార్థించిలింబో.

11 సొబ్బి దినోనె అముకు కావలిసిలా కద్ది అముకు దే.

12 పొదర్లింకె అమె పట్ల కొరిలా అపరాదమునె అమె క్షమించిలాపనికిరి,
అమె కొరిలా అపరాదమునె క్షమించు.

13 అమె సోదనరె నాపొడుకుంటా అముకు దుస్టుడు తీకిరి తప్పించు.

14 పొదర్లింకె తప్పునెకు తోమె క్షమించినె పరలోకంరె తల్లా తొ బో తోముకు క్షమించివో.

15 ఈనె పొదర్లింకు తోమె నాక్షమించినె తొ బో అంకా తొ తప్పునె క్షమించిని.

ఉపాసం గురించి బోదించివురో

16 వేసదారునె ఉపాసం కొరిలాబెల్లె మనమానె దిగిమంచి బులి తంకె మూసే నీరసంగా దిగదిల్లాపనికిరి కొరుగునుసె. తోమె ఉపాసం కొరిలాబెల్లె సాకిరి కొరితెనాండి. యెడ సొత్తాక, తంకె తంకరో ప్రతిపలం పొందినె బులి కచ్చితంగా కొయిలింబి.

17 తోమె ఉపాసం కొరిలాబెల్లె “మూ” దొయిగీకిరి ముండొ అంచిడిగీండి

18 సాకిరి కొర్నే తోమె ఉపాసం కొరిలాపనికిరి మనమానుకు దిగిదిన్ని. ఈనె రహస్యంగా దిగిలా తో “బో” తెలుసుగుచ్చి. సెల్లె తొ బో తొ ప్రార్థన దిక్కిరి ప్రతివలం దూసి.

పరలోకం పలియ కూర్చిగివురో

(లూకా 12:33,34)

19 తొ కోసం యే లోకం పలియకు సంపాదించితెనాండి. ఎట్టె సే పలియకు చెదానె దరిపాసి. సే పలియకు తుప్పు కయిపీవో. సారోనె పొడికిరి దోచిగివ్వె.

20 తోమె పలియకు పరలోకం కూర్చుగునొండి. సెట్టె చెదానె దరిని, తుప్పు కయిపీని. సారోనె పొడికిరి దోచిగిన్నింతె.

21 తో సంపద కేటె తన్నే తో మనుసు కూడా కెబ్బుకూ సెట్టాక తాసి.

దేకు హల్లో బొత్తి

(లూకా 11:34-36)

22 అంకి దేకు గుటె బొత్తిపనాట. తో అంకినె బొత్తేరోన్నె తో దేఅల్లా హల్లోగా తాసి.

23 ఈనె తో అంకినె నాబొల్లర్నే తో దేఅల్లా మొదారొ యిజిసీ. తొ బిత్తరె తల్లా హల్లో మొదారొ యిజిసీ సే మొదారొ కెత్తె డొరొగా తాసి.

పురువు ఇంకా సంపద

(లూకా 16:13; 12:22-31)

24 జొనె మనమ దీలింకు యజమానునెకు సేవ కొర్నారి. సాకిరి కొర్నే సెయ్యె జొనుకు ప్రేమించికిరి, యింకాజొనుకు ద్వేసంచికిరి తాసి. ఈనె జొనుకు అతిస్తద్దదీకిరి సేవ కొరికిరి, యింకాజొనుకు అస్తద్ద కొరుసి. తోమె పురువుకు, పలియకు సేవ కొరివురో ఈని.

25 సడవల్లరె మియి కొయిలాట కిరబుల్నే, తొ జికానుకు కావలిసిలా కద్ది గురించి కాని, తొ దేనుకు కావలిసిలా కొన్నానె గురించి కాని, చింతించితెనాండి. కద్ది కన్నా పొర్నో విలువైలాట నీనా? సాకిరాక కొన్నానె కన్నా దే ముక్కయైలాట నీనా?

26 మెగోనె ఉడిల్లా వక్సినెకు గమనించోండి. సడానె విత్తనాలు జల్లినింతె వచ్చానె వచ్చుదిన్నింతె. ఈనె దన్నొకు కొట్టరె కూర్చుగిన్నింతె. ఈనె పరలోకం తల్లా తొ “బో” సడానుకు పోసింబిలీసి. తోమె సడకన్నా విలువైలాలింకె నీనా?

27 చింతించికిరి తా జీవిత కలోకు గుటె గడియకు బొడిదిగిల్లాలింకె తొబిత్తరె కెనన్నా అచ్చెనా?

28 తోమె కొన్నానె గురించి కిరుకు చింతించిలీసో? గసాంపరె బొడిలా పుల్లోసుకు గమనించోండి. సడనె పైటి కొర్పింతె కొన్నానె కొరిగిన్నింతె.

29 ఈనె మియి కొయిలాట కిర బుల్నే గొప్ప విలువ తల్లా సాలోమోను రొజంకా అలంకరనమురె యే పుల్లోనె గుటె పుల్లోదీకిరి కూడా సరితూగునారి.

30 ఆజి రొయికిరి కల్లికి సుక్కిజికిరి నియ్యబిత్తరె పొక్కదిల్లా యే గసాకు పురువు ఎత్తె అందంగా అలంకరించినె తొముకు యింకెత్తో అందంగా అలంకరించివొయో నీ! తోమె అల్పవిస్వాసినె.

31 ఈనె “కిర కయిమంచి? కిర పీమంచి? కే కొన్నానె పిందిగిమంచి? బులి చింతించితెనాండి.”

32 పురువుకు నాజనిలా మనమానాక సడపొచ్చాడె దొమిడితోనె. పరలోకం తల్లా తొ బోకు ఎడల్లా తొముకు అవసరం బులికిరి తెలుసు.

33 ఈనె అగరె తా రాజ్యం కోసం, నీతి కోసం ప్రయాస పొడొండి; సెల్లె సడల్లా పురువు తొముకు దూసి.

34 సడుకాక కల్లికి గురించి చింతించితెనాండి. కల్లికిరో చింత కల్లికిరోటాక. కే దినొకు తగిలా కొస్టానె సే దినొకాక చాలు.

7

పొదర్లింకు తీర్పు తీర్పువురో

(లూకా 6:37,38,41,42)

1 తోమె తీర్పు తీర్పుతెనాండి. సాకిరి కొర్నే పురువొకా తొముకు తీర్పు తీర్చిని.

2 తోమె పొదరలింకె ఉంపరె తీర్పు తీర్చినె తొముకంకా పురువు తీర్పు తీర్చివో. తోమె నప్పిలా నప్ప దీకిరి పొదరలింకె తొముకు నప్పికిరి దూసె.

3 తోమె తో బయిరో అంకిరె తల్లా నలుసుకు దిగిలీసా. ఈనె తొ అంకిరె తల్లా దూలముకు దిగినార్లీసా.

4 తో అంకిరె దూలము తన్నుగా తో బయిరో అంకిరె తల్లా నలుసుకు కడిగిత్తు బులి క్యాకిరి కొయిపార్లీసు?

5 వేసదారీ! అగరె తో అంకిరె తల్లా దూలముకు కడిగిత్తు. సెత్తెలై తో బయిరొ అంకిరె తల్లా నలుసుకు కడితె తొత్తై తేటగా దిగదూసి.

6 పరిసుద్దమైలాట కుక్కురొనుకు దీతేనాండి. తొం ఉంపరె పొడికిరి తొముకు చీల్చిపూసి. తొమె మూత్యాలుకు గుసిరీనె అగరె పొగితేనాండి. పొగినె సడ సడానుకు గొడ్డొనె తొల్లై మండిపూసి.

మగు, కుజ్జు, మరు

(లూకా 11:9-13)

7 మగినె దూసి. కుజ్జినె మిలుసి. మరినె తలుపు కడుసి.

8 మగిలా ప్రతీ మనమ పొందివొ, కుజ్జిలాటకు మిలివొ, తలుపు మరిలాటకు తలుపు కడివొ.

9 పో రొట్టెకు మగినె పొత్తొ దిల్లా బో తొంబిత్తరె కేసన్నా అచ్చెనా?

10 నీనె మచ్చొ మగినె సప్పొకు కేసన్నా దూసినా?

11 దుస్తులైలా తొమె తొం పిల్లానుకు బొల్టొంచ దిమ్మాసిబులికిరి తెలుసు నీనా! ఈనె సాటబెల్లె పరలోకంరొ తొం బో తాకు మగిలాలింకు బొల్టొంచ దిన్నీనా? తప్పకుండా దూసి.

12 ప్రతీ వినయంరె పొదరలింకె తొముకోసం కిర కొరిమాసిబులి తొమె ఆసింతులీసొ తొమె పొదరలింకు కోసం సాకిరాక కొరిమాసి. ఎడ మోసే దర్మసాస్తంరె, యింకా ప్రవక్తానె యాకిరి కొయిలా అర్థం యెడాక.

ఇరుకు బట్టొ

(లూకా 13:24)

13 నాసనముకు జెల్లా బట్టొ యిరుకుగా తాసి. సే బట్టొ విసాలంగా అచ్చి. బడేలింకె సే బట్టొతీకిరి ప్రవేసింతునె.

14 ఈనె నిత్యజీవముకు జెల్లా బట్టొ కస్టంగా రొవ్వొ. సే బట్టొ ఇరుకుగా రోసి. కుండిలింకె మాత్రమాక సడకు కనుగునునె. యెడ గమనించొండి ఇరుకు తల్లా బట్టరాక ప్రవేసింతుండి.

గుట గొచ్చొ సడరొ పొగలానె

(లూకా 6:43,44)

15 సారొప్రవక్తానె వినయంరె జాగర్తగా తాండి. తంకె గొరొ సొమ్మానె పనా కొన్నానె గుడిగీకిరి తొం పక్కు అయివె. ఈనె బిత్తరె క్రూరమైలా తోడేల్లు పనికిరి రొవ్వె.

16 తంకు కలిగిల పలము దిక్కిరి తంకు తొమె గుర్తించి గలిగిమాసి. కొంటానె గొచ్చొ తీకిరి ద్రాక్కు పొగలానుకు, పల్లెరు గొచ్చొనె తీకిరి అంజూరొ పొగలానుకు కట్టిప్పరొ సాద్యమాకనా?

17 బొల్ల గొచ్చొకు బొల్ల పొగలానె కాసివొ. పుల్ల పొగలానె కాసిలా గొచ్చొకు పుల్ల పొగలానాక కాసుసి.

18 బొల్ల గొచ్చొకు పుల్ల పొగలానె కాసినింతె. ఈనె పుల్ల పొగలానె కాసిలా గొచ్చొకు బొల్ల పొగలానె కాసిని.

19 బొల్ల పొగలానె నాదిల్లా గొచ్చొకు అనికిరి నియ్యరె పొక్కదూసి.

20 సడకాక తంకె తంకు కలిగిల పలాలుకు దిక్కిరి తొమె తంకు గుర్తించి గలిగివాసి.

తొమె మెత్తై తెలిసిని

(లూకా 13:25-27)

21 మెత్తై ప్రబూ! ప్రబూ! బులి డక్కిలెత్తై మాత్రాన పురువురొ రాజ్యం బిత్తురుకు జోంచొబులికిరి బులిగితేనాండి. ఈనె మో బో ఇస్టప్రకారం సల్లాలింకె మాత్రమాక జేపారె.

22 సే తిర్పుదిన్ బడేలింకె మెత్తై దిక్కిరి, ప్రబూ! ప్రబూ! తో నారె అమె సువార్త ప్రకటించించ్చొ? బుత్తోనుకు సొడదిపించించ్చొనా? బడే అద్బుతానె కొరిలానింతొనా? బులి బులుసొ.

23 సెల్లై మియి తంకడికిరి తొమె కేసెవొ మెత్తై తెలిసిని. సెడ్డలింకైలా తొమె మో అగరెతీకిరి బాజాండి బులి స్పష్టంగా కొయిమి.

గొరొనె బందితల్లా దీలింకు గురించి

(లూకా 6:47-49)

24 ఈనె మో కొతానె సునికిరి సడకు ఆచరించిలా ప్రతి మనమ పొత్తొ ఉంపరె తా గొరొ బందిగిల్లా బుద్ధిమంతుడుకు పొలికిరచ్చి.

25 సే గొరొ రాతి పొత్తొ ఉంపరె బందిలాట. ఈనె బొర్న పొడినన్నా, వరదానె అయికిరి తుపాను బానే అయికిరి సే గొరొకు మరినన్నా సే గొరొ పొడ్చి.

26 ఈనె మో కొతానె సునికిరి నడకు నాఆచరించిలా ప్రతీ మనమ బల్లి ఉంపరె తా గొరొ బందిగిల్లా బుద్ధినీలాట దీకిరి సమానము.

27 బొర్స అయికిరి, వరదానె అయికిరి, తుపాను బానే అయికిరి సే గొరొకు మర్నే సే గొరొ కూలిజేసి నడ పతనం బయంకరమైలాట.

యేసుకు రొల్లా అదికారం

28 సెల్లె యేసు యే కొతానె కొయికిరి ముగించిలాబెల్లె, మనమానె తా బోద సునికిరి ఆచ్చర్యపొడిసె.

29 సెయ్యె తంకు సాన్తీనె పనికిరి నీకుంటా, అదికారం రొల్లాపనికిరి తంకు బోదించిసి.

8

యేసు జోనుకు బొలికొరివురో

(మార్కు 1:40-45; లూకా 5:12-16)

1 యేసు పొరోతో ఉంపరె దీకిరి వొల్లిలాబెల్లె మనమానె గుంపునె గుంపునెగా తా పొచ్చాడె అయిసె.

2 కుస్తురోగం రొల్లా మనమ జోనె అయికిరి తా అగరె మోకరించికిరి, “బో, తొత్తె ఇస్సమైనె మెత్తె బొలుకొరుపారు” బులిసి.

3 “మెత్తె ఇస్సమాక” యేసు తా అత్తో చాపికిరి తాకు సూగీకుంటా, “తొత్తె బొలైమంచి బులి కొరిగిల్లునా, ఈనె బొలైసు” బులి కొయిసి. ఎంట్లాక తా కుస్తురోగం తీకిరి బొలైజిసి.

4 సెల్లె యేసు తా దీకిరి, ఏ సంగతి గురించి కాకు కొయితెనా ఈనె యాజకుడు పక్కు జేకిరి తో దే దిగదీకిరి, తొత్తె బొలైలపనికిరి తంకు రుజువయితె మోసే ఆజ్ఞాపించిలా కానుక చెల్లించు బులి కొయిసి.

యేసు రోమా అదికారిరో పైటితాకు బొలికొరువురో

(లూకా 7:1-7)

5 యేసు కపెర్నహూము బుల్లా గాకు అయిలాబెల్లె రోమా అదికారి జోనె తా పక్కరకు అయికిరి, తాకు సహాయం మగిసి.

6 “బో! మో సేవకుడు పక్కవాతం సంగరె గొరె మొంచరె కదిలినారుకుంటా పొడికిరి అచ్చి. సెయ్యె బడే బాదపొడిలీసి బులి కొయిసి.”

7 యేసు, “మియి అయికిరి తాకు బొలికొరుంచి” బులి కొయిసి.

8 ఈనె అదికారి, “బో! నా, తూ మో గొరె గొడ్డె లొగితే కూడా మియి అర్లుడుని. ఈనె తువ్వు కొతాబుల్నే చాలు, మో సేవకుడుకు బొలైజివో.

9 కిరకుబుల్నే, మియి కూడా అదికారినె తొల్లె తల్లాటాక. మో తొల్లె కూడా సైనికునె అచ్చె. మియి యే సైనికుడు సంగరె ‘జా’ బుల్నే జోసి; సే సైనుకుడు ఆయి బుల్నే ఆసి. మో సేవకుడు దీకిరి ‘యెడ కొరు’ బుల్నే కొరువో” బులి కొయిసి.

10 యేసు యెడ సునికిరి ఆచ్చర్యపొడిసి. సెయ్యె తా పొచ్చాడె అయిలాలింకె దిక్కిరి, యెడ సొత్తాక. ఎత్తె గొప్ప విస్వాసము తల్లా మనమ మెత్తె ఇస్సాయెలురె కేసె దిగిదిల్లానింతె.

11 మియి కొయిలాట కిరబుల్నే, తూర్పు దీకిరి, పడమర దీకిరి, బడేలింకె మనమానె ఆసి. అయికిరి, అబ్రాహాము, ఇస్సాకు, యాకోబు దీకిరి మిసికిరి పురువు రాజ్యంరె జరిగిలా విందురె మిసిగివ్వె.

12 ఈనె తా రాజ్యో వారసునెగా తవ్వొలిసిలాలింకె నానమ్మిలందరె తంకు మొందారె బిత్తరె పొక్కదివ్వె. సెట్టె తంకె కందానె, దంతోనె కమిడిగీకుంటా బాదకు అనుబవించుసె.

13 యేసు సతాదిపతి సంగరె, తువ్వు “జా! విస్వాసింపిలపనాక జరుగుసి” బులి కొయిసి.

సే గడియరె తా సేవకుడుకు బొలైజిసి.

యేసు బడేలింకు బొలికొరువురో

(మార్కు 1:29-34; లూకా 4:38-41)

14 యేసు పేతురు గొరొకు అయికిరి తా సను జోరో సంగరె మొంచ దరికిరి రొల్లాట దిగిసి.

15 యేసు తా అత్తోకు సూగిత్తల్లాబెల్లె, జోరో తాకు నడదీకిరి బాజేసి. సెయ్యె ఉటికిరి పరిచర్య కొరువురో మొదలు కొరిసి.

16 మనమానె సొంజైతల్లాబెల్లె, బుత్తోనె దరిలా బడేలింకు యేసు పక్కు డక్కిగీకిరి అయిసె. సెయ్యె గుట్ కొత సంగరె బుత్తోనుకు సొడిపించిసి. జబ్బానె సంగరె రొల్లలింకల్లా బొలికొరిసి.

17 నడకాక “సెయ్యె అమె బాదలకు తావుంపరె పొగ్గీకిరి అమె రోగునుకు బరించిసి” ఈనె యెసయా ప్రవక్త సంగరె పలికిలా ఏ కొతానె సొత్తయితె యాకిరి జరిగిసి.

యేసుకు సిస్యునెగా తవ్వరొ
(లూకా 9:57-62)

18 యేసు తా చుట్టు తల్లా మనమానె గుంపునెకు దిక్కిరి, గలిలయ సొంద్రొ తెనాడె పొక్కు జాండిబులి కొయిసి.

19 సెల్లె దర్మసాస్త్ర పండితుడు జొనె అయికిరి, “బోదకా! తువ్వ కేటికి జెన్నే మియి నెట్టుకు అయిమి” బులి కొయిసి.

20 యేసు, “నక్కానె నుచ్చుపొడుతుండుకు గత్తోనె అచ్చె. బారె ఉడిల్లా పక్కినె రొయితండుకు గూడినె అచ్చె. ఈనె మనమరొ పో ముండో వాల్చిగితై కూడ సోటునీ” బులి తాసంగరె కొయిసి.

21 ఇంకా జొనె సిస్యుడు, “ప్రబూ! అగరె మో బో కు బుజ్జదీతే అనుమతి దే బులి కొయిసి.”

22 ఈనె యేసు తాసంగరె, “మొరిజల్లాలింకు బుజ్జదీతె మొరిజల్లాలికె అచ్చెదె తువ్వ మో సంగరె ఆయి” బులి కొయిసి.

యేసు తుపానుకు ఆపువురొ
(మార్కు 4:35-41; లూకా 8:22-25)

23 యేసు పడవ ఉటిలాబెల్లె సిస్యునె తాసంగరె జేసె.

24 సెత్తెలె అకస్మాత్తుగా గుట్ బొట్ట తుపాను సే సొంద్రొ ఉంపరకు అయిలందరె సే పడవ అలానె వల్లరె బుడ్డిజెల్లాపనికిరి అచ్చె. ఈనె సే సమయంరె యేసు గుమ్ముకుంటా అచ్చె.

25 సిస్యునె తాపక్కు అయికిరి తాకు ఉడదీకుంటా, “ప్రబూ! రక్కించు మొరిలాపనికిరి అచ్చె!” బులిసె.

26 యేసు, తొముకు యెత్తె అల్పవిస్వాసం? కిరుకు దొరొపొడిలిసో? బులికిరి ఉటికిరి బాకు, అలలకు సాంతించుబులికిరి ఆజ్ఞాపించిసి. సడ సాంతించిసి.

27 తంకె ఆచ్చర్యపొడికిరి, “ఎయ్యె కేటవో? బా, అలానె కూడా ఆ కొత సునిలీసె” బులి కొయిగిచ్చె.

యేసు బుత్తోనె దరిలా దీలింకు బొలికొరువురొ
(మార్కు 5:1-20; లూకా 8:26-39)

28 యేసు, సొంద్రొ తెనిపొక్కరె తల్లా గదరేనీయునె దెసాకు చేరిగిచ్చె. బుత్తోనె దరిలా మనమానె దీలింకె సమాదులు దీకిరి అయికిరి తాకు మిసిగిచ్చె. అంకె క్రూర ప్రవర్తన వల్లరె సే బట్టోదీకిరి కేసె జెన్నారీలీసె.

29 సే బుత్తోనె, పురువురొ పో! అముకు కిరకొరిమంచి బులి అయిసు? తగిలా సమయం నాయిలా అగరాక అముకు సిక్కించమాసే బులికిరి ఎట్టికి అయిసునా? బులి గట్టిగా దొందరికుంటా బులిసె.

30 తంకు కుండె దూరె గుట్ గుసిరీనె గుంపు మేసికుంటా అచ్చె.

31 సే బుత్తోనె యేసుకు దిక్కిరి, “తూ అముకు పొడిదిపిమంచి బులి బులిగిన్నే సే గుసిరీనె గుంపు బిత్తరకు పొడిదిపే” బులి బతిమాలిగిచ్చె.

32 సెయ్యె సడికిరి, “బాజాండి!” బులి కొయిసి. సడకు సడనె దోరకు అయికిరి సే గుసిరీనె బిత్తరకు బాజీసె. సే గుసిరీనె గుంపు సొబ్బి అగరె తల్లా పొరొతో ఉంపరెత్తికిరి దొమిడి జేకిరి సొంద్రొ బిత్తరె పొడికిరి మొరిజీసె.

33 సే గుసిరీనె జొగిలాలికె సెట్టె దీకిరి దొముడుకుంటా గా బిత్తరకు జేకిరి జరిగిలాటల్లా కొయికిరి, సే బుత్తో దరిలాలింకు కిరైసా సొబ్బి కొయిసి.

34 సెల్లె యెడ సునికిరి సే గా అల్లా యేసుకు మిసితె అయిసి. తంకె తాకు దిక్కిరి తంకె రొల్ల ప్రాంతం సడదీకిరి బాజా బులికిరి బతిమాలిగిచ్చె.

9

గొడ్డత్తో పొడిజిల్లా మనమకు యేసు బొలికొరువురొ
(మార్కు 2:1-12; లూకా 5:17-26)

1 యేసు పడవ ఉటికిరి సొంద్రొ దాటికిరి సెయ్యె రొల్లా గాకు అయిసి.

2 కుండిలింకె మనమానె మొంచదరిలా జొనె పక్వవాత రోగికు సొప్పంపరె యేసు పక్కు దరిగీకిరి అయిసి. యేసు తంకె విస్వాసం దిక్కిరి సే పక్వవాతవ రోగిసంగరె, మో పో “దైర్యంగా రో, తో పాపోనె క్షమించబొడిసి” బులి కొయిసి.

3 ఎడ సునికిరి కుండిలింకె దర్మసాస్త్ర పండితులు తంకె బిత్తరె తంకె “ఎయ్యె పురువుకు దూసించువురొ కొరిలీసె” బులి కొయిగిచ్చె.

4 తంకె కిరబులిగిల్లీసెవో యేసుకు బుజ్జికిరి సెయ్యె తంకెసంగరె, “తొం ప్రూదయంబిత్రరకు సారొలోచనానె కైంకి అయిపించిలీసా?

5 ఉటికిరి సలు ‘తో పాపోనె క్షమించించి’ బులి కొయివురో సులువునా?

6 పాపోనె క్షమించితె మనమరో పోకు బూమంపరె అదికారం అచ్చిబులికిరి తంకు నిరూపించిమంచిబులి” పక్కవత రోగిసంగరె, సడకు “వుటు! తో సొప్ప దరిగీకిరి గొరుకు జా!” బులి కొయిసి.

7 పక్కవతం సంగరె తల్లా మనమ ఉటికిరి గొరుకు జేసి.

8 ఎడ దిక్కిరి సెట్టెరోల్ల మనమానుకు డొరోమొందిసి. మనమానుకు యెడపనా అదికారందిల్లా పురువుకు తంకె స్తుతించిసె.

యేసు మత్తయికు డక్కువురో

(మార్కు 2:13-17; లూకా 5:27-32)

9 యేసు సెట్టిదీకిరి బయిలుదేరికిరి జేతన్నుగా, మత్తయి బుల్లా మనమ బొసిరికిరి పన్నునె వసూలు కొరువురో దిగిసి. యేసు తాదీకిరి, “మో పొచ్చాటె ఆయి” బులిసి. మత్తయి ఉటికిరి తా పొచ్చాడె జేసి.

10 యేసు, మత్తయి గొరె బత్తోకైతె బొసికిరి తల్లాబెల్లె, బడేలింకె పన్నునె వొసులుకొరిలాలింకె, పాపోనె అయిసె, తంకల్లా యేసుదీకిరి, తా సిస్యునెదీకిరి మిసికిరి బత్తో కైతె బొసిరిసె.

11 పరిసయ్యునె ఎడ గమనించికిరి యేసు సిస్యునె సంగరె, “తొం బోదకుడు, పన్నునె వసూలుకొరిలాలింకె సంగరె, పాపోనె సంగరె మిసికిరి కిరుకు కద్ది కయితె బొసిరిసి?” బులి పొచ్చురిసె.

12 యేసు ఎడ సునికిరి బొల్లెరోల్లాలింకు వైద్యుడు అవసరంనీ. జబ్బుదీకిరి తల్లలింకాక వైద్యుడు అవసరం తాసి.

13 లేకనాలె కిడచ్చో జేకిరి పరిసీలింఱొండి మియ్యి పాపోనెకు డక్కితె అయించి గని, నీతిమంతునెకు డక్కితె అయిలాసి. మీ దయకాక కోరిలింబి గాని, జంతు బలినె కోరిలాటనీ.

ఉపాసం గురించి ప్రస్నించువురో

(మార్కు 2:18-22; లూకా 5:33-39)

14 సే తరవతరె బాప్టిసం దిల్లా యోహానురో సిస్యునె యేసు పక్కు అయికిరి, “అమె, పరిసయ్యునె కెబ్బుకూ ఉపాసం కొరిలింఱొ ఈనె తో సిస్యునె ఉపాసం కిరుకు కొర్నింతె?” బులి పొచ్చురిసె.

15 యేసు, యాకిరి జవాబు దీసి. “బొర్రో తంకసంగరె తల్లాబెల్లె బ్యా గొరొలింకె కిరకు ఉపాసం కొరువె? ఈనె బొర్రొకు తంకుపక్కురెతీకిరి కొనిబాజెల్లా సమయం ఆసి. సెత్తెలె తంకె ఉపాసం కొరునె” బులిసి.

16 కేసయినెను “చిరిజిల్లా పుర్న కొన్నాకు నోకొన్న సంగరె మాసిక పొగినింతె. సాకిరి కొర్నే సే అతుకు చిరిజోసి. సెత్తెలె నోకొన్న సే కన్నంకు యింకా బొట్టకొరుపూసి.

17 సాకిరాక నోటైలా ద్రాక్సరసంకు పుర్న సొమ్మొసంచెరి నుచ్చినింతె. సాకిరి కొర్నే సే సొమ్మొసంచె చిరిజీకిరి సే ద్రాక్సరసము నాసనమైజివో. సెత్తాకనీకిరి సే సొమ్మొసంచె కూడా నాసనమైజివో. సడకు నోటైలా ద్రాక్సరసముకు నో సొమ్మొసంచెరాక నుచ్చికిరి రొయిదిమ్మాసి. సాకిరి కొర్నే దీటా బద్రంగా తాసి” బులి యేసు కొయిసి.

అదికారి జ్యోకు, రొగొతో జబ్బు మొట్టకు యేసు బొలికొరువురో

(మార్కు 5:21-43; లూకా 8:40-56)

18 ఈనె యేసు యాకిరి కొతలగితల్లాబెల్లె యూదుల సమాజమందిరముకు అదికారిగా తల్లా జొనె అయికిరి, తా అగరె మోకరించికిరి, “మో జో ఉంచినాక మొరిజిసి. ఈనె తూ అయికిరి తో అత్తో తా ఉంపరె లొగినే సెయ్యె జూసి” బులి కొయిసి.

19 సెల్లె యేసు, తా సిస్యునె ఉటికిరి తా పొచ్చాడె జేసి.

20 తంకె జేతల్లాబెల్లె పన్నెండు బొచ్చొరోనెతీకిరి రొగొతో జబ్బుసంగరె బాద పొడిలా జొనె మొట్ట పొచ్చాడెదీకిరి అయికిరి తా కొన్నా అంచుకు సూగిచ్చి.

21 సెయ్యె, “మియి తా కొన్నకు సూగిన్నే చాలు మెత్తె బొల్లెజివో” బులి మనసురె బులిగిచ్చి.

22 యేసు పొచ్చాడుకు బులికిరి తాకు దిక్కిరి, మో జ్యో దైర్యంగా రో! తో విస్వాసమాక తొత్తె బొలికొరిసి బులి కొయిసి. సే కొయిలా ఎంట్లాక సెయ్యె బొల్లెసి.

23 యేసు సే అదికారి గొరొబిత్తురుకు జేతల్లాబెల్లె, సెట్టె బజన కొరిలాలింకె గోల తప్పురో దిగిసి.

24 తంకె సంగరె, “బాజండి, సే జ్యో మొరిజిల్లాని గుమ్మిలీసి” బులి కొయిసి. తంకె తాకు బచ్చిసె.

25 సెయ్యో తంకు పొడదిప్పికిరి బిత్తురుకు జేకిరి సే పిల్లరో అత్తో సూగిచ్చి సెయ్యో ఎంట్లాక ఉటిసి.

26 ఏ సంగతి సే ప్రాంతమల్లా తెలిసి.

యేసు దిగానీలా దీలింకు బొలికొరువురో

27 యేసు సెట్టెదీకిరి బయలుదేరికిరి జేతల్లాబెల్లె దీలింకె అంకీనె నీలాలింకె, “దావీదురో పో! అమంపరె దయ దిగదే!” బులి కేకానె పొక్కుంటా తాకు అనుసరించినె.

28 యేసు గొరో బిత్తురుకు జేతల్లాబెల్లె దీలింకె అంకీనె నీలాలింకె తా పక్కరకు అయినె. సెయ్యో తంకు సంగరె, “ఎడ మియి కొరిపారిబులి తొమె నమ్మిలీసానా?” బులి పొచ్చురిసి. “వై ప్రబూ!” బులి తంకె సమాదానం కొయినె.

29 సెల్లె సెయ్యో తంకె అంకీనె సూగీకుంటా, “తొముకు కెత్తె విస్వాసం తన్నే సెత్తె పలం మిలుసి” బులిసి.

30 తాకు అంకీనె దిగదీనె. యేసు, “ఏ సంగతి కాకు నాతెలిసికుంటా జాగర్త పొడండి” బులి తంకు గట్టిగా కొయినె.

31 ఈనె తంకె జేకిరి తా గురించి సే “ప్రాంతమల్లా” సాటిపినె.

కొతానీలా మనమకు యేసు బొలికొరువురో

32 తంకె దోరకు జేతల్లాబెల్లె కుండె మనమానె బుత్తో దరిలా మూగమనమకు యేసు పక్కు కొడిగీకిరి అయినె.

33 యేసు బుత్తోకు సాడిపించిలా ఎంట్లాక సే మూగమనమ కొతలగివురో మొదలు దీసి. సెట్టెదీకిరి మనమానల్లా ఆచ్చుర్లపొడికిరి, “యెడపనా సంగతి ఉంచినెజాంక ఇస్తాయేలురె కెట్టే జరిగిలాని” బులిసి.

34 ఈనె పరిసయ్యునె, “సెయ్యో బుత్తోనో అదికారి సహాయం సంగరె బుత్తోనుకు సాడిపించిలీసి” బులిసి.

యేసు మనమానె కోసం కనికరం పొడివురో

35 యేసు యూదునెరో సబాస్థలంరె బోదకొరుకుంటా బొట్ట గానె, సన్ని గానె బుల్లికిరి పురువురో రాజ్యం గురించి సువార్త కొర్లీసి. సొబ్బి రకానె జబ్బూనె, బాదానెకు బొలికొరిసి.

36 ఈనె యేసు సెట్టె తల్లా మనమానుకు దిక్కిరి, జొగులోతా నీలా గొర్లీనె పనికిరి అలసిజేకిరి, చెదిరిజేకిరి తవ్వరో దిక్కిరి తంకంపరె జాలిపొడిసి.

37 సే తరవాతరె తా సిస్యునె సంగరె, బిల్లో బొల్లె పచ్చిసి ఈనె కూర్చితందుకు, పైటిలింకె కుండెలింకె అచ్చె.

38 ఈనె “యజమానుడుకు ప్రార్దన కొరొండి సెల్లె సెయ్యో బిల్లో కట్టితె పైటిలింకు పొడదూసి” బులి కొయినె.

10

యేసు పొడదిల్లా పన్నెండుమంది

(మార్కు 3:13-19; లూకా 6:12-16)

1 యేసు తా పన్నెండు మంది సిస్యునెకు డక్కికిరి బుత్తోనుకు సాడిదీతందుకు, సొబ్బిరకానె జబ్బూనెకు, బాదానెకు బొలికొరితె తంకల్లా అదికారం దీసి.

2 సే పన్నెండులింకె అపోస్తులునె బులి నా లొగిసి, సీమోను బుల్లాటకు, పేతురు బులి డక్కితవ్వె. తా బై అంద్రెయ. జెబెదయి పో యాకోబు, తా బయి యోహాను.

3 పిలిప్పు, బర్తొలోమయి, తోమా, పన్నునె వొసులుకొరిలా మత్తయి, అల్పయి పో యాకోబు, తద్దయి.

4 కనానీయుడెలా సీమోను, యేసుకు ద్రోహం కొరిలా యూదా ఇస్కరియోతు.

పన్నెండుమందిరో పైటి

(మార్కు 6:7-13; లూకా 9:1-6)

5 సే పన్నెండు మందికి మనమానె పక్కు పొడిదికుంటా, తంకు యేసు యాకిరి ఆజ్ఞాపించిసి, “యూదునె నీలాలింకు పక్కరకు గాని, సమరయ దెసారొ పట్టనమునెకు గాని జేతెనాండి”

6 సడకు బదులుగా నసించిజితల్లా ఇస్తాయేలు మనమానె పక్కు జాండి. తంకె తప్పిజెల్లా గొర్లీనె పనికిరి అచ్చె.

7 ఈనె జేకుంటా, “పురువురో రాజ్యం పక్కరాక అచ్చి” బులి ప్రకటన కొరొండి.

8 జబ్బూనె సంగరె తల్లాలింకు బొలికొరొండి. మొరిజిల్లాలింకు ఉడిదెండి, కుస్తురోగీనెకు సుద్ది కొరొండి. బుత్తోనుకు పొడదిపెండి. తొమె సుచ్చరాక పొందిలాట సుచ్చరాక దెండి.

9 సున్న గాని, వెండి గాని, రాగి పలియానె తొమె సొమ్మొనంచినెరె లొగ్గీకిరి జేతెనాండి,

10 తోమె ప్రయానం కొరితల్లాబెల్లె పలియసంచినె గాని, కొన్నానె గాని, జోడానె గాని, అత్తోబడ్డిగాని, తొం పొచ్చాడె యింగుటె కిచ్చి నీజితెనాండి. పైటి కొరిలాలింకు కూలి మిలుసి నీనా!

11 తోమె కే గాకు జెల్లిసావో, సే గారె కేసె తోముకు ఇస్టపొడికిరి డక్కిలీసవో సే చోటు సడదిల్లా జాంక తా గొరొ బిత్తరాక తాండి.

12 తోమె సే గొరొబిత్తరకు జెల్లాబెల్లె సే గొరై సమాదానం కలుగుమాసి బులి కోండి.

13 సే గొరొలింకె యోగ్యులైసే తొం కొయిలా సమాదానం సే గొరొబిత్తరాక కలుగుసి. నీనెమాను సే సమాదానం తోముకాక బుల్లికిరి ఆసి.

14 ఈనె ఈనెమాకు, తోముకు కేసె స్వాగతం నాకొయినె సే గొరొకు గాని ఈనె సే గాకు గాని సడిదీకిరి జెల్లా అగరె తొం గొడ్డోస్తో *దుల్లి దులిప్పొండి.

15 యెడ సొత్తాక, తీర్పు తీర్చిలా దినొరె తోమె సడదిల్లా గానెరొ స్థితికన్నా సొదొమ, గొమొర్రా పట్టనమూనె దయ పొందిగివ్వె బులి కచ్చితంగా కొయిలించి.

అయితల్లా హింసానె

(మార్కు 13:9-13; లూకా 21:12-17)

16 నునొండి తోడేల్లు మొజుకు గొర్రీనుకు పొడిదిల్లాపనికిరి తోముకు పొడిదిల్లించి. ఈనె సప్పొనె పనికిరి తెలివిగా, పావురాలుపని నిస్కపటంగా తాండి.

17 ఈనె, మనమానె వినయంరె జాగర్తగా రోండి. తంకె తోముకు దరిగీకిరి, బందించీకిరి పక్కరె తల్లా న్యాయసబకు అప్పగించునె. తంకె యూదునెరొ సబాస్థలంరె కొరడా మడ్డోనె మరివె.

18 మో వల్లరె తోముకు సాక్సంగా పాలకులు అగురుకు, రొజానె అగురుకు కొనిగిజోసె సెల్లె తంకు, యూదునె నీలాలింకు మో నువార్త ప్రకటించుసా.

19 తంకె తోముకు అదికారినెకు అప్పగించిలాబెల్లె, కే విదంగా కొతలగిమంచో? కిరకొయిమంచో? బులి చింతించితెనాండి. తోమె కిర కొతాలగిమంచో సే సమయంరె తోముకు తెలియపర్చివో.

20 కిరుకు బుల్లె కొతాలగిలాట తొమ్మెనీ. తో బోరొ ఆత్మ తొంబిత్తరెదీకిరి కొతలగువో.

21 అన్నబయి అన్నబయికు, బో పోకు మొర్నుకు అప్పకొయివె. పిల్లానె తంకె మా, బోనుకు ఎదురు బుల్లికిరి తంకు మొరదూసె.

22 మనమానల్లా మో నా కారనంగా తోముకు ద్వేసించివె. ఈనె చివర జాంక సహనం సంగరె తల్లాట రక్సింతుబొడివో.

23 తోముకు గుటె గారె హింసించినె తప్పించిగీకిరి యింగుటె గాకు పొలిజాండి. యెడ సొత్తాక. తోమె ఇస్రాయేలు గానల్లా నాబుల్లిలా అగరాక మనమరొ పో ఆసి.

24 “సుక్కిగిల్లా సిస్యూనె గురువులుకన్నా గొప్పలింకెనింతె; సాకిరాక పైటికొరిలాలింకె యజమానికన్నా గొప్పలింకెనింతె.”

25 సిస్యూడు తా గురువు పనికిరి తమ్మంచి. సాకిరాక పైటికొరిలాలింకె యజమానుడు పనికిరి తన్నే చాలు. గొరొ యజమానికి †బయెల్లెబూలు బులి బుల్లె సే గొరొలింకు యింకెత్తో నానె లొగివేయో.

కాకు డొరుమాసి

(లూకా 12:2-7)

26 “ఈనె తోమె మనమానుకు డొరితెనాండి. రహస్యమైలాట పొదరెపొడివో. నుచ్చిదిల్లాట నాతెలిసికుంటారొన్నీ.”

27 మియి రహస్యంగా కొయిలా కొతానె బాహాటంగా పొదరిలింకు కోండి. తోమె కన్నొరె కొయిలా కొతానె గొరొ ఉంపరె ఉటికిరి ప్రకటించొండి .

28 తంకె దేకు మొరదీపారె ఈనె ఆత్మకు మొరదిన్నారె. తంకు గురించి డొరితెనాండి. దేకు, ఆత్మకు సరకంరె పొక్కిరి నాసనం కొరిలా పురువుకు డొరొండి.

29 గుటె పైసాకు దీట పిచ్చుకానె బిక్కునె. ఈనె తొం “బోకు” నా బుజ్జుకుంటా బూమి ఉంపరె గుట్టుంకా పొడ్డీ.

30 తొం ముండొ ఉంపరె తల్లా బల్లొనంకా కెత్తో గొనికిరి అచ్చె.

31 సడకు డొరితెనాండి. బడే పిచ్చుకానె కన్నా తోమె విలువైలాలింకె.

క్రీస్తుకు బప్పిగివురొ ఇంకా నాబప్పిగివురొ

(లూకా 12:8,9)

* 10:14 యూదునెరె తంకసంగరె మిసికిరి పురువురొ రాజ్యంకు నాఅంగీకరించాలింకె † 10:25 సాతానుడుకు తల్లా గుటె నా

32 మెత్తె మనమానె సమక్సంరె వొప్పిగిల్లా ప్రతి మనమా పరలోకంరె రొల్ల మో బో అగరె మియి తాకు వొప్పిగిమ్మి.

33 ఈనె మనమానె సమక్సంరె మెత్తె తిరస్కరించిలాలింకు మియి పరలోకంరె రొల్ల మో బో అగరె జన్మి బులి కొయిమి.

సాంతాక నీ, విబేదాలంకా తాసి
(లూకా 12:51-53; 14:26,27)

34 మియి బూమింపరకు సాంతికు దన్నెతె అయింపి బులిగిత్తెనాండి. కత్తికు దన్నెతె అయింపి గాని సాంతికి నీ.

35 కిరుకుబుల్నే మియి, బోనుకు పోనుకు మొజిరె, మానుకు తా జోనుకు మొజిరె, ససుకు బూనెకు మొజిరె, విబేదం లోగిత్తె అయింపి.

36 గుట్ గొరుకు చెందిలాలింకాక సే గొరొ బిత్తరెలింకు సత్తుమానె ఊసె.

37 తా మా బోకు మో కన్నా ఎక్కువగా ప్రేమించిలా మనమ మెత్తె సిస్యూడు ఈనారి. తా పోకు ఈనన్నా, జోకు ఈనన్నా మోకన్నా ఎక్కువగా ప్రేమించిలాట మెత్తె సిస్యూడు ఈని.

38 మెత్తె వెంబడించిలా మనమ మో సిలువకు బోయికిరి మెత్తె నాఅనుసరించినె మో సిస్యూనె యీతె యోగ్యునె ఈనింతె.

39 పొర్నొకు కాపాడిగిల్లా మనమ సడకు వొరదీగివ్వొ. ఈనె మో కోసం జీకకు వొరదీగిల్లా మనమ సడకు సంపాదించిగునుసి.

ప్రతిపలం

(మార్కు 9:41)

40 తొముకు అంగీకరించిలలింకె మెత్తె అంగీకరించుసె. మెత్తె అంగీకరించిలలింకె మెత్తె పొడిదిల్లాటకు అంగీకరించిలపనాక.

41 జొనె మనమ ప్రవక్త ఈలందుకు తాకు చేర్చిగిల్లా మనమకు సే ప్రవక్త పొందిలా పలం పొందుసి. ఈనె జొనె మనమ నీతిమంతుడు ఈలందుకు తాకు చేర్చిగిల్లా మనమ నీతిమంతుడు పొందిలా పలం పొందుసి.

42 తొమె మో సిస్యూనె యీలందుకు, తంకు కేసె గుట్ గిన్నె పని దూసెవో తంకు ప్రతిపలం మిలుసి బులి కచ్చితంగా కొయిలించి.

11

బాప్టీసం దిల్లా యోహాను తీకిరి కబురు దన్నెలాలింకె

(లూకా 7:18-35)

1 యేసు తా పన్నెండు మంది సిస్యూనెకు తంకె కొరివలిసిలా పైటీనె గురించి కొయికిరి, సే తరవాతరె సెయ్యె సెట్టి దీకిరి బయలుదేరికిరి బోదించుకుంటా ప్రకటించుకుంటా సుట్టూ తల్లా బడె గానెకు జేసి.

2 చెరసాలరె తల్లా యోహాను క్రీస్తు కొరిలా పైటీనె గురించి సునిసి. సెయ్యె కుండిలింకె సిస్యూనెకు యేసు పక్కరకు పొడిదీసి.

3 తంకె జేకిరి, యోహాను “ఆసి బులి కొయిలాట తువ్వాకనా? నీనే యింకాజొనె కోసం అమె ఎదురు దిగిమంచినా?” అం సంగరె కోబులి పొచ్చరిసె.

4 సడకు యేసు తంకె సంగరె యాకిరి కొయిసి. “తొమె జేకిరి సునిలాంచకు, దిగిలాంచకు, యోహానుకు కోడి.

5 అంకీనె నిలాలింకె దిగిలీసె, నాసల్లాలింకె సలిపార్లీసె, కుస్తురోగినె బోలైలీసె, కల్లోలింకె సునిపారిలీసె, మొరిజిల్లాలింకె జీకిరి అయిలీసె, సువార్త పేదలింకు ప్రకటించిబోడిలీసె.

6 మో వినయంరె అబ్బంతరం నాపొడిలాట దన్యుడు.”

7 యోహాను సిస్యూనె జేతల్లాబెల్లె, యేసు యోహాను గురించి సెట్టె తల్లా మనమానె సంగరె యాకిరి కొతాలగివురో మొదలు దీసి, పొరోతో ప్రాంతంరె కిర దిగిమంచి బులి జేసా? బాకు పిట్టిగిల్లా గసాకు దిగిమంచి బులి జెల్లీసానా?

8 ఈనె కిర దిగిమంచి బులి జేసా? విలువైల కొన్నానె పిందిగిల్ల మనమకు దిగిమాబులి జేసానా? విలువైలా కొన్నానె పిందిగిల్లలింకె రొజా బవనాలై తాసె.

9 ఈనె, కిర దిగిమంచి బులి జేసా? ప్రవక్తకునా? తొమె దిగిలాట ప్రవక్త కన్నా గొప్పీట బులి మీ కొయిలించి.

10 తా గురించి యాకిరి రాసికిరి అచ్చి తో కన్నా అగరె మో సలాదికు పొడదూంచి, సెయ్యె తో కన్నా అగరె జేకిరి తో బట్టా సిద్ధం కొరుసి.

11 తిల్లంట్కు జొర్నెలాలింకె బిత్తరె బాప్టీసం దిల్లా యోహాను కన్నా గొప్పీట జొన్నన్నా నీబులి తొ సంగరె కచ్చితంగా కొయిలించి. ఈనన్నా పురువురో రాజ్యంరె తగ్గించిగిల్లాట యోహాను కన్నా గొప్పీట ఊసి.

12 బాప్టిసం దిల్లా యోహాను కలోనె దీకిరి, ఎత్తె జాంక పురువురో రాజ్యం బలవంతంగా ఆక్రమించిగిల్లీసె. ఈనె బలం తల్లాలికె సడ బిత్తురుకు అయిలీసె.

13 యోహాను కలోజాంక ప్రవక్తనె, మోసే దర్మసాస్త్రము పురువురో రాజ్యం గురించి కొయికుంటా అయినె.

14 తంకె కొయిలాట విస్వసించినె, యోహానుకు అయితల్లా ఏలీయా బులి తోముకు కొయికిరి అచ్చి.

15 సునితె కన్నోనె తల్లాలికె సునొండి.

16 ఉంచినె “ఏ తరంలింకు కిడసంగరె పొల్పిమంచి? తంకె సొంత నెయినై బొసికిరి గట్టిగా కొతానె లగ్గితల్లా పిల్లానె సంగరె సమానంగా అచ్చె.

17 ‘అమె పిల్లనగ్రోవి పుంకినన్నా; సాకిరాక తోమె నచ్చిలీనింతో, అమె విసాదమైలా గిత్తో గయినన్నా, తోమె దుక్కించిలానింతో.’

18 కిరుకుబుల్నే యోహాను కయికిరి, పీకిరి అయిలానీ. ఈనె సొబ్బిలింకె తాకు బుత్తో దరిగిచ్చి బులి కొయినె.

19 మనమరో పో కైకుంట, పీకుంటా అయినె. ఈనె సొబ్బిలింకె, ‘ఎయ్యె కద్దికారి, పీకారి ఈనె వన్నునె వొనూలు కొరిలాలింకు, పాపోనెకు జట్టుకారి’ బులి కొయినె. పురువురో జ్ఞానం సే పైటీనె వల్లరె తీర్పు పొందువో బులిసి.”

పురువుకు నానమ్మిలా పట్టనమూనె

(లూకా 10:13-15)

20 ఈనె బడే అద్బుతానె కొరినెను కుండె గానెరె మారుమనుసు పొందిలానింతె. ఈనె యేసు సడకు విమర్శించినె.

21 అయ్యో! కొరాజీనా! అయ్యో! బేత్సయిదా పట్టనమూనె! తోముకు బడే స్రమ. మియి తొం బిత్తరె కొరిలా అద్బుతానె తూరు, సీదోను గానై కొరికిరి తన్నే తంకె కెబ్బో పాపోనె సడిదీకిరి గోనిసంచి, పాసా మక్కిగీకిరి, మారుమనుసు పొందిగీకిరి తైతవ్వె.

22 ఈనె మియి కొయిలాట కిర బుల్నే తీర్పు కొయిలా దినోరె తూర్పు, సీదోను పట్టనమూనె మనమానె తొం కన్నా దయపొందిలా స్థితిరె తానె.

23 “ఈనె, ఓ కపెర్నహూము బుల్లా గా! తువ్వ మెగోకు ఉడిజెమ్మా బులిగిల్లునా? సాకిరి జరిగినీ! తువ్వ పాతాలలోకం బిత్తరె పొడిజెవ్వ. తో బిత్తరె కొరిలా మహాత్మాలు సాదోమ నగరంరె కొరికిరి తన్నే సడ ఉంచినె మిగిలికిరి రొయిత.

24 ఈనె మియి తోముకు కొయిలాట కిరబుల్నే తీర్పు కొయిలా దినో సాదోమ పట్నం కన్నా తోమె నాబరించిలా స్థితిరె తాసా.”

మో పక్కు అయిండి విస్తాంతి దూంచి

(లూకా 10:21,22)

25 సీ సమయంరె యేసు యాకిరి బులిసి, “బో” మెగోకు బూమికి ప్రబువైలా తొత్తె స్తుతించిలించి. కిరకుబుల్నే, తువ్వ సడకు తెలివిగిల్లాలింకు, తెలివిలింకె మరుగుకొరికిరి పామరులుకు తెలిసిలా పనికిరి కొరిసు.

26 వై బో! తువ్వ యాకిరి కొరువురో తొత్తె బడే ఇస్టం.

27 మో బో మెత్తె సొబ్బి అప్పగించినె. బోకు తప్ప పో గురించి కాకు తెలిసిని. పోకు తప్ప బో కేసా కాకు తెలిసిని. పో బచ్చిగిల్లాటకు సొబ్బి తెలియపర్చునీ.

28 బారం బొయిగీకిరి అలసిజిల్లాలింకల్లా మో పక్కరకు అయిండి. మియి తోముకు విస్తాంతి దూంచి.

29 మీ దిల్లా కాడికు బొయిగీకిరి, సడకు దిక్కిరి సుగ్గిండి. ఈనె మియి సాత్వికుడు, దీన మనుసు గల్లాట. సడకు తొం ఆత్మకు విస్తాంతి మిలుసి.

30 ఈనె మియి దిల్లా కాడికు బొయివురో సులువుగా, మియి దిల్లా బారం తేలిగ్గా తాసి.

12

విస్తాంతి దినో గురించి ప్రస్న

(మార్కు 2:23-28; లూకా 6:1-5)

1 గుట విస్తాంతి దినై యేసు, తా సిస్యనె సంగరె మిసికిరి బిల్లోనై సలికుంటా జెల్లీసి. తా సిస్యనె బొక్కో సంగరె రొల్లందరె ఎన్నూనె చిండిగీకిరి కయివురో మొదలు కొరిసె.

2 పరిసయ్యనె ఎడ దిక్కిరి యేసు సంగరె, దిగూ “విస్తాంతి దినోరె తో సిస్యనె నాకొరివలిసిలాపైటీ కొరిలీసె” బులి పొచ్చురిసె.

3 సెత్తెలె యేసు తంకసంగరె యాకిరి కొయిసి. దావీదుకు తా అనుచరూనెకు బొక్కిలాబెల్లె కిరకొరిసో తొముకు తెలిసినీనా?

4 సెయ్యె పురువురో మందిరముకు జేకిరి యాజకులాక తప్ప సెయ్యెన్నా తా సంగరె తల్లాలింకైనన్నా నాకైవలిసిలాంచ పురువుకు అర్పించిలా సముకపు రొట్టినె సెయ్యె తా అనుచరూనె కైసె.

5 సెత్తాకనీ, గుడిరో యాజకూనె విస్తాంతి దినె పైటి కొరిసేబుల్లా వియం దర్మసాస్త్రంరె అచ్చి. సడ తంకె సాకిరి కొరికిరి దర్మసాస్త్రంకు తప్పిజిల్లినె ఈనన్నా తూ తంకు తప్పు నాదర్నే తప్పాకనీనా. బులి దర్మసాస్త్రంరె రాసికిరి అచ్చినీనా?

6 మియి కొయిలాట కిరబుల్నే మందిరం కన్నా గొప్పుమనమా ఎట్టె అచ్చి.

7 ఈనె మీ కనికరముకాక కోరిలింబి గాని బలి కోరిలాట నీ బుల్లా వాక్యంరె అర్దం తొముకు తెలిసికిరి తన్నే తొమె నిర్దోసునెకు తీర్పు తీర్చినారో.

8 ఈనె “విస్తాంతి దినోకు మనమరో పో ప్రబువు ఈకిరి అచ్చి” బులి కొయిసి.

అత్తో పొడిజిల్లా మనమకు బొలికొరువురో

(మార్కు 3:1-6; లూకా 6:6-11)

9 ఈనె సెయ్యె సెట్టెతీకిరి బయలుదేరికిరి యూదునెరె ఆరాదన చోటుకు జేసి.

10 సెట్టె అత్తో పొడిజిల్లా మనమ జొనె అచ్చి. తంకె యేసు ఉంపరె తప్ప మోపుమాసి బులి ఎదురుదిగితల్లా పరిసయ్యునె, తాకు, “విస్తాంతి దినోరె బొలికొరువురో న్యాయమాకనా?” బులి తాకు పొచ్చురిసె.

11 సడకు యేసు, “తొ బిత్తరె కే మనమకైనన్నా, గుట్ గొర్రితన్నే సడ విస్తాంతి దినోరె గత్తోరె పొడిజిన్నే సడకు దరిగీకిరి తొమె ఉంపురుకు జింకినింతోనా?”

12 ఈనె మనమ గొర్రికన్నా బడె రెట్లనె విలువైలాట నీనా? సడకు విస్తాంతి దినోరె బొలికొరువురో దర్మమాకనీనా” బులి కొయిసి.

13 సాకిరి సే అత్తో పొడిజిల్లా మనమ దీకిరి, “తో అత్తో చాపు బులిసి.”

సెయ్యె అత్తో సాపిసి. అత్తో పుర్తిగా బొలైజికిరి దీటో అత్తో పనికిరి ఈసి.

14 ఈనె పరిసయ్యునె దోరకు జేకిరి, యేసుకు మొరదీతె పన్నాగం పన్నిసె.

పురువు బచ్చిగిల్లా సేవకుడు

15 ఈనె యేసు సే సంగతి తెలిసిగీకిరి సెట్టిదీకిరి బాజేసి. బడెలింకె పురువు పొచ్చాడె జేసె. పురువు జబ్బూనె దీకిరి రొల్లలింకల్లా బొలికొరిసి.

16 సెయ్యె తా గురించి కాకు కొయితెనా బులి తంకు ఆజ్ఞాపించిసి.

17 యెసయా ప్రవక్త సంగరె పురువు కొయిలా యే కొతానె సొత్తయిలాపనికిరి యే విదంగా జరిగిసి,

18 సెయ్యె మో సేవకుడు! తాకు మీ బచ్చిగించి.

తా ఉంపరె మెత్తె యిస్టమచ్చి సెయ్యె మో ఆత్మకు బడె ఆనందం కలిగించిసి.

మో ఆత్మ తా ఉంపరకు అయిపించుంచి.

సెయ్యె యూదునె నీలాలింకు న్యాయం కొరిపారి బులిసి.

19 సెయ్యె కొలి లగినీ, కేకానె పొగినీ,

సెయ్యె తా దొందరానె కాకు సుందిన్నీ.

20 న్యాయం కొరిలా జాంక నలిగిజిల్లా రెల్లుకు సెయ్యె బంగిని.

సుగిజితల్లా బొత్తి సెయ్యె సుగిదిన్నీ.

21 తా నారె యూదునె నీలాలింకు నిరీక్కున కలుగుసి.

యేసు, బయెల్లెబూలు

(మార్కు 3:20-30; లూకా 11:14-23)

22 సే తరవాతరె కుండెలింకె, బుత్తో దరిలా గుడ్డి మోపాకు, కొతానె నాఅయికుంటతల్లా జొనెకు యేసు పక్కరకు డక్కిగీకిరి అయిసె. యేసు తాకు బొలికొరిసి. సే కొతానె నాఅయిల మోపాకు కొతా, అంకీనె అయిసె.

23 మనమానల్లా యెడ దిక్కిరి ఆచ్చుర్యపొడికిరి “ఎయ్యె దావీదు పో ఈకిరి తాసి” బులిసె.

24 పరిసయ్యునె యెడ నునుకిరి, “బుత్తోనె అదికారి బయెల్లెబూలు సహాయం దీకిరి ఎయ్యె బుత్తోనుకు సొడిపించిలీసి” బులిసె.

25 తంకె ఆలోచనానె యేసుకు బుజ్జికిరి. తంకు సంగరె యాకిరి కొయిసి. తాకు సెయ్యొక, విరోదంగా తల్లా రాజ్యం నసించిజెవ్వో. తాకు విరోదంగా తల్లా కే పట్ను ఈనన్నా, గొరొ ఈనన్నా కూలిజోసి.

26 సాతాను సాతానుకు గొడ్డదిన్నె సెయ్యె టారినారి. సెల్లె తా రాజ్యం క్యాకిరి టారుసి?

27 మియి బయెల్లెబూలు దీకిరి బుత్తోనుకు సొడిపించినె తొలింకె కావల్లరె సొడిపించిలీసే? ఈనె తంకాక తొముకు తీర్పు తీర్పుసె.

28 బయెల్లెబూలునీ ఈనె మియి పురువురో ఆత్మ దీకిరి బుత్తోనుకు పొడిదిన్నె పురువురో రాజ్యం తొముకు అయిలాపనాక!

29 సాకిరాక అగరె బలం తల్లా మనమకు నాబందికుంటా తా గొరొబిత్తరకు జేకిరి తా వస్తుమానె కేసే చొరినారె. సే బలం తల్లా మనమకు బందిలా తరవాతరాక గొరొకు చొరిపారె.

30 మో సంగరె నాతల్లా మనమ మెత్తె విరోదంగా తాసి. మో సంగరె మిసికిరి నాతల్లా మనమ చెదిరిజోసి.

31 సడకు మీ కొయిలాట కిరబుల్నే మనమ కొరిలా పాపోనె సొబ్బిటికు, దేవదూసనకు పురువు క్షమించుసి. ఈనె పురువురో ఆత్మకు వ్యతిరేకమైలా దూసనకు క్షమాపన మిల్చి.

32 మనమరో పోకు దూసించికిరి కొతలగిలాలింకు పురువు క్షమించుసి. ఈనె పవిత్రాత్మకు దూసించికిరి కొతలగిలాలింకు ఉంచినె యింకెబ్బుకూ క్షమించిని.

గుట గొచ్చొ సడరో పొగలానె

(లూకా 6:43-45)

33 “తొముకు బొల్ల పొగలానె కావాలబులిగిన్నె, గొచ్చుకు బొల్లెకిరి కొరుమంచి. తో గొచ్చొ బొల్ల నీసే సడకు బొల్ల పొగలానె కాసిని. గొచ్చొకు సడరో పొగలానె వల్లరె గుర్తించిమాసి.

34 తొమె సప్పొపనాలింకె. దుష్టులు బొల్ల కొతానె క్యాకిరి కొయిపారొ. హూదయం బిత్తరె రొల్లాటాక తుండొ కొతాలగుసి.

35 బొల్ల మనమరె బొల్ల తాసి. సాకిరాక తా బిత్తరె దీకిరి బొల్ల బయలుకు ఆసి. దుష్టుడురె చెడు తాసి గనక తా దీకిరి చెడు బయలుకు ఆసి.

36 ఈనె మియ్యి కొయిలాట కిరబుల్నే మనమానె పలికిలా సొబ్బి వ్యర్థమైలా కొతకు తీర్పు కొయిల దినొ లెక్క కొయివురో ఊసి.

37 కిరుకుబుల్నే తో కొతానె వల్లరాక తొమె నిరపరాదులువొ, అపరాదులువొ తీర్పు పొందును” బులి కొయిసి.

అద్భుతం కోసం మగువురో

(మార్కు 8:11,12; లూకా 11:29-32)

38 సే తరవాతరె కుండిలింకె సాస్తీనె, పరిసయ్యునె తా సంగరె, “బోదకా! తువ్వు గుట అద్భుత కార్యము కొరిమంచి బులి పొచ్చిరిసె.”

39 ఈనె ఉంచినె దుష్టులు, పురువుకు నా జనిలాలింకె తాకు అద్భుతం కొరుబులి పొచ్చిరిసె. యోనా ప్రవక్త కోసం దిగదిల్లా అద్భుతం తప్ప యింకా కే అద్భుతం తొముకు దిగదిన్నె బులిసి.

40 కిరుకుబుల్నే, యోనా బొట్ట మచ్చొ పెట్టారె తింట రత్తి దూసునె గడిపిసి. సాకిరాక మనమరో పో తింట రత్తి దూసునె బూగర్బంరె తాసి.

41 నీనెవె మనమానె యోనా కొయిలా చాటింపు సునికిరి మనుసు మార్చిగిచ్చె గనక తీర్పు కొయితల్లా దినె తంకె ఏ తరంలింకు సంగరె సహా టారికిరి ఏ తరంలింకె నేరస్తులుబులి నిర్నయించిసి. గాని ఉంచినె యోనా కన్నా గొప్పమనమ ఎట్టె అచ్చి.

42 దక్కిన దిక్కురె తల్లా సీబా దెసో రాని సొలోమోను జ్ఞానముకు దిగిమంచి బులికిరి బడే దూరు దీకిరి అయిసి. ఈనె తీర్పు కొయిల దినొ సెయ్యె పొదరెలింకె వుంపరె నేరం మోపిలీసి. ఈనె ఉంచినె సొలోమోను కన్నా బొట్ట మనమ ఎట్టె అచ్చి.

అపవిత్రాత్మ బుల్లికిరి అయివురో

(లూకా 11:24-26)

43 “అపవిత్రాత్మ జొనె మనమకు సడికిరి బాజెల్లా తరవాతరె సడ విస్త్రాంతి కోసం కుజ్జిగికుంటా పనినీలాచోటురె బుల్లిలీసి. ఈనె సడకు విస్త్రాంతి మిల్లాని.

44 సెల్లె 'మియి సడికిరి బారైలా మో గొరుకు యింకా బుల్లికిరి జోంచి' బులి కొయిగిచ్చి. సడ బుల్లికిరి అయికిరి, సే గొరై కేసే నీవురో సొబ్బి జడికిరి తల్లాట దిగిసి.

45 సెల్లె సడ జేకిరి తాకన్నా, దుష్టులైలా సత్ర బుత్తోనుకు డక్కిగీకిరి అయిలీసి. సొబ్బి మిసికిరి సే గొరొబిత్తరకు జేకిరి రొయితె అయిసి. సెల్లె సే మనమ గతి అగరెకన్నా బడే అద్దానంగా తాసి. ఏ నాబొత్తైలా తరంలింకు సాకిరాక తాసి" బులి కొయిసి.

యేసురో మా, అన్నబయినె

(మార్కు 3:31-35; లూకా 8:19-21)

46 యేసు మనమానె సంగరె యింకా కొతలక్కుంటా అచ్చి. సెల్లె తంక మా, అన్నబయినె తా సంగరె కొతలగిమంచి బులి అయికిరి బయిలై టారిసె.

47 జోనె మనమ యేసు సంగరె, తో మా, అన్నబయినె తో సంగరె కొతలగిమంచి బులి బయిలై టారికిరి అచ్చె! బులి కొయిసి.

48 యేసు సమాదానం కొయికుంటా, "కేసె మో మా? కేసె మో అన్నబయినె?" బులి కొయిసి.

49 తా సిస్యూనె ఆడుకు దిగిదీకుంటా, "ఇదిగో మో మా, ఇదిగో మో అన్నబయినె బులి కొయిసి.

50 కేసె పరలోకంరె తల్లా మో బోరో ఇస్టంరె సలివేయో సెయ్యక, మో మా సెయ్యక మో అన్నబయి మో అప్పబొయిసి" బులి కొయిసి.

13

విత్తనాలు జల్లిలాటరో ఉపమానం

(మార్కు 4:1-9; లూకా 8:4-8)

1 సే దినె యేసు గొరో దీకిరి జేకిరి సోంద్రో ఒడ్డురె బోసికిరి అచ్చి.

2 తాచుట్టూ బడే మనమానె గుంపు కూడికిరి అచ్చె. సడకు సెయ్యె బోదకొరితె పడవ ఉటికిరి బోసిరిసి. మనమానె సోంద్రో ఒడ్డురె టారికిరి అచ్చె.

3 సెయ్యె తంక బడే విసయోనె ఉపమానాలు పనికిరి బోదించిసి.

జోనె రైతు విత్తనాలు జల్లితె జేసి.

4 సెయ్యె విత్తనాలు జల్లిలాటైలై కుండె విత్తనాలు బట్టో పక్కరె పొడిసె. పక్కినె అయికిరి సడకు కైపిసె.

5 ఈనె కుండె విత్తనాలు మట్టి బూతునీలా పొత్తో బూమి ఉంపరె పొడిసె. సెట్టె మట్టి నీలందరె సెరోనె బిత్తురుకు నాటిలానీ.

6 ఈనె సూర్యోదయం యీలా తరవతరె సే మొక్కానె వాడిజిసె. సడ సెరోనె నాబొడిలందరె ఎంట్టాక సుక్కిజేసి.

7 ఈనె కుండె విత్తనాలు కొంటానె తుప్పానె మొజిరె పొడిసె. యే కొంటానె తుప్పానె బొడికిరి మొలకలుకు అనిసిపేసె.

8 ఈనె కుండె విత్తనాలు సారవంతమైలా మట్టి ఉంపరె పొడిసె. సడబిత్తరె కుండె సోయి వొంతానె పచ్చిసి, కుండె అరవై వొంతానె పచ్చిసి, కుండె ముప్పై వొంతానె పచ్చిసి.

9 సునితె కన్నోనె తల్లాలికె సునుసె! యేసు బోద కొరితె ఉపమానాలు ఉపయోగించిసి.

ఉపమానంరో అర్థం

(మార్కు 4:10-12; లూకా 8:9,10)

10 సిస్యూనె అయికిరి యేసుకు, "తువ్వు మనమానె సంగరె ఉపమానాలు ఉపయోగించికిరి కిరుకు కొతలగిలీను?" బులి పొచ్చరిసె.

11 సెయ్యె యాకిరి సమాదానం కొయిసి, పురువు రాజ్యంరొ రహస్యంకు తెలిసిగిల్లా జ్ఞానం తోముకు దీసి. ఈనె తంకు దిల్లాని.

12 ఈనె కాకు బూతు దీసో తాకు ఇంకా బూతు దూసి. నీలాలికె పక్కరె దీకిరి తల్లాటంకా కడిగునుసి.

13 మియి తంకె సంగరె ఉపమానాలు దీకిరి కిరుకు కొతాలగిలించి బుల్లై, తంకె దిగిలాలికె పనికిరి అచ్చెగాని దిగినింతె. సునిలా పనికిరి తానె గని అర్థం కొరిగిన్నింతె, గ్రహించినింతె.

14 సాకిరాక యెసయా ప్రవక్త యంకోసం కొయిలా ప్రవచనం కొతానె సొత్తాక ఊసి, అంకె తప్పకుంటా సునుసె, ఈనె అర్థం కొరిగిన్నింతె.

తంకె తప్పక దిగుసె ఈనె గ్రహించినింతె.

15 తంకె అంకీనెదీకిరి దిక్కిరి, కన్నోనెదీకిరి సునికిరి,
 హ్రుదయం సంగరె అర్థం కొరిగీకిరి మో ఆడుకు
 బుల్లినె మియి తంకు బోలుకొరిమి.

ఈనె సాకిరి జరిగినాసి బులి యే మనమానె
 హ్రుదయమునె కటిసము యాలందరె తంకు

బొల్లకిరి సుందిన్నీ తంకు తంకె అంకీనె బుజ్జిగిచ్చె.

16 ఈనె తొం అంకీనె దిగిపారిలీసె సడానె దన్యమైలాంచ. తొం కన్నోనె సునుపార్లీసె సడానె దన్యమైలాంచ.

17 ఎడ సొత్తాక కొయిలించి. కుండెలింకె ప్రవక్తానె, నీతిమంతునె తొమె దిగిలాంచ దిగిమంచిబులికిరి ఆసపొడిసె. ఈనె దిగినారినె. తొమె సునిలాంచ సునిమ బులికిరి ఆసపొడిసె. ఈనె సున్నారినె.

యేసు విత్తనాలు జల్లీలా ఉపమానం గురించి వివరించువరొ
(మార్కు 4:13-20; లూకా 8:11-15)

18 ఈనె విత్తనాలు జల్లీలా రైతు ఉపమానం కోసం బోదించిలీసి.

19 కుండెలింకె పురువురొ రాజ్యం కోసం సునిసె. ఈనె అర్థం కొరిగిన్నింతె. సాట హ్రుదయం బిత్తరె నాటిజెల్లా దైవ సందేసంకు దుస్టుడు అయికిరి దరిగీకిరి బాజీసి. యంకు బట్టో పొక్కరె పొడిలా విత్తోనె సంగరె పొల్పుగివొచ్చు.

20 దైవ సందేసంకు సునికిరి ఎంట్లాక ఆనందం సంగరె అంగీకరించుసె. పొత్తో మట్టి ఉంపరె పొడిలా విత్తోనె సంగరె పొల్పుగివొచ్చు.

21 సడ సెరోనె బిత్తరకు నాజెవురొ వల్లరె సందేసం కెత్తోకలో జీని కొస్టోనె కాని హింసానె కాని అయిలబెల్లె తంకె ఎంట్లాక సడకు సడిదిపీవె.

22 దైవ సందేసముకు సునికిరి జీవితంకె కొస్టానుకు, పలియ వల్లరె కలిగిలా మోసంకు నిస్సహాయులైజీకిరి యింకెబ్బుకూ, తంకు కొటానె మొక్కలరె పొడిలా విత్తనాలు సంగరె పొల్పుగివొచ్చు.

23 ఈనె దైవ సందేసముకు సునికిరి సడకు అర్థం కొరిగిల్లాలింకు బొల్లబూమిరె పొడిలా విత్తనాలు సంగరె పొల్పుగివొచ్చు. తాండ్రె కుండె సోయి వొంతూనె పలించివె, కుండె అరవై వొంతూనె పనికిరి కుండెలింకె ముప్పై వొంతూనె పలించుసె.

కలుపు మొక్కానెరొ ఉపమానం

24 యేసు తంకు యింగుటె ఉపమానం కొయిసి, పురువురొ రాజ్యంకు బొల్ల విత్తోనె బిల్లొరె నాటిల మనమ సంగరె పొల్పుగివొచ్చు.

25 ఈనె గుటె రత్తిరె తావుంపరె నాపొడిలాలింకె అయికిరి గోదుము విత్తనాలు మొజిరె కలుపు విత్తోనె జల్లీపీకిరి బాజీసె.

26 గోదుములు బొడిలాబెల్లె సడసంగరె పాటు గసా మొక్కానె కూడా దిగదీసి.

27 సెల్లె పైటిలింకె, తంకె బొడొమనమానె పక్కు. అయికిరి బో! తో బిల్లొరె బొల్ల విత్తోనె నాటిసునీనా; ఈనె కలుపు మొక్కానె క్యాకిరి బొడిసె? బులి పొచ్చరిసె.

28 యెడ నాపొడిలాలింకె కొరిలా పైటి బులి సే యజమాని సమాదానం కొయిసి. అమె జేకిరి సడకు జింకికిరి పొదిమొగనా బులి పొచ్చరిసె.

29 సడకు సెయ్యె నా! ఉంచినె తొమె కలుపు మొక్కానె కడినె గోదుమ మొక్కానె కూడా జింకిపొక్కదిల్లా అవకాసం అచ్చి.

30 ఈనె కట్టిలాకలో అయిలా జాంక దీటాకూడా బొడిమురొండి. సెల్లె మియి కట్టిలాలింకె సంగరె, అగరె కలుపు మొక్కానె కట్టికిరి, పుడ్డిపీతె సడకు బిడ్డానె పని బందండి. నీ తర్వాతరె గోదుమ గింజలుకు పొగుకొరికిరి మో దన్నొకొట్టురె రొయిదేండి బులి కట్టిలాలింకె సంగరె కొయిమి బులి కొయిసి.

ఆవగింజరొ ఉపమానం
(మార్కు 4:30-32; లూకా 13:18,19)

31 సెయ్యె తంకు యింగుటె ఉపమానం కొయిసి, పురువు రాజ్యంకు గుటె ఆవగింజ సంగరె పొల్పుగివొచ్చు. జొనె మనమ గుటె ఆవగింజ విత్తో తా తొటరె నాటిసి.

32 సడ విత్తోనె సొబ్బిటికన్న సన్నీట, బొడిలాబెల్లె మొక్కానె సొబ్బిటికన్న బొట్టగా బొడికిరి గుటె గొచ్చొవూసి. పక్కినె సే కొమ్మానె ఉంపరె గూడినె బందిగివ్వె.

పులిసిలా పిండిరో ఉపమానం
(లూకా 13:20,21)

33 యేసు తంకు యింగుట ఉపమానం కొయిసి, “పురువు రాజ్యం పులిసిజెల్లా పిండిపనాట. జొనె మొట్ట పులిసిలాట కుండెపిండి కడిగికిరి బడే పిండిరె మిసిలాబెల్లె నే పిండల్లా పుల్లగా యీజేసి.”

యేసు ఉపమానాలు ఉపయోగం
(మార్కు 4:33,34)

34 యేసు మనమానెకు సొబ్బి సంగతినె ఉపమానాలు సంగరాక కొయిసి. ఉపమానం నీకుంటా తంకు కిచ్చి కొయిలాని.

35 నడకు ప్రవక్త సంగరె సెయ్యె కొయిల కొతానె సొత్తాక ఊసి,
“మియి ఉపమానాలు సంగరె కొతాలక్కిరి,
లోకొ ఆరంబంతీకిరి నుచ్చిలా సొబ్బి కొయించి.

కలుపు మొక్కానెరో ఉపమానం అర్థం కొయివురో

36 సె తరవాతరె సెయ్యె మనమానుకు నడదీకిరి గొరొబిత్తరకు జేసి. సెయ్యె సిస్యనె అయికిరి తా బిల్లొరె కలుపు మొక్కానె ఉపమానం గురించి అముకు వివరంగా కోడి” బులి పొచ్చురిసె.

37 యేసు యాకిరి సమాదానం కొయిసి, బొల్ల విత్తోనె నాటితల్లా మోపో మనమరో పో.

38 ఏ లొకొ బిల్లొ సంగరె పొల్చిసి. బొల్ల విత్తోనె పురువు రాజ్యంరె తల్లా మనమానెదీకిరి పొల్చువురో ఈసి. బిల్లొరె కలుపు మొక్కానె దుస్టుడు సంబందూనె సంగరె పొల్చుసి.

39 నడకు నాటిల సత్తువు సాతాను సంగరె పొల్చిసె. కట్టిలాకలో యుగాంతం సంగరె పొల్చిసె. కట్టిలాలికె దేవదూతనె సంగరె పొల్చువురో ఈసి.

40 కలుపు మొక్కానెకు జింకిపీకిరి నియ్యరె పొక్కిరి పుడ్డిలాపనికిరాక యుగాంతంరె కూడా సాకిరాక ఊసి.

41 మనమరో పో తా దూతానెకు పొడిదీకిరి, తా రాజ్యంరె తల్లా పాపోనెకు, సెడ్డపైటీనె కొరిపించిలాలింకు పోగు కొరుసి. సాకిరి పొగుకొరికిరి

42 తంకు నియ్యగుండంరె పోదూసె. సెట్టె తంకె కందికుంట దంతోనె కముడుకుంటా బాద అనుబవించుసె.

43 సే తరవాతరె నీతిమంతునె తంకె బోరో రాజ్యంరె నూర్యుడు పనికిరి ప్రకాసించుసె. కన్నోనె రొయికిరి సున్లాలికె అర్థం కొరుగుచ్చె.

నుచ్చిగిల్లా పలియా కోసం ఉపమానం

44 పురువు రాజ్యం బిల్లొరె నుచ్చిదిల్లా నిది పనాట. గుటె మనమ సే నిదికి కనిగిచ్చి. ఈనె వెంట్రాక నడకు నుచ్చిదీసి. సే తరవాతరె ఆనందంగా జేకిరి తా పక్కరె రొల్లొంచ సొబ్బి బిక్కిపేకిరి సే బిల్లొకు గినిసి.

ముచ్చాలు గురించి ఉపమానం

45 పురువురో రాజ్యం బొల్ల ముచ్చాలు గురించి కుజ్జిల మనమ పనికిరి అచ్చి.

46 జొనె బిక్కిగిల్లాట బొల్ల విలువైలా గుట్టె ముత్యం కనిగిసి. సె తరవాతరె జేకిరి తా పక్కరె రొల్లాటల్లా బిక్కిపేకిరి నడకు గినిసి.

వల కోసం ఉపమానం

47 ఈనె “పురువురో రాజ్యం సోంద్రొ బిత్తరె పొక్కిరి సొబ్బి రకాలు మచ్చొనె దరిలా గుటె వలకు పోలికిరి అచ్చి.

48 వల మచ్చొనెదీకిరి పూరిజెల్లాబెల్లె మచ్చురిలింకె నడకు ఒడ్డుకు జింకికిరి బొల్ల మచ్చొనుకు బుట్టిరె పొక్కిరి నాపైటికైయిలా మచ్చొనుకు బిసురుదూసె.

49 సాకిరాక యుగాంతంరంకా దేవదూతనె అయికిరి బొల్లలింకె దీకిరి చెడ్డలింకు వేరుకొరుసి.

50 ఈనె నానుగిజిల్లా నియ్యగుండమురె పోదుసే. తంకె దుక్కొపొడుసె, బాదకు అనుబవించుసె, దంతోనె కముడుసె.”

నో సత్యం ఇంకా పుర్న సత్యం

51 “తోముకు సే సొబ్బి అర్థమైసినా?”

బులి యేసు పొచ్చురిసి. తంకె వై బులిసె.

52 నడుకు సెయ్యె తంకసంగరె, “పురువురో రాజ్యం గురించి ఉపదేసం పొందిలా ప్రతీ దర్మసాస్త్ర పండితుడు తా కజానా తీకిరి జొనెమోపా పుర్నాంచకు, నోంచకు పొదురుకు దన్నెలా గొరొయజమాని పనికిరి అచ్చి” బులిసి.

యేసుకు నజరేతురే తునికరించువురో
(మార్కు 6:1-6; లూకా 4:16-30)

53 యేసు ఏ ఉపమానాలు కొయిలా తరవాతరే, సే చోటు సడికిరి బాజేసి.

54 సెయ్యె తా సొంత గాకు అయిసి. సెట్టె యూదునెరో ఆరాదన చోటురే బోదించువురో మొదలు దీసి. తంకె సే బోదానె సునికిరి బడె ఆచ్చర్యపొడికిరి, యే జ్ఞానం, యే అద్భుతానె యెడల్లా యాకు కేటదీకిరి అయినె?

55 యెయ్యె వడ్రంగిరో పో నీనా? తా మారో నా మరియు నీనా? తా అన్నబయినె యాకోబు, యోసేపు, సీమోను, యూదా నీనా?

56 తా అప్పబోయినీనె సొబ్బిలింకె అంసంగరె తల్లీనె నీనా? ఈనె యాకు యెడానల్లా కేటతీకిరి అయినె? బులి కొయిగిచ్చె.

57 సాకిరి కొయిగీకిరి తాకు త్రునీకరించినె. సెల్లె యేసు తంకసంగరె, “కొయికుంటా, ప్రవక్తకు తా దెసారె తా గొర్రె తప్ప సొబ్బిలింకె గొరవింతునె” బులి కొయిసి.

58 తాకు తంకె విన్నసించిలానింతె గనక సెయ్యె సెట్టె బడె అద్భుతానె కొరిలాని.

14

బాప్టీసందిల్లా యోహానురో మొర్నొ
(మార్కు 6:14-29; లూకా 9:7-9)

1 సే కల్రె గలిలయకు అదికారియాలా హేరోదు యేసు గురించి సునిసి.

2 సెయ్యె తా అదికారినె సంగరె, “సెయ్యె బాప్టీసం దిల్లా యోహాను మొర్నొ దీకిరి జీకిరి అయిసిబులి మో నమ్మకం. కాబట్టి అద్భుతానె కొరిలా సక్తి తా బిత్తరాక అచ్చి” బులి తా సేవకునెకు కొయిసి.

3 సాకిరి కిరుకు బులిసి బుల్తే కుండెకలోనె అగరె హేరోదు యోహానుకు బందించికిరి చెరసాలరె పొగిపించిపీసి. యాకిరి జరిగితే కారనం హేరోదియ. ఎయ్యె హేరోదు బయిలా పిలిప్పుకు నెయిపో.

4 యోహాను హేరోదుదీకిరి, “తూ హేరోదియా సంగరె మిసికిరి రొపురో న్యాయంని!” బులి పొచ్చిరిసి.

5 యే కారనంగా హేరోదు యోహానుకు మొరదమ్మించిబులిగిచ్చి. ఈనె మనమానె యోహానుకు జొనె ప్రవక్తగా దిగిలీసె కాబట్టి హేరోదు తంకు దిక్కిరి డొరిజేసి.

6 హేరోదు జొర్నెలా దినె పొరువొ జరిగిసి. సేదినె హేరోదియ జో సబరె నచ్చికిరి హేరోదుకు మెప్పించిసి.

7 సడకు సెయ్యె తా జోకు మగిలాట దూంచిబులికిరి కొతా దీసి.

8 సెయ్యె తా మా ప్రొత్సాహం వల్లరె, “బాప్టీసం దిల్లా యోహాను ముండొకు గుటె పల్లెంరె లోక్కిరి మెత్తెదేండి” బులి మగిసి.

9 యెడ సునికిరి రొజాకు బాద కలిగిసి. ఈనె అతిదులు అగరె కొతా దిల్లందరె, తా కోరిక తీర్చు బులి ఆజ్ఞాపించిసి.

10 ఎంట్లాక బటులుకు పొడిదీకిరి చెరసాలరెతల్లా యోహాను ముండొ అనిపించిపీసి.

11 జొనె బటుడు యోహాను ముండొకు గుటె పల్లెంరె దరిగీకిరి అయికిరి తాకు దీసి. సెయ్యె సడకు తా మా పక్కు దరిగీజేసి.

12 యోహాను సిస్యునె అయికిరి తా దేకు దరిగిజేకిరి సమాది కొరిసె. సే తరవాతరె జేకిరి యేసు సంగరె కొయిసె.

పాట వెయ్యిలింకు బంటదిప్పురో
(మార్కు 6:30-44; లూకా 9:10-17; యోహాను 6:1-14)

13 సెల్లె యోహానుకు జరిగిలా సంగతి సునికిరి యేసు జొన్నాక పడవ ఉటికిరి కేసేనీలా చోటుకు జేసి. సెయ్యె జెల్లాట పట్నాలైతల్లాలింకల్లా సునికిరి మనమనె గుంపునె గుంపునెగా గానైతీకిరి అయికిరి సలికుంటా తా పొచ్చాడెజేసి.

14 యేసు పడవరెతీకిరి వొల్లికిరి మనమానె గుంపునె గుంపునెగా సెట్టె రొప్పురో దిగిసి. తంకంపరె సెయ్యె జాలిపొడిసి. తంకె బిత్తరె జబ్బానెదీకిరి తల్లాలింకు సెయ్యె బొలికొరిసి.

15 సొంజయిలాబెల్లె సిస్యునె తా పక్కు అయికిరి, “యే చోటు బొనొరె అచ్చి, ఈనె ఉంచునుకు బడెసొంజైజేసి. అంకు పొడదీపెండి. గానెబిత్తరకు జేకిరి కిరైనా కద్ది గినిగీకిరి కానె” బులిసె.

16 యేసు, “తంకె జేతె అవనరంని. కైతె తొమె కిరైనా దేండి.” బులి తంకె సంగరె కొయిసి.

17 “అం పక్కురె పాట రొట్టినె, దీట మచ్చోనె మాత్రమాక అచ్చి” బులి తంకె సంగరె సమాదానం కొయిసె.

18 “సడకు ఎట్టికి దరిగీరి అయిండి” బులి యేసు కొయిసి.

- 19 సే తరవాతరె మనమానె సెట్టెరొల్ల గసా బయల్లరె బోసాండిబులి కొయిసి. సే పాట రొట్టినె, దీట మచ్చినె దరిగికిరి మెగో ఆడుకు దిక్కిరి పురువుకు స్తోత్రం కొయిసి. సే రొట్టినె బంగికిరి తా సిస్యూనెకు దీసి. సిస్యూనె మనమానుకు బంటదీసె.
- 20 సాబ్బిలింకె పెట్టోపూరు కయిసె. సే తరవాత సిస్యూనె మిగిల్లా ముక్కలుకు పన్నెండు బుట్టినెపూరు పూరిదీసె.
- 21 మొట్టానె, పిల్లనె నీకిరి ఇంచుమించు పాటవెయ్యి మంది జాంక వొండ్రపోనె సే దినె సెట్టె కద్దినె కయిసె.

యేసు పనంపరె సలివురో

(మార్కు 6:45-52; యోహాను 6:15-21)

- 22 సే తర్వాతరె యేసు తా సిస్యూనె సంగరె పడవ ఉటికిరి మోకన్నా అగరె తెనాడె ఒడ్డుకు జాబులి కొయిసి. సెయ్యె సెట్టె రొయికిరి మనమానుకు పొడిదిపీసి.
- 23 మనమానుకు పొడదిల్లాతర్వాతరె యేసు జొన్నాక ప్రార్థనకొరితె పొరొతో ఉంపరకు జేసి. సాంజయిసి ఈనె సెయ్యె జొన్నాక సెట్టె రొయిజేసి.
- 24 ఒడ్డుకు పడవ బడె దూరె అచ్చి. ఎదురు బా పొగిలందరె కెరటాలు సే పడవకు మరిలీసె.
- 25 సొక్కలెపైలా జామురె తింట తీకిరి సొగంటబెల్లె యేసు సొంద్రొ ఉంపరె సలికిరి సిస్యూనె పక్కు జేసి.
- 26 సెయ్యె సొంద్రొఉంపరె సలివురో దిక్కిరి సిస్యూనె, బుత్తో బులి కొయిగికిరి డొరిజేకిరి బొట్టానె దొందరానె దొందిరిసె.
- 27 యేసు ఎంట్రాక, “మియ్యోక! దైర్యంగా తాడి! డొరితెనాండి!” బులి కొయిసి.
- 28 పేతురు, “ప్రబూ తువ్వయినె, సొంద్రొఉంపరె సలిను. మియ్యోకా సొంద్రొ ఉంపరె సలితందుకు అనుమతిదే! బులి కొయిసి.
- 29 పేతురు ఆయి బులి యేసు కొయిసి. సెల్లె పేతురు పడవ వొల్లికిరి పని ఉంపరె సలికిరి యేసు పక్కు జేసి.
- 30 ఈనె బా పొగివురో గమనించికిరి డొరికిరి పనిబిత్తరె బుడ్డిజీకుంటా, ప్రబూ, మెత్తె కాపాడు!” బులి దొందరిసి.
- 31 యేసు ఎంట్రాక తా అత్తో చాపికిరి తాకు దరిగికిరి, “అల్పవిస్వాసి, కైంకి నందేహించులీను?” బులి పొచ్చిరిసి.
- 32 తంకె పడవ ఉటిలా తరవాతరె బా తగ్గిజేసి.
- 33 పడవరెతల్లాలింకె యేసుకు మొక్కికిరి, “తువ్వ సొత్తాక పురువురో పో!” బులి ఆచ్చర్యపొడిసె.

గెన్నేసరెతురె రోగులుకు బొలికొరువురో

(మార్కు 6:53-56)

- 34 తంకె సొంద్రొ దాటికిరి గెన్నేసరెతు ఒడ్డుకు అయిసె.
- 35 సే గాలింకె యేసుకు గుర్తించికిరి చుట్టూ రొల్లా గానె రొల్లలింకల్లా కబురు కొయికిరి. మనమానె జబ్బులునెదీకిరి తల్లాలింకె తా పక్కు డక్కిపించిసె.
- 36 “తంకె తో కొన్నా అంచుకు ఈనెను నూగిపించు” బులి బతిమాలిగిచ్చె. తాకు నూగిల్లాలింకల్లా బొల్లెజేసి.

15

పూర్వీకులురో బోద

(మార్కు 7:1-13)

- 1 సెల్లె కుండెలింకె పరిసయ్యునె, సాస్తీనె యెరూసలేము దీకిరి అయికిరి యేసుకు పొచ్చిరిసె.
- 2 “తో సిస్యూనె కద్దికైలా అగరె అత్తోనె కిరుకు దొయిగినింతె? బొడిలింకె లొగిలా ఆచారమానె తంకె కిరుకు నిర్లక్యం కొరిలీసె?” బులి పొచ్చిరిసె.
- 3 సడకు యేసు యాకిరి సమాదానం కొయిసి, తొ ఆచారమానె కోసం పురువురో ఆజ్ఞానెకు కిరుకు యాకిరి నిర్లక్యం కొరిలీసె?
- 4 పురువు మా, బోకు గొరవించు బులిసి. సెత్తాకనీ మా, బోకు దూసించిలాలింకు మొర్నొసిక్కు పొగిమాసి బులి కొయిసి.
- 5 ఈనె జొనె తా బోకైనా మాకైనా సహాయం కొరితె దిల్లాట యెడ పురువురోబు బులి కొయికిరి బోదించిలీసె.
- 6 తొమె తొ పారంపర్యాచారము కోసం పురువురో కొతానుకు పొక్కరె దీపిలీసా. సడ వల్లరె తంకె మాబోనుకు గొరవించినార్లీసె.
- 7 తొమె మోసంకొర్లాలింకె. యెసయా తొ గురించి అగరె కొయిలాట సొత్తాకనీనా.
- 8 యే మనమానె మెత్తె కొతానె సంగరె గొరవించుసె. ఈనె తంకె మనుసూనె మెత్తె దూరుగా తాసి.

9 తంకె ఆదాదనలు వ్యర్థం!

తంకె బోదానె మనమానె కొరిలా ఆజ్ఞానె సంగరె సమానం బులి కొయిసి.

మనమకు అపవిత్రం కొరిలాంచ
(మార్కు 7:14-23)

10 సెల్లె యేసు మనమానుకు తా పక్కరకు అయిబులి డక్కికిరి తంకెదీకిరి, “సునికిరి అర్థం కొరిగిండి.

11 మనమ తుండోబిత్తరెకు జెల్లాట కిరనెను తాకు అపవిత్రం కొరిని. తా తుండోదీకిరి అయిల కొతానె తాకు అపవిత్రం కొరివో” బులి కొయిసి.

12 సే తరవాత సెయ్యె సిస్యనె అయికిరి, “తూ కొయిలాట సునికిరి పరిసయ్యనె రగోపాడిసె బులి తొత్తె తెలిసిసీనా?” బులి పొచ్చిరిసె.

13 యేసు, పరలోకంరె తల్లా మో “బో” నానాటిలా ప్రతి మొక్క సెరోనె సంగరె కడికిరి పొక్కదూసి.

14 తంకు జోలుకు జేతేనాండి. తంకె నాయికులు గుడ్డిలింకె. ఈనె తంకె పొదరలింకు బట్టో దిగదీకిరి రొసి. గుడ్డిమనమ గుడ్డిమనమకు బట్టో దిగదినే దీలింకె గత్తోరె పొడుసె బులిసి.

15 పేతురు, “సే ఉపమానంకు అముకు విడమరికిరి కోండి” బులి పొచ్చిరిసి.

16 యేసు తంకసంగరె యాకిరి కొయిసి. తోముకూడా అర్థం యిలాసీనా? పొదర్లింకన్నా తెలివినీలాలింకెపనికి అచ్చో.

17 కిరెనన్నా తుండో బిత్తరుకు జెల్లాట పెట్టోబిత్తరుకు జేకిరి సెల్లె “దే” దీకిరి బయలుకు జెల్లిసిబులికిరి తోముకు తెలిసిసీనా.

18 ఈనె తుండోదీకిరి బయలుకు అయిలా కొతానె ప్రూదయం దీకిరి ఆసి. మనమకు అపవిత్రం కొరిలాట యెడాక.

19 కిరుకుబుల్పే, చెడు ఆలోచన, హత్య, దర్మిపైటినె, లైంగిక దుర్మితి, సారోపైటినె, సారోసాక్సినె, దైవదూసనానె ప్రూదయంతీకిరి ఆసి.

20 యెడ కారంగా మనమ అపవిత్రం ఈలీసి. ఈనె అత్తోనె నాదొయిగికుంటా బత్తో కైయిలెత్తె మాత్రంరె అపవిత్రం ఈని బులిసి.

తిల్లాంటరో విస్వాసం
(మార్కు 7:24-30)

21 యేసు సే చోటుకు సడదీకిరి తూరు, సీదోసు ప్రాంతమూనెకు జేసి.

22 సే ప్రాంతంరె తల్లా కనానుమొట్ట యేసు పక్క కందికుంటా అయికిరి, “ప్రబూ! దావీదురో పో! మో ఉంపరె దయ దిగదే. మో జోకు బుత్తో దరిగీకిరి బడే బాద పొడిలీసి” బులి తాదీకిరి కొయిసి.

23 యేసు కిచ్చి సమాదానం కొయిలాని. సడవల్లరె సిస్యనె అయికిరి, “సెయ్యె గట్టిగా దొందరికిరి అం పొచ్చాడె అయిలీసి. తాకు పొడదీపేండి” బులి విజ్ఞప్తి కొరిగిచ్చె.

24 యేసు “తప్పిజెల్లా ఇస్రాయేలు వంసమురె వొరిజెల్లా గొర్రీనె కోసం మాత్రమాక మెత్తె పొడదీసి” బులి కొయిసి.

25 సే మొట్ట అయికిరి యేసు అగరె ముడుకూనె పొక్కిరి, “ప్రబూ! మెత్తె సహాయం కొరండి!” బులి మగిసి.

26 యేసు, “పురువురో పిల్లానుకు చెందిలా బత్తో కడికిరి కుక్కురోనుకు పొగువురో నాయ్యంనీ” బులి సమాదానం కొయిసి.

27 “సాత్తాక ప్రబూ! ఈనె, కుక్కురోనె కూడా తా యజమానిరో బల్లంపరె దీకిరి పొడిలా ముక్కలుకు కైవెసీనా?” బులి సెయ్యె బులిసి.

28 సెల్లె యేసు, “మా! తోబిత్తరె తల్లా విస్వాసం బొట్ట. తూ కొరిలాపనాక జరుగుసి” బులి సమాదానం కొయిసి. సే గడియరాక తా జ్యోకు బొలియిజిసి.

యేసు బడేలింకు బొలికొరువురో

29 యేసు సెట్టెదీకిరి బయలుదేరికిరి గలిలయ సొంద్రో ఒడ్డురెదీకిరి జేసి. పొరోతో ఉంపరకు జేకిరి బొసిరిసి.

30 మనమానె గుంపునె గుంపునెగా సెట్టికు అయిసె. తంకె తా పొచ్చాడె సొట్టలింకె, అంకీనె నీలాలింకె, గొడ్డత్తోనె పొడిజెల్లలింకె, కొతానె నాయిలలింకె యింకా బడే రకాలు రోగోనె రొల్లాలింకు దరిగీకిరి అయికిరి తా గొడ్డొనె అగరె పొదీసె. సెయ్యె తంకు బొలికొరిసి.

31 కొతానె నిలాలింకు కొతానె అయిసి. గొడ్డోనె అత్తోనె పొడిజెల్లాలింకె బొల్లెజిసి. కుంటీలింకె సలిసె. అంకీనె నీలాలింకు అంకీనె అయివురో మనమానల్లా దిక్కిరి ఆచ్చర్యపొడికిరి ఇస్రాయేలు పురువుకు స్తుతించిసె.

చారవేయిమందికి కద్ది దివ్వరో
(మార్కు 8:1-10)

32 యేసు తా సిస్యనెకు డక్కికిరి తంక సంగరె, “అంక ఉంపరె మెత్తె బడే జాలి కలిగిలీసి. తంకె తిందినెదీకిరి మోపక్కరాక అచ్చె. తంక పక్కరె కైతే కిచ్చినీ. తంకు బొక్కరె పొడదీతె మెత్తె ఇస్టంనీ. సాకిరి పొడదీన్నే తంకె బట్టరె ముండొబించికిరి పొడుజూసె” బులి కొయిసి.

33 తా సిస్యనె యేసుకు, “యే మారు మూల గానె సొబ్బిలింకు సారిపొడిలా రొట్టినె కేటె మిలుసి?” బులి కొయిసె.

34 “తొ పక్కరె కెత్తె రొట్టినె అచ్చె?” బులి యేసు పొచ్చిరిసి.

“సత్ర రొట్టినె, కుండె సన్ని మచ్చినె అచ్చె” బులి తంకె సమాదానం కొయిసె.

35 యేసు మనమానెకు నేలంపరె బొసిరొడి బులి ఆజ్ఞాపించిసి.

36 సే తరవాత సత్ర రొట్టినె, మచ్చినె కడిగిరి పురువుకు క్రుతజ్జతలు కొయికిరి సడకు బంగికిరి సిస్యనెకు దీసి. సిస్యనె సడానె మనమానుకు బంటదీసె.

37 సొబ్బిలింకె సంత్తుప్తిగా కైలా తరవాతరె సిస్యనె మిగిలిజల్లా ముక్కలల్లా సత్ర బుట్టినె పూరదీసె.

38 మొట్టానె, సన్ని పిల్లానె నీకిరి చారవేయిమంది వండ్ర పోనె సేదినె సెట్టె కద్దినె కైసె.

39 సెల్లె యేసు మనమానుకు పొడదిపేకిరి వడవ ఉటికిరి మగదాను ప్రాంతం జేసి.

16

అద్బుతానె కొరుబులి పొచ్చురివురో

(మార్కు 8:11-13; లూకా 12:54-56)

1 సెల్లె పరిసయ్యునె, సద్దూకయ్యునె యేసుకు పరీక్నించిమాసి బులి అయికిరి, పురువు తొత్తె పొడదీసి బులి అముకు తెలివైలాపనికిరి “మెగో తీకిరి గుటె అద్బుతంకు అముకు దిగదె” బులి పొచ్చిరిసె.

2 ఈనె యేసు యాకిరి కొయిసి. “సాంజెబెల్లె మెగో గొర్రయికిరి తన్నే సే దినె వాతావరనం బొల్లెతాసిబులి తొమె బులిగిల్లీసో.

3 సొక్కలె మెగో గొర్రయికిరి తైకిరి, మెగో మబ్బునె తన్నే సే దినె బొరొ ఆసి బులి బులిగిల్లీసో. మెగో ఆడుకు దిక్కిరి తొమె వాతావరనంకు సూచనకొయిపారొ ఈనె యే కలో దిగదిల్లా అద్బుతంకు అర్థం కొరిగిన్నింతె.

4 దుస్టులు, బక్తినిలాలింకె యే తరంలింకె అద్బుత కార్యాలనె దిగదెబులికిరి మగుసె. పురువు యోనా ప్రవక్తకు కొరిలా అద్బుతం తప్ప మరి కే అద్బుతం దిగదిల్లాని.”

బులి కొయికిరి సడకు యేసు తంకు సడదీకిరి బాజేసి.

పరిసయ్యునె సద్దూకయ్యురో పులిసిలా పిండి

(మార్కు 8:14-21)

5 సిస్యనె సొంద్రొదాటికిరి జెల్లాబెల్లె, అగరె తంకె నందిగిల్ల రొట్టినెకు దరిగిజెవ్వరో పసిరిజేసె.

6 యేసు తంకెదీకిరి, “జాగర్త! పరిసయ్యునె కారనంగా, సద్దూకయ్యునె కారనంగా పులిసిలా పిండి వినయంరె దూరుగా టారింబి” బులి తంకు కొయిసి.

7 యే వినయం గురింబి తంకె బిత్తరె తంకె కొతలగ్గీకిరి, “అమె రొట్టినె దన్నయిలానింతో బులి” సెయ్యె సాకిరి కొయిసి బులిగిల్లీసె.

8 తంకె బులిగివురో యేసుకు బుజ్జసి. తంకె, “తొబిత్తరె అల్పవిస్వాసంలింకె రొట్టినె నీబులికిరి తొబిత్తరె తొమె కైంకి కొతాలగ్గిల్లీసో?

9 తొముకు యింకా తెలిసినీనా? పాటవెయ్యి మందికి పాట రొట్టినె బంటదిల్లాబెల్లె మిగిల్లా ముక్కలుకు తొమె కెత్తొ బుట్టినె పూరదీసెవో తొమె పసిరిజిసోనా?

10 ఈనె సత్ర రొట్టినెకు చారవెయ్యి మందికి బంటిలాబెల్లె మిగిల్లా ముక్కలు తొమె కెత్తె బుట్టినె పూరూ పూరదీసెవో గురుతు సీనా?

11 మియి తొముకు కొయిలాట రొట్టినె కోసం నీబులి తొమె కిరుకు అర్థం కొరిగిన్నార్లీసో? పరిసయ్యునె, సద్దూకయ్యునె వల్లరె కలిగిలా పులిసిలాటకు దూరుగా టారింబి” బులి కొయిలీసి.

12 సెత్తెలె సెయ్యె రొట్టెలుకు ఉపయోగించిలా పులిసిల వినయంరె జాగర్త పొడుబులి బుల్లానీ గాని పరిసయ్యునె బోద వినయంరె, సద్దూకయ్యునె బోద వినయంరె జాగర్త పొడుబులి తంకు అర్థమైసి.

పేతురు యేసు గురించి కొయివురో
(మార్కు 8:27-30; లూకా 9:18-21; యోహాను 6:68,69)

13 యేసు కైసరియ పిలిప్పు పట్నం పక్కరే తల్లా గానె పక్క అయిలాబెల్లె తా సిస్యనె సంగరె, “మనమరో పో గురించి మనమానె కిరబులి కొయిగిల్లీసె?” బులి పొచ్చురిసి.

14 తంకె “కుండె మనమానె బాప్టిసం దిల్లా యోహాను బులిసి. కుండె మనమానె ఏలీయా బులిసి. కుండె మనమానె యిర్మీయా బులిసి. ఇంకా కుండె మనమానె ప్రవక్తానెరె జొనైకిరి రొవ్వొచ్చు బులి బులిగిల్లీసె” బులి కొయిసి.

15 యేసు, ఈనె తొం వినయంకిర? మియ్యి కేసె బులి తొమె బులిగిలిసో? బులి తంకు పొచ్చురిసి.

16 సడకు సీమోను పేతురు, తువ్వు క్రీస్తు సజీవుడెలా పురువురో పో బులి సమాదానం కొయిసి.

17 సడకు యేసు యాకిరి కొయిసి, “యోనా పో! సీమోనూ, తూ దన్యుడు! యే వినయంకు తొత్తె మనమానె కొయిలానింతె ఈనె పరలోకంరె తల్లా మో బోకా కొయిసి.

18 ఈనె తూ పేతురు బులి మియి కొయిలించి. యే పొత్తో ఉంపరె మియి మో సంగంకు బందుంచి. సే సంగం అగరె పాతాలలోకం కూడా ఎదిరించినారి బులి కచ్చితంగా కొయిలించి.

19 పురువురో రాజ్యంరె తాలమునె మియి తొత్తెదిమ్మి. యే బూమి ఉంపరె తూ నిరాకరించిలాలింకు పరలోకంరె కూడా నిరాకరించుంచి. యే ప్రపంచంరె తూ అంగీకరించిలాలింకు పరలోకంరె కూడా అంగీకరించుంచి” బులిసి.

20 సే తరవాతరె, సెయ్యె క్రీస్తు బుల్లా వినయం కాకూ కొయితెనా బులికిరి సిస్యనె సంగరె కొయిసి.

యేసురో స్రమ, మొర్నొ
(మార్కు 8:31-9:1; లూకా 9:22-27)

21 సెత్తెలె దీకిరి యేసు తా సిస్యనె సంగరె సెయ్యె యెరూసలేముకు జెవ్వొలిసిల సంగతి గురించి, సెట్టె తల్లా బొడిలింకె, ప్రదానయాజకూనె, సాస్త్రీనె తాకు హింసించిలా వినయం గురించి, సెయ్యె పొందివలిసిలా మొర్నొ గురించి, తింటో దినెరె జీకిరి అయితల్లాట గురించి కొయివురో మొదలు కొరిసి.

22 పేతురు తాకు గుటె పక్క డక్కికిరి ప్రబూ సాకిరి కొతాలగితెనాబులి, “పురువు తాంపరె దయ దిగదిమంచె! సాకిరి కెబ్బుకు జరిగినాసి!” బులిసి.

23 యేసు పేతురు ఆడుకు బుల్లికిరి, సాతాను “మో అగరె దీకిరి బాజా, తువ్వు మెత్తె ఆటంకం కలిగించిలీను యే ఆలోచనానె మనమానె తీకిరి అయిలాంచ పురువుతీకిరి అయిలాంచనీ” బులి కొయిసి.

24 సెల్లె యేసు తా సిస్యనె సంగరె, “మో పొచ్చాడె అయిమాసిబులిగిల్లాట సాబ్బీ సడదీకిరి, మో సిలువకు బొయికుంటా మెత్తె అనుసరించుంచి.

25 కేసన్నా తా పొర్నొకు కాపాడిగిమాసి బులిగిల్లాట సడకు వొరదగివ్వొ. ఈనె మో కోసం తా పొర్నొకు సడదగిల్లలింకె సడకు పొందిగివ్వొ.

26 లొకొ అల్లా జయించికిరి తా పొర్నొకు వొరదగిన్నే మనమకు కిర లవొ కలుగుసి? సే పొర్నొకు బుల్లికిరి పొందిగిత్తే సెయ్యె కిరదీపారి?

27 మనమరో పో తా దేవదూతానె సంగరె మిసికిరి, బో మహిమ సంగరె అయిలీసి. సెత్తెలె సెయ్యె ప్రతి మనమకు కొరిలా పైటినె వల్లరె ప్రతిపలం దూసి.

28 ఎట్టె టారిలాలింకె బిత్తరె కుండెలింకె మనమరో పో తా రాజ్యం సంగరె అయిలాట దిగిలాజాంక జీకిరి తాసె” బులి కచ్చితంగా కొయిలించి బులిసి.

17

యేసు రూపం మారువురో
(మార్కు 9:2-13; లూకా 9:28-36)

1 యేసు సో దినోనె తరవాతరె పేతురుకు, యాకోబుకు, యాకోబు బయిల యోహానుకు, గుటె ఎత్తెలాపొరోతంపరకు తా పొచ్చాడె ప్రత్యేకంగా డక్కిగీకిరి జేసి.

2 సెయ్యె సెట్టె తల్లాలింకగరె దివ్యరూపం పొందిసి. తా మూ సూర్యుడుపని మెరిసి. తా కొన్నానె హల్లో పనికిరి దగదగా మెరిసి.

3 సే గడియరె తంకగరె మోసే, ఏలీయా ప్రత్యక్షమైసి. తంకె యేసు సంగరె కొతలగివురో సిస్యనె దిగిసి.

4 సెల్లె పేతురు యేసు నంగరె, “ప్రబూ, అమె ఎట్టె రొవ్వరో బొట్ట. తొత్తె ఇస్టమైనే తింట పర్నసాలానె బందిపించుంచి తొత్తె గుట, మోసే గుట, ఏలీయాకు గుట” బులి కొయిసి.

5 సెయ్యె యింకా కొతలగితల్లాబెల్లె గుట కాంతివంతంమైలా మెగో సెట్టె టారిలాలింకు బుజ్జివేసి. సెల్లె సే మెగో దీకిరి గుట స్వరమైకిరి, “ఎయ్యె మో యిస్టమైలా పో, ఆ గురించి మీ ఆనందించిలించి, ఆ కొత నునొడి” బులి నుందిసి.

6 ఎడ నునికిరి సిస్యూనె డొరొసంగరె బొర్లాపొడిజీసె.

7 యేసు అయికిరి తంకు సుగీకిరి “ఉటోడి, డొరితెనాండి” బులి కొయిసి.

8 ఈనె తంకె ఉటికిరి దిగిలాబెల్లె తంకు యేసుతప్ప యింకేసే దిగదిల్లానింతె.

9 తంకె పొరొతో వొల్లికిరి తొల్లకు అయితల్లాబెల్లె యేసు, “మనమరో పో జీకిరి అయిలాజాంక తొమె దిగిలా యే దర్ననం గురించి కాకు కొయితెనాండి” బులి ఆజ్ఞాపించిసి.

10 సెల్లె తా సిస్యూనె “అగరె ఏలీయా అయిమంచి బులి సాస్తీనె కిరుకుబుల్లీసె” బులి పొచ్చిరిసె.

11 సడకు యేసు యాకిరి సమాదానం కొయిసి, “ఏలీయా తప్పకుండా ఆసి. అయికిరి అగరాక సొబ్బీ సిద్దపరిచివో బుల్లా కొత సొత్తాక.

12 మియి కొయిలాట కిరబుల్లీ, ఈనె ఏలీయా అగరాక అయిసి. ఈనె తంకె తాకు గుర్తించినారికిరి తాకు తంకె ఇస్టమైలాపనికిరి కొరిసె. సాకిరాక మనమరో పో కూడా తంకవల్లరె న్రమ అనుబవించుసి బులి కొయిలించి.”

13 యేసు బాప్టీసం దిల్లా యోహాను గురించి కొయిసి బులి సిస్యూనెకు సెల్లె అర్దమైసి.

**బుత్తో దరిలా జొనె కుర్రకు యేసు బొలికొరివురో
(మార్కు 9:14-29; లూకా 9:37-43)**

14 సెల్లె తంకె మనమానె పక్కరెదీకిరి బుల్లికిరి అయిలాబెల్లె జొనె మనమ యేసు పక్కు అయికిరి మోకరించిసి,

15 “ప్రబూ! మో పో ఉంపరె దయ దిగదె. సెయ్యె మూర్పుజబ్బుసంగరె బడే బాదపొడిలీసి. కొతకొతకు నియ్యరె, పనిరె పొడిజెల్లీసి.

16 తాకు తో సిస్యూనె పక్కరకు దరిగీకిరి అయించి. ఈనె తంకె తాకు బొలికొరినారిసె” బులి కొయిసి.

17 సెల్లె యేసు, “మూర్పులైలా తొబిత్తరె విస్వాసంనీ. మియి కెత్తె కలో తొసంగరె తమ్మంచి? కెత్తె కలో తొ కోసం ఓర్పిగిమ్మి? తాకు మో పక్కరకు డక్కిగీకిరి అయిండి” బులి కొయిసి.

18 యేసు సే బుత్తోకు బాజాబులికిరి గట్టిగా కొయిసి. సడ సే పిల్లాసాదీకిరి బయలుకు అయిసి. సే గడియరాక సే పిల్లాసుకు బొల్లెసి.

19 సిస్యూనె సే తరవాతరె యేసు పక్కరకు ప్రత్యేకంగా అయికిరి, “అమె కిరుకు సడకు పొడదిన్నారించో?” బులి పొచ్చిరిసె.

20 యేసు, తొబిత్తరె ఆవగింజెత్తె విస్వాసం నీ గనుక తొమె సడకు పొడదిన్నారిసా. ఈనె ఎడ సొత్తాక.

21 తొబిత్తరె ఆవగింజెత్తె విస్వాసము రొన్నె చాలు. తొమె ఏ బొనో సంగరె సెటుకు జా బులి కొయినె జోసి. “తొముకు నాఅత్తరయిలాట తన్ని” బులి కొయిసి. ప్రార్దన వలరాక గానీ యింకా కిరసంగరె జెన్నీ బులి కొయిసి.*

**యేసు యింగుట బెల్లె తా మొర్నొ కోసం కొయివురో
(మార్కు 9:30-32; లూకా 9:43-45)**

22 ఈనె సిస్యూనె గలిలయరె యింకా మిసిగిల్లబెల్లె యేసు తంకెసంగరె, “మనమరో పో మనమానెకు అప్పగించబొడుసి బులి కొయిసి.

23 తంకె తాకు మొరుదూసి. ఈనె తింటో దినె సెయ్యె మొర్నొ దీకిరి జీకిరి ఆసి” బులి కొయిసి. ఎడ నునికిరి సిస్యూనె బడే దుక్కొపొడిసె.

మందిరంరొ పన్ను కోసం

24 యేసు, తా సిస్యూనె కపెర్నూముకు చేరిగిల్లాబెల్లె, సెట్టె మందిరంరొ పన్నునె వనూలు కొరిలాలింకె పేతురు పక్కరకు అయికిరి, “తొ బోదకుడు మందిరంరొ పన్ను చెల్లించినా?” బులి ప్రస్నించిసె.

* 17:21 ఎడ మూల గ్రంథాలరె సీ

25 “దూసి” బులి పేతురు సమాదానం కొయికిరి గొరొబిత్తరకు జేసి. సెయ్యె కిచ్చి నా కొతలగిలా అగరె యేసు, “సీమోను తూ కిరబుల్లీను? రోజానె యే బూమి ఉంపరె వన్నునె కా పక్కరె వసూలుకొరివె? తా స్వంత దేసొలింకె పక్కరె దీకిరినా? పొదర్లింకె పక్కరె దికిరినా?” బులి పొచ్చిరిసి.

26 “పొదర్లింకె పక్కరె” బులి పేతురు సమాదానం కొయిసి. యేసు సాకిరియినె పన్ను బందివలిసిలా అవసరం నీబులి కొత!

27 ఈనె తంకు ఇబ్బంది లొగివురో మెత్తె ఇస్టంనీ. సొంద్రొ పక్కరకు జేకిరి గేలం పొగు! అగరె దరిలా మచ్చొ తుంఱొ పిటికిరి దిగినె అముకు సొరిపొడిలా నానెం మిలివొ. సడకు దరిగీకిరి జేకిరి అం దీలింకె పన్ను బందిపే! బులి కొయిసి.

18

కేసె గొప్పీట

(మార్కు 9:33-37; లూకా 9:46-48)

1 సె తరవాతరె సిస్యూనె యేసు పక్కరకు అయికిరి, “ఈనె పురువురో రాజ్యంరె సొబ్బిలింకె కన్నా గొప్పలింకె కేసే?” బులి పొచ్చిరిసి.

2 యేసు గుటె సన్ని పిల్లాసొకు పక్కరకు అయిబులి డక్కికిరి తాకు తంకె మొజిరె టారెదీకిరి యాకిరి కొయిసి,

3 “తోమె మారికిరి, తోమె మనుసూనె బిత్తరె సన్ని పిల్లానె పని నారొన్నే పురువురో రాజ్యంకు జెన్నారొ” బులి కచ్చితంగా కొయిలింబి.

4 సడకు ఎ సన్ని పిల్లనుకు తల్లా మనస్సు కలిగికిరి తగ్గించిగిల్లా మనమ పురువురో రాజ్యంరె సొబ్బిలింకె కన్నా గొప్పలింకెపని పరిగినింపబొడుసి.

5 సెత్తాకనీ యాట సన్ని పిల్లనెరె జొనుకు మో నారె చేర్చిగిన్నె మెత్తె చేర్చిగివ్వొ.

పాపం కొరితె సొదింపబొడివురో

(మార్కు 9:42-48; లూకా 17:1; 2)

6 ఈనె ఎ సన్ని పిల్లనె విస్వాసంకు కెసన్నా ఆటంకం కొరితె కారనం యాలకన్నా, బెక్కుకు తిరగలి పొత్తో బందికిరి లోత్తెల సొంద్రొరె పొక్కదివురో బొల్ల.

7 అబ్యంతరములు వల్లరె ఏ లొకొకు స్రమ; అబ్యంతరముకు యివురో తప్పినీ. ఈనె కావల్లరె అబ్యంతరము ఆసొ సే మనమకు స్రమ.

8 తో గొడ్డొ, తో అత్తొ తొత్తె అబ్యంతరం కొర్నె సడకు అనికిరి పొక్కదెండి. దీట గొడ్డొనె దీట అత్తొనె రొయికిరి కెబ్బుకు పుడ్డయితల్లా నియ్యరె పొడిలాకన్నా, సొట్టమోపొగ ఈనె గొడ్డొనె అత్తొనె నీలా మోపొ పనికిరి రొయికిరి నిత్యజీవం పొందిగివురో బొల్ల.

9 ఈనె అంకి తొత్తె అబ్యంతరం కొర్నె సడకు జింకికిరి పొక్కదెండి. దీట అంకి రొయికిరి నరకంబిత్తరె నియ్యరె పొడివురోకన్నా గుటె అంకి దీకిరి పరలోకం బిత్తురుకు జెవురో బొల్ల.

వొరిజెల్లా గొరె

(లూకా 15:3-7)

10 ఏ సన్ని పిల్లనె కాకు సన్ని దిగా దిగితెనాండి. మియ్యి కొయిలాట కిరబుల్లె పరలోకంరె తల్లా యే దూతానె పరలోకంరె తల్లా మో బో మూకు కెబ్బుకు దిక్కికుంటా తాసె.

11 *

12 గుటె పక్కరె సొయి గొర్రీనె అచ్చెబులిగిండి. సడానె గుటె గొర్రె తప్పిజెన్నే, సెయ్యె సే తొంబైతొమ్మిది గొర్రీనె బొసొ ఉంపరె సడదీకిరి, సె తప్పిజెల్ల గొర్రె కోసం కుజ్జినీనా? తోమె కిరబులుసొ?

13 ఎడ సొత్తాక, సే గొర్రెమిల్లె సే తొంబైతొమ్మిది గొర్రీనె కన్నా సెయ్యె సడవల్లరె బడే ఆనందించుసి.

14 సాకిరాక పరలోకంరె తల్లా మో బో ఏ సన్ని పిల్లనె కేసె తప్పిజెవురో పరలోకంరె బో ఆనందించుసి.

పాపంరె తల్లా అన్నబయినె అప్పబొయినె

15 తో బయి తొంపరె తప్పు కొర్నె తా పక్కరకు జేకిరి సెయ్యె కొరిలా తప్పు తాకు జొన్నే తల్లాబెల్లె కోండి. సెయ్యె తో కొతా సున్నే తాకు తూ బుల్లికిరి సంపాదించిగిల్లాపనికిరాక.

* 18:11 యే వాక్యం అసల్లెలా గ్రందాలురె సీ

16 సయ్యో తొం కొత నాసున్నే, జొన్న, నీనె దీలింకు సాక్సీనె తొం పొచ్చాడె దరిగి జాండి. కిరుకుబుల్నే ప్రతి వినయముకు నిర్ణయించితె లేకనానె కొయిలా పనికిరి దీలింకె నీనె తిల్లింకె సాక్సం కొయిమంచి.

17 తొం కొతా సునితె సయ్యో నాఅంగీకరించినె జేకిరి తంకె సంగం కోండి. సయ్యో సంగం కొయిలా కొతకూడ నాసున్నే తాకు తొమె పొదరెలింకెగా పన్నునె వొసులు కొరిలా పాపోనెగా బులిగిండి.

నిరాకరించువురో, అంగీకరించువురో

18 ఈనె యే బూమంపరె తొమె కిరకు బందించువోయొ, సడ పరలోకంరె బందింపబొడివో; బూమంపరె తొమె కిరకు పిటివోయొ, సడ పరలోకంరె పిటుసి బులి తొం దీకిరి కచ్చితంగా కొయిలించి.

19 సడకనీ, మియ్యి కొయిలాట కిరబుల్నే తొంబిత్తరె దీలింకె మిసికిరి బూమంపరె ఏకమైకిరి కిరగురించన్నా ప్రార్థించినె, సెల్లె పరలోకంరె తల్లా మో బో సడ తొముకు సొత్తాక అనుగ్రహించుసి.

20 కిరుకుబుల్నే మో నారె దీలింకె నీనె తిల్లింకె కేటె మిసికిరితన్నే మియ్యి సెట్టె తంకెదీకిరి తాంచి.

నాక్సమించిలా సేవకుడురో ఉపమానం

(లూకా 17:3,4)

21 సెల్లె పేతురు యేసు పక్కరకు అయికిరి, “ప్రబూ! మో బయి మెత్తె పాపం కొర్నే మియ్యి కెత్తెబెల్లె తాకు క్షమించిమాసి? సత్రబెల్లెనా?” బులి పొచ్చురిసి.

22 సడకు యేసు యాకిరి సమాదానం కొయిసి. ఏడుసార్లునీ, డెబ్బది ఏడు సార్లు క్షమించిమాసి బులి కొయిలించి.

23 ఈనె పురువురో రాజ్యం తా సేవకునె సంగరె లెక్కలు పరిస్కరించిగిమ్మంచి బుల్లా జొనె రొజా సంగరె పొల్పికిరి అచ్చి.

24 సే రొజా లెక్కలు దిగివురో మొదలు లొగిలాబెల్లె వేలకొలది సున్న నానేలు అప్పు తల్లా జొనె మనమకు బటులు రొజా పక్కరకు డక్కిగీకిరి అయిసె.

25 ఈనె అప్పు తల్లా మోపా పక్కరె అప్పు తీర్చితె పలియనీ. సడకు సే రొజా తాకు, తా నెయిపుకు, తా కుటుంబంకు, తాపక్కరె తల్లా సారుకోనె సొబ్బి బిక్కిపీకిరి అప్పు తీర్చు బులికిరి ఆజ్ఞాపించిసి.

26 సే సేవకుడు రొజా అగరె ముడుకూనె పొక్కిరి, కొద్ది కలో దే, తొత్తె దివ్వలిసిలా పలియ సొబ్బి దీపించి బులి బతిమాలిగిచ్చి.

27 రొజా సే సేవకుడు ఉంపరె దయసంగరె కనికరంపొడికిరి క్షమించికిరి తాకు విడుదల కొరిసి. సడ వుంపరె తాకు అప్పు కూడా నాదీకుంట కొరిసి.

28 సే సేవకుడు బయలుకు జేకిరి, తాదీకిరి మిసికిరి పైటికొరిలా సేవకుడుకు దిగిసి. తాకు వెయ్యి వెండినానేలు అప్పుతల్లా మొపారె బెక్కొ దరిగీకిరి, మో అప్పు తీర్చు బులి వేదించిసి.

29 అప్పుతల్లా సేవకుడు ముడుకూనెపొక్కిరి, కొద్ది కలో గడువు దే తో అప్పు తీర్చుపూంచి బులి బతిమాలిగిచ్చి.

30 ఈనె అప్పుదిల్లా మోపా సడకు అంగీకరించిలాని. ఈనె జేకిరి తా అప్పు తీర్చిల జాంక సె అప్పుతల్లా మొపాకు చెరసాలరె పొగిప్పించిసి.

31 తా సంగరె తల్లా సేవకుడు జరిగిలాట దిగిసి. తంకు బడె బాదపొడిసి. తంకె జేకిరి జరిగిలాటల్లా తంకె రొజా సంగరె కొయిసె.

32 సెల్లె సే రొజా సే సేవకుడు డక్కికిరి, రగొ సంగరె దుర్మార్గుడా! తువ్వ మెత్తె బతిమాలందకు తో అప్పు అల్లా క్షమించించి.

33 ఈనె మియ్యి తో ఉంపరె దయ దిగదిల్లపని తాకు తోసంగరె తల్లా సేవకుడు ఉంపరె దయ దిగదిమ్మాసిసీనా? బులిసి.

34 సే తరవాతరె రొజా బడె రగొసంగరె తా అప్పు అల్లా తీర్చిలా జాంక సిక్స లొగు బులికిరి సే సేవకుడుకు బటులుకు అప్పగించిసి.

35 సడకు యేసు, తొం బిత్తరె ప్రతిజొనె తొం బయికు మనసార నాక్సమించినె పరలోకంరె తల్లా మో బో తొం పట్ల సే రొజా పనాక కొరివో.

19

విడాకులు గురించి యేసు బోదించివురో

(మార్కు 10:1-12)

1 యేసు కొతలగివురో ఈజిల్లా తరవాతరె గలిలయ సడదీకిరి యొర్దాను వొడ్డుతెనాడె తల్లా యూదయ ప్రాంతంకు జేసి.

2 మనమానె గుంపునె గుంపునెగా తా పొచ్చాడె జేసె. సెయ్యె తంకు బోలికొరిసి.

3 కుండెలింకె పరిసయ్యునె తాకు పరీక్షించిమాసి బులి తా పక్కు అయికిరి, “వొండ్రపో తా నైపోకు కే కారనం దిగదీకిరి విడాకులు దివ్వొచ్చునా?” బులి పొచ్చిరిసె.

4 సెయ్యె, “అగరె స్రుస్థకర్త వొండ్రపోకు, తిల్లాంతుకు కొరిసి బులి తోమె లేకనానెరె చదివిలానింతోనా? బులిసి.

5 సడవల్లరె వొండ్రపో తా మా, బోకు సడికిరి తా నైపో సంగరె గుట్టెమాసి. తంకె దీలింకె మిసికిరి గుటె దే గా జూసె.

6 సే కారనంరె తంకె యింక అగరె దీలింకెగా నీకుండా జొన్నెపనికిరి తాసె! పురువు ఏకం కొరిలాలింకు మనమానె వేరుకొరినాసి” బులి సమాదానం కొయిసి.

7 “ఈనె వొండ్రపో యిడాకులు పత్రం తా నైపోకు దీకిరి తాకు పొడదిపించువొచ్చు బులికిరి మోసే కిరుకు ఆజ్ఞాపించిసి?” బులి పరిసయులు పొచ్చిరిసె.

8 యేసు, సే “కొయిలా కొతానె తోమె సునిలానింతో గనక తో నైపోకు విడాకులుదీతె మోసే తోముకు అనుమతి దీసి. ఈనె అగరెదీకిరి యాకిరినీ.

9 ఈనె మియ్యి కొయిలాట కిరబుల్నే, కే మనమైనా తా నైపోరొ దర్పిపైటి వినయంరె తప్ప నైపోకు విడాకులుదీకిరి యింగుటె మొట్టుకు బ్యాకొరిగిన్నే తాదీకిరి దర్పిపైటి కొరిలాపని ఊసి.” బులిసి.

10 సిస్యునె తాకు, “విడాకులుదీతె యడాక కారనం కావలసియినె బ్యా నాకొరిగీకుంటా రొవ్వరొ బొల్ల” బులిసి.

11 యేసు, “తూ కొయిలా యే బోద సొబ్బిలింకు సాద్యంనీ. ఈనె పురువు అనుగ్రహించిలాలింకు మాత్రమాక.

12 బ్య నా కొరిగితే బడె కారనాలు తాసె. కుండెలింకె మా పెట్టాక నపుంసకులుగా జొరైసె. ఈనె బ్య కొరిగిన్నింతె. ఈనె కుండెలింకె పొదరలింకు నపుంసకులుగా కొరుసె. ఈనె బ్య కొరిగిన్నింతె. ఈనె కుండెలింకె పురువురొ రాజ్యం గురించి బ్య కొరిగిన్నింతె. ఎ బోదకు అంగీకరించిలాలింకె అంగీకరించొండి” బులి సమాదానం కొయిసి.

యేసు సన్నిపిల్లాసుకు ఆసిర్వదించివురొ

(మార్కు 10:13-16; లూకా 18:15-17)

13 సెల్లె యేసు తా అత్తోకు సన్ని పిల్లనెరొ ముండెంపరె లొక్కిరి తంకోసం ప్రార్థన కొరిమంచిబులి కుండెలింకె మనమానె తంకు దరిగి అయిసె. ఈనె సే డక్కిగీకిరి అయిలలింకు సిస్యునె గద్దించిసె.

14 ఈనె యేసు, “పురువురొ రాజ్యం తంకపనాలింక్టాక. తంకు మో పక్కు అయిమురొండి తంకు ఆపితెనాండి” బులి కొయిసి.

15 తంకె ముండెంపరె అత్తోలొక్కిరి ఆసిర్వదించిలా తరవాతరె యేసు సెట్టెదీకిరి బాజేసి.

పలియతల్లా బెండకుర్త

(మార్కు 10:17-31; లూకా 18:18-30)

16 గుటెబెల్లె జొనె బెండకుర్త యేసు పక్కరకు అయికిరి, “బోదకుడా! నిత్యజీవం పొందిమంచిబుల్నే మియి కిర బొల్ల పైటి కొరిమంచి?” బులి పొచ్చిరిసె.

17 సడకు యేసు, “బొల్ల గురించి మెత్తెకిరుకు పొచ్చిరిలీసు? బొల్ల మనమ జొన్నాక అచ్చి. తూ నిత్యజీవం పొందిమంచిబుల్నే ఆజ్ఞానెకు పాటించిమంచి” బులి సమాదానం కొయిసి.

18 “కే ఆజ్ఞానె?” బులి సే బెండకుర్త పొచ్చిరిసె. యేసు, “మనమకు

మొరదిన్నాసి, దర్పిపైటి కొరినాసి, సారొపైటి కొరినాసి, సారొ సాక్సం కొయినాసి.

19 మాకు బోకు గొరవించిమాసి. తోపనికిరాక తో పొరుగులింకు ప్రేమించిమంచి” బులి కొయిసి.

20 సే బెండకుర్త, “మియి ఏ ఆజ్ఞలల్లా పాటించిలించి. యింకా కిరకొరిమంచి?” బులి పొచ్చిరిసె.

21 సడకు యేసు, “తూ పరిపూర్ణుడు ఈమాసి బులిగిన్నే, జేకిరి తో పక్కరె తల్లాట బిక్కికిరి నీలాలింకు దే! సాకిరి కొర్నే తొత్తె పరలోకంరె పలియ మిలుసి. సే తరవాతరె మెత్తె అనుసరించు” బులి సమాదానం కొయిసి.

22 సే బెండకుర్త పక్కరె బడె పలియ తల్లందరె యేసు కొయిలాట సునికిరి విచారంసంగరె బాజేసి.

23 సే తరవాతరె యేసు తా సిస్యునెసంగరె, పలియ తల్లలింకె పురువురొ రాజ్యంబిత్తురుకు అయివురొ బడెకొస్తా బులి మియి కచ్చితంగా కొయిలించి.

24 మియి యింకా కొయిలించి. పలియతల్లాట పురువురొ రాజ్యంబిత్తురుకు జెవురొకన్నా, ఒంటి సూదిబెజ్జంతీకిరి దూరిజెవురొ సులువు బులి కొయిసి.

25 సిస్యునె ఏ కొత సునికిరి బడె ఆచ్చర్పొడిసె, “ఈనె కేసె రక్సన పొందుపారె?” బులి పొచ్చిరిసె.

26 సెల్లె యేసు తంకాడుకు దిక్కిరి, “అడ మనమకు అసాద్యమాక ఈనె పురువుకు సొబ్బి సాద్యమాక” బులి కొయిసి.

27 సెల్లె పేతురు, “తో పొచ్చాడె అయితె అమె సొబ్బి సడదిపించో. ఈనె, అముకు కిర మిలివో?” బులి పొచ్చిరిసె.

28 యేసు, నో ప్రపంచంరె మనమరొ పో తేజోవంతుడుయికిరి సింహాసనమంపరె బోసురుసి. మో పొచ్చాడె అయిలా తొమ్మంకా పన్నెండు సింహాసనాలు ఉంపరె బోసిరికిరి ఇస్రాయేలు మనమానెబిత్తరె పన్నెండు గోత్రాలులింకు తీర్పుకొయిసో బులి కచ్చితంగా కొయిలించి.

29 మో నా కోసం గొరొనెకన్నా, అన్నబయినెకన్నా, అప్పబోయినెకన్నా, మా, బోకన్నా, పిల్లానుకు, బిల్లోనెకన్నా సడిదిగిల్లాలికె సడకు సోయి వంతులు పలం నిత్యజీవం కూడా పొందిగివ్వె.

30 ఈనె అగరె తల్లాలికె బిత్తరె బడేలింకె పొచ్చుకు జూసె. పొచ్చాడె తల్లాలికె బిత్తరె బడేలింకె అగురుకు ఆసి! బులి కొయిసి.

20

ద్రాక్స తోటరొ పైటిలింకె కోసం

1 పురువురొ రాజ్యో యాకిరి అచ్చి. గుట ద్రాక్సతోట యజమానిసంగరె పొలికిరి అచ్చి. గుటబెల్లె తోటరె పైటి కొరితె పైటిలింకు డక్కిమంచి బులి సొక్కలాక ఉటికిరి జేసి.

2 సే దినె పైటి కొరిలాలింకు గుట వెండినానెం దూంచబులి ఒప్పిగికిరి తంకు తా ద్రాక్సతోటకు పొడదీసి.

3 సెయ్యె సొక్కలె తొమ్మిదిగంటలకు యింకా సొంతకు జేసి. సెట్టె కుండె మనమానె సుచ్చరాక టారికిరి రొప్పురొ దిగిసి.

4 సెయ్యె తంకెసంగరె తొమె కూడా జేకిరి ద్రాక్సతోటరె పైటి కొరొండి. తొముకు కూడ సమానంగా కూలి దూంచి బులి కొయిసి.

5 తంకె సడకు అంగీకరించికిరి జేసె. సెయ్యె పన్నెండు గంటలయిలాబెల్లె, ఈనె తినిగంటలయిలబెల్లె కూడా జేకిరి యింకా సొకిరాక డక్కిసి.

6 సెయ్యె ఇంచుమించు పాట గంటలయిలాబెల్లె జేకిరి యింకా కుండె మనమానె సెట్టె టారికిరి తవ్వరొ గమనించిసి. సెయ్యె తంకెసంగరె తొమె దినొల్లా కిచ్చినాకొరుకుంటా కిరుకు ఎట్టె టారిసో? బులి పొచ్చిరిసి.

7 అముకు పైటికొరితె కేసే డక్కిలానింతె బులి తంకె సమాదానం కొయిసి. సెల్లె సెయ్యె తంకదీకిరి తొమె కూడా మో ద్రాక్సతోటరె పైటి కొరొండి బులి కొయిసి.

8 సొంజెలాబెల్లె సే ద్రాక్సతోటరొ యజమాని తా అదికారి సంగరె పైటిలింకల్లకు డక్కికిరి చివరకు దీకిరి అయిలలింకె సంగరె మొదలుకొరికిరి కూలి దీపో బులి కొయిసి.

9 పంచ గంటయిలబెల్లె పైటి మొదలు లొగిల పైటిలింకె అయిసి. తంకు గుట వెండినానెం దీసి.

10 అగరె పైటి మొదలు లొగిలలింకె అయికిరి తంకు బడేకూలి ఆసి బులికిరి ఆసపొడిసె. ఈనె తంకు కూడా గుట వెండినానెం మిలిసి.

11 తంకె కూలి కడిగికిరి అదికారి ఉంపరె సొనిగిల్లీసె,

12 కొరకు బరించికిరి దినల్లా పైటికొరిల అముకు, గుట గంట పైటి కొరిలాలింకు సమానంగా కిరుకు దిగిలీసు?

13 ఈనె సెయ్యె జొనె కూలిపైటిమనమ సంగరె, స్నేహితుడా సును తొత్తె కిచ్చి అన్యాయం కొరిలాని. గుట దినొకు గుట వెండినానెం కు పైటి కొరుంచో బులి తువ్వ ఒప్పిగిచ్చునీనా.

14 తో కూలి కడిగికిరి బాజా! మో ఇస్టం తొత్తెదిల్లా కూలి అంకా పొచ్చాడె అయిలాలింకు కూడా దిమ్మాబులిగించి.

15 మో పలియ మో ఇస్టంమైలపనికిరి కర్చుకొరిలా అదికారం మెత్తె నీనా? మియి బొల్లె యివురొ తువ్వ వోదర్చినారిలినునా? బులి కొయిసి.

16 “యారక పొచ్చాడె రొల్లాలికె అగురుకు ఆసి; అగరె రొల్లాలికె పొచ్చాడుకు జోసే” బులి కొయిసి.

యేసు తా మొర్నో కోసం తింటోసారి కొయివురొ (మార్కు 10:32-34; లూకా 18:31-34)

17 యేసు యెరూసలేముకు జెమ్మాసి బులిగిల్లాబెల్లె పన్నెండు మంది సిస్యూనెకు పక్కరకు డక్కికిరి యాకిరి కొయిసి.

18 అం సొబ్బిలింకె యెరూసలేముకు జెల్లించో. సెట్టె మనమరొ పో ప్రదానయాజకూనెకు, దర్మసాస్త్ర పండితునెకు అప్పగింపబోడువో. తంకె తాకు మొర్నొసిక్స పొక్కిరి,

19 తాకు యూదునెనీలాలింకు అప్పగించుసె ఇంకా హేలన కొరికిరి, కొరడా మడ్డోనె మరికిరి సిలువకు పొగుసె. ఈనె తింటోదినె సెయ్యె సజీవంగా ఉటికిరి ఆసి.

గుట మారొ విన్నపం
(మార్కు 10:35-45)

20 సే తరవాత జెబెదయి నైపో తా దీలింకె పోనె మిసికిరి యేసు పక్కు అయికిరి తా అగరె ముడుకూనె పొక్కిరి గుటె కొతా దేబులికిరి కోరిసి.

21 యేసు, “తోత్తె కిర కావాలి?” బులి ఎంట్లాక పొచ్చురిసి. నెయ్యె, తో రాజ్యంరె, మో దీలింకె పోనుకు జోనుకు తో బత్తోకైలా అత్తో పొక్కరె

యింకజోనుకు తో బాఅత్తో అడుకు తల్లాపనికిరి కొతా దే బులి మగిసి.

22 సడకు యేసు, “తోమె కిడ పొచ్చిరిలీసా తోముకు తెలిసిని. మో గిన్నెరె పురువురో కస్తానె పూరికిరి మియ్యి పీతందుకు సిద్దంగా అచ్చి. తోమె పీపారొనా?” బులి పొచ్చిరిసి. పీపారొ బులి తంకె సమాదానం కొయిసి.

23 నెయ్యె తోమె గిన్నెరొట పీపారొ ఈనె మో బత్తోకైల అత్తో అడుకు, బా అత్తో అడుకు బొసరదివురో మో వసమురెనియ్యి. మో బో కా కోసం సిద్దపరిచివోయె తాకాక సడ మిలివో బులి కొయిసి.

24 మిగిల్లా దొట్టలింకె సిస్యనె ఎడ సునికిరి నెటరొల్ల దీలింకె బయినె ఉంపరె రగ్గొపొడిసె.

25 యేసు తంకు పక్కు డక్కికిరి, “యూదునెనీలాలింకె రొజానె పనికిరి తంకె మనమ ఉంపరె అదికారం చెలాయించుకుంటా తానె బులి తోముకు తెలుస్సు.

26 ఈనె తోమె సాకిరి తన్నాసి. తొబిత్తరె గొప్పమనమా ఈమాసిబులిగిల్లాట తోముకు సేవకుడుగా తమ్మంచి.

27 తొబిత్తరె ముక్కుడుగా తమ్మాసిబులిగిల్లామనమ దాసుడుగా తమ్మంచి.

28 సాకిరాక మనమరొ ‘పో’ సేవ కొరిపించిగితై అయిలాని గాని, సేవకొరితె అయిసి. సొబ్బిలింకు యిడిపించితె కోసం తా పొర్నొకు గుటె వెలగా చెల్లించితె అయిసి” బులిసి.

యేసు అంకీనె నీలా దీలింకు బొలికొరువురో
(మార్కు 10:46-52; లూకా 18:35-43)

29 యేసు, తా సిస్యనె యెరికో పట్నం తీకిరి బయలుదేరికిరి జేతల్లాబెల్లె బడె మంది మనమానె తా పొచ్చాడెజేసె.

30 బట్టో పొక్కరె బొసిరిలా దీలింకె గుడ్డిలింకె యేసు సే బట్టరె అయిలీసి బులి సునికిరి, “దావీదు పో ప్రబూ అముకు కరునించు” బులి గట్టిగా కేకానె పొగిసె.

31 మనమానె తంకు సూతురోడి బులికిరి కొయిసె. ఈనె సే గుడ్డిలింకె యింకా గట్టిగా, “ప్రబూ! దావీదు పో! అమంపరె దయ దిగిపించు!” బులి బొట్ట కేకానె పొగిసె.

32 యేసు టారికిరి సే గుడ్డిలింకు డక్కికిరి, “మీ తోముకు కిర కొరిమాసిబుల్లీసో?” బులి పొచ్చురిసి.

33 ప్రబూ! అముకు అంకీనె దిగదిమ్మంచి! బులి తంకె సమాదానం కొయిసె.

34 యేసు తంకె ఉంపరె దయ కలిగికిరి తంకె అంకీనె సూగిచ్చి ఎంట్లాక తంకు అంకీనె దిగదీసె ఈనె తంకె తాకు వెంబడించినె.

21

యెరూసలేముకు విజయోత్సవం సంగరె జెవురో
(మార్కు 11:1-11; లూకా 19:28-40; యోహాను 12:12-19)

1 యేసు, తా సిస్యనె యెరూసలేముకు జేకిరి ఒలీవ బొనొ పక్కరె బేత్తుగే బుల్లా గాకు చేరిగిచ్చె. యేసు తా సిస్యనె బిత్తరె దీలింకు సే గాకు పొడిదీకుంటా తంకు యాకిరి కొయిసి,

2 గాబిత్తురుకు జాండి నెట్టె దోరె బందిలా గుటె గొడ్డొ, సడ పిల్లకు దిగివో. సడానుకు పిటికిరి మో పక్కు వొడిగికిరి అయిండి.

3 కేసన్నా పొచ్చురినే, అడ ప్రబువుకు కావాలిబులి కోండి; సడ అవసరం తీరిలా ఎంట్లాక బుల్లీకిరి పొడదూ బులి కోండి.

4 ప్రవక్త కొయిలా కొతా సొత్తెయితె యాకిరి జరిగిసి,

5 దిగూ “తో రొజా దీనుడైకిరి గొడ్డొ,
గొడ్డొపిల్ల ఉటికిరి అయిలీసి”

బులి సీయోను జో దీకిరి కోండి.

6 నెల్లె సిస్యనె జేకిరి యేసు ఆజ్ఞాపించిలాపనికిరి కొరిసె.

7 గొడ్డొకు, గొడ్డొపిల్లకు కొడిగి అయికిరి సడ ఉంపరె తంకె కొన్నానె యింపిసె యేసు సడంపరె ఉటికిరి బొసిరిసి.

8 సెట్తల్లా తంకెదీకిరి బడేమంది తంకె కొన్నానుకు, గొచ్చొనొ కొమ్మానె బట్టొరె యించినె.

9 తాకు అగరె, పొచ్చాడె సలిలా మనమానె యాకిరి కేకానె పొగినె. దావీదు పోకు మహిమ! ప్రబువు నారె అయిలాటకు సర్వొన్నతమైలా చోటానై జయం బులి పురువుకు స్తుతించినె.

10 యేసు యెరూసలేమునకు జేసి. సే గాఅల్లా ఆందోలన చెలరేగినె, “ఎయ్యె కేసె?” బులి మనమానె పొచ్చురిసె.

11 “ఎయ్యె యేసు, గలిలయరె తల్లా నజరేతు గాకు చెందిలా ప్రవక్త” బులి తా పొచ్చాడె తల్లాలికె సమాదానం కొయినె.

యేసు మందిరంబిత్తురుకు జెవురొ

(మార్కు 11:15-19; లూకా 19:45-48; యోహాను 2:13-22)

12 యేసు మందిరంబిత్తురుకు జేకిరి, సెట్టె బిక్కిగిల్లాలింకు, గినిగిల్లాలింకు దోరకు పొడిదీపీసి. పలియ మార్చిలాలింకు బల్లానుకు, పావురాలు బిక్కిలాలింకురో పిటముకు పొక్కదీసి.

13 సెయ్యె తంకు, యెడ “ ‘మో మందిరం సొబ్బిలింకూ ప్రార్థనాలయం’ గా తాసి బులిసి. ఈనె తొమె సడకు దోచిగిల్లా సారొనె గొరొపనికిరి మార్చిపీసా” బులి కొయినె.

14 అంకీనె నిలాలికె, కుంటిలింకె మందిరంరె తల్లా తా పక్కరకు అయినె. సెయ్యె తంకు బొలికొరిసి.

15 ప్రదానయాజకూనె, సాస్తీనె సెయ్యె కొరిలా అద్బుతానె దిగినె. మందిరం అగరె తల్లా పిల్లానె, “దావీదు పోకు జయం” బులి కేకానె పొగివురొ సునిసె. తంకు రగ్గొ అయినె.

16 “సన్ని పిల్లానె కిరబుల్లీసెవొ తువ్వు సునుసునా?” బులి తంకె యేసుకు ప్రస్నానె పొగినె. సడకు యేసు, “సునించి, సన్నిపిల్లానె, పసిపిల్లానె కూడా తొత్తె స్తుతించిలాపని కొరు! బులి లేకనాలై రాసికిరి అచ్చి. ఎడ తొమె కెబ్బే చదివిలానింతోనా?” బులి కొయినె.

17 సెయ్యె తంకు సడదీకిరి, పట్నం బయలై రొల్లా బేతనియ గాకు జేకిరి సే రత్తిల్లా సెట్టె గడిపిసి.

యేసు అంజూరొ గొచ్చొకు సపించివురొ

(మార్కు 11:12-14,20-24)

18 సొక్కలెపైలా తరవాతరె సెయ్యె బుల్లికిరి పట్నం బిత్తరకు అయితన్నుగా తాకు బొక్కిసి.

19 యేసు బట్టొ పక్కరె తల్లా గుటె అంజూరొ గొచ్చొకు దిక్కిరి సడ పక్కజేసి. ఈనె తాకు ఆకూనె తప్ప యింకా కిచ్చి మిల్లానీ. సెయ్యె సే గొచ్చొ సంగరె, యింకా కెబ్బుకు పొగలానె దిన్నారు బులిసి. ఎంట్లాక సే అంజూరొ గొచ్చొ సుక్కిజేసి.

20 సిస్యూనె సడ దిక్కిరి బడే ఆచ్చర్యపొడిసె, “అంజూరొ గొచ్చొ ఎత్తెబేగ క్యాకిరి సుక్కిజేసి?” బులి పొచ్చురిసి.

21 యేసు, “ఎడ సొత్తాక తొమె అనుమానం నాపొడుకుంటా విస్వసించినె మియి అంజూరొ గొచ్చొకు కొరిలాపని తొమ్మంకా కొరిపారొ. సెత్తె మాత్రమాక నీ, ఏ బొనుకు, తువ్వు ఉటికిరి సోంద్రొరె పొడుబుల్వే; సడ సాకిరాక ఊసి.

22 పురువు తొమె పొచ్చురిలాంచ దూసి బులి విస్వాసం సంగరె ప్రార్థన కొరండి. సెల్లె తొమె కిరమగినె సడ మిలుసి” బులి కొయినె.

యేసు అదికారం గురించి ప్రస్నించివురొ

(మార్కు 11:27-33; లూకా 20:1-8)

23 యేసు మందిరంరె బోదించితల్లాబెల్లె ప్రదానయాజకూనె, బొడిలింకె అయికిరి, కే అదికారం సంగరె తువ్వు ఏ పైటినె కొరిలీను? తొత్తె అదికారం కేసె దీసె? బులి పొచ్చురిసి.

24 యేసు సమాదానం కొయికిరి, “మియ్యి తొముకు గుటె ప్రస్న పొచ్చురుంచి. తొమె కొయినె మియి ఎడ కే అదికారం సంగరె కొరిలింబొ కొంచె.

25 బాప్టీసం దిల్లా యోహానుకు కేసె పొడదీసె? పురువునా? మనమానె నా?” బులి పొచ్చురిసి.

తంకె, “పురువు” బులి కొయినె తాకు కిరుకు నమ్మిలానింతొ? బులి పొచ్చురివొ.

26 మనమానె బులి కొయినె మనమనల్లా యోహాను జొనె ప్రవక్త బులి నమ్మినె. ఈనె తంకె కిర కొరుసెవొ బులి డొరొసంగరె జొనుకు జొనె కొతలగ్గిచ్చె.

27 సడకు తంకె, “అముకు తెలిసినీ” బులి కొయినె. ఈనె, తొముకు మియి కే అదికారం సంగరె కొరిలింబొ కొయినీ బులిసి.

దీలింకె పోనెరొ ఉపమానం

28 ఉంచినె ఆలోచించికిరి కోండి. జొనుకు దీలింకె పోనె రొయితవ్వె. సెయ్యె బొడు పొ పక్కరకు అయికిరి, పో! ఆజి జేకిరి ద్రాక్కతొటరె పైటి కొరుబులి కొయినె.

29 సెయ్యో, మెత్తె ఇష్టంనీబులి కొయిసి. ఈనె ఎంట్రాక మనుసు మార్చిగీకిరి జేసి.

30 సెల్లె బో తా దీటో పో పక్కరకు అయికిరి సే వినయం కొయిసి. సే పో జెమ్మి బులి కొయికిరి జెల్లాని.

31 సే దిలింకె బిత్తరె కేసె బో కొత సునుసే? బులి యేసు పొచ్చిరిసి. తంకె బోడు పో బులిసె.

యేసు తంకె సంగరె యాకిరి కొయిసి.

మియి తోముకు సొత్తె కొయిలించి. సుంకరీనె, దర్మీనె తొం కన్నా అగరె పురువురో రాజ్యంకు జోసే.

32 యోహాను నీతిరో బట్టో దిగదీతె అయిసి. తొమె తాకు నమ్మిలానింతో. ఈనె సుంకరీనె, దర్మీనె తాకు నమ్మిసె. సడకు దిక్కిరంకా తొమె మనుసుమారిలానీ, విస్వసించిలానింతో.

ద్రాక్స తోట ఫైటిలింకెరొ ఉపమానం

(మార్కు 12:1-12; లూకా 20:9-19)

33 యింగుటె ఉపమానం సునొండి. జోనె యాజమాని రొయితవ్వి. సెయ్యో గుటె ద్రాక్సతోట నాటికిరి చుట్టూ గోడ బందిపించికిరి ద్రాక్సరసం కడితె గానుగ తోట్టుకు బందిపించిసి. జోగులో జోగితె గుటె మంచె కొరుపించిసి. తరవాతరె తోట రైతులుకు దీకిరి దూరు ప్రయానంకు బాజేసి.

34 కట్టిలాదినొ అయిలాబెల్లె తా సేవకునెకు సే రైతులు పక్కరకు జేకిరి వాటా దరిగి అయిబులి పొడిదీసి.

35 సే రైతులు, సే సేవకుడుకు దరిగీకిరి జోనుకు మరిసె, జోనుకు మొరిదీసె, జోనుకు పొత్తొనె సంగరె మరిసె.

36 ఆసామి యేసారి అగరె కన్నా బడేలింకు సేవకునెకు పొడిదీసి. తంకు కూడా సాకిరాక కొరిసె.

37 సే ఆసామి ఆకరువురె తా పోకు గొరవించుసెబులి బులిగీకిరి ఆకరువురె తా పోకు తంకె పక్కరకు పొడిదీసి.

38 ఈనె సే రైతులునె తా పోకు దిక్కిరి ఎయ్యో వారసుడు. యాకు మొరదీకిరి తా ఆస్తికు కడిగిమంచి బులిగిచ్చె.

39 సే తరవాతరె పోకు దరిగీకిరి మొరిదీకిరి ద్రాక్సతోట పొచ్చాడె పోదీపీసె.

40 “సే ద్రాక్సతోట యజమానుడు అయికిరి సే రైతులుకు కిర కొరువో?” బులి పొచ్చిరిసి.

41 యజమాని సే దుష్టులుకు కచ్చితంగా మొరిదీపీవో. వచ్చుకలొరె తా బాగంకు తాకు దిల్లాలింకు సే ద్రాక్సతోటకు దూంచి బులి కొయిసి.

42 యేసు తంకె దీకిరి యాకిరి కొయిసి గొరొ బందిలలింకె తిరస్కరిచిలా పొత్తొ సడకు ముక్కమైల పొత్తొవూసి.

సడ ప్రబూ వల్లరె కలిగిలాట బులి సడ అంకీనెకు

ఆచర్యమైలాటబులి తొమె కెబ్బె

లేకనానె కొయిలాపని కెబ్బే చదివిలానింతోనా?

43 సడకు మియ్యి కొయిలాట కిరబుల్నే పురువు తా రాజ్యంకు తొమె పక్కరెదీకిరి కడిగికిరి, సే రాజ్యంకు బొల్ల పలం పలించిలాలింకు దూసి.

44 *ఈనె యే పొత్తొ ఉంపరె పొడిలాలింకె ముక్కలు ఈజుసె. కా అంపరె యే పొత్తొ పొడివోయో సెయ్యో నలిగిజివ్వొ.

45 ప్రదానయాజకూనె, పరిసయునె యేసు కొయిలా ఉపమానం సునికిరి సెయ్యో తంకె గురించి కొతలగిలపనికిరి గ్రహించిసె.

46 సెల్లె తంకె తాకు బందించితె సమయం కుజ్జిలీసె. ఈనె మనమానె తాకు జోనె ప్రవక్త బులిగిచ్చె గనక మనమానుకు దిక్కిరి డొరిజిసె.

22

బ్యా కద్దినెరొ ఉపమానం

(లూకా 14:15-24)

1 యేసు ఉపమానాలు ఉపయోగించికిరి యాకిరి కొయిసి.

2 పురువురో రాజ్యంరె జోనె రొజా తా పోరో బ్యా సందర్భంగా కద్దినె కొరిలాటకు పోలికిరి అచ్చి.

3 సే రొజా కద్దినెకు ఆహ్వానించిలాలింకు డక్కితె తా సేవకునె పొడిదీసి. ఈనె తంకె అయితె ఇష్టపొడిలనింతె.

4 సే రొజా కుండిలింకు సేవకునెకు పొడదీకిరి డక్కిలాలింకు కద్దినె సిద్ధంగా అచ్చి బులి కొండి. ఎద్దునెకు, బొల్ల బలిసిలా పసువునుకు కట్టికిరి సొబ్బీ తయారు కొరించో బులి కొయిసి.

5 ఈనె డక్కిలాలింకె లెక్క కొరిలానింతె. జోనె తా కొలకు, యింకాజోనె వ్యాపారంకొరిగితె బాజిసె.

6 మిగిల్లాలింకె సేవకునెకు దరిగీకిరి అవమానం కొరికిరి మొరిదీసె.

* 21:44 యే వచనం లేకనానె నీ

- 7 సే రోజాకు బడే రగ్గో అయికిరి తా సైన్యముకు పొడదీకిరి సే హంతకులుకు నాసనం కొరికిరి, తంక పట్నుకు పుడ్డివేసి.
- 8 సే తరవాతరె సేవకునె సంగరె, బ్యాకద్దినె సిద్ధంగా అచ్చి గాని మియి డక్కిలాళికె అర్దులు నీ.
- 9 ఈనె సెయినంట జేకిరి తొముకు దిగిదిల్లాళికెకల్లాకు బ్యాకద్దినెకు డక్కిండి బులి తా సేవకునె సంగరె కొయిసి.
- 10 సే సేవకునె సెయినె మొజుకు జేరికి తంకు దిగిదిల్ల బొల్లలింకు, చెడ్డలింకు, సొబ్బిలింకు డక్కిగీకిరి అయినె. సే గొరొల్లా బ్యా విందుకు అయిలాళికె సంగరె పూరిజేసి.
- 11 రొజా చుట్టలకు దిగితె అయిసి. సెటె రొల్లాళికె బిత్తరె జొనె బ్యా కొన్నానె నాపొగ్గికుంటా బొసికిరి తల్లాట సెయ్యె దిగిసి.
- 12 స్నేహితుడా! బ్యా కొన్నానె నాపిందిగీకుంటా బిత్తరుకు క్యాకిరి అయిను? బులి రొజా తాకు పొచ్చిరిసి. సే మనమ కిచ్చి నాకొతలక్కుంటా సూతిరికిరచ్చి.
- 13 ఎంట్లాక సే రొజా తా సేవకుల సంగరె, తా గొడ్డొనె, అత్తోనె బందికిరి వొందారె పొక్కదేండి. సెట్టె సెయ్యె కందికుంటా, దంతొనె కముడుకుంటా బాదకు అనుబవించుసి బులి కొయిసి.
- 14 “పురువు బడేలింకు ఆహ్వనించిసి. ఈనె బచ్చిగిల్లాళికె కుండిలింకె మాత్రమాక” బులి కొయిసి.

పన్నునె బందివురొ కోసం ప్రస్నీంచివురొ (మార్కు 12:13-17; లూకా 20:20-26)

- 15 సే తరవాతరె పరిసయ్యునె జేకిరి తాకు తా కొతానె తప్పుదరిగిమంచి బులి ఆలోచన సంగరె యేసుకు ప్రస్నీంచిసి.
- 16 సెల్లె తంకె పరిసయ్యులొ సిస్యునెకూ, హేరోదురొ మనమానుకు కుండెలింకు పొడదీకిరి “బోదకుడా తూ సత్యవంతుడు బులి, పురువురొ బట్టో తల్లాట తల్లాపనికిరి కొయిలీను బులి అముకు తెలుస్సు. పొదరిలింకె కొతానె లెక్క కొరును బులి మొగమాటం దిగిపించునూబులి అముకు తెలుస్సు.
- 17 ఈనె రోమా చక్రవర్తికు పన్నునె బందివురొ అం నియమం ప్రకారం దర్మంనా? నీనా? తో అబిప్రాయం కో” బులి పొచ్చిరిసి.
- 18 యేసుకు తంకె ఆలోచన బుజ్జికిరి, వేసం పొగ్గిల్లాళికె! మెత్తె కిరుకు పరిక్సించిలీసో? బులి కొయిసి.
- 19 తొమె కే నానె సంగరె పన్నునె బందిలీసెవొ మెత్తె దిగదేండి బులి కొయిసి. తంకె గుటె కాసు దన్నయికిరి తాకు దీసె.
- 20 సెయ్యె, ఎడ ఉంపరె రొల్లా “ఏ బొమ్మ, అక్కరాలు కాట?” బులి తంకు పొచ్చిరిసి. తంకె “నడ రోమా చక్రవర్తిరోట” బులి కొయిసి.
- 21 సెల్లె సెయ్యె వెంట్లాక, “సాకిరియినె చక్రవర్తిరోట చక్రవర్తికు, పురువురోట పురువుకు చెల్లించొండి” బులి తంకసంగరె కొయిసి.
- 22 యెడ సునికిరి బడే ఆచ్చర్యపొడికిరి తాకు సడిదీకిరి బాజీసె.

మొరొదీకిరి జీకిరి అయివురొ కోసం ప్రస్న (మార్కు 12:18-27; లూకా 20:27-40)

- 23 సే దినాక, సద్దుకయ్యునె యేసు పక్క అయికిరి మొరిజిల్లాళికె జీకిరి అయినంతె బులి వాదించిలాళికె యాకిరి కొయిసి.
- 24 “బోదకా! జొనెమొట్ట పిల్లానె నీకిరి మొరిజిన్యే, తా బయి సే వితంతువుకు బ్యా కొరిగీకిరి మొరిజిల్లా అన్నకు సంతానం కలిగించిమాసిబులి మోసే కొయిసినీనా బులి పొచ్చిరిసి.
- 25 అంబిత్తరె ఏడుగురు బయినె గుటె కుటుంబంరె అచ్చె. అగరె రొల్లట బ్యా కొరిగీకిరి పిల్లానె నీకుంటా మొరిజీసి. ఈనె సే వితంతువుకు మొరిజిల్లాటరొ బయి బ్యా కొరిగీసి.
- 26 సాకిరాక అగరోట, తింటోట, ఏడుగురు కూడా సాకరాక తాకు బ్యా కొరిగీకిరి పిల్లానెనీకుంటా మొరిజీసి.
- 27 చివరకు సే మొట్ట కూడా మొరిజీసి.
- 28 ఈనె ఉంచినె సే ఏడుగురు సే మొట్టకు బ్యా కొరిగిచ్చెనీ, ఈనె పునరుత్తానం తరవాతరె సెయ్యె సే ఏడుగురె కాకు నైపోగా తాసి?”
- 29 యేసు తంకె సంగరె “తొముకు లేకనానె గాని పురువురొ సక్తి గాని నాజనికిరి అపార్దం కొరిగిల్లీసా.
- 30 పునరుత్తానంరె బ్య కొరిగివురొ గాని, నాకొరివురొ గాని తన్నీ. తంకె పరలోకంరె దేవదూతానెపనికిరి తాసె.
- 31 ఈనె మొరిజిల్లాళికె జీవురొ కోసం పురువు తొముకు కిర కొయిసివొ తొమె చదివిలానింతోనా? బులి సెయ్యె పొచ్చిరిసి.

32 'మియ్యి అబ్రాహాముకు పురువు, ఇస్సాకుకు పురువు, యాకోబుకు పురువు' బులి కొయిసి. మియి మొరిజిల్లాలింకు పురువు నీ, జీలాలింకాక మియి పురువు."

33 సెల్లె యే బోద సున్లాలింకల్లా ఆచ్చర్యపొడిసి.

గొప్ప ఆజ్ఞ

(మార్కు 12:28-34; లూకా 10:25-28)

34 సెల్లె యేసు సద్దూకయ్యునెరో తుండో బుజ్జిపించిసి బులి పరిసయ్యునె సునికిరి పక్కరకు అయిసె.

35 తంకె బిత్తరె జొనె దర్మసాస్త్రపండితుడు తాకు పరిక్కించిమాసిబులి ప్రస్నించిసి,

36 బోదకా! దర్మసాస్త్రమురె ఆజ్ఞానెరె కే ఆజ్ఞ ముక్కుమైలాట బులి పొచ్చిరిసి.

37 యేసు "తో బొల్ల ప్రూదయం సంగరె, తో బొల్ల ఆత్మ సంగరె, బొల్ల బుద్ధి సంగరె తో ప్రబువైలా పురువుకు ప్రేమించొండి.

38 ఎడ సాబ్బి ఆజ్ఞలకన్నా ఏ ఆజ్ఞ గొప్పిట ముక్కుమైలాట.

39 దీటో ఆజ్ఞ కూడా సాటకా, 'తోపనాక తో పొరుగుతాకంకా ప్రేమించెమంచె.'

40 మోసే దర్మసాస్త్రంరె ఈనె ప్రవక్తానెరో బోదానల్లా యే దీట ఆజ్ఞనె ఉంపరె ఆదారపొడికిరి అచ్చి."

క్రీస్తు కోసం ప్రస్తు

(మార్కు 12:35-37; లూకా 20:41-44)

41 యింగుటె సారి పరిసయ్యునె కూడిగీకిరి, యేసు పక్క అయిలాబెల్లె తంకు యాకిరి పొచ్చిరిసి,

42 "తోమె క్రీస్తు గురించి కిర బులిగిల్లిసా? సెయ్యె కా పో?" బులి పొచ్చిరిసి. "దావీదు పో" బులి కొయిసి.

43 యేసు తంకె దీకిరి ఈనె దావీదు పురువు ఆత్మసంగరె కొతలక్కిరి ప్రబూ బులి కిరుకు డక్కిసి?

44 ప్రబువు, *మోప్రబువు సంగరె తో

సత్తువునె తో గొడ్డో అగరె పొయిదిల్లాజాంక,

మో కైయిలత్తో ఆడుకు

బొసురోస్సి బులి కొయిలానీనా.

45 ఈనె దావీదు తాకు ప్రబూ బులి డక్కితల్లాబెల్లె సెయ్యె తాకు క్యాకిరి పో ఊసి? బులి తంకు పొచ్చిరిసి.

46 కేసె కిచ్చి కొయినారిసె. సే దినోదీకిరి తాకు కే ప్రస్తానె పొచ్చిరితండుకు కాకు ధైర్యం చాల్లాసి.

23

పరిసయులుకు, సాస్త్రీనెకు యేసు గద్దించివురో

(మార్కు 12:38,39; లూకా 11:43-46)

1 సే తరవాతరె యేసు మనమానె గుంపుసంగరె, సిస్యునె సంగరె యాకిరి బులిసి,

2 సాస్త్రులూనె, పరిసయ్యునె మోసే దర్మసాస్త్రంకు తంకాక బోదించితె అదికారం అచ్చిబులి కొతలగ్గిలీసె.

3 సడకు తంకె తోముకు కొయిలాటల్లా సునికిరి విదేయత సంగరె కొరొండి. ఈనె తంకె బోదించిలాట తంకె ఆచరించినంతె గనక తంకె కొరిలంచ కొరితెనాండి.

4 నాబొయినార్లా గొబిరీనె తంకె మనమానెరో కందొనె ఉంపరె లొగుసె, ఈనె తంకె సే గొబిరికు సిటికినంగిలిసంగరంకా సాయం కొర్పింతె.

5 తంకె మనమానె దిగిలాపనికిరి పైటీనె కొరుతోసె పురువురో బొట్ట వాక్యమునె రాసిగీకిరి ముండోకు అత్తోనుకు రక్కరేకునె బందిగుచ్చె, బొట్ట అంచు యాల కొన్నానె పిందిగివ్వె.

6 కద్దీనె, సబాస్త్రలాలె ముక్కుమైలా చోటునె బొసివురోబుల్నే తంకు బడే ఇస్టం.

7 సొంతనెయినై, మనమానె తంకు ఉలంగదిమ్మంచిబులి, ఈనె గురువు బులి డక్కిపించిగివురో తంకు ఇస్టం.

8 తోమె మాత్రం గురువు బులి డక్కిపించిగితెనాండి. తోమల్లా అన్న బయినె గనక "తో సాబ్బిలింకు బోదకుడు జొన్నాక."

9 ఈనె యే బూమంపరె కాకు తోమె "బో" బులి డక్కితెనాండి. పరలోకంరె తల్లా పురువు జొన్నాక తో బో.

10 సాకిరాక తోమె నాయకుడు బులి డక్కిపించిగితెనాండి. క్రీస్తు జొన్నాక నాయకుడు.

11 తొంబిత్తరె గొప్పిట తోముకు సేవకుడుపని తమ్మంచి.

* 22:44 క్రీస్తు గురించి కొయివురో

12 తాకు సెయ్యె గొప్ప కొయిగిల్లాలింకు పురువు తగ్గించిపివో. తగ్గించిగికిరి తల్లాలింకు పురువు గొప్ప కొరుసి.

వేసదారులుకు యేసు గద్దించివురో
(మార్కు 12:38-40; లూకా 20:47)

13 వేసదారులైలా సాస్త్రులూనె, పరిసయ్యునె తొముకు బడేస్త్రమ. పురువురో రాజ్యంకు మనమానె నాజనికుంటా బట్టో బుజ్జిపీలీసా. తొమె జెన్నింతో, జమ్మా బులిగిల్లాలింకు జేపించిలీనింతో.

14 రండిలింకు తొముకుఅనుకూలంగా లోపర్చిగికిరి తంకరో గొరోనుకు దోచిగిల్లీసా, దీర్గ ప్రార్థనలు కొరికిరి మనమానుకు మెప్పించిమాసిబులిగిల్లీసా గనక తొమంపరకు గొప్ప సిక్కు ఆసి. *

15 వేసదారులైలా సాస్త్రీనే, పరిసయ్యునే, తొముకు సిక్కు తప్పిని. జొనెమోపుకు తొబిత్తరె మిసిగితై దెసొనల్లా బుల్లికిరి తొప్రయత్నం కొరిలీసా. తీరా సెయ్యె మిసీలాబెల్లె తొపనాక తాకంకా దీటొంతు నరకముకు పాత్తుడుగా కొరిలీసా.

16 అంకినె నీకుంటా షొదర్లింకు బట్టోదిగదిమ్మంచిబులిగిల్లాలింకే, తొముకు సిక్కు తప్పిని. కేసైనా మందిరం ఉంపరె ఒట్టు లొగినె నస్తానీ, గుడిబిత్తరె సున్నంపరె ఒట్టు లొగినె సే ఒట్టుకు కట్టుబొడికిరి తమ్మంచి బులి తొమె కొయివో.

17 తెలివి నీలా గుడ్డిలింకె, కిర గొప్పా? సున్ననా సున్నకు పవిత్రం కొరిలా గుడినా?

18 ఈనె బలిపీటం వుంపరె ఒట్టు లొగినె, నస్తంనీ గని, నడంపరె తల్లా కానుకంపరె ఒట్టు లొగినే సే ఒట్టుకు కట్టుబొడికిరి తమ్మంచి. బులి తొమె బోదించిలీసా.

19 గుడ్డిలింకె, కిర గొప్ప? కానుకనా? సే కానుకకు పవిత్రం కొరిలా బలిపీటంనా?

20 సడకు బలిపీటంపరె ఒట్టు లొగినె, నడంపరె తల్లా సొబ్బిటంపరె ఒట్టు లొగిలాపనాకనీనా.

21 సాకిరాక మందిరం ఉంపరె ఒట్టు లొగినె, సడ ఉంపరె, తాండ్రతల్లా పురువుంపరె ఒట్టు లొగిలాపనాకనీనా!

22 సాకిరాక పరలోకంపరె ఒట్టు లొగినె సెట్టె తల్లా సింహాసనంపరె, సే సింహాసనంపరె బొసికిరితల్లా పురువుంపరె ఒట్టు లొగిలాపనాకనీనా!

23 వేసదారులైలా సాస్త్రులూనె, పరిసయ్యునే, తొమె మోసం కొరిలాలింకె. తొముకు సిక్కు తప్పిని. తొమె పుదీనా, సోపు, జిలకర్ర సొబ్బిటిరె దనమబాగం దూసా. ఈనె దర్మసాస్త్రంరె తల్లా ముక్కమైలాంచ కిరబుల్నే న్యాయం, దయ, నమ్మకత్వం, యెడానె సొబ్బి సడదీసె. అగరె సడకు నాసడుకుంటా తొమె యెడకు కొరుమాసి.

24 అంకినె నీకుంటా బట్టోదిగదిమ్మంచి బులిగిల్లాలింకే, దర్మసాస్త్రంరె అవనరం నీలా సన్నించకంకా తొముకు తొమ్మాక అనుసరించిలీసా, ఈనె అత్యవసరమైలాంచకు నాతెలిసిగీకుంటాక సడదిల్లీసా.

25 సాస్త్రులూనె, పరిసయ్యునే, తొమె మోసం కొరిలాలింకె. తొముకు సిక్కు తప్పిని. తొమె ముంతకు, పల్లెముకు దోరె బొలుకొరుసా, ఈనె బిత్తరె అత్యుస, స్వార్థము సంగరె అచ్చొ.

26 గుడ్డి పరిసయ్యునే, అగరె తొమె ముంతానెకు, పల్లెంకు బిత్తరె సుబ్రం కొరొండి. సెల్లె బయెలైంకా సుబ్రంగా తాసి.

27 సాస్త్రీనే, పరిసయ్యునే తొమె మోసం కొరిలాలింకె. తొముకు సిక్కు తప్పిని. తొమె సున్నొమరిలా సమాదులుపనాలింకె. సడ బయలుకు అందంగా దిగదూసి. ఈనె బిత్తరె మొరిజిల్లాలింకెరో పియ్యెజిల్లా అడ్డోనె పనికిరి కల్మసం దీకిరి తాసె.

28 సాకిరాక తొమె బయలుకు నీతిమంతునెపని దిగదూసా. ఈనె బిత్తరె వేసదారన, పాపం సంగరె పూరికిరచ్చొ.

యేసు తంకు సిక్కు గురించి అగుంతాక కొయివురో
(లూకా 11:47-51)

29 వేసదారులైలా సాస్త్రీనే, పరిసయ్యునె తొముకు స్త్రమ. తొమె ప్రవక్తానె సమాదులు బందికుంటా, నీతిమంతునెరో సమాదీనెకు అలంకరించిలీసా.

30 సెత్తాకనీకిరి, అమె తాత ముత్తాతనె కలొరె జీకిరి రొన్నే, తంకె దీకిరి మిసికిరి ప్రవక్తానెకు మొరదీకుంటా రొయితమ్మోనీనా.

31 ఈనె సొత్తాక తొమె ప్రవక్తానెకు మొరదిల్లా వంసముకు చెందిలాలింకె బులి అంగీకరించికిరి తొముకు తొమ్మాక సొక్కుం కొయిగిల్లీసా.

32 తొం తాత ముత్తాతలు మొదలు కొరిసె. తొమె ముగించొండి.

33 తొమె సప్పొ సంతానం పనికిరితల్లా ప్రమాదకరమైలా ద్రోహినే, నరక సిక్కు తీకిరి క్యాకిరి తప్పించిగిమాసిబులిగిల్లీసా?

* 23:14 ఏ వాక్యం మూల గ్రంథాలరె రాసికిరి సీ

34 తోమె పక్క ప్రవక్తానెకు, తెలివిలింకెకు, దర్మసాస్త్ర బోదకునెకు పొడదిల్లింబి. తంకబిత్తరె కుండెలింకు సిలువ పొగివో. ఇంకుండెలింకు సబాస్తలం సొబ్బిలింకగరె కొరడా మడ్డోనె మరిపించువో. కుండెలింకు గానె తీకిరి పొల్లిల్లాపనికిరి గొడ్డిమరుసా.

35 నీతిమంతుడైలా హేబెలు రొగొతో దీకిరి గుడికు బలిపీటముకు మొజిరె తోమె మొరిదిల్లా బరకీయ పో ఈలా జెకర్యా రొగొతో జాంక యే బూమంపరె నీతిమంతుడు వొల్లికించిలా రొగొతోకల్లా తోమ్మాక బాద్యులు.

36 యెడ సొత్తాక. యేతప్పల్లా యేతరంలింకంపరాక పొడుసి బులి కొయిలింబి.

యేసు యెరూసలేముకు ప్రేమించువురో
(లూకా 13:34,35)

37 ఓ యెరూసలేము, యెరూసలేము తువ్వు ప్రవక్తానెకు మొరదీసు పురువు తోపక్కరకు పొడదిల్లాలింకు తూ పొత్తొనె సంగరె మరిసు. కూడ తా పిల్లానుకు తా రెక్కానె తొల్లె నుచ్చిలాపని మియ్యి తో పిల్లానుకు నుచ్చిమా బులి కెత్తో సారులు ఆసించింబి. ఈనె తువ్వు అంగీకరించిలాను.

38 ఇదిగొ దిగూ, పాడియిజిల్లా తో మందిరముకు పురువు కాళీగా తోముకు సడదీసి.

39 ఉంచినె తీకిరి “ప్రబువు నారె అయిలాట స్తుతించబోడుమాసి” బులి తోమె కొయిలా జాంక మెత్తె దిగినింతోబులి తోముకు కొయిలింబి.

24

యేసు మందిరం పొడిజెవురో గురించి కొయివురో
(మార్కు 13:1,2; లూకా 21:5,6)

1 యేసు మందిరంకి నడికిరి జేతల్లాబెల్లె తా సిస్యునె అయికిరి సే మందిరంకి బందిలాట గురించి తాకు దిగదీసె.

2 సడకు యేసు, తోమె ఎడల్లా దిగిలీసానీ, ఎడ సొత్తాక. పొత్తో ఉంపరె పొత్తో నాతారుకుంటా తంకె సొబ్బి పొడుజూసి బులిసి.

స్తమానె, హింసలు
(మార్కు 13:3-13; లూకా 21:7-19)

3 ఈనె యేసు ఒలీవపొరొతో ఉంపరె బోసిరిసి. తా సిస్యునె తా పక్కరకు అయికిరి, “కోండి; ఎడ కెబ్బె కెబ్బుకు జరుగుసి? తూ అయిలా అగరె, యే యుగం అంతమైతె అగరె కిర ఆనవాలు దిగదూసి?” బులి పొచ్చురిసె.

4 యేసు యాకిరి కొయిసి. తోముకు కేసే మోసం నాకొరికుంటా జాగర్తగా టారింబి.

5 కిరుకు బుల్నే బడేమంది మో నారె అయికిరి మియ్యి క్రీస్తు బులి కొయికిరి బడేలింకు మోసం కొరివె.

6 యుద్ధాలు గురించి, యుద్ధాలు లగివురో గురించి సున్లాబెల్లె తోమె దిగులు పొడితెనాండి. ఎడ కచ్చితంగ వూసి. ఈనె అంతం ఉంచినాక అయిసి.

7 దెసొ ఉంపరకు దెసొ లగానెకు ఆసి. రాజ్యం ఉంపరకు రాజ్యం లగానెకు ఆసి. పల్లెగానె కరువునె, బూకంపాలు ఆసి.

8 ఈనె పిల్లానె జొర్నెలా బెల్లె అయిలా బొత్తానె పని తాసి.

9 సే తరవాతరె తంకె తోముకు అదికారింకెకు అప్పగించుసె. సే అదికారింకె తోముకు హింసలోక్కిరి మొరదూసె. మో నా కారంగా దెసొనల్లా తోముకు ద్వేసించుసె.

10 సే సమయంరె బడేమంది యే విస్వాసం దీకిరి తోలుగుజుసె. జోనుకు జొనె త్రునీకరించిగీకిరి, ద్వేసించిగివ్వె.

11 సారొప్రవక్తానె బడే మంది అయికిరి మనమానుకు మోసం కొరివె.

12 అదర్మము ఎక్కువైవురో వల్లరె బడేలింకెరో ప్రేమనీకుంటా యీజోసి.

13 ఈనె విస్వాసంరె ఉంచినెతీకిరి అంతము జాంక సహించిగిల్లాటాకాక రక్కన మిలివో.

14 పరలోక రాజ్యో సువార్త మనమానుకల్లా సాక్సిగా దెసొనుకల్లా ప్రకటించబోడుసి. సెత్తెలె అంతం అయివో.

బయంకరమైలా హేయ వస్తువు
(మార్కు 13:14-23; లూకా 21:20-24)

15 ఈనె ప్రవక్త ఈలా దానియేలు సంగరె కొయిలాట బయంకరమైలా హేయవస్తువు పరిసుద్దస్తలమురె టారివురో తోమె దిగిలాబెల్లె చదివిలాట గ్రహించిమాసి.

16 సెల్లె యూదయ ప్రాంతంరె తల్లా మనమానె పొరొతంపరకు పొలిజివురో బొల్ల.

17 మిద్దంపరె తల్లాట తా గొరో బిత్తురుకు జేకిరి కిచ్చి కడిగిన్నాసి.

18 బిల్లారె తల్లాట తా కొన్నానుకు కడిగితై పొచ్చుకు జెన్నాసి.

19 అయ్యో, సే దినోరె పనిదీగిల్లాలికె, పురటాలు మొట్టానుకు బడే బాద కలుగుసిని.

20 సే దినోరె బడే కొస్టాతాసి. ఈనె సిత్తోకలోరె గాని, ఈనె విస్త్రాంతి దినెరె గాని పొలిజివ్వలీసిలా గతయినాసి బులి ప్రార్థనకొరొండి.

21 స్తుస్తి ఆరంబం తీకిరి ఆజి జాంక సెత్తో కొస్టానె కెబ్బే అయిలాని. యికెబ్బుకూ యాని.

22 పురువు సే దినో లెక్క తక్కువ నాకొరినే, కేసే జీకిరి తయితెని. ఈనె పురువు సెయ్యో బచ్చిగిల్లాలికె కోసం సే దినో లెక్క తగ్గించుసి.

23 సే దినోరె తొబిత్తరె కేసన్నా, ఇదిగో దిగొండి క్రీస్తు ఎట్టె అచ్చి బులి గాని, నీనే, సెట్టె అచ్చి బులి గాని బుల్తే నమ్మితెనాండి.

24 కిరుకు బుల్తే సారొ క్రీస్తునె, సారొప్రవక్తానె అయికిరి క్రీస్తుబులికిరి, ప్రవక్తానెబులికిరి కొయికుంటా పురువు బచ్చిగిల్లా మనమానుకంకా మోసం కొరితె, బడే మహత్కార్యాలు, అద్బుతానె కొరికిరి దిగదూసె.

25 సునొండి సే కలో నాఅయిలా అగరాక తొముకు కొయిలించి.

26 ఈనె తొమె సంగరె కేసన్నా అదిగో సెయ్యో కేసేసిలా చోటురె అచ్చి బులి కొయినె సెట్టికు జేతేనాండి. ఈనె, ఎట్టె గదిరె అచ్చి బుల్తే నమ్మితెనాండి.

27 తూర్పురె జొరైకిరి పడమర దాకా మెగోరె మెరిసిలా మెరుపుపనికిరాక మనమరొ పో ఆసి.

28 మొడ కేటి తన్నే రాబందునె సెట్టె పోగైవె.

మనమరొ పో అయివురొ

(మార్కు 13:24-27; లూకా 21:25-28)

29 సే కొస్టాకలో గడిచిల ఎంట్లాక నూర్యుడు వొందారొ ఈజుసి. చంద్రుడు వెలుగు దిన్నీ. నక్కత్రాలు మెగొనెదీకిరి జొడిజివ్వె. మెగొనొ సక్తులు కదిలిజివ్వె.

30 సెల్లె మనమరొ పో అయిలీసి బులి సూచన మెగొరె దిగదూసి. బూమంపరె దెసొనల్లా దుక్కొపొడివె. మనమరొ పో మహా మహిమసక్తి సంగరె, బడే తేజస్సు సంగరె మెగొనె అయివురొ తంకె దిగుసె.

31 సెల్లె పురువు తా దూతానెకు గొప్ప బూర పుంకుకుంటా పొడదూసి. సే దూతలు బూమంపరె చారదిక్కుతీకిరి బుల్తే, సే చివర దీకిరి యేచివరదాకా బుల్లికిరి పురువు బచ్చిగిల్లాలింకు పోగుకొరివె.

అంజూరొ గొచ్చొ గురించి పటొ

(మార్కు 13:28-31; లూకా 21:29-33)

32 ఈనె ఉంచినె అంజూరొ గొచ్చొరొ పటొ సుగ్గిండి. సడ కొమ్మానె కొల్లెలా ఆకూనె అయిలసంగరాక, కొర కలో అయిలి బులి తొముకు తెలుసుగుసి.

33 సాకిరాక మియ్యి కొయిలాటల్లా దిగిలా వెంట్లాక సే* కలో తలుపు పక్కరె అచ్చి బులి తొమె తెలిసిగివ్వొ.

34 యెడ సొత్తాక. ఎడల్లా జరిగిలా జాంక యే తరంలింకె మొరిజిన్నింతె బులి కచ్చితంగా కొయిలించి.

35 బూమి, మెగొ నసించిజివ్వొ ఈనె మో కొత కెబ్బుకు నసించిజెన్నీ.

సే బయంకరమ్మెల దినో కాకు తెలిసిని

(మార్కు 13:32-37; లూకా 17:26-30,34-36)

36 సే దినెరె గురించి నీనే సే గడియరె గురించి పరలోకంరె దేవదూతలకు గాని, పోకు కాని కాకు బుజ్జిని. బోకు మాత్రమాక తెలుస్సు.

37 నోవహు కల్లె క్యాకిరి అచ్చివొ మనమరొ పో అయితల్లాబెల్లె కూడా సాకిరాక తాసి.

38 జలప్రలయంకు అగరె దినెజాంక నోవహు బొయితొ బిత్తరకు జెల్లాదినెజాంక మనమానె కైకుంట, పికుంటా, బ్యానె కొరిగీకుంటా రొయితవ్వె.

39 ప్రలయం అయికిరి తంకల్లకు కొడిగీబాజిసి జాంక తంకు బుజ్జిని. మనమరొ పో కూడా సాకిరాక నాబుజ్జికుంటా ఆసి.

40 సెల్లె దీలింకె వండ్రపోనె బిల్లారె పైటి కొరుకుంటా రొసె. జొనె కొనిగిబాజివురొ యింకొ జొనుకు సడిదివురొ ఊసి.

41 దీలింకె తిల్లాలింకె తిరగలి యిసురుకుంటా తన్నె జొనుకు కొనిగిబాజివురొ యింకొ జొనుకు సడిదివురొ ఊసి.

42 ప్రబువు కేదినొరె అయిలీసివొ తొముకు బుజ్జిని ఈనె సిద్దంగా టారింబి.

* **24:33** సే కలో బడేపక్కరైకిరి తలుపు పక్కరె అచ్చి

43 ఈనె యే విసయం తెలిసిగిండి. గొరొకు యజమాని సొరొ కెబ్బుకు ఆసివొ బుజ్జికిరి తన్నే, తా గొరొకు సొరొకు నాఅయిదీకుంటా సతనైకిరి కాపలాతాసి.

44 మనమరొ పొ కూడా తొమె నాఅరకైలా గడియకు ఆసి. ఈనె తొమె కూడా సొకిరాక సిద్దంగా తమ్మంచి.

విస్వాసంనీలా, విస్వాసం గలిగిలా సేవకుడు గురించి

(లూకా 12:41-48)

45 ఉంచినె విస్వాసము తల్లా, తెలివివైలా సేవకుడు కేసే? గొరొ యజమాని తాకు తాగొరొ పైటికురిలింకు బొల్ల సమయంరె బత్తొ దీతె లొగిసి.

46 గొరొ యజమానుడు మనమ అయిలబెల్లె సే పైటి మనమ యజమానుడు కొయిల పైటి కొరికిరి తన్నె సెయ్యె బడే దన్యడు.

47 సాకిరి కొర్లాబెల్లె మియ్యి తొముకు సొత్తాక కొయిలింబి, గొరొ యజమాని సే పైటి మనమకు తాకు తల్లా ఆస్తంపరె తాకు అదికారిగా నియమించుసి.

48 ఈనె పైటి మనమ చెడ్డాట యీనె తాబిత్తరె సెయ్యె మోగొరొ యజమాని యింక అయిని బులి మనుసురె, బులిగీకిరి

49 తా సంగరె పైటికొరిలాలింకు మరిపురొ మొదలు లొగిసి. సెత్తాకనీకిరి పీలాలింకె సంగరె మిసికిరి కైకిరి, తాసి.

50 యజమాని తా పైటి మనమ నాఎదురు దిగిలాదినె, తంకు నాబుజ్జిలా సమయంరె అయివొ.

51 తాకు ముక్కలు కొరికిరి నరకం బిత్తరె పొక్కదూసి. సే నరకంరె వేనదారులల్లా కందికుంటా దంతొనె కమిడిగీకుంటా బాదకు అనుబవించుసి.

25

దొస్త దిండపిల్లానెరో ఉపమానం

1 పురువు రాజ్యంరె యాకిరి రొవ్వొ, దొసిలింకె దిండానె తంకె తంకరొ బొత్తినె దరిగీకిరి బ్యాబొరుకు మిసిగిత్తే జెల్లాలింకు పొలికిరచ్చి.

2 తంకె బిత్తరె పంచిలింకె తెలివినీలాలింకె; పంచిలింకె తెలిసిగల్లాలింకె.

3 తెలివినీలా దిండానె బొత్తినె దరిగీకిరి జేసి. ఈనె తంకసంగరె తెల్లొ దరిగీకిరిజెల్లానింతె.

4 తెలివిరొల్లా దిండానె తంకె బొత్తినె పాటు సీసానై తెల్లొ కూడా దరిగీకిరి జేసి.

5 బొరొ అయితె ఆలన్యం ఈసి. సొబ్బిలింకె కునికిపాటుసంగరె గుమ్మా అయికిరి గుమ్మిజీసె.

6 మొజరత్తిరె గుట కేక సుందిసి, ఇదిగొ బొరొ అయిసి, అయికిరి మిసిగిండి బులి.

7 వెంట్రాక సే దొసిలింకె దిండానల్లా ఉటికిరి తంకె బొత్తినె సరికొరిగిచ్చె.

8 ఈనె తెలివినీలా దిండానె అం బొత్తినై తెల్లొ అల్లా యీజేసి తొ తెల్లొ కుండె అముకు దేండి బులి తెలివిగల్లా దిండానుకు మగిసి.

9 తెలివి గల్లా దిండానె, యే తెల్లొ అముకల్లా సారిపొడినీకివొ, కొట్టుకు జేకిరి తొ కోసం తెల్లొ గినిగీకిరి అయిండి బులి కొయిసి.

10 ఈనె తంకె తెల్లొ గినిగిఅయితే జెల్లాబెల్లెకు బొరొ అయిసి. సిద్దంగా తల్లా పంచిలింకె దిండానె బ్యాకద్దీనుకు తాదీకిరి మిసికిరి బిత్తురుకు జేసి. సేతర్వాతరె తట్టినె పొగిపీసె.

11 తల్లా దిండానె అయికిరి బో, బో, తలుపు పిటు బులి బొట్ట కేకానె పొగిసె.

12 ఈనె సెయ్యె మియ్యి సొత్తాక కొయిలింబి; తొమె కేసెవో మెత్తె తెలిసిని బులి కొయిసి.

13 తొముకు సే దినొ, సే సమయం కెబ్బుకు ఆసివొ తెలిసిని గనక సిద్దపొడికిరి టారైంబి.

తిల్లింకె సేవకునెరో ఉపమానం

(లూకా 19:11-27)

14 పురువురొరాజ్యం యాకిరి అచ్చి, జొనె మనమ దూరుదెసాకు ప్రయానం జేకుంటా తా సేవకుడుకు డక్కికిరి తా ఆస్తికు అప్పగించిలా యజమానుడుకు పొలికిరచ్చి.

15 జొనుకు పాటవెయ్యి సున్న నానేలు దీసి. యింకజొనుకు దీటవెయ్యి సున్ననానేలు, తింటో మనమకు గుటవెయ్యి సున్న నానెం. తంకు తంకె సామర్థ్యం దిక్కిరి దీసి. సే తరవాత ప్రయానం కొరిసి.

16 పాట వెయ్యి సున్న నానేలు పొందిలా మనమ వెంట్రాక జేకిరి సే పలియసంగరె బొజొకొరికిరి యింకా పాట వెయ్యి సున్ననానేలు సంపాదించిసి.

17 సాకిరాక దీట వెయ్యి సున్న నానేలు పొందిలాట జేకిరి యింకా దీట తలాంతులు సంపాదించిసి.

18 ఈనె గుట్టె వెయ్యి సున్న నానేలు పొందిలాట జేకిరి గుటె గత్తో కులికిరి తా యజమాని దిల్లా గుట్టె కూడా గత్తోరె నుచ్చిదీసి.

19 బడేకలో తరవాతరె సే సున్న నానేలు దిల్లా సేవకునెరో యజమానుడు అయికిరి లెక్కలు దిగిసి.

20 పాట వెయ్యి సున్న నానేలు పొందిలా మనమ యింకా పాట వెయ్యి సున్న నానేలు దన్నెకిరి బో, తూ మెత్తె పాటవెయ్యి సున్న నానేలు దీసు. నడనంగరె మియ్యి ఇంకా పాటసోయి సున్న నానేలు సంపాదించించి దిగు బులిసి.

21 సే యజమాని యాకిరి కొయిసి బడే బొట్టె పైటి కొరిసు తోబితైరె బొట్టెగునో, విస్వాసం అచ్చి. తువ్వ్య కొంచెమురె నమ్మకంగా పైటి కొరిసు. గనక మియి తొత్తె బడేంచంపరె బొడొమనమగా కొరుంచి. తో యజమాని నంగరె మిసికిరి సంతోసంకు బంటిగును బులి కొయిసి.

22 దీట వెయ్యి సున్న నానేలు పొందిలా మనమంకా అయికిరి, బో, మెత్తె దీట వెయ్యి సున్న నానేలు దీసు. మియి యింకా దీట సంపాదించించి దిగుబులి బులిసి.

23 సే యజమాని, బొట్టె పైటి కొరిసు తోబితైరె బొట్టెగునో, విస్వాసం అచ్చి. తువ్వ్య కొంచెమురె నమ్మకంగా పైటి కొరిసు గనక తొత్తె యింకా బడేంచంపరె అదికారిగా కొరుంచి, తో యజమానినంగరె మిసికిరి సంతోసంగా తా బులిసి.

24 సెల్లె గుట్టె వెయ్యి సున్న నానేలు పొందిలా మనమ అయికిరి బో, తూ బొట్టెనీబులి మెత్తె తెలుసు. విత్తనం నాపొగిలా చోటురె తూ కట్టును బులి, నా జల్లిలాచోటురె పచ్చకు పోగు కొరిలాట బులి.

25 సడకు మియి డొరికిరి తో సున్న నానేలు దనిగిజేకిరి బూమిరె నుచ్చిదీంచి. ఇదిగో తోట తూ కడుగును బులి కొయిసి.

26 సడకు సే యజమాని, తా నంగరె తూ బద్దకం మనమ, చెడ్డ దాసుడు మియి నాపొగిలా చోటురె కట్టిలాట, విత్తనం నాజల్లిలా చోటురె పొగుకొరిలాట బులి తొత్తె తెలుసునా?

27 సాకిరి కొరికిరి తన్నే మో పలియ వడ్డిలింకు పక్కరె సడదిన్నే మీ అయికిరి వడ్డిసంగరెసహా కడిగింతా బులికిరి,

28 తా పక్కరె తల్లాటకు కడిగికిరి దొస్టవెయ్యి సున్న నానేలు తల్లాటకు దీసి.

29 రొల్లా ప్రతిమనమకు యింకా బడేంచదూసి. సెయ్యె సమ్ముద్ది కలిక్కిరితాసి. ఈనె నీలాట పక్కరెదీకిరి తాకు తల్లాటకుండాంక కడిగివురో ఊసి.

30 ఈనె సే నాపైటికైలా దాసుడుకు బయలై వొందారై పొక్కదేండి. సెట్టె కందికుంటా, దంతోనె కముడుకుంటా తాసి బులిసి.

అంతిమ తీర్పు

31 తేజోవంతుడైలా మనమరొ పో తా దేవదూతల నంగరె మిసికిరి ఆసి. అయికిరి తేజోవంతమైలా తా రొజా సింహాసనం ఉంపరె బొసురుసి.

32 సెల్లె సాబ్బిదెసొనొ మనమానుకు పోగు కొరికిరి తా అగరె తారదీపించుసి. సెల్లె జొనె గొర్రీనె జొగిలోతా తా మందరె మేకనెకు, గొర్రీనుకు వేరు కొరిలాపనికిరి దీట గుంపునెగా కొరుసి.

33 సే తా నీతిమంతునెకు కైలత్తో ఆడుకు, బాఅత్తో ఆడుకు కు మిగిల్లాలింకు తల్లాపనికిరి తారొపించుసి.

34 సెల్లె రొజా తా కైయిలత్తాడుకు తల్లాలింకెసంగరె, మో బోరో ఆసిర్వాదంకు పొందిగిల్లాలింకే. తొమె అయిండి, అయికిరి లొకొకు పునాది పొగిలాబెల్లాక తొం కోసం సిద్ధపరిచిలా రాజ్యంకు రొయిదికిరి ఆంచి అయికిరి కడిగిండి.

35 కిరుకుబుల్నే, మియి బొక్కొనంగరె తల్లాబెల్లె తువ్వ్య మెత్తె కద్దిదీసా. గొలారిలబెల్లె తువ్వ్య మెత్తె పనిదిసా. పరదేసియునిగా తో పక్కరకు అయిలాబెల్లె తొమె మెత్తె ఆతిద్యం దీసా.

36 కొన్నానె కావలిసిలాబెల్లె తొమె మెత్తె కొన్నెదిసా. జబ్బుసంగరె తల్లాబెల్లె తొమె మెత్తె సేవ కొరుసా. మియి చెరసాలరె తల్లాబెల్లె అయికిరి పలకరించుసా బులి కొయిసి.

37 సెల్లె నీతిమంతునె, ప్రబూ, తువ్వ్య బొక్కొనంగరె తల్లాబెల్లె అమె కెబ్బె తొత్తె కద్ది దీంచో? తువ్వ్య గొలారిలబెల్లె తొత్తె పనికెబ్బె దీంచో?

38 తువ్వ్య పరదేసియునిగా కెబ్బె అయిసు? తొముకు కెబ్బె ఆహ్వానించించో? తొత్తె కెబ్బె కొన్నానె కావాలిబులికిరి అయిసు? కొన్నానె తొత్తె కెబ్బెదీంచో?

39 తువ్వ్య నాబొల్లరొకిరి రొల్లాబేల్లె అమె కెబ్బె దిగించో? తువ్వ్య చెరసాలరె కెబ్బె అచ్చు? తొముకు దిగితె కెబ్బె అయిచో? బులి పొచ్చిరిసె.

40 సే రొజా, ఎడ సొత్తాక. హీస స్తితిరె తల్లా మా బయినుకు తొమె కొరిల ప్రతి సాయము మెత్తె కొరిలాపనాక బులిగుంచి బులి జవాబు కొయిసి.

41 సే తరవాతరె సే రోజా తల్లాలింకు దిక్కిరి సాపగ్రస్తులింకె, మెత్తె సడికిరి జాండి! సాతానుకు, తా దూతలకు సిద్దం కొరిలా నిత్యమూ పుడ్డెతల్లా నియ్యబిత్తురుకు జాండి.

42 కిరుకుబుల్చే, మియి బొక్కొనంగరె తల్లాబెల్లె తోమె మెత్తె కద్ది దిల్లానింతో. గొలారిలబెల్లె తోమె మెత్తె పీతె పనిదిల్లానింతో.

43 మియి పరదేసిగా అయిలబెల్లె తోమె మెత్తె ఆహ్వనించిలానింతో. మెత్తె కొన్నానె కావలిసిలాబెల్లె తోమె కొన్నానె దిల్లానింతో. మియి జబ్బునంగరె చెరసాలరె రొల్లాబెల్లె తోమె మెత్తె సేవకొరిలానింతో బులి కొయిసి.

44 సెల్లె తంకె కూడా, ప్రబూ తువ్వు బొక్కొనంగరె గాని, ఈనె గొలారిల సంగరె రొల్లాబెల్లె కాని, ఈనె పరదేసియునిగా కాని, ఈనె జబ్బునంగరె చెరసాలరె తల్లాపని కెబ్బె దిగించో? సాకిరి దిక్కిరి కూడా తోముకు కెబ్బె సాయం కొరిలానింతో? బులి కొయిసె.

45 ఈనె, ఎడ సాత్తాక. దీనస్తిదితిరె తల్లా జొసుకన్నా తోమె సాయం కొర్నే సెల్లె మెత్తె సాయం కొరిలాపనాక బులి కొయిసి.

46 ఈనె “అంకె జేకిరి నిత్య సిక్కుకు అనుబవించివె. ఈనె నీతిమంతునె నిత్యజీవంకు జోసే.”

26

మనమానె గుంపు యేసు వ్యతిరేకంగా అయివురో

(మార్కు 14:1; 2; లూకా 22:1; 2; యోహాను 11:45-53)

1 సెల్లె యేసు తా బోదకు ముగించిలా తరవాతరె సిస్యనె సంగరె యాకిరి కొయిసి.

2 “దీట దినె తరవాతరె పస్కాపారువో అయిలబెల్లె తోముకు బుజ్జును. సెల్లె మనమరో పోకు సిలువ పొగితె అప్పగించుసె” బులి కొయిసి.

3 ప్రదానయాజకూనె, బొడిలింకె, కయప బులి డక్కితల్లా ప్రదానయాజకుడురో బవనం అగరె చేరిగిచ్చె.

4 యేసుకు తంకె కిరో గుట్టె కుట్టనంగరె బందించికిరి మొరదిమ్మంచిబులి కాకూ మాయోపాయం కొరుసె.

5 “ఈనె పారువో దినెరె నాబులి, సాకిరి కొర్నే మనమానె కొలీనె ఊసె” బులి బులిగిచ్చె.

బేతనియరె యేసుకు తెల్లొప్పొక్కిరి అబిసేకించువురో

(మార్కు 14:3-9; యోహాను 12:1-8)

6 యేసు బేతనియరె కుస్తురోగైకిరి బొల్లెజిల్లా సీమోను గొరె అచ్చి.

7 యేసు కద్దికైతండుకు బొసిరికి తల్లాబెల్లె జొనె మొట్ట * చలువరాతిబుడ్డిరె బడె కరిడైల అత్తరు సంగరె సెయ్యె పక్కరకు అయికిరి తా ముండొవుంపరె అత్తరు పొగిసి.

8 యెడ దిక్కిరి సిస్యనెకు రగో అయిసి “కిరుకు యాకిరి వ్యర్థంకొరును? బులి పొచ్చిరిసె.

9 ఏ అత్తరు బడె బూతు బిక్కికిరి సే పలియ బీదలింకు దివ్వలిసిలాట” బులి తంకె కొయిసె.

10 యేసు ఏ వినయం తెలిసిగికిరి, తంకు యాకిరి కొయిసి “తాకు కిరుకు బులిసా? సెయ్యె మోకోసం బొట్ట పైటి కొరిసి,

11 బీదలింకె కెబ్బుకు తొనంగరె రొసె. ఈనె మియి తొనంగరె కెబ్బుకు తొ సంగరె తన్నిని.

12 సెల్లె యేసు సెయ్యె సే అత్తరు మో దేంపరె వోడదీకిరి మెత్తె సమాది కొరితె తయారు కొరిసి.

13 ఎడ సాత్తాక యే సువార్తకు లొకొరె కే చోటురె కొయినెను సెయ్యె గురుతుకు ఆసి. సెయ్యె కొరిలాట కూడా కొయిగుచ్చె” బులి కొయిసి.

యేసుకు అప్పకొయితె యూదా వొప్పిగివురో

(మార్కు 14:10,11; లూకా 22:3-6)

14 సె తరవాతరె పన్నెండుగురు బిత్తరె యూదా ఇస్కరియోతు ప్రదానయాజకూనె పక్కరకు జేసి.

15 “తాకు తో అప్పగించినె తోమె మెత్తె కిరదూసా?” బులి ప్రదాన యాజకూనెకు పొచ్చిరిసి. తంకె ముపై వెండి కాసులు లెక్కకొరికిరి దీసె.

16 సెల్లెదీకిరి యూదా తాకు దరికిరి దిమంచెబులి సరైలా సమయం కోసం ఎదురు దీగిలీసి.

యేసు తా సిస్యనె సంగరె పస్కా కద్దికు కయివురో

(మార్కు 14:12-21; లూకా 22:7-13,21-23; యోహాను 13:21-30)

* 26:7 అల్పస్థురు బుల్లా మ్రుదువైలా పొత్తోరో సంగరె కొర్లా విలువైలా గుట సీసా

17 నాపులిసిల రొట్టినె కైలా పొరొవొ దినె అయిసి. సే పొరై తొలిదినె సిస్యనె యేసు పక్కరకు అయికిరి, పస్కాపొరువొ కద్దినె కేటె తయారు కొరుబులును? బులి పొచ్చిరిసె.

18 యేసు యాకిరి జవాబు కొయిసి, పట్టుం బిత్తురుకు మియి కొయిల మనమ పక్కరకు జాండి తాసంగరె మో సమయం పక్కరకు అయిసి. మియి మొ సిస్యనె సంగరె మిసికిరి పస్కాపొరువొ కద్ది తొ గొరై కొరిమంచె బులిగిలించొ బులి అం గురువు కొయిసి బులికిరి బులి కోండి.

19 సిస్యనె యేసు కొయిలాపనికిరి పస్కాపొరువొ కద్ది సిద్దం కొరిసె.

20 సొంజయిలబెల్లె యేసు పన్నెండు లింకె సంగరె మిసికిరి కైయితందుకు బొసిరిసె.

21 సొబ్బిలింకె కైతల్లాబెల్లె యేసు తంకె సంగరె “తొబిత్తరె జొనె మెత్తె దరిపించుసి” బులి కచ్చితంగా కొయిసి.

22 తంకు బాద కలిగికిరి ప్రతి జొనె తంసంగరె, “ప్రబూ, మీ నా” జొనె తరవాతరె జొనె పొచ్చిరిసె.

23 యేసు సమాదానం కొయికుంటా, “మోసంగరె మిసికిరి గిన్నెరె రొట్టె ముంచులాటాక మెత్తె అప్పకొరుసి.

24 మనమరొ పొ లేకనాలై రాసికిరితల్లాపనికి మొరుజూసి. ఈనె మనమరొపొకు అప్పకొయిలా మనమకు బడేకస్టా కలుగుసి. సెయ్యె నాజొన్నైకిరి తన్నే బొల్ల” బులి కొయిసి

25 సెల్లె సెయ్యె ద్రోహం కొరిల యూదా, బోదకుడా “మియ్యినా” బులి పొచ్చిరిసి. యేసు, తువ్వు కొయిలాపనికిరాక బులిసి.

ప్రబు రత్తిరొ కద్ది

(మార్కు 14:22-26; లూకా 22:14-20; 1 కొరింది 11:23-25)

26 తంకె కైతల్లబెల్లె యేసు గుట రొట్టె కడికిరి క్రుతజ్ఞతాస్తుతులు అర్పించికిరి నడకు బంగికిరి సిస్యనెకు దీకుంటా, “ఎడ కడిగీకిరి కాండి! ఎడ మో దే” బులి కొయిసి.

27 సే తరవాతరె పాత్రకు కడిగీకిరి క్రుతజ్ఞతాస్తుతులు అర్పించికిరి తంకు దీకుంటా, “సొబ్బిలింకె ఎ పాత్రరె తల్లాట ప్పిండి.

28 యెడ మో రొగొతో. సొబ్బిలింకు కోసం పాపక్కమాపన నిమిత్తం చిందించులా పురువురొ నిబందన రొగొతో.

29 ఆజిదీకిరి మో బో రాజ్యంరె తొసంగరె మిసికిరి ఎ నాట ద్రాక్కరసంకు యింకాపీలా జాంక పినీబులికిరి తొసంగరె నిచ్చయంగా కొయిలించి”

30 సెల్లె తంకె కీర్తనకు గైకుంట ఒలీవపొరొతో వుంపరకు జేసె.

పేతురు సొరొకొతాలగుసి బులి యేసు అగరాక కొయివురొ

(మార్కు 14:27-31; లూకా 22:31-34; యోహాను 13:36-38)

31 సే తరవాతరె యేసు తంకె సంగరె, “ఎ రత్తిరె తొమె మో కారనం వల్లరె చెదరిజూసా. కిరుకుబుల్చే, మియి గొర్రినె జొగిలాటకు మరుంచి సెల్లె మందరొ గొర్రినె చెదిరిజొనె బులి రాసికిరి అచ్చి.

32 ఈనె మియి మొర్నొదీకిరి ఉటిలబెల్లె తొకన్నా అగరె గలిలయకు జొంచి” బులి కొయిసి.

33 పేతురు, “సొబ్బిలింకె తొత్తె నడికిరి జెన్నెను మియి మాత్రం తొత్తె నడికిరి జెన్ని” బులి సమాదానం కొయిసి.

34 యేసు, “ఎడ సొత్తాక. యే రత్తికి కూడ నాడక్కిలా అగరె మియి కేసెవొ బుజ్జినీబులి తింటసారి కొయివు” బులి పేతురుకు సమాదానం కొయిసి.

35 ఈనె పేతురు, “మియి తొసంగరె మిసికిరి మొరుజున్నన్నా, తువుకెసొ మెత్తె బుజ్జినీబులి కొయినీ” బులి బులిసి. సిస్యనె సొబ్బిలింకె సాకిరాక కొయిసె.

గెత్తేమనే బుల్లా తొటరె యేసు ప్రార్థన

(మార్కు 14:32-42; లూకా 22:39-46)

36 సే తరవాతరె యేసు సిస్యనె సంగరె మిసికిరి గెత్తేమనే బుల్ల సొటుకు జేసి. తంకె సంగరె, “ఎట్టె బొసురొండి. మియి కుండెదూరు జేకిరి ప్రార్థనకొరుంచి” బులి కొయిసి.

37 యేసు పేతురుకు, జెబెదయి దీలింకె పొనె తా పొచ్చాడె డక్కిగీకిరి జేసి. సెయ్యె దుక్కొసంగరె, కలతసంగరె పూరికిరచ్చి.

38 సెల్లె సెయ్యె తంకసంగరె, “మో ఆత్మ మొర్నొ వేదన పొడిలీసి. ఎట్టె తయికిరి మోసంగరె పాటు సతనైకిరి టారింబి” బులి కొయిసి.

39 యేసు యింకా కుండె దూరు జేకిరి సొస్థంగపొడికిరి, “మో బో! సాద్యమైసె దుక్కొసంగరె పూరిలా యే పాత్రకు మో పక్కరె దీకిరి కడిపె! ఈనన్నా నెరవేరవలిసిలాట ఎడ మో ఇస్థంనీ, తొ ఇస్థం సంగరాక” బులికిరి ప్రార్థించిసి.

40 సే తరవాతరె బులిక్కిరి అయికిరి సిస్యనె గుమ్ముకుంటా తవ్వరో గమనించినె. సెయ్యె, “మోసంగరె మిసికిరి గుటె గంట సేపంకా సతనైకిరి రొన్నారిసోనా?” బులి పేతురుకు పొచ్చిరిసి.

41 తోమె సోదనరె నాపొడుకుంటా “సెతనెసికిరి రొయికిరి ప్రార్దనకొరొండి! ఆత్మ సిద్ధమాక ఈనె దేరె బలహీనంగా అచ్చి!” బులి పేతురు సంగరె కొయిసి.

42 సెయ్యె దీటోసారి జేకిరి, “మో బో! ఎ ప్రమ బుల్లా పాత్రరె తల్లాట పీమాసిబులి తన్నే మియి సడకు పూంచి. తో ఇస్టమాక నెరవేరిమాసి!” బులి ప్రార్దన కొరిసి.

43 సెయ్యె ఇంగుటె బులికిరి అయికిరి తా సిస్యనె యింకా గుమ్మికిరి రొవురో దిగినె. అంకీనె బరువైవురోవల్లరె తంకె గుమ్ము ఆపిగిన్నారిసె.

44 సెయ్యె తింటసారి తంకు సడికిరి అగరె ప్రార్దదించిలవనిక యింకా ప్రార్దనకొరిసి.

45 సే తరవాతరె తా సిస్యనె పక్కరకు అయికిరి, “తోమెయింకా గుమ్మిలిసానా, విస్త్రాంతి కడిగిల్లిసానా? దిగొండి! మనమరో పో పాపాత్మునెకు అప్పగించిల గడియ పక్కరకు అయిసి బులి కొయిసి.

46 యింకా జెమ్మా, ఉటండి. అదిగో! మెత్తె అప్పగించిలాట అయిలీసి” బులి కొయిసి.

యేసుకు బందించువురో

(మార్కు 14:43-50; లూకా 22:47-53; యోహాను 18:3-12)

47 సెయ్యె కొతలకుంట రొల్లాబెల్లె పన్నెండుగురు బిత్తరె జోనె యూదా అయిసి. ప్రదానయాజకూనె, ప్రజాప్రముకునె పొడదిల్లా బోడుమనమానె గుంపు గుటె తంకె పొచ్చడె అయిసి. తంకె అత్తొనై కత్తినె, బడ్డినె, బల్లెలు సంగరె అయిసి.

48 సే అప్పగించిలాట, “మియి జేకిరి కాకు చుమ్మో లొగుంచువో, తాకు బందించొండి!” బులి అగరాక గుటె గుర్తు దీసి.

49 యూదా వెంట్రాక యేసు పక్కరకు జేకిరి, గురువు బులి “వందనము కొయికిరి” తాకు చుమ్మోలోగ్గిచ్చి.

50 యేసు, “స్నేహితుడా! తువ్వ కొరితె అయిల పైటి కొరు” బులి కొయిసి. వెంట్రాక కుండెలింకె మనమానె అగురుకు అయికిరి తాకు దరిగీకిరి బందించినె.

51 యేసు సంగరె రొల్లాలింకె బిత్తరె జోనె వెంట్రాక తా కత్తికు వరదికిరి కడికిరి, ప్రదానయాజకుడురో పైటి మనమరో కన్నె అనిపేసి.

52 యేసు, తో “కత్తికు వరబిత్తరె లొగ్గి కత్తిట్టెక్కిల మనమా సే కత్తినంగరాక మొరుజొసి.

53 మియి మో బో సహాయం కావాలబులి మగినారిబుగిల్లిసోనా? మియి మగిల వెంట్రాక పన్నెండు గుంపునె కన్నా బడెలింకు దేవదూతానెకు పొడిదిన్నీనా?

54 మియి సాకిరి కొరినె యాకిరి జరిగిమంచెబులి లేకనాలై రాసిలాట క్యాకిరి నెరవేరుసి?” బులి కొయిసి.

55 సే తరవాతరె యేసు అయికిరి, మనమనెసంగరె, “దోపిడి సారొకు దరిగిత్తె అయిలాపనికిరి కత్తినె సంగరె, బడ్డినె సంగరె అయిసాకిరా? మందిరంరె ప్రతిదినె బోదించించి. ఈనె సెల్లె తోమె మెత్తె బందించిలానింతో

56 ఈనె, ప్రవక్తానె రొంతిలంచ నెరవేరిమంచెబులి ఎడల్లా జరిగినె” బులి కొయిసి. వెంట్రాక సెయ్యె సిస్యనె సొబ్బిలింకె తాకు సడికిరి పొలిజినె.

యేసుకు మహాసబ అగరె లొగివురో

(మార్కు 14:53-65; లూకా 22:54-55,63-71; యోహాను 18:13; 14:19-24)

57 తంకె యేసుకు బందించిలా ప్రదానయాజకుడైలా కయప పక్కరకు కొడిగీకిరి జేసె. సెట్టె సాస్తీనె, బొడిలింకె అగరాక కొడిగీకిరి అచ్చె.

58 ఈనె పేతురు కుండె దూరు తీకిరి యేసుకు ప్రదానయాజకుడురో గొరొ జాంక పొచ్చాడెసి. గొరొబిత్తరె కెర జరిగిలీసివో దిగిమంచెబులి బటునె సంగరె మిసికిరి గొరొ దోరె టారిసి.

59 మొర్నొసిక్కు విదించిమంచిబులిగీకిరి ప్రదానయాజకూనె, మహాసబలింకె యేసుకు ప్రతికూలంగా, సారొసాక్య్య కోసం దిగినె.

60 బడె మంది సార సాక్య్య కొయితె అగురుకు అయిసె. ఈనె మొరిదితె సారిల సాక్య్యం మిల్లనీ. చివరకు దిలింకె మనమనె అగురుకు అయిసె.

61 తంకె యాకిరి కొయిసె, “ఎ మొపో ‘మియి పురువురో గుడికు నాసనం కొరికిరి తింట దినై యింకా బందిపారి’ బులి కొయిసి.”

62 సెల్లె ప్రదానయాజకుడు ఉటికిరి టారికిరి యేసు, అంకె కొరిలా నేరారోపనకు తువ్వ సమాదానం కొయినూనా? బులి పొచ్చిరిసి.

63 ఈనె యేసు జవాబు కొయిలాని. ప్రదానయాజకుడు, “నజీవుడైలా పురువుంపరె ప్రమానం కొరికిరి కో, తువ్వు పురువు పోయిలా క్రీస్తునా?” బులి పొచ్చిరిసి.

64 యేసు జవాబు కొంకుంటా, “వై! తువ్వు బుల్లాట సొత్తాక. తొసంగరె కొయిలాట కిరబుల్నే యింక అగరె దీకిరి మనమరొ పో గొప్పఅదికారం సంగరె సెయ్యె కైయిలత్తొ ఆడుకు బోసిరికిరి రొపురొ ఆకాసమంపరొ మెగొనై అయిపురొ తొమె దిగుసో” బులి కొయిసి.

65 ఎడ సునికిరి ప్రదానయాజకుడు తా కొన్నానె సిరిగీకిరి, యెయ్యె దైవదూసన కొరిలీసి. పొదరిలింకె సాక్సినె కిరుకు? దిగొండి సెయ్యె పురువుకు దుసింబిలాట సునిసోనీనా!

66 ఈనె తొమె కిరబులిగిలిసో? బులి పొచ్చిరిసి. “తాకు మొర్పొదండన పొగిమంచెబులి” తంకె సమాదానం కొయిసె.

67 తంకె కుండెలింకె తా మూ ఉంపరె సెప్పొ పొక్కిరి మరిసె. ఈనె కుండెలింకె తాకు చెంప అంపరె మరికిరి.

68 “ఓ క్రీస్తు! తొత్తె కేసె మరిసెవో కనుగును” బులి పొచ్చిరిసె.

పేతురు యేసు కేసో తెలుసునీ బులి కొయిపురొ
(మార్కు 14:66-72; లూకా 22:56-62; యోహాను 18:15-18,25-27)

69 ఎట్టె పేతురు బయిలై బోసిరికిరి తల్లాబెల్లె జొనె ప్రదానయాకుడొరొ పైటి మొట్ట తాపక్కు అయికిరి, “తువ్వు కూడా గలిలయుడైలా యేసుసంగరె తల్లా మనమాకనీనా?” బులి పొచ్చిరిసి.

70 ఈనె సెయ్యె తంకెల్లా అగరె, “తువుకిర కొతలగిలిసివో మెత్తె బుజిని!” బులి కొయిసి.

71 సె తరవాతరె తంకె అల్లా సెటి దికిరి ద్వారం పక్కరకు జేసె. సెట్టె తాకు యింకోదాసి పిల్ల దీకిరి, సెట్టెతల్లా మనమానె సంగరె, “యే మోపొ, నజరేయుడైలా యేసుసంగరె తల్లాటాకనీనా!” బులి కొయిసి.

72 పేతురు ఒట్టులోగికిరి యింకా సెయ్యె తా కొతానుకు నిబులికిరి, “మెత్తె నే మనమా కేసెవో బుజిని!” బులి కొయిసి.

73 కుండె సేపైలా తరవాతరె సెట్టె టారికిరి తంకె పేతురు పక్కరకు అయికిరి, “సొత్తాక తువ్వాక తంకబిత్తరె జొన్నాక. తొ కొతాతీరు దిగితన్నే గలలీయుడురె జొనె బులి తెలివైలీసి” బులి కొయిసి.

74 సెల్లె పేతురు సొత్తాక కొయిలింబి బులిసి. సెయ్యె పురువుంపరె ప్రమానం కొరికుంటా, “నే మనమ కేసెవో మెత్తె తెలిసిని” బులి కొయిసి. వెంట్రాక కూడ డక్కిసి.

75 “కూడ నాడక్కిలా అగరె మియి కేసెవో తెలిసినిబుల్లా కొత తినిబెల్లె బులుసు బుల్లా కొతా పేతురుకు జ్ఞాపకం అయిసి” పేతురు బయలుకు జేకిరి బొట్టగా కందిసి.

27

పిలాతు పక్కరకు యేసు

(మార్కు 15:1; లూకా 23:1,2; యోహాను 18:28-32)

1 సొక్కలైలాబెల్లె ప్రదానయాజకునె, బొడిలింకె సొబ్బిలింకె కూడికిరి యేసుకు మొరదితే నిర్నయించిగిచ్చె.

2 తంకె తాకు బందించి కొడిజేకిరి రోమా ప్రదానఅదికారియాల పిలాతుకు అప్పగించిసె.

యూదారొ మొరొనొ
(అప్టొ 1:18; 19)

3 యేసుకు అప్పగించిలా యూదా యేసుకు మొర్పొసిక్కు నిర్నయించించిసె బులి జనికిరి బాదపొడిసి. మనుసు మార్పిగికిరి సెయ్యె కడిగిల్లా ముప్పై వెండినానేలు ప్రదానయాజకునెకు, బొడిలింకె బులికిరి దిపికుంటా,

4 “మియి కే తప్పు నాకొల్లా మనమరొ రొగొతోకు అప్పకొయికిరి పాపం కొరించి. నే అమాయిడుకు మొర్పొకు అప్పగించించి” బులి కొయిసి. తంకె, “నడ తో కొలి అముకు సంబందం నీ” బులి బాజాబులి కొయిసె.

5 యూదా సే పలియకు దేవాలయంరె పొక్కదీకిరి, జేకిరి ఉరి పొగ్గిచ్చి.

6 ప్రదానయాజకులూనె సే వెండి నానేలు కడిగికిరి, “యెడ మనమకు మొరదితే రొగొతో దీకిరి గినిలా పలియ ఈనె యే పలియకు కానుకానెపెడిరె పొగివురొ బొల్లనీ” బులి కొయిసి.

7 తంకె ఆలోచించికిరి సే పలియసంగరె పరదెసారె తల్లాలింకె బుజ్జదీతెపైటికైలాపనికిరి జొనె కుమ్మరి మనమరొ పొలముకు గినిసె.

8 నడకు ఉంచునుకు కూడా “రొగొతో బూమి” బులి కొయివె.

9 నడసంగరె “తంకె ముప్పై వెండి నానేలు కడిగికిరి ఇస్రాయేలు మనమానె తా కోసం యిర్మీయా ప్రవక్త సంగరె పురువు పలికిలా యే కొతానె నెరవేరిసె.

10 ప్రబువు ఆజ్ఞాపించిలపనికిరి తంకె సే పలియసంగరె కుమ్మరి పొలముకు గినిసె.”

యేసుకు పిలాతు ప్రస్నించివురో

(మార్కు 15:2-5; లూకా 23:3-5; యోహాను 18:33-38)

11 యేసు రోమా ప్రదాన అధికారియాలా పిలాతు అగరె టారిసి. సెయ్యె “తూ యూదునెరో రోజానా?” బులి యేసుకు పొచ్చిరిసి. “తూ కొయిలాట సొత్తాక” బులి సే కొయిసి.

12 ప్రదానయాజకూనె, బోడిలింకె తాంపరె తప్పు పొగిలాబెల్లె కూడా కిచ్చి కొయిలాని.

13 సెల్లె పిలాతు, “తంకె తో ఉంపరె ఎత్తె నేరమూనె మోపిలీసెనీ తువ్వు సునువురోనీనా?” బులి పొచ్చిరిసి.

14 యేసు తువ్వు గుటె కొతకు కూడా జవాబు కొయిలాను. సడకు పిలాతు బడె ఆచ్చర్యపొడిసి.

యేసుకు మొర్సొకు అప్పగించివురో

(మార్కు 15:6-15; లూకా 23:13-25; యోహాను 18:39-19:16)

15 పొరువొ దినోనె మనమానె కోరిలా జొనె నేరస్తుడుకు సడిదిల్లా అలవాటు. సె ప్రదానఅదిపతి ఆచరించితవ్వి.

16 సే దినోనె బరబ్బా బుల్లా నా గల్లా జొనె నేరస్తుడు చెరసాలరె అచ్చి.

17 సడకు మనమానె తా పక్కు అయిలాబెల్లె పిలాతు, “కాకు విడుదల కొరుబుల్లీసో? బరబ్బాకునా నీనె క్రీస్తు బులి డక్కిలా యేసుకునా?” బులి తంకు పొచ్చిరిసి.

18 అసూయవల్లరె యుదా అధికారిసె యేసుకు అప్పగించిసె బులి పిలాతుకు తెలుసు.

19 పిలాతు న్యాయపీటం ఉంపరె బొసితన్నుగా తా నైపో, “సే నీతిమంతుడు విసయంరె జోక్యం కొరిగితైనా. మియి యే రత్తిరె తా గురించి సొప్పారె కెత్తె కొస్టోనెకు అనుబవించించి” బుల్లా సందేసంకు పొడిదిసి.

20 బరబ్బాకు సడికిరి యేసుకు మొర్సొసిక్కు పొగిలపని కోరిగిబులికిరి ప్రదానయాజకూనె, బోడిలింకె మనమానుకు రెచ్చమరిసె.

21 పిలాతు “దీలింకెబిత్తరె మెత్తె కాకు సడదె బుల్లీసో?” బులి మనమానెకు పొచ్చిరిసి. బరబ్బాకు బులి తంకె సమాదానం కొయిసె.

22 “ఈనె ‘క్రీస్తు’ బులి డక్కితల్లా యే యేసుకు మెత్తె కిరకొరుబుల్లీసో?” బులి పిలాతు పొచ్చిరిసి. సొబ్బిలింకె, “సిలువ పొగండి!” బులి కొయిసె.

23 సడకు “సెయ్యె కిర తప్పు కొరిసి?” బులి పిలాతు పొచ్చిరిసి. ఈనె తంకె, “తాకు సిలువకు పొగండి” బులి యింకా గట్టిగా దొందిరిసె.

24 లబో కలిగితె మారుగా కొలిసె మొదలైవురో పిలాతు గమనించిసి. తరవాతరె సెయ్యె పని కడిగికిరి మనమానె అగరె సే పనిరె అత్తొనె దొయిగికిరి, “తా రొగొతోకు మియి కారనం నీ. ఎడ తొ బాద్యత” బులి కొయిసి.

25 మనమానె, “తా రొగొతో అమంపరె, అం పిల్లానె ఉంపరె తమ్మాసిగాక” బులి కొయిసె.

26 సే తరవాతరె పిలాతు బరబ్బాకు సడిదీసె. ఈనె యేసుకు కొరడా మడ్డొనె మరికిరి సిలువకు పొగితె అప్పగించిసె.

సైనికునె యేసుకు అవమానం కొరువురో

(మార్కు 15:16-20; యోహాను 19:2,3)

27 సే తరవాతరె అధికారిసె సైనికునె యేసుకు రోజాబవనం బిత్తరుకు దరిగిజేకిరి, సెల్లె సైనుకులల్లా తా చుట్టూ చేరిసె.

28 తా కొన్నానెకు పిటికిరి, గొర్ర ఊదారంగు డెంగకొన్నాకు తాకు పిందిసె.

29 కొంటానె సంగరె గుటె కిరీటం బునికిరి తా ముండొంపరె లొగిసె. తా కైలా అత్తోకు గుటె రెల్లుబడ్డి దీసె. తా అగరె ముడుకూనె పొక్కిరి నమస్కారం కొరుకుంటా, “యూదునెరో రోజా, జయము” బులి అవమానం కొరిసె.

30 తావుంపరె సెప్పొ పొక్కిరి, సే రెల్లుబడ్డిదీకిరి తా ముండొంపరె మరిసె.

31 తాకు అవమానం కొల్లా తరవాతరె సే డెంగకొన్నాకు కడిపికిరి తా కొన్నా తాకు పిందిసె. సేతర్వాతరె తాకు సిలువకు పొగితె కొనిగిజేసె.

క్రీస్తుకు సిలువ పొగివురో

(మార్కు 15:21-32; లూకా 23:26-43; యోహాను 19:17-27)

32 తంకె బయలుకు జేతన్నుగా కురేనే ప్రాంతముకు చెందిలా సీమోను బుల్లా నా తల్లా మనమ దిగదీసి. తాకు బలవంతం కొరికిరి యేసు సిలువకు బొయిపించిసె.

33 తంకె గొల్లొతా బుల్లా చోటుకు చేరిగిచ్చె.

- 34 సెట్టె చేదు మిసిలా ద్రాక్షరసంకు యేసుకు పీతె దీసె. ఈనె సక్కి దిక్కిరి నడకు పీతె సెయ్యె ఇస్టపొడిలానీ.
- 35 తాకు సిలువకు పొగిల తరవాతరె తా కొన్నానుకు చీటీనె పొగ్గీకిరి బంటిగిచ్చె.
- 36 సే తరవాతరె సైనికునె బొసిరికిరి తాకు జొగులో జొగిసె.
- 37 తావుంపరె, “యెయ్యె యూదునె రొజా యేసు” బులి నేరముకు గుట చెక్కంపరె రాసికిరి తా ముండొంపరె లొగిసె.
- 38 ఈనె తాసంగరె బందిపోటు దోపిడి సారొనెదీలింకె జొనెకు కైలత్తాడుకు, యింకజొనుకు బాఅత్తాడుకు సిలువకు పొగిసె.
- 39 సే బట్టరె జెల్లాలింకె ముండొ బించుకుంటా తాకు అవమానం కొరిసె.
- 40 “గుడికి నాసనం కొరికిరి తింట దినె ఇంకాబందిలాట, తొత్తె తువ్వు కాపాడిగిత్తు. తువ్వు పురువురో పోయానె సే సిలువుదీకిరి వొల్లికిరి ఆయి” బులిసె.
- 41 ప్రదానయాజకూనె సాస్త్రీనె, బొడిలింకె మిసికిరి తాకు సాకిరాక అవమానం కొరిసె,
- 42 “సెయ్యె పొదరిలింకు రక్సింఱుసి. ఈనె తాకు సెయ్యె రక్సింఱుచిగిన్నారి. సెయ్యె ఇస్రాయేలు రొజాపనెనే సిలువదీకిరి వొల్లికిరి అయినె సెల్లె తాకు నమ్ముంచొ.”
- 43 సెయ్యె పురువుకు నమ్మిసి, “సెయ్యె పురువురో పో బులి కొయిసె. పురువుకు కావలిసిలాటయినె తాకు ఉంచినాక రక్సింఱుసి” బులి కొయిగిచ్చె.
- 44 తాసంగరె సహా సిలువ పొగిలా దోపిడి సారొనంకా సాకిరాక అవమానించినె.

యేసు మొర్నొ

(మార్కు 15:33-41; లూకా 23:44-49; యోహాను 19:28-30)

- 45 దిప్పొరువన్నెండు గంటలదీకిరి తినిగంటజాంక సే దెసల్లా మొదారొకమ్మిపేసి.
- 46 సుమారు తినిగంటయాలబెల్లె యేసు, గట్టిగా “ఏలీ, ఏలీ, లామా సబక్తానీ” బులి బొట్ట కేక పొగిసి. సే కొతకు, మో దేవా, మో దేవా, మో అత్తో కిరుకు సడిదీను? బులి అర్దం.
- 47 సెట్టె టారికిరితల్లా కుండెలింకె ఎడ సునికిరి, “సెయ్యె ఏలీయాకు డక్కిలీసి” బులి బులిగిచ్చె.
- 48 జొనె ఎంట్లాక దొమిడికుంటా జేకిరి గుట స్పాంజి దన్నెసి. నడ పులిసిలా ద్రాక్షరసంరె బుడ్డికిరి గుట రెల్లబడ్డికు లొక్కిరి యేసుకు పీతె దీసి.
- 49 ఈనె పొదరలింకె, “టారెసె, తాకు కాపాడితె ఏలీయా ఆసికివొ దిగిమా” బులిసె.
- 50 యేసు యింకా గుట కేక పొక్కిరి తా పొర్నొ సడిదీసి.
- 51 సే సమయంరె గుడిరో తెర ఉంపరె దీకిరి తొల్లె జాంక దీటబాగంగా చిరిజీసి. బూకంపం అయికిరి బండలు బద్దలైజీసె.
- 52 సెల్లె సమాదీనె పిటిగిచ్చె. పురువురో మొరిజిల్లా బడెలింకె పరిసుద్దులు దేనె ఉటీసె.
- 53 తంకె సమాదులు తీకిరి దోరకు అయిసె. ఈనె యేసు జికిరి అయిలాబెల్లె తంకె పరిసుద్దపట్టుముకు అయికిరి బడెలింకు దిగదీసె.
- 54 యేసుకు జొగులో జొగిలా సతాదిపతి, సైనికులూనె బూకంపాలుకు, జరిగిలా సంగతీనెకు దిక్కిరి బడె డొరిజేకిరి, “యెయ్యె సొత్తాక పురువురో పో” బులి కొయిగిచ్చె.
- 55 బడెలింకె మొట్టానె దూరు తీకిరి దిక్కుంటా అచ్చె. అంకె యేసుకు పరిచర్యానె కొరితె గలిలయదీకిరి అనుసరించికిరి అయిలాలింకె.
- 56 తంకబిత్తరె మగ్గలేనే మరియ, యాకోబు యోసే రొ మా యాలా మరియ, జెబెదయి నైపొ అచ్చె.

యేసుకు సమాదికొరివురో

(మార్కు 15:42-47; లూకా 23:50-56; యోహాను 19:38-42)

- 57 ఈనె సొంజైలాబెల్లె, పలియ తా యాలా యోసేపు అరిమతయి గాతీకిరి అయిసి. సెయ్యెంకా యేసుకు వెంబడించిలాటాక.
- 58 సెయ్యె పిలాతు పక్కరకు జేకిరి యేసురో దేకు దేబులి మగిసి. పిలాతు దే బులి ఆజ్ఞాపించిసి.
- 59 యోసేపు సే దేకు కడిగీకిరి గుట నోకొన్నరె చుట్టిసి.
- 60 సే తరవాతరె గుట బొట్ట పొత్తోకు తొలిపించికిరి తా కొనం కొరిగిల్లా నో సమాదిరె సడకు రొయిదీసి. సెల్లె గుట బొట్టపొత్తోకు సే సమాదికు అడ్డుగా దొర్లిలింఱికిరి బాజేసి.
- 61 మగ్గలేనే మరియ, యింకజొనె మరియ సే సమాది అగరె బొసిరికిరి అచ్చె.

సమాది అగరె బటులునె జొగులో

62 సడ విస్త్రాంతికి సిద్దమైలా దినో. మరదినై ప్రదానయాజకూనె, పరిసయ్యునె, పిలాతు సమక్సంరె కూడిగిచ్చె.

63 “బో, సే సారొకొతాలగిలాట జీకిరి తల్లాబెల్లె ‘తింటొదినొరె మియ్యి ఇంకా జీకిరి ఆంచి’ బులి కొయివురో అముకు గుర్తు అచ్చి.

64 సడకు తింట దినో జాంక సె సమాదికు జాగర్తగా జొగులో లోగు బులికిరి ఆజ్ఞాపించండి. సాకిరి నాకొర్నే తా సిస్యునె అయికిరి తా దేకు నుచ్చిదీకిరి, ‘సెయ్యె జీకిరి ఉటిసి’ బులి మనమానుకు కొయివొచ్చు. ఏ చివరి సారొకొతా అగరె సారొకొతా కన్నా గోరంగా తాసి” బులి కొయిసె.

65 పిలాతు, బటులుకు దరిగిజేసి. “తంకు సమాదికు జాగర్తగా జొగువురో తొ బాద్యత” బులి కొయిసి.

66 తంకె జీకిరి సే సమాదికు ముద్ర పొక్కిరి బటులుకు సే సమాదికు జొగులో లొక్కిరి సడకు బద్రం కొరిసె.

28

మొర్నొ దీకిరి జీకిరి ఉటివురో

(మార్కు 16:1-10; లూకా 24:1-12; యోహాను 20:1-10)

1 విస్త్రాంతి దినో యిజేసి. అద్దారొ సొక్కలెపైతల్లాబెల్లె మర్దలీనే మరియు, యింకజొనె మరియు సమాది దిగితె జేసి.

2 వెంట్రాక గుట బూకంపం అయిసి పరలోకందీకిరి ప్రబువు దూత అయికిరి సే సమాది పొత్తో దొర్లింకికిరి సేడ ఉంపరె బొసిరిసి అచ్చి.

3 సడ రూపం మెరిసిలాపనచ్చి. తా కొన్నానె మంచుపని దొగలైకిరి అచ్చె.

4 సమాదికు జొగొలో జొగిలా బటునె తాకు దిక్కిరి డొరొసంగరె వనికిజీకిరి, మొరిజిల్లాలింకె పని యిజేసి.

5 సే దేవదూత, మొట్టానె సంగరె యాకిరి బులిసి, “డొరితెనాండి, సిలువకు పొగిలా యేసు కోసం తొమె కుజ్జిలీసో బులి మెత్తె తెలుసు.

6 సెయ్యె యెట్టెని. సెయ్యె కొయిలాపనాక ఉటికిరి అచ్చి. తాకు రొయిదిల్లా సోటుకు దిగిండి.

7 వెంట్రాక జీకిరి తా సిస్యునె సంగరె కోండి, ‘సెయ్యె మొర్నొ తీకిరి ఉటికిరైసి బులి. తొకన్నా అగరె గలిలయకు జొసి. తొమె తాకు సెట్టె మిసిగుచ్చి’ బులి కొయిసి. మియి కొయిలాట గుర్తు దీగిండి.”

8 తంకె తా సిస్యునుకు కొయిమంచి బులి సమాదిపక్కరెదీకిరి డొరొసంగరె, ఆనందం సంగరె దొముడుకుంటా జీకిరి తంకు కొయిసె.

9 వెంట్రాక యేసు తంకు మిసిగీకిరి, “తొముకు సుబం” బులి కొయిసి. తంకె తా పక్కరకు అయికిరి తా గొడ్డొనంపరె పొడికిరి తాకు మొక్కిసె.

10 సెట్టె యేసు తంకసంగరె, “డొరితెనాండి. జీకిరి బయినె సంగరె గలిలయకు జాబులికొండి. తంకె సెట్టె మెత్తె మిసిగుచ్చె” బులిసి.

సైనికునెరో సమాచారం

11 తంకె జేతన్నుగా. సెల్లాక కుండెలింకె సైనికునె పట్నుంకు జీకిరి జరిగిలాటల్లా ప్రదానయాజకుడు సంగరె కొయిసె.

12 ప్రదాన యాజకూనె, బొడిలింకె మిసికిరి గుట కుట్రవన్నె. తంకె సైనికునెకు బడే పలియ దీసె.

13 ఈనె “తా సిస్యునె, ‘మొజిరత్తిరె గుమ్మితల్లా బెల్లె అయికిరి తా దేకు సారిపీసె’ బులి కోండి.

14 యే సంగతి పిలాతు పక్కు జెన్నే తాకు సాంతిపరిచికిరి తొముకు కే కస్టం నాఅయికుంటా అమె దిగుంచొ” బులి రెచ్చమరిసె.

15 బటులు పలియ కడిగికిరి తంకె కొయిలాపని కొరిసె. యూదునెరె యేకొతా బొల్లె వ్యాపించికిరి ఆజిజాంక వాడుకరె అచ్చి.

యేసు తా సిస్యునెకు దిగదివురో

(మార్కు 16:14-18; లూకా 24:36-49; యోహాను 20:19-23; అపో 1:6-8)

16 సే తరవాతరె సె పదుకుండుగురు సిస్యునె గలిలయకు జీకిరి, యేసు కొయిల పొరొతంపరకు జేసి.

17 సెట్టె యేసుకు దిక్కిరి తాకు మొక్కిసె. ఈనె తంకబిత్తరె కుండెలింకె అనుమానం పొడిసె.

18 సెట్టె యేసు తంకపక్కరకు అయికిరి యాకిరి కొయిసి. “పరలోకంరె, బూమంపరె తల్లా అదికారమల్లా పురువు మెత్తెదీసి.

19 ఈనె జాండి తొమె సొబ్బి దెసొసుకు జేకిరి, తంకు మో సిస్యనెగా కొరొండి. బో నారె, పో నారె, పవిత్రాత్మ నారె తంకు బాప్టిసం దేండి.

20 మియి తొముకు కొయిలా కొతానల్లా తంకు ఆచరించు బులికిరి బోదకొరొండి. మియి కెబ్బుకూ యే యుగాంతం జాంక తొ పొచ్చాడె తాంచి” బులి కొయిసి.

పాలు కొరింథియులుకు రాసిన మొదటి పత్రిక పాలు కొరింథియులుకు రాసిన అగరె పత్రిక అగరె కొత్త

కొరింథి పత్రిక అపొస్తలుడైల పాలు గురించి రాసిన యడ సుమారు 55 బొచ్చొరొనె క్రీస్తు జొరైలా తరువాతరె రాసిబొడిసి ఏ దిటా పత్రికలు పాలు కొరింథి సంగముకు రాసినె సెయ్యె ఎ లేకనలు ఎపెసురె రొల్ల సమయంరె కొరింథి సందర్శనకు అగరాక మాసిదొనియ దీకిరి రాసి 16:5-9 . ఎ లేక సంగంరె కుండెమంది సబ్యుల దీకిరి సంగంరె బడె దేరొనె పద్దతుల గురించి వేరె ఇంకా లైంగిక దుర్నినీతిదీకిరి నహాయం సంగరె గుటె ప్రతిస్తుందన సంగరె కొరింథి ప్రాంతం సెడ లైంగిక దుర్నినీతిదీకిరి ప్రసిద్ధి చెందిసి సెడ వలరె చర్చి ఏ సమస్యలకు ఎదిరిగితై ఆచర్యం కలిగినీ 1 కొరింథి ప్రేమవుంపరె ప్రసిద్ధి అద్యాయముకు కూడ కలిగీకిరి రొసి.

సంగతీనె

1. పాలు కొరింథియులుకు వలకిరించెల వలరె నిమిత్తం క్రుతజ్ఞ కొయివురొ 1:1-9
2. కొరింథియరె సంగమురె యిడిజిల్లా గురించి తాకు అయిలా నివేదిక తెలియ పరిచిలా 1:10-4:21
3. తరువాత సెయ్యె లైంగిక దుర్నినీతి గురించి ఇంక న్యాయం ఉద్దేశించికిరి కొతలగువురొ 5-6
4. సెడ తరువాత సెయ్యె బ్య, విగ్రహముకు బలి దివురొ మనమానె ఆరాదన, ఆద్యాత్మిక వరలు ఇంకా పునరుత్థానపనట విసయాలవుంపరె సూచనలు దిసె 7-15
5. ఆకరుకు సెయ్యె కుండె ఆచరనాత్మక ఇంకా మనమానె విసయం సంగరె ముగించిసి 16

1 పురువురొ చిత్తంవల్లరె యేసు క్రీస్తురొ అపొస్తలుడైకిరి రొయితె డక్కిలా పాలుకు, బయిలా సొస్తెనేసుకు.

2 కొరింతియరె తల్లా పురువురొ సంగముకు బుల్నే క్రీస్తుయేసురె పరిసుద్దులయిలలింకె పనికిరి పరిసుద్దులుగా రొయితె డక్కితల్లలింకు తంకును అముకు ప్రబువుగా తల్లా అమె ప్రబువుయిల్లా యేసుక్రీస్తు నారె ప్రతి చోటురె ఆరాదనకొర్లాలింకల్లకు నుబం బులి కొయికిరి రాసిలించి.

3 అం బో యిలా పురువుదీకిరి, ప్రబువైలా యేసు క్రీస్తుదీకిరి క్రుపా, సాంతి తొముకు కలిగిమాసి.

క్రీస్తురె ఆసిర్వాదం

4 క్రీస్తుయేసురె తొముకు దిల్లా పురువురొ క్రుపకు దిక్కిరి, తొ విసయమైలా మో పురువుకు కెబ్బుకు క్రుతజ్ఞతాస్తుతులు చెల్లించిలించి.

5 క్రీస్తుకు గురించి ఐక్యత తొబిత్తరె రొవురొవల్లరె తాబిత్తరె తొమె ప్రతి విసయంరె బుల్నే సొబ్బి కొతానెరె, సొబ్బి జ్ఞానమురె అబివుద్ది పొందిసా.

6 సడుకాక ప్రబువైల యేసుక్రీస్తురొ కొత గురించి ఎదురు దిగిలీసా గనక సెయ్యె దీతల్లా ఆసిర్వాదంకు కిచ్చి వొరిదిగిన్నారొ.

7 సడకు కే ఆత్మీయమైలా వరాలు వల్లరె లోపం నీకిరి, తొమె అం ప్రబువైలా యేసు క్రీస్తు ప్రత్యక్త కోసం ఎదురు దిగిలీసా.

8 అం ప్రబువైలా యేసు క్రీస్తు దినెరె తొమె నేరం నీకుంటా తల్లాపనికిరి అంతముదాకా సెయ్యె తొముకు రక్సించువొ.

9 అం ప్రబువైలా యేసు క్రీస్తు బుల్లా తా పొరొ సహవాసముకు తొముకు డక్కిలా పురువు నమ్మకమైలాట.

సంగమురె విబాగాలు

10 అన్నబయినె అప్పబొయినీనె, తొమె సొబ్బిలింకె గుట్టాక కొతంపరె, తైకిరి నా యిడిజికుంటా, గుట్టా బావము సంగరె కొతలగిమంచి బులి, గుట్టె మనస్సు సంగరె గుట్టె ఉద్దేశము సంగరె, తొమె సిద్ధపొడికిరి రొమ్మంచె బులి అం ప్రబువైలా యేసు క్రీస్తు అదికారం సంగరె తొముకు కొరిగిల్లించి.

11 మో అన్నబయినె అప్పబొయినీనె, తొబిత్తరె కొలీనె అచ్చె బులి తొ గురించి క్లోయె గొరొబిత్తరిలింకె వల్లరె మెత్తె తెలిసి.

12 తొబిత్తరె జొనె “మియి పాలులింకె” బులి, జొనె, మియి అపొల్లోటా యింకాజొనె యే పేతురు బులి, యింకాజొనె, మియి క్రీస్తుయిట బులి కొయిగిల్లినె బులిసి.

- 13 క్రీస్తు విభజింపబోడికిరి అచ్చినా? పౌలుకు తొం కోసం సిలువ పొగిసేనా? పౌలు నారె తొమె బాప్టిసం పొందిసోనా?
 14 మో నారె తొమె బాప్టిసం పొందిసొబులి కేసెనెను నాకొయిలపనికిరి,
 15 క్రీస్తునకు గాయికి తప్ప యింక కాకు మియి బాప్టిసం దిల్లాని. సడకు పురువుకు క్రుతజ్ఞతాస్తుతులు చెల్లించిలింబి.
 16 సైపనాను గొరొలింకు బాప్టిసం దీంబి తంకు తప్ప ఇంకా కాకు ఈనెను బాప్టిసం దించికివో మెత్తె తెలిసిని.
 17 బాప్టిసం దీతె క్రీస్తు మెత్తె పొడదిల్లానీ ఈనె, మనమా జ్ఞానం సంబందం నీకుంటా క్రీస్తురో సిలువ వ్యర్థము నాయికుంటా, కొతకారితనం నీకుంటా సువార్త ప్రకటించితందుకాక సెయ్యె మెత్తె పొడదీసి.

క్రీస్తురో బలం యింకా పురువురో జ్ఞానం

- 18 సిలువరె క్రీస్తు మొర్నొ గురించి వార్త, నసించితల్లా తంకు బోడతనం ఈనె రక్సింబబోడితల్లా అముకు పురువురో సక్తి.
 19 యే వినయంరె జ్ఞానులు
 “జ్ఞానముకు నాసనము కొరిమి.
 వివేకుల వివేకముకు నాపైటికైకుంటా కొరిమి” బులి రాసికిరి అచ్చె.
 20 జ్ఞాని కిరయిసి? సాస్త్రి కిరయిసి? ఏ లోకంరో తర్కవాది కిరయిసి? ఏ లోక జ్ఞానముకు పురువు బోడయిలాటగా కొరికిరి అచ్చి నీనా!
 21 పురువురో జ్ఞానానుసారముగా లోకము తా జ్ఞానము సంగరె పురువుకు నాబుజ్జిలందరె, సువార్త ప్రకటన బుల్లా బోడతనం సంగరె నమ్మిలాలింకు రక్సింబివురో పురువుకు ఇస్థమైకిరి అచ్చి.
 22 యూదునె అద్భుతానె కొరుబులికిరి పొచ్చుర్లీసె, గ్రీసు దెసొలింకె జ్ఞానము కుజ్జిలీసె.
 23 ఈనె అమె సిలువపొగిలా క్రీస్తుకు ప్రకటించిలింబొ. సడ యూదునెకు ఆటంకము యీకిరి, అన్యమనమానెకు బోడాట పనికిరి అచ్చి.
 24 ఈనె యూదునెకు కిర, గ్రీసుదెసొలింకు కిర, డక్కిలాలింకాక క్రీస్తురో వార్త పురువురో సక్తి, పురువురో జ్ఞానమయికిరి అచ్చి.
 25 పురువు బోడతనం మనమానొ జ్ఞానముకన్నా జ్ఞానమైలాట. పురువురో బలహీనత మనమానొ బలముకన్నా బలమైలాట.
 26 అన్నబయినె అప్పబొయినీనె, తొముకు డక్కిలా డక్కకు దిగొండి. తొబితరె లోకరీతిరె జ్ఞానులు ఈనన్నా, గనులైనన్నా, బొట్ట వంసములింకె బులికిరి డక్కిలానీ గని
 27 పురువు తా ఉద్దేసం ప్రకారంగా తెలివిలింకు లజ్జొకొరితె లోకందికిరి బోడలింకు పురువు ఏర్పరిచిగీకిరి అచ్చి. బలవంతులులింకు లజ్జొకొరితె లోకమురె బలహీనులైలింకు పురువు ఏర్పర్చికిరి అచ్చి.
 28 బచ్చిగిలలింకు వ్యర్థము నాకొరికిరి లోకమురె నీచమైలింకు, త్రునికరింపబోడిలింకు, పురువు ఏర్పర్చిగీకిరి అచ్చి.
 29 సడకు కే మనమా పురువు అగరె గొప్పలు కొయిగిన్నాసి.
 30 ఈనె తావల్లరె తొమె క్రీస్తుయేసురె అచ్చొ. పురువు వల్లరె సెయ్యె అముకు జ్ఞానముకు నీతికి పరిసుద్ధాతకు విమోచనముయిసి.
 31 సడకు “కేసెనె గొప్పలు కొయిగిల్లీసొ సెయ్యె ప్రబువురె గొప్ప ఈవాసిబులి లేకనాలై రాసికిరి అచ్చి.”

2

సిలువ పొగిలా క్రీస్తురో ఉపదేసం

- 1 జట్టుకారీనె, మియి తొం పక్కు అయిలబెల్లె కొతకారైకిరి గాని అదికజ్ఞానం సంగరె గాని నుచ్చిదిల్లా పురువురో సత్యముకు తొముకు ప్రకటించితందుకు అయిలానీ.
 2 మియి, తొం మొజురె రొల్లాబెల్లె యేసు క్రీస్తు, ఇంకా తా సిలువ మొర్నొగురించి తప్ప, యింకిచ్చి మెత్తె తెలిసిని బులి నిచ్చయం కొరిగించి.
 3 ఈనె బలహీనత సంగరె డొరొ సంగరె బడే వనుకు సంగరె తొం పక్కు అయింబి.
 4 సడకు మియి కొతలగినన్నా సువార్త ప్రకటించినన్నా, జ్ఞానయుక్తమైల సోదకొతానుకు నాఉపయోగించుకుంటా, పురువురో పరిసుద్ధాత్య సక్తి సంగరె దిగిదీతే వినియోగించించి.

5 తొం విస్వాసము మనమానెరొ జ్ఞానముకు ఆదారము నాకొరిగీకిరి, పురువురొ సక్తికు ఆదారము కొరిగీకిరి రొమ్మంచుబులి, మో ఉద్దేశం.

పురువురొ జ్ఞానం

6 పరిపూర్ణులైలా తెలివిలింకె మొజిరె తెలివి బోదించిలింఱొ, నడ ఏ లొకొ జ్ఞానమునీ, అంతరించిజిల్లాట యే లొక అదికారిరొ జ్ఞానం పనాటనీ.

7 పురువురొ జ్ఞానము మర్మమైలపనికిరి బోదించిలింఱొ. ఏ జ్ఞానం మరుగైకిరి అచ్చి. యే లొకొ ఆరంబముకు అగరాక అడకు పురువు అం మహిమ నిమిత్తము నియమించినీ.

8 నడ లొకొదికారీనుకు కాకు బుజ్జిని; నడ తంకు బుజ్జికిరి తన్నే మహిమాస్విరూపియైలా ప్రబువుకు సిలువ నాపొక్కింటా రొయితె.

9 నడ గురించి పురువు సెయ్యె ప్రేమించిలింకె కోసం కిర సిద్ధపరిచినా నడ

“అంకికి దిగదిల్లానీ,

కన్నొకు సుందిల్లానీ,

మనమనె ప్రూదయంకు గోచరము ఈలాని” బులి లేకనులురె రాసికిరి అచ్చి.

10 అముకు ఈనె పురువు నడకు తా ఆత్మవల్లరె బయిలుపరిచికిరి అచ్చి. సే ఆత్మ సొబ్బిటికు పురువు మర్మమునె కూడ పరిసోదించిలింఱొ.

11 జొనె మనమరొ సంగతీనె తాబితరెతల్లా మనమరొ ఆత్మకాక తెలుసు. సాకిరాక పురువురొ సంగతీనె పురువురొ ఆత్మకాక తెలుసు.

12 పురువు వల్లరె అముకు కలిగిలాటకు తెలిసితే అం లొకొకాత్మకు నీకిరి పురువు పక్కరెతీకిరి అయిలా ఆత్మకు పొందిలింఱొ.

13 ఈనె మనమానొ జ్ఞానము సుక్కిల కొతానెసంగరె నీకిరి ఆత్మ సంబందమైలా సంగతీనుకు ఆత్మ సంబందమైలా సంగతీనె సంగరె కొయికుంటా ఆత్మ సంబందమైలా సత్యాలు సుక్కిలా కొతానె సంగరె యెడ కోసమాక అమె బోదించిలింఱొ.

14 ప్రక్రతి సంబందిమిల్లా మనమ పురువురొ ఆత్మ వినయములకు అంగీకరించిని, నడ తాకు బోడాటపనికిరి తాసి, నడ ఆత్మానుబవము సంగరాకా వివేచించిబోడిసి. కాబట్టి నడకు సెయ్యె గ్రహించినారి.

15 ఆత్మసంబందమైలాట సొబ్బిటికు పరిసిలించుసి గాని సెయ్యె కా సంగరె ఈనెను పరిసిలించబోడిని.

16 ప్రబువురొ మనుస్సుకు జనికిరి

తాకు బోదించిలాట కేసె? అమె ఈనె క్రీస్తు మనస్సు కలిగిలింకె.

3

పురువురొ సేవకునె

1 మో జట్టుకారీనె యీలా లింకె ఆత్మసంబందమైలా మనమానె సంగరె కొతలగిలపనికిరి మియి తొంసంగరె కొతలగినార్లించి. దేసంబందులైలా మనమానాక బులికిరి, క్రీస్తురొ విస్వాసమురె సన్నిపిల్లానె బులికిరి, లొకొ అనుసారంగా తొంసంగరె కొతలగించి.

2 తొముకు దుద్దొదీకిరి పుసించి, బలమైలా కద్దొదీకిరి తొముకు పుసెలాని, తొమె ఇంకా ఉంచునుకు సిద్ధపొడిలనింతొ.

3 తొబితరె అసూయనె కలహము తన్నుగా తొమె దే సంబందులిల్లా మనమనె పనికిరి చలిలాలింకె నీంతొనా?

4 జొనె “మియి పాలుత, ఇంగుటె మియి అపొల్లోటా” బులి కొయిలాబెల్లె తొమె ప్రక్రతి సంబందులిల్లా మనమనె నీంతొనా?

5 అపొల్లో కేసె? పాలు కేసె? అమె కేవలం సేవకునె నీనా. జోసుకు జొనె పురువు దిల్లా పైటికొరిసె. తంకె వల్లరె తొమె విస్వాసించుసా.

6 మియ్యి నాటించి, అపొల్లోలింకె పనిపొగించి, నడకు బోడిపించిలాట పురువాక.

7 ఈనె నడకు బోడిపించిలాట పురువాక గని, నాటిలాటరె పనిపొగిలాటరె కిచ్చినీ.

8 నాటిలాట పనిపొగిలాట గుట్టాక. సొబ్బిలింకె సెయ్యె సే కొరిలా కొస్టా కొలిది బహుమతి కడుగునుసి.

9 అమె పురువు సంగరె మిసికిరి పైటిలింకె పనికిరి అచ్చి; తొమె పురువు బిల్లోపనికిరి గొరొపనికిరి అచ్చి.

10 పురువు మెత్తె అనుగ్రహించిలా క్రువవల్లరె మియ్యి సుక్కిదిల్లా బొల్లపైటిత పనికిరి పునాది పొగించి, ఇంకా జొనె సెడవుంపరె బందిలీసి; సొబ్బిలింకె సెడవుంరె క్యేకిరి బందిలిసివో జాగర్తాగ దిగిమంచె.

11 పొగిలటా తప్ప, యింగుటె పునాది కేసెను పొగినరె; ఏ పునాది యేసు క్రీస్తాక.

12 కేసె యీనెను ఏ పునాది ఉంపరె సున్న, వెండి, విలువైలా పొతోరొనె, బడ్డి, గసా, చెక్కానె యడనల్లాసంగరె బందినె,

13 ఈనె, తంకె తంకె పైటి దిగదూసి, సె దినెరె సెడకు దిగదూసి, సెడ నియ్యసంగరె పొదరకు దిగదూసి. ఈనె తంకె తంకె పైటి కాటవో నియ్యక పరీక్షంచుసి.

14 ఈనె పునాదివుంపరె జొనె బందిలా పైటి టారిసె సెయ్యె బహుమతి కడుగుసి.

15 తువ్వు జొనె పైటి పుడ్డిదిపెనె తంకు నస్తం కలుగుసి; సెయ్యె తా మట్టుకు రక్సింపబొడుసి ఈనె నియ్యసంగరె తప్పించిగిల్లా పనికిరి రక్షంపబొడుసె.

16 తొమె పురువురో మందిరం పనికిరి అచ్చొబులి, పురువురో ఆత్మ తొ బిత్తరె తల్లిసిబులికిరి తొమె తెలిసిగిన్నింతొనా?

17 కెసెనెను పురువురో మందిరంకు పాడుకొరినె పురువు తాకు పాడుకొరసి. పురువు మందిరం పరిసుద్దుయికిరి అచ్చొ; తొముకు తొమంకా మందిరమైకిరి అచ్చొ.

18 కేసెనె తంకు సెయ్యె మోసం కొరిగిన్నాసి. తొమె బిత్తరె కేసెను ఏ లోకంరె తా జ్ఞానమైలాట బులి కొయిగిన్నె, సెయ్యె బుద్ధిహినుడు వుసి.

19 ఏ లోకంరె తెలివి పురువురో ద్రుస్తిరె బుద్ధిహినతా. తెలివిలింకె తంకె కుయుక్తిలరె సెయ్యె దరుగుసి; బులి లేకానము కొయిలీసి.

20 ఈనె జ్ఞానీనెరో యోచనానె పైటికైని బులి ప్రబువుకు తెలుసు బులి యింగుటె లేకనమురె రాసికిరి అచ్చొ.

21 కాబట్టి కేసెను మనమనె కొరిలా పనికిరి అతిసయిపొడినాసి; సొబ్బి తొముకాక

22 పౌలుయినెను అపొల్లోయినెను, పేతురుయినెను, లోకొయినెను, జీవముయినెను, మొర్నొయినెను, ఉంచినెరోల్లాట కిర యినెను అయిలాట యినెను సొబ్బి తొమటాక.

23 తొమె క్రీస్తు లింకె; క్రీస్తు పురువురోట.

4

క్రీస్తురో అపొస్తులు

1 యాకిరి క్రీస్తు సేవకునె బులికిరి, పురువురో మర్మమల వినయములరె నిర్వాహకునె పనికిరి తొమె పరిగినించొండి.

2 ఈనె గ్రుహనిర్వాహకునెరె ప్రతిజొనె యాజమనుకు నమ్మకమైలటగా తవ్వురో అవనరం.

3 తొమె వల్లరె యినెను, కే మనమ సంగరె యినెను మియ్యి విమర్శింపబొడివురో మెత్తె సన్ని వినయాం; సాకరాక మెత్తె మియ్యెక తిర్పు తీర్చిగిని.

4 మొ హ్రుదయం బొల్లా, ఈనెను సెడకు మియి నీతిమంతుడు పనికిరి బచ్చిగివురొయిని, మెత్తె తిర్పు తిర్చిలాట ప్రబువుకా.

5 సెడకు సమయము నాయిలా అగరె, బుల్నే ప్రబువు అయిలా జాంక, కిడ కోసం తీర్పు తీర్చితెనాండి. తా వొందరె రహస్యములకు హల్లోబిత్తరకు దన్నెకిరి హ్రుదయలాబిత్తరె ఆలోచనానెకు దొరె పొడిలబెల్లే, సొబ్బిలింకు తగిలా మోప్పు పురువు వల్లరె కలుగుసి.

6 మో జట్టుకారీనె తొమె అముకు దిక్కిరి, లేకనమురె రాసికిరి తల్లా సంగతినెకు అతిక్రమించినాసి బులి సుగ్గికిరి, తొమె జొనె గొప్పకొరికిరి ఇంకజొనె ఉంపరె తునికరించీలీసా, ఏ కొతానె తొ నిమిత్తమైల మో ఉంపరె అపొల్లో ఉంపరె లొగికిరి సుచ్చనగా కొయిలింబి.

7 తొత్తె ఆదిక్యము కలిగించిలాట కేసె? తొత్తె కలిగిలా సొబ్బిటిబిత్తరె పురువు తొత్తె దిల్లాని కిర? సాకరాక తొత్తె రొల్లా సొబ్బి సుచ్చాటకా పొందిగిసు ఈనె కిరుకు గొప్ప కొయిగిల్లిను?

8 సడకు అగరాక తొమెకెరైనా తక్కువ నీకుంట త్రుప్తుపొందికిరి అచ్చొ? సడకు అగరె ఐస్వర్యవంతులైకిరి అచ్చొ? అముకు సడిదీకిరి తొమె రొజానైకిరి అచ్చొ? ఈనె బొల్లాక అమె తొ దీ కూడ రొజానెయితండుకు బులి తొమె రొజానెయివురో మెత్తె సంతోసమా సి.

9 మొర్నొ సిక్కి విదించిలాపనికి బులి పురువురో అపొస్తులుమైల ఈలాలింకె అముకు సొబ్బిలింకె అగరె కడపటి రొయిదీసి బులి మెత్తె తొచీలీసి. అమె లోకొరె దేవదూతలకు మనమానెల్లకు వింతగా అచ్చొ.

10 అమె క్రీస్తు వల్లరె బుద్ధిహినులు, తోమె క్రీస్తురె బుద్ధిమంతులు; అమె బలంనిలలింకె, తోమె బలంరొల్లలింకె; తోమె గనులు, అమె గనహీనులులింకె.

11 ఏ గడియజాంక బోక్కొరె, సాసా సంగరె, సిరిజిల్లాకొన్నానె నిలలింకె పని; కుందానె కయిలింకో; రొయితె గొరొసీకిరి అచ్చొ.

12 అం సొంత అత్తొనెసంగరె పైటికొరికిరి కస్టపొడిలింకో. నిందపొడికిరి దీవించిలించ్చొ; హింసపొడికిరి ఓర్చిగిలించ్చొ.

13 దూసింబొడికిరి బతిమలిగిలించ్చొ లోకొకు మురికి పనికిరి సొబ్బిలింకు పెంటపనికిరి ఉంచినె జాంక బచ్చికిరి అచ్చొ.

14 తోముకు లజ్జొకొరిమంచెబులి నీగాని మో యిస్టమైలా పిల్లనెకు బుద్ధి కొయితె ఏ కొతానె రాసిలింబి.

15 క్రీస్తురె తోముకు ఉపదేసకునె దొస్టెయ్యిమంది పాలించిలాట రొన్నెను బో జొన్నాక. క్రీస్తు యేసురె సువార్తవల్లరె మియి తోముకు బొయికిరి అచ్చొ.

16 సెడకు తోమె మెత్తె పొలికిరి సలిగిలలింకె పనికిరి రొమంచెబులి తోముకు బతిమాలిగిలింబి.

17 ఎడ వల్లరె ప్రబువురె మెత్తె ప్రియుడు నమ్మకమైలా మో పొయిలా తిమోతికు తోమె పక్కరకు పొడదిలింబి. సెయ్యె క్రీస్తురె మియి సలిగిలా విదమురె, బుల్తే ప్రతి చోటురె ప్రతి సంగమురె మియి బోదించిలా విదనము, తోముకు గుర్తు కొరుసు.

18 మియి తోమె పక్క. అయిని బులి బులిగికిరి కుండిలింకె విర్రవీగిలిసా.

19 ప్రబువు చిత్తమైనె బెగకా తోమె పక్కరకు అయికిరి, ఉప్పొంగిలలింకె కొతనెకు నీ తంకె సక్తికా తెలుసుగుంచు.

20 పురువురె రాజ్యము కొతానె సంగరె నీ. సక్తి ఈకిరి అచ్చొ.

21 తోమెకిడ కొరిలిసెవో? బడ్డి సంగరె మియి తోమె పక్క. అయిమంచెనా? ప్రేమసంగరె సాత్వికమైల మనస్సుసంగరె అయిమంచెనా?

5

సంగమురె దుర్బీతి

1 తొబిత్తరె దర్బిపైటిలింకె అచ్చొ బులి కచ్చితంగా తెలుసు. తొబిత్తరె జొనె తా బోరొ నైపొకు రొయిదిగిసిపని. సడవనా దర్బిపైటి పురువుకు నానమ్మిగిల్లాలింకె బిత్తరె కూడ జరిగినీ.

2 యాకిరి రొయికిరి, తోమె విర్రవిగిలిసా గాని తోమె కెమాత్రము దుక్కొపొడికిరి యాట పైటినె కొర్లలింకు తొబిత్తరె దీకిరి వెలిపొగిలీనింతొ.

3 మియి దే వినయంరె దూరుగా రొంచి ఆత్మవినయంరె పక్కరె రొయికిరి, తొసంగరె కూడా రొల్లాపనికిరకా ఏ పైటి యాకిరి కొర్లలింకు గురించి యడకగరకా తీర్పు తీర్చికిరి అచ్చొ.

4 కిరబుల్తే, ప్రబువువైలా యేసు దినొనెరె తా ఆత్మ రక్షింపబొడిలా పనికిరి దేరొ కొరికానె నసించితే అం ప్రబువువైలా యేసుక్రీస్తు నారె తొమ్మంకా,

5 మో ఆత్మంకా అం ప్రబువువైలా యేసుక్రీస్తు బలంసంగరె కూడిగీకిరి అయిలబెల్లె, సాలింకు సాతానుకు అప్పగించిమంచె.

6 తోమె అతిసయపొడివురె బొల్ల నీ, “పులిసిలా పిండి కుండె ఈనెను ముద్దల్లా పులిసికొరువో బులి తోమెకు తెలిసినినా.”

7 తోమె పులిసిలా పిండి నిలాలింకె ఈనె నోముద్దెత్తెకు సె పుర్నాటయిలా పులిసిల పిండికు కడికిరిపొయిదెండి. సెత్తనికిరి అమె క్రీస్తుబుల్లా పస్కా గొరై పిల్లకు బలికొరిసె.

8 ఈనె పుర్నాటయిలా పులిసిల పాపంసంగరె ఈనె దుర్కార్థతము దుస్టత్వముకు పులిసిల పిండిసంగరెయినెను నికిరి, నిన్కపటంము సొత్తాక పులిసిలాని రొట్టిసంగరె పొరొవో ఆచరించించొ.

9 జారులు సంగరె జట్టు కొరితెనా బులికిరి మో పత్రికరె తోముకు రాసికిరి అచ్చొ.

10 ఈనె ఏ లోకంరె జారుల సంగరె యానెను, లోబునె సంగరె యానెను, సారొలింకె సంగరె యానెను, విగ్రహానెకు పూజించిలలింకె సంగరె యానెను, కే మాత్రము జట్టు కొరితెనాబులికిరి నీ. సాకిరి యానె తోమె లోకము దీకిరి బాజీసా నీనా.

11 ఉంచినినె, అన్నబయినె అప్పబొయినినె బులితల్లా కెసినెను దర్బిపైటిగాని బొమ్మలకు పూజించివురొ గాని గలినెదిల్లాలింకె గాని పీకారి గాని దోచిగిలటగాని యినె, సాటలింకె సంగరె జట్టు కొరినాసి కైయినాసెబులి తోముకు రాసికిరి అచ్చొ.

12 పొదరెలింకు తీర్పు తీర్పుల మెత్తె కిర? “తోమె బిత్తరెలింకు తీర్పు తీర్పులలింకె నీనా.”

13 పొదరెలింకు పురువాక తీర్పు తీర్పుసి. గనుక సే “దుర్మార్గులుకు తొ బిత్తరెదీకిరి కడిపివో బులికిరి లేకనాలై రాసికిరి అచ్చి.”

6

విస్వాసులునె జోనుకు జోనె వ్యతిరేకంగా కోర్టులుకు జెన్నాసి

1 తొబిత్తరె జోనుకు ఇంకజోనె వుంపరె కొలీనె రొల్లబెల్లె నెయ్యె పురువురో మనమానె అగరె నీకిరి యూదునెనీలలింకె పక్కరె తీర్పు తీర్పుతె తెగించుసునా?

2 పురువురో మనమానెయిలా తోమె లోకొకు తీర్పు తీర్పుమాసిబులి తొముకు తెలిసినినా? తోమెవల్లరె లోకొముకు తీర్పు రొల్లబెల్లె, సన్ని సంగితిసె గురించి తీర్పు తీర్పుతె తొముకు సక్తి నీనా?

3 అమె దేవదూతానెకు తీర్పు తీర్పుంచొబులి తెలిసినినా? ఏ జీవన సంబంధమైలా సంగతిసె గురించి యింకా ముక్కముగా తీర్పు తీర్పువచ్చు నీనా?

4 ఈనె ఏ జీకాకు సంబంధమైలా కొలీనె తొముకు కలిగినె సడక తీర్పుతె సంగమురో క్రమము నాజనిలాలింకు సంగరె బొసురుదుసానా?

5 తొముకు లజ్జో అయిమంచెబులి కొయిలించొ కిర తా అన్నబయినె మొజిరె కొలీనె తీర్పులా బుద్ధిమంతుడు తొబిత్తరె జొన్నాన నీనా?

6 సాకిరాక అన్నబయి అన్నబయినె అంపరె కొలీనె లగిలిసి ఈనె తీర్పువు కోసం అవిస్వాసిసె అగరాక జెల్లిసా.

7 జోనెవుంపరె జోనె కొలీనె లగువురో తొబిత్తరె ఉంచినెకాక బొల్లనీ. సడకన్నా అన్యాయముకు సహించివరో మేలాకనీనా? సడకన్నా తొ ఆస్తి సొరుపివురో మేలు నీనా?

8 ఈనె తోమె అన్యాయము కొర్లిసా, మోసంకొరిలిసా, తొ సొంత అన్నబయినెకంకా యాకిరి కొరిలిసా.

9 అన్యాయం కొర్లాలింకె పురువురో రాజ్యముకు వారసునె యినింతెబులి తొముకు తెలిసినినా? మోసం యీతెనాండి; జారిలైనెను విగ్రహానెకు పూజించిలలింకె ఈనెను దర్పిపైటి కొరిలలింకె, సొదిలింకె ఈనెను, మొండ్రపొ సంయోగులీనెను

10 సొరొనె యీనెను లోబునె యీనెను పీలలింకె యీనెను దూసించిలింకె యీనెను దొచుగిల్లలింకె యీనెను పురువురో రాజ్యముకు అర్దులు ఈనింతె.

11 తొ బిత్తరె కుండిలింకె తంకెపనికిరి అచ్చె, ప్రబువు యీల యేసు క్రీస్తు నారె యీనెను అమె పురువురో ఆత్మ తొముకు దొయిలందరె, పరిసుద్దులికిరి నీతిమంతునె పనికిరి ఈసా.

తొ దేనెకు పురువుకు మహిమగా రొయిదేండి

12 జోనె మెత్తె సొబ్బి కొరువొచ్చు బులి కొయిలీసి “సొబ్బిటంపరె మెత్తె స్వాతంత్రము అచ్చి” గాని సొబ్బి కొరినాసి. సొబ్బిటంపరె మెత్తె స్వాతంత్రము అచ్చిగాని మియి సొబ్బిటుకు లోబొడిజిల్లాని.

13 కద్ది పెట్టొకు, పెట్టొ కద్దికోసం కొరికిరి అచ్చి; పురువు సెడకు ఎడకు నాసనము కొరిసి. దే జారత్వము కొరితె నిగానీ పురువుకు మహిమకొరితాక. ప్రబువు సెడకు పుసిలిసి.

14 పురువు ప్రబువుకు మొర్పొదీకిరి ఉటదీసి; అముకు కూడ తా సక్తినంగరె ఉటదూసి.

15 తొ దేనె క్రీస్తుకు అవయవానె యికిరి అచ్చి బులి తొముకు తెలిసినినా? మియ్యి క్రీస్తురో అవయవానెకు కడిగీకిరి దర్పిరో అవయవానె పనికిరి కొరిలిసునా? సడ కే మాత్రము యీని.

16 వేస్యనంగరె మిసిగిల్లాట తాదీకిరి గుట్టదేయికిరి అచ్చి బులి తొమె తెలిసిగీనింతొనా? తంకె దీలింకె గుట దేయికిరి రొసే బులి లేకనానెరె రాసికిరి అచ్చి.

17 సాకరాక ప్రబువు సంగరె మిసిగిలటా తాసంగరె గుట ఆత్మయికిరి అచ్చి.

18 జారత్వముకు దూరు పొలిజాండి. మనమ కొరిలా ప్రతి పాపముకు మానకు హనికొరిని గాని, జారత్వము కొరిలాట తా సొంత దేకు నస్టంగా పాపము కొరిలిసి.

19 తొమె దే పురువు వల్లరె తొముకు అనుగ్రహింపబొడిసి, తొమెబిత్తరె రొల్లా పరిసుద్దత్తుకు మందిరం యికిరి అచ్చిబులి తొమె తెలిసిగీనింతొనా? తొమె, తొమె సొత్తు నీ, తొమె పురువులింకె.

20 విలువలోక్కిరి గినిలాలింకె సెడకు తొమె దేసంగరె పురువుకు మహిమకొరొండి.

7

బ్యకోసం ప్రస్తు

- 1 తోమె రాసిలా విసయముకు; తిల్లాటకు బ్య నాకొరిగివురో వొండ్రొపొకు బొల్ల.
- 2 ఈనెను జారత్వము జరిగితల్లా వల్లరె ప్రతిమనమకు సొంత నైపో రొమంచె, ప్రతి తిల్లాటకు సొంతో గొయిత రొమంచె,
- 3 గొయిత నైపోకు సాకిరాక నైపో గొయితకు తంకె తంకె దర్మముకు జరిగించిమాసి.
- 4 గొయితకాక గని నైపోకు తా దే ఉంపరె అదికారం నీ; సాకిరాక నైపోకాకు గని గొయితకు దే ఉంపరె అదికారం నీ.
- 5 ప్రార్దన కొరివురో తొముకు అవకాసం కలిగిలపనికిరి కుండెకలో జాంక దీలింకె సమ్మతి చొప్పురె తప్ప, జొనుకు జొనె వేరుగా రొయితెనాండి; తోమె మనస్సు నాటారిదీగినె సాతాను తొముకు నాసోదించిల పనికిరి బుల్లికిరి మిసిగిండి.
- 6 మియ్యి కొయిలాట ఆజ్జు నిగానీ, సలహా మత్తమాక.
- 7 మనమానె అల్లా మోపన్నకా రొమంచె బుల్లిగిలిసె. ఈనె జొనె గుటె విదముకు ఇంకజొనె ఇంగుటె విదముకు ప్రతి మనమ తాకు రొల్లా క్రుపావరములకు పురువు వల్లరె పొందికిరి అచ్చి.
- 8 మో పనికిరి రొప్పురో తంకు బొల్లబులి బ్య నాయిలలింకె సంగరె రండిలింకె సంగరె కొయిలించి.
- 9 ఈనె మనస్సు నాఆపిగిన్నార్నే బ్యా కొరిగివొచ్చు; కామం సంగరె రొల్లకన్నా బ్యాకొరిగిన్నే బొల్ల.
- 10 ఈనె బ్యయిలలింకు మియ్యి నీ ప్రబువుక ఆజ్జాపించిలాట కిరబుల్నే, నైపో గొయిత సడదిన్నాసి.
- 11 సడదిన్నే బ్య నాకొరిగీకుంటా రొమంచి; నీనె, తా గొయిత సంగరె సమాదానం పొడిమంచి. ఈనె గొయిత తా నైపోకు విడాకులు దిన్నాసి.
- 12 ప్రబువు నీ మియ్యి తక్కిలాలింకె సంగరె బుల్లిలాట కిరబుల్నే కే బయిక్సెనన్నా అవిస్వాసురాలైలా నైపో తన్నె, సెయ్యె తా సంగరె కాపురం కొరిమా బులి ఇస్టపొడినె, సెయ్యె తాకు విడాకులుదిన్నాసి.
- 13 ఈనె కే తిల్లాటకు అవిస్వాసమైలా గొయిత రొయికిరి, తా సంగరె కాపురం కొరిమా బులి ఇస్టపొడినె, సెయ్యె తాకు విడాకులు దిన్నాసి.
- 14 అవిస్వాసమైలా గొయిత నైపో వల్లరె పురువుకు అంగీకరించబొడుసి; అవిస్వాసురాలైలా నైపో విస్వాసమైలా గొయిత వల్లరె పురువుకు అంగీకరించబొడుసి. సాకిరి నీనె తొం పిల్లానె అపవిత్రులైకిరి తాసె. ఉంచినె ఈనె తంకె పవిత్రునె.
- 15 ఈనె అవిస్వాసైలాట సడదిన్నెను సడుదూసి గని; సే సందర్భమురె బయికి యీనెను బొయినికి యీనెను వివాదమునీ. సమాదానముగా రొయితె పురువు అముకు డక్కిసి.
- 16 యే తిల్లాట తో గొయితకు రక్సించుసునా నీనా? తొత్తె కిర తెలుసు. యే వొండ్రపొ తో నైపోకు రక్సించుసునా నీనా? తొత్తె కిర తెలుసు.

తోమె పురువు డక్కిలా పనికిరి జిండి

- 17 ఈనె ప్రబువు ప్రతి మనమకు కే స్తితి నియమించిసా, పురువు ప్రతిలింకు కే స్తితిరె డక్కిసివో సే వరమురె సలిగెండి; యే ప్రకారమాక సంగములు సొబ్బిటిరె నియమించిలింకి.
- 18 సున్నతి పొందిలాట కాకు ఈనెను డక్కివురో ఈసినా? సెయ్యె సున్నతి జేగొట్టిగిన్నాసి; సున్నతి నాపొందిలాట కాక్సెనెను డక్కివురో ఈసినా? సున్నతి పొందివలిసిలా అవసరంనీ.
- 19 పురువురో ఆజ్జానెకు అనుసరించివురో ముక్కము గని, సున్నతి పొందిలాటరె కిచ్చీనీ. సున్నతి నాపొందిగిల్లాటరె కిచ్చీనీ.
- 20 ప్రతిలింకె కే స్తితిరె డక్కిసో సే స్తితిరాక రొమంచి.
- 21 దాసుడైకిరి రొయితె డక్కిసినా? చింతపొడితెనా గని స్వతంత్రుడైతె సక్తి కలిగీకిరి తన్నె, స్వతంత్రుడైనె ఇంకా బొల్ల.
- 22 ప్రబువువలరె డక్కిలా దాసుడు ప్రబువు వలరె స్వతంత్రము పొందిలాట. సే ప్రకారము స్వతంత్రుడైకిరి డక్కిలాట క్రిస్తు దాసుడు.
- 23 పురువు తొముకు విలువ లొక్కిరి గినిసి సడకు మనమకు దాసునె యీతెనాండి.
- 24 జట్టుకారినెలింకె, ప్రతి మనమ కే స్తితిరె డక్కిసెవో సే స్తితిరాక పురువు సంగరె సహవాసము కలిగీకిరి రొమంచి.

బ్యా నా ఈలాలింకె గురించి, రండిలింకె గురించి ప్రస్తు

25 బ్యా నా ఈలాళింకె వినయంరె, ప్రబువురో ఆజ్ఞ మియ్యి పొందిలాని గాని నమ్మకమైలాట పనికిరి రొయితె ప్రబువు వలరె కనికరము పొందిలాటైకిరి మో ఉద్దేశం కొయిలించి.

26 ఉంచినెరో ఇబ్బంది వల్లరె వొండ్రపొ సెయ్యె తల్లా స్తితిరె రొవురో మేలుబులి తలంచిగిల్లించి.

27 నైపొకు కట్టుబొడికిరి అచ్చునా? నడివురో కొరితెనా. నైపొకు సడికిరి వేరుగా అచ్చునా? బ్యా కొరిగితెనా.

28 ఈనెను తువ్వు బ్యా కొరిగినెను పాపం నీ, బ్యా నాయిలాట బ్యా కొరిగినెను తాకు పాపము నీ; బ్యా నాయిల పిల్ల బ్యా కొరిగినైను తాకు పాపం నీ; ఈనె సాలింకు దేసంబందమైలా స్రమానె కలుగుసి; సెడ తొముకు నాకలిగికుంటా కొరిగిల్లించి.

29 మో జట్టుకారీనెలింకె, మియి కొయిలాట కిరబుత్పై, కలొ కుండేకా అచ్చి కాబట్టి ఇంక అగరె బ్యా ఈలాళింకె బ్యా నాయిలపన జీవించువాసి.

30 కందిలాళింకె కందిలాపనికిరి సంతోసపొడిలాళింకె సంతోసపొడిలాపనికిరి గినిగిల్లాళింకె తంకె గినిలాట తంకటానీలాపనికిరి.

31 ఏ లోకం అనుబవించిలాళింకె అమితంగా అనుబవించిలాపనికిరి తమ్మంచి; కైంకిబుత్పై ఏ లోకమురె నటన అంతరించిజిల్లీసి.

32 తొమె చింతనిలాపనికిరి తమ్మంచె బులి కొరిగిల్లించి. బ్యా నాయిలాట ప్రబువుకు కే విదంగా సంతోసం లొగిపారిబులికిరి పురువొ వినయంరె స్రద్ధ కలిగీకిరి తమ్మంచి.

33 ఈనె బ్యాయిలట నైపొకు క్యాకిరి సంతోసం పర్చిపారి బులి లోకవినయాంరె సెడకు కోసం బాదపొల్లీసి.

34 సాకిరాక నా బ్యా యిలా మొట్ట, కన్యక తా దేరె ఆత్మరె పవిత్రం యిలాపనికిరి రొయితె ప్రబువు వినయంరె కార్యములను గురించి దుక్కొపొడిలిసా గాని బ్యాయికిరి,

35 తొముకు ఆటంకంగా రొమంచెబులి నీ, తొబొట్ట కోసం కొయిలించి. తొమె బొట్టా పైటిసంగరె, పొదరటకు నా ఆన నాపొడుకుంటా ప్రబువుంపరె ద్రుష్ట లొక్కిరి సెయ్యె సేవ కొరిమంచెబులి మో ఆస.

36 జొనె తా సంగరె బ్య నిస్సయమైలాబెల్లై కన్యకు నాబ్యకొరిగికుండ రొవురో అక్రమముబులి బులిగీనె, నీనె అముకు వయస్సు బొడిజెవ్వరో వల్లరె బ్యకొరిగివురో అవసరముబులి బులిగిలించి. తంకె బ్యకొరిగివొచ్చు. సెడరె పాపం నీ.

37 ఈనె కేసైనె తా జ్యోకు బ్యా కొరివురో అవసరంనికుంట, సెయ్యె స్తిరచిత్తుడు, తా ఇస్టప్రకారం కొరిలా సక్తి తైయికిరి, తాకు నా బ్యా నీకుంట రొయిదిమంచె బులి తా మనస్సురె నిస్సయించిగినె బొల్లికిరి ప్రవర్తించిలిసి.

38 సడకు తా జ్యోకు బ్యా కొరిలాట బొల్లికిరి ప్రవర్తించిలిసి, బ్యా నాకొరిలాట యింకా బొల్లికిరి ప్రవర్తించిలిసి.

39 నైపొ తా గొయిత జీకిరి రొల్లెత్తై కలొ బద్ధురాలు యికిరి తమ్మాసి, గొయిత మొరిజిన్నె తాకు ఇస్టమైలలింకు బ్యా కొరిగినితె స్వతంత్రురాలు యికిరి తాసి గాని ప్రబువురె మాత్రమాక బ్యా కొరిగిమంచె.

40 ఈనె సెయ్యె రండింట పనికిరిరొన్నె సెయ్యె దన్యరాలుబులి మో అబిప్రాయం. పురువు ఆత్మ మెత్తై కూడ కలిగికిరి అచ్చిబులి తలిసిగిల్లించి.

8

విగ్రహాలకు దిల్లా ప్రసాదం కోసం ప్రస్తు

1 విగ్రహానెకు బలిగా అర్పించిలా వినయంరె అమల్లా జ్ఞానము ఈలాళింకె పనికిరి తెలుసు. జ్ఞానము గర్వపొడిలా పనికిరి కొరివొ. గాని ప్రేమ క్షేమాబివుద్ది కలిగించుసి.

2 కేసైనా తాకు కిర ఈనెను నాబుజ్జిలాటనీ బులికిరి కొయిగిన్నె, సెయ్యె తెలిసిగిల్లా పనికిరి ఇంక తాకు తెలిసిగిత్తై కిచ్చి నీ.

3 జొనె పురువుకు ప్రేమించినె సెయ్యె పురువుకు తెలిసిలా పనికిరి తాసి.

4 ఈనె విగ్రహానెకు బలిగా అర్పించిలాంచకు కైలాంచ వినయంరె లొకంరె విగ్రహాలు సుచ్చాంచ బులికిరి, పురువు జొన్నాక తప్ప ఇంగుట పురువు నీబులికిరి తెలిసిగించొ.

5 పురువునె బులి డక్కితల్లాళింకెక ప్రబువు బులి డక్కితల్లాళింకె బడేలింకె అచ్చె. మెగోసంపరె ఈనెను బూమి ఉంపరె ఈనెను పురువు బులి డక్కితల్లా సొబ్బిలింకు,

6 ఈనె అముకు జొన్నాక పురువు అచ్చి. సెయ్యె బో; తాదీకిరి సొబ్బి కూడా కలిగిసి; తా నిమిత్తము అమె అచ్చొ. ఈనె అముకు ప్రబువు జొన్నాక; సెయ్యె యేసు క్రీస్తు; తాదీకిరి సొబ్బి కలిగిసి; అమె తా దీకిరాక జీలించొ.

7 ఈనె సొబ్బిలింకె సత్యంకు నా తెలిసిగిల్లాలింకె పనికిరి అచ్చె. కుండిలింకె యెడకగరె తంకు విగ్రహానెకు ఆరాదించిలలింకె గనక తంకె కయిలా కడ్డినె విగ్రహానెకు బలి దిల్లాట బులి బచ్చికిరి కయితోసె. తంకు మనసాక్కి బలహీనమైలందరె అపవిత్రమైజీసె బులిగిచ్చె;

8 కడ్డి వల్లరె పురువు పక్కరె అమె మెప్పుపొందినింతో; నాకయిలవలరె అముకు తక్కువని, కయిలందరె అముకు బూతునీ.

9 ఈనె తోముకు కలిగిలా ఏ స్వాతంత్రము వల్లరె విస్వాసంరె బలంనిలాలింకె పాపంరె నాపొడుకుంటా దిగిమ్మాసి.

10 కైంకిబుల్నే జ్ఞానము గలిగిలా తువ్వు విగ్రహాలు పక్కరె కడ్డినిరె బొసిలాబెల్లె జోనె దిగిలీసి, బలహీనమైలా మనసాక్కిగల్లా సెయ్యె విగ్రహానెకు బలిదిల్లా పదార్థములుకు కయితె ధైర్యము దన్నెగిచ్చేనీనా?

11 సడకు కాకోసం క్రీస్తు మొరిజీసివో సే నాబలం రొల్లా సే తో బయి తో జ్ఞానము వల్లరె నసించుజూసి.

12 యాకిరి బయినెకు విరోధముగా పాపము కొరిలందరె, తంకె బలహీనమైలా మనసాక్కికు బొత్తలోగివురో వల్లరె, తోమె క్రీస్తుకు విరోధముగా పాపము కొరిలాలింకె ఈలీసా.

13 కాబట్టి కడ్డి పదార్థములు వలరె మో బయినెకు అబ్యంతరము కలిగివురో వలరె, మో బయినెకు అబ్యంతరము నాకలిగికుంటా రొల్లపనికిరి మియి కెబ్బుకు మోసో కయినీ.

9

అపొస్తులురో అదికారాలు, పైటినె

1 మియి స్వతంత్రుడు నీనా? మీయి అపొస్తులుడు నీనా? అమె ప్రబువైలా యేసుకు మీ దిగిలానినా? ప్రబువురె మోపైటినుకు పలము తోమె నీనా?

2 పొదరిలింకు మీయి అపొస్తులుడు నీనెను తొం మట్టుకినెను అపొస్తులు దీకిరి అచ్చె. ప్రబువురె మో అపొస్తులత్వముకు ముద్దగా రొల్లలింకె తోమె నీనా?

3 మెత్తె విమర్శించిలలింకు మీ కొయిలా సమాదానం ఎడాక.

4 కైతండుకు పీతండుకు అముకు అదికారం నీనా?

5 తల్లా పొదరె అపొస్తులులింకె పనికిరి, ప్రబువురో బయినెపనికిరి, పేతురు పనికిరి విస్వాసురాలు ఈలా నైపోకు పొచ్చాడె నీజీతె అముకు అదికము నీనా?

6 ఈనె పైటి నాకొరితె మీయి, ఇంకా బర్నబా మాత్రమాక అదికారం అచ్చినా?

7 కేసైనన్నా తా సొంత కర్చు లోగ్గీకిరి దండురె పైటికొరుసినా? ద్రాక్చతోట పొక్కిరి సడ పలము నాకైయిలాట కేసె? మందకు జొక్కిరి మందరో దుద్దో నాపీలాట కేసె?

8 ఏ కొతానె లోకాచరము బట్టి కొయిలించినా? దర్మసాస్త్రమంకా యెడకు కొయిలీసి నీనా?

9 కొల మండితల్లా గయిరో తుండోకు చిక్కము లోగితెనా బులి మోసే దర్మసాస్త్రమురె రాసికిరి అచ్చె. పురువు గయినె కొరకు విచారించిలినా?

10 కేవలం అమె కోసం ఎడకు కొయిలీసి అవును, అంకోసంనీనా ఏ కొత రాసికిరి అచ్చె? క్యాకిరిబుల్నే, దున్నిలాట ఆస సంగరె దున్నివాసి, కొల మండిలాట బిల్లోరె పాలుపొందిమంచెబులి ఆససంగరె మండిపించిమాసి.

11 తోము కోసం ఆత్మ సంబంధమైలాంచ అమె పొగిలబెల్లె తొం వల్లరె దేసంబందమైలా పొగలానె కట్టిగిత్తె బొట్ట పైటికిరా?

12 పొదరలింకు తోమంపరె ఏ అదికారంరె పాలుకలిగినె అముకు బడేట తాసి నీనా? ఈనె అమె ఏ అదికారముకు ఉపయోగించిగిల్లానింతో; క్రీస్తు సువార్తకు కే అబ్యంతరము ఈసన్నా నాకలుగుకుంటా సొబ్బి బరించిలించో.

13 మందిరంరె పైటి కొరిలాలింకె మందిరం దీకిరి కడ్డి మిలుసి. బలిపీటం పక్కరె పైటికొరిలాలింకు బలిదిల్లాటరె వాటా మిలుసిబులి తెలుసునీనా?

14 సాకిరాక సువార్త కొయిలాలింకు సువార్త వల్లరె జీవించిమాసిబులి ప్రబువు నియమించిసి.

15 మీ ఈనె ఆండ్రె కిరయినెను ఉపయోగించిగిల్లాని; తోమె మోవల్లరె యాకిరి జరిగించిమాసి బులి యే కొతానె రాసిలాని. కేసె ఈనెను మో అతినయ అదికారముకు వ్యర్థము కొర్నే మెత్తె మొరిజివ్వరాక బొల్ల.

16 ఈనె మి సువార్త ప్రకటించిలందుకు గొప్పలు కొయిగిన్నీ. సువార్త బోదించివురో మో బాద్యత. మియి సువార్త నాబోదించినె మెత్తె కొస్టా.

17 యెడ మియి ఇస్టపాడికిరి కొరినె మెత్తె బొర్టొనో మిలుసి. నాయిస్టపాడినెను పురువు యే బాజిత మెత్తె అప్పగించిసి.

18 సాకిరైనె మెత్తె బొర్టొనో కిర? మియి సువార్త ప్రకటించిలబెల్లె సువార్తరె మెత్తె తల్లా అదికారముకు పరిపూర్ణముగా నావినియోగించికిరి సువార్త సుచ్చురాక ప్రకటించివురో మో బొర్టొనో.

19 మియి సొబ్బిలింకె వినయంరె స్వతంత్రైకిరి అచ్చి. బడెమందికు సంపాదించిగిత్తె సొబ్బిలింకు మెత్తె మీయి పైటిమోపొగా కొరిగించి.

20 యూదునెకు సంపాదించిగిత్తె యూదునెకు యూదుపనికిరాక రొల్లింబి. దర్మసాస్త్రముకు నాలోబొడిలలింకు సంపాదించిగిత్తె మీ దర్మసాస్త్రముకు నాలోబొడిలాట ఈనెను, దర్మసాస్త్రముకు లోబొడిలాలింకె పనికిరి రొల్లింబి.

21 పురువు వినయంరె దర్మసాస్త్రము నారొల్లాటనీ కాని క్రీస్తు వినయంరె దర్మసాస్త్రముకు లోబొడిలాట. ఈనెను దర్మసాస్త్రము నారొల్లాలింకు సంపాదించిగిత్తె దర్మసాస్త్రము నారొల్లాలింకు దర్మసాస్త్రము నారొల్లాట పనికిరి తల్లింబి.

22 బలహీనులుకు సంపాదించిగిత్తె బలహీనులకు బలహీనుడుగా అచ్చి. క్యేకిరి ఈనెను కుండిలింకు రక్సింబిమాసిబులి సొబ్బిలింకు సొబ్బి విదముగా తంకమనమైకిరి అచ్చి.

23 ఈనెను మీయి సువార్త వల్లరె తొమల్లా యే ఆసీర్వాదానె పొందిగిమ్మాసి బులి సొబ్బి కొరింబి.

24 దొముడిల పందంరె దొముడిలాలింకె సొబ్బిలింకె దొముడువె గాని జొన్నాక బహుమనము పొందుగునుసి బులి తొముకు తెలిసినినా? సాకిరాక తొమె బహుమానము పొందిలాపనికిరి దొముడొండి.

25 ఈనె పందెమురె పొరాడిలా ప్రతిలంకె సొబ్బి వినయములురె తగ్గికిరి తాసె. తంకె క్షయమైలా కిరీటంకు పొందిగితెను, అమె ఈనె అక్షయమైల కిరీటంకు పొందిగిత్తె తగ్గికిరి అచ్చి.

26 సడుకాక మీ సర్దెలా గురి కలిక్కిరి దొమిడిలింబి వ్యర్థముగా పొరాడిలాని. బా మరిలాపనికిరి మీ పొట్లాడనీ గని గుటెబెల్లె పొదరిలింకు ప్రకటించిలా తర్వాతరె

27 మీయి మో దేకు నలగమరిగీకిరి మో స్వాదీనంరె రొగ్గించి మో బహుమానంకు వొరదగిన్నాసి బులి ప్రయాస పొడిలింబి.

10

విగ్రహాలు కోసం హెచ్చరిక

1 మో జట్టుకారీనెలింకె మియ్యె తొత్తె గుర్తు కొరిగిల్లింబి బులిగిల్లింబి మోసే కల్లొరె సంగితెనే తొముకు సెడకిర బుల్వే, అమె పితురులునె మెగొనె తొల్లె కాపాడుబొడికిరి తంకె సొబ్బిలింకె గొర్తసాంధ్రొరె ఉంపరె దీకిరి కిచ్చి నాయికుంటా సలికిరి జేసె,

2 మోసేకు సంగరె జెల్లాలింకె మేగొనెరె సాంధ్రొరె బాప్టిసం పొందిగిసె,

3 సొబ్బిలింకె ఆత్మ సంబందమైలా గుట్టాక కద్ది కయిసె.

4 సొబ్బిలింకె ఆత్మ సంబందమైలా గుటె పానీయముకు పానము కొరిసె. కెడబుల్వే తంకె సంగరెజేల్లాలింకె ఆత్మ సంబందమైలా బండపొత్తోటా పీసె; సె బండ క్రీస్తాక.

5 ఈనె తంకె బిత్తరె బడెలింకె పురువుకు ఇస్టంగా నింతె సెడకు బొనొరె మొరిజిసె తాత మొర్రిదే బొనొరె గతించిజిసి.

6 తంకె ఆసించిలా పనికిరి అమె నాబొల్లతల్లాట నా ఆసించిలా పనికిరి ఏ సంగితినె అమె అంకీనకు దిగిలపనికిరి అచ్చి.

7 “మనమానె కయితె పితే బొసొరిసె, కెలితె వుటిసె.” లేకనానె బులికిరి రాసిలా పనికిరి తంకెబిత్తరె కుండిలింకె పనికిరి తొమె విగ్రహారదకులలైకిరి రొయితనాండి.

8 ఈనె తంకె పనికిరి అమె దర్పిపైటి నాకొరికుంట తమ్మండి; తంకెబిత్తరె కుండిలింకె దర్పిపైటి కొరిలావల్లరె గుటెదినాక ఇరువది మూడువేల మంది మొరిజిసె.

9 అమె ప్రబువుకు బాదలోగిలా పనికిరి సోదించిలింబొ, తంకె బిత్తరె కుండిలింకె సోదించికిరి సప్పొను వల్లరె మొరిజిసె.

10 తొమె నాసొనిగిండి; తంకె బిత్తరె కుండిలింకె సొనిగికిరి మొర్నొదూత వలరె మొరిజిసె.

11 ఏ సంగితినె అంకీనె సంగరె దిగిలపనికిరి హెచ్చరికగా అచ్చి తంకు సంబవించిసి, అంతంకలొరె తల్లాపనికిరి అముకు కలిగితె రాసికిరి అచ్చి.

12 మియి టారికిరి అచ్చి బులికిరి తలంచిగిల్లాలింకె నాపొడిజికుంటా జాగర్తగా దిగెండి.

13 సాదారనంగా మనమనకు కలిగిల సోదనతప్ప ఈనె కిచ్చి తొముకు సంబవించిలానీ. పురువు నమ్మదగిలాట; తొమె సహింప గలిగితెత్తుకన్న బూతు సెయ్యె తొముకు సోదంపబొడినీ. సెత్తనీ, సహింపకలిగితె తాకు సోదన సంగరె కూడ తప్పించిగిల్లా బట్టొ కొరుసి

14 ఈనె మో జట్టుకారీనెలింకె, విగ్రహారాదనకు దూరు టారింబి.

15 బుద్ధిమంతులు సంగరె కొతలగిల పనికిరి తోమె సంగరె కొతలగిలించి, మీయి కొయిల సంగతకు తోమెకా ఆలోచించింది.

16 అమె దీవించికిరి ఆసిర్వాచనపు పాత్రబిత్రెరోల్లాట పివురో క్రీస్తు రొగొతో పాలుపొందిగివ్వరోనినా! ఈనె అమె బంగిల్లా రొట్టె కైయివురో క్రీస్తు దేరె పాలుపొందివ్వరోనినా.

17 అమె సొబ్బిలింకె సె గుట్టాక రొట్టెరె పాలుపొందిగిలింకో, రొట్టె గుట ఈనె బడేంచయాల అమె గుట్టాక దే యికిరి అచ్చొ.

18 దే ప్రకారముమైలా ఇస్రాయేలుకు దిగింది. బలి అర్పించిలా సెడకు కయిలలింకె బలిపీటము సంగరె పాలుపొందిగిలీసా.

19 ఇంక మియ్యి కొయిలాట కిరబుల్చె? విగ్రహార్పిపించివురో కిర రొల్లాటయినెను విగ్రహములరె కిర రొల్లాటయినెను కొయిలింకోనా?

20 నీ గాని, పురువు నానమ్మిగిల్లాలింకె అర్పించిలా బలినె పురువుకు నీ బుత్తోనుకు అర్పించిలిసెబులి కొయిలించి. తోమె బుత్తోనె సంగరె పాలుపొందిగితె మెత్తె ఇస్థం నీ.

21 తోమె ప్రబు పాత్రరోల్లాట సాకరాక బుత్తోనె పాత్రరోల్లాట కూడా పీనారొ ప్రబువురో బల్లంపరెత్తల్లా తాండె సెడ బిత్రెరోల్లాట బుత్తోనె బల్లంపరె తల్లా సెడబిత్రెరె కూడ పాలుపొందిగినానె.

22 ప్రబువుకు రగ్గొ దాన్నెపారొనా? తాకన్నా అమె బలంగలలింకెనా?

23 సొబ్బి వినయాలరె మెత్తె స్వాతంత్రము కలిగినీ గాని సొబ్బి కొరిలంచ నీ. సొబ్బిటి బిత్రెరె మెత్తె స్వాతంత్రము కలిగినీ గాని సొబ్బి క్రేమాబివుద్ది దిన్ను.

24 కేసెనె తా కోసం నీ, ఎదుటి లింకె కోసం బొల్లా దిగిమంచె.

25 మనస్సాక్కి అబ్యంతరంనీనె సొంతరె బిక్కిలాట మోసా కే ప్రన్న నాపొచ్చురుకుంట కెడయినె కైయివొచ్చు.

26 “బూమి తాండె బిత్రెరెరోల్లా సొబ్బి ప్రబువురోంచ బులి లేకనానె రాసికిరి అచ్చొ.”

27 అవిస్వాసినె సంగరె గుట తోముకు కద్దికు డక్కిలాబెల్లె జేతె తోముకు మనస్సురోలబెల్లె తోముకు దిల్లాంచకిరయినెను సెడకు గురించి మనస్సాక్కి నిమిత్తము కే విచారన నాకొరుకుండ కాండి.

28 ఈనె కేసినెను తొనంగరె ఎడ బలి అర్పించిలాటబులి కొయినె సెటా తెలిసిలాబెల్లె మనస్సాక్కి నిమిత్తము నా కాండి.

29 మనస్సాక్కి నిమిత్తముగా తో సొంత మనస్సాక్కి నిమిత్తము నీ పొదరిలింకె మనస్సాక్కి నిమిత్తముకా యాకిరి కొయిలించి. కిరుకుబుల్చే పొదరిలింకె మనస్సాక్కిబట్టి మో స్వాతంత్రము వినయంరె తీర్పు తీర్పువురో క్యేకిరి?

30 మియ్యి క్రుతజ్ఞత సంగరె కడిగినె మియ్యి కిడవల్లరె క్రుతజ్ఞతా చెల్లించిలింకో సెడ వల్లరె మియ్యి దూసింపబొడివురో కిర?

31 ఈనె తోమె కయినెను, పీనెను తోమె కిర కొరినెను సొబ్బి పురువొ మహిమ కోసం కొరొండి.

32 యూదునెకు యీనెను, గ్రీసుదెసొలింకు యీనెను, పురువురో సంగముకు యీనెను అబ్యంతరము కొరితెనాండి.

33 యాకిరి మియ్యి కూడ సొంత ప్రయోజనాలు నాదిగికుండా, బడేలింకె రక్సంపబొడిమంచె బులి తంకె ప్రయోజనం కలిగిమంచె బులి, సొబ్బి వినయములరె సొబ్బిలింకు సంతోసం లొగిల్లించి.

11

1 మియ్యి క్రీస్తు పొలికిరి సలిగిలా పనికిరి తోమెకూడ మెత్తె పొలికిరి సాలిగిండి.

ఆరాదనరె ముండొకు ముసుగు బుజ్జిగెవురో

2 తోమె సొబ్బి వినయాలరె మెత్తె జ్ఞాపకం కొరిగికుంట, మియ్యి తోముకు అప్పగించిల బోదనుకు పాటించిలందుకు తోముకు మెచ్చిగిలించి.

3 ప్రతి మనమకు సిరస్సు క్రీస్తాక, తిల్లాటకు సిరస్సు వొండ్రపోబులి, క్రీస్తుకు సిరస్సు పురువు బులి తోమె తెలిసిగిమంచె బులి కొరిగిల్లించి.

4 కే వొండ్రపో ముండొవుంపరె ముసుకు పొగికిరి ప్రార్థన కొరుసివో నీనె ప్రకటనాకొరసా, సె వొండ్రపో తా ముండొకు క్రీస్తుకు అవమానం కొరిలా పనికిరాక.

5 ఏ తిల్లాట ముండొవుంపరె ముసుకు పొగికిరి ప్రార్థనకొరిసివో నీనా ప్రకటనాకొరసా, సె తా తిల్లాట ముండొవుంపరె అవమానం కొరిసి; కెడబుల్చే సెడ తాకు గుండు కొరిలాపనికిరాక తాసి.

6 తిల్లాట మునుకు పొగినె తా ముండొరో బల్లొనె కత్తిరించిగిమంచె. కత్తిరించినెను గుండు కొరిగితె యినెను తిల్లాట అవమానముయినెను సెయ్యె మునుకు పొగిమంచె.

7 వొండ్రపోయినె పురువు పొలికిరి మాహిమయికిరి అచ్చి సెడకు ముండొవుంపరె మునుకు పొగినాసి ఈనె తిల్లాట వొండ్రపోకు మహిమయికిరి అచ్చి.

8 కెడబుల్నే తిల్లాట వొండ్రపోదికిరి అయివొగని వొండ్రపో తిల్లాట దీకిరి కలిగిలాని.

9 ఈనె తిల్లాటకు వొండ్రపో కోసం గాని వొండ్రపో తిల్లాట కోసం కొరిలాని.

10 సెడకు దూతానె నిమిత్తము తిల్లాటలొకె యిల్లా తొమె ముండొవుంపరె మునుకు పొగిండి సెడ గొయితకు గురించి రొసి.

11 ఈనె ప్రబువురె తిల్లాటకు వేరుగా వొండ్రపోనీ వొండ్రపోకు వేరుగా తిల్లాటనీ.

12 తిల్లాటకు వొండ్రపో దికిరి క్యాకిరి అయిసా సాకిరి వొండ్రపో తిల్లాటకు మూలముగా అయిసి, ఈనె సొబ్బిక్కుడ పురువు మూలముగ కలిగీకిరి అచ్చి.

13 తొబిత్తరె తొమె నిర్నయంకడిగెండి; తిల్లాటకు మునుకు నీకిరి పురువుకు ప్రార్థనకొరువురో బొల్లనా?

14 వొండ్రపో ముండొరో బల్లొనె పుసిగితె తాకు అవమానం బులి స్వబావసిద్ధముగ తొముకు తెలిసిసినా?

15 తిల్లాటకు ముండొరో బల్లొనె పైటిసెంగు పనికిరి దివ్వరొయిసి సెడకు తా ముండొరో బల్లొనె పుసిగివురో తాకు గొరవంగా తాసి.

16 కెసియినెను సెడవల్లరె కొలీనెలగ్గిలాలొకె అమె బిత్తరెయినెను పురువు సంగమురె యినెను ఏటాపన ఆచారమూనె నిబులి సెయ్యె తెలిసిగిమంచె.

ప్రబువురో కద్ది

(మత్తయి 26:26-29; మార్కు 14:22-25; లూకా 22:14-20)

17 తొముకు ఏ ఆజ్ఞానెకు దీకుంటా తొముకు మెచ్చిగించి. తొకూడికిరి అయివురో బూతు కీడుకుగాని బూతు మేలుకు నీ.

18 అగరె సంగతి కిరబుల్నే, తొమె సంగమురె సొబ్బిలొకె రొల్లాబెల్లె తొమె బిత్తరె కళ్లు అయిలి బులి నునిలించి. కుండెమట్టుకు ఎడ సొత్తెబులికిరి నమ్మిలించి.

19 తొమె బిత్తరె యొగ్గులైలా తంకె కెసెవో దిగదిలపనికిరి తొమె బిత్తరె విరిజేవ్వొరో తప్పినీ.

20 తొమెల్లా మిసికిరి అయిలబెల్లె తొమె ప్రబువు రాత్తి కద్ది బొల్లాట కొరిలాని.

21 కేడబుల్నే తొమె సె కద్ది కైలబెల్లె జొనెకంటా జొనె అగరె తా మట్టుకు సెయ్యె కద్ది కైయిలీసె; సెడకు జొనె బొక్కొలిసి ఇంకజొనె మత్తుయిలీసె.

22 ఎడకిర? కైయితె పితే తొముకు గొరొసినా? పురువు సంగముకు లెక్కనకొరుకుండ పేదలింకు లజ్జొకడిలిసినా? తొమె సంగరె కిర కొయిలించి. ఎడకు గురించి తొముకు మెచ్చిగిమినా? మెచ్చిగినీ.

23 మీ తొముకు అప్పజెప్పిలా సెడకు ప్రబువువల్లరె పొందించి. ప్రబువుయిలా యేసు సెయ్యె అప్పిగించబొడిలా రాత్తిరె గుట రొట్టెకు టెక్కికిరి,

24 క్రుతజ్ఞత చెల్లించిసి, సెడకు బగికిరి ఎడ తొమె కోసం యిలా మో దే; మెత్తె గుర్తు దనిగితె ఎడకు కొరుబులి కొయిసి.

25 సెడ పనికిరి కద్దియొజిల్లా తర్వాతరె గిన్నె టెక్కికిరి ఎ గిన్నె మో రొగొతొయిలా నో నిబందన, “తొమె ఎడబిత్తరొట పీలాబెల్లెలా మెత్తె గుర్తు” దనిగితె ఎడకు కొరుబులి కొయిసి.

26 తొమె ఏ రొట్టెకు కైకిరి, ఏ గిన్నెరొల్లాట పీలబెల్లెల్లా ప్రబువు అయిలజాంక తా మొర్నొకు ప్రకటించసో.

27 కాబట్టి కేసె అయొగ్యముగా ప్రబువురో రొట్టెకు కైసివో, నీనె తా గిన్నెరొల్లాట పీసెవో, సెయ్యె ప్రబువురో దేకు గురించి రొగొతొ గురించి పాపంకొరిలటా వుసి.

28 కాబట్టి ప్రతి మనమా తాకుసెయ్యె పరిక్నంచిగిమంచె; సాకొరికిరి సె రొట్టుకు కైకిరి, సె గిన్నెరొల్లాట పీమంచె.

29 ప్రబువు దేబులి నాబులిగికుండ కైకిరి పీలటా సిక్సవిది కలిగితె కైకిరి పీలిసి.

30 యే కారనం తొమె బిత్తరె బడెలింకె బలహీనులికిరి జబ్బుగా అచ్చె; బడెలింకె మొర్నిజీసె.

31 ఈనె అముకు అంకా పరిక్నంచిగినె తీర్పు నాపొందుకుంటా తాంచో.

32 అమె తీర్పు పొందినె లోకొసంగరె పాటు అముకు సిక్సవిది నాకలిగిలపనికిరి ప్రబువు అత్తరె సిక్సింపబొడిలించో.

33 ఈనె మో జట్టుకారీనెలింకె ఈనె, బల్ల విసయంరె తొమె మిసికిరి అయిలబెల్లె జొనెకోసం జొనె జొగ్గీకిరి రొమ్మంచి.

34 తోమె మిసికిరి అయివురో సిక్సవిదికు కారసం నీకుండ తల్లాపనికిరి, కేసినెను బొక్కొనంగరె రొల్లాబెల్లె తా గొరొరె కద్ది కైయిమంచె. మీయ్యె అయిలాబెల్లె మిగిల్లా సంగితిసెకు ఆజ్ఞానె దూంచె.

12

పరిసుద్దాత్మరో వరాలు

- 1 ఈనె మో జట్టుకారీనెలింకె ఆత్మసంబందమైలా వరమూనె కోసం తోముకు నాతెలిసిలాట మెత్తె ఇన్ఱం నీ.
- 2 తోమె యూదునెనీలాలింకె పనికిరి రొల్లబెల్లె నాకొతలాగిల విగ్రహముకు పూజాకొర్లిసండుకు సెడకు సలిపించుబొడిసి బులి తోముకు తెలుసు.
- 3 ఎడకు పురువు ఆత్మ వలరె కొతలాగిలాట కేసినెను యేసు సాపగ్రస్తుడుబులి కొయినీ, పరిసుద్దాత్మ వల్లరె తప్ప కేసినెను యేసు ప్రబువు బులి అంగీకరించెలీసె మియి తొత్తె కొయిపారి.
- 4 ఆత్మసంబందమైలా వరమూనె బడేవిదలగా అచ్చి ఈనె సె గుటె ఆత్మ అముకు దూసు.
- 5 ఈనె పరిచర్యానె బడే రకానెగా అచ్చె గని సే ప్రబువుకు జొన్నాకాక సేవ కొరిలీసె.
- 6 బడేరకానెపైటిసె అచ్చి గాని సొబ్బిలింకె బిత్తరె సొబ్బిటికు జరిగించిలా పురువు జొన్నాక.
- 7 ఈనెను సొబ్బిలింకె బిత్తరె ప్రయోజనము కోసం ప్రతిజోనుకు ఆత్మ ప్రత్యక్షత అనుగ్రహించికిరి అచ్చి.
- 8 క్యాకిరి బుల్చే, జోనుకు ఆత్మ వల్లరె బుద్ది వాక్యముకు, ఇంక జోనెకు సె ఆత్మకు పాటించిలా జ్ఞానవాక్యము, దివ్యురూసి.
- 9 ఇంకజోనుకు సె ఆత్మవల్లరాక విస్వాసముకు, ఇంకజోనుకు సె గుటె ఆత్మవల్లరాక స్వస్థపరిచిలా వరములకు, దివ్యురూసి.
- 10 ఇంకజోనుకు అద్భుత పైటిసె కొరిలా సక్తి, ఇంకజోనుకు ప్రవచన వరముకు, ఇంకజోనుకు ఆత్మల వివేచన, ఇంకజోనుకు నానావిద బసోనె, ఈనె ఇంకజోనుకు బసోనె అర్థం కొయిల్ల సక్తి అనుగ్రహించికిరి అచ్చి.
- 11 ఈనెను ఎడల్లకు సె ఆత్మ గుట్టాక తా చిత్తము చొప్పురె ప్రతిజోనుకు ప్రత్యేకంగ బంటిడికిరి కార్యసిద్ది కలిగించిలీసి.

గుటె దేరె బడే అవయవానె

- 12 క్యాకిరి దే గుటెయిలాబెల్లె బడె అవయవమునెకు కలిగీకిరి అచ్చివో, క్యాకిరి దేరో అవయవమునె సొబ్బి గుట్టాక దేయికిరి అచ్చి, సాకరాక క్రీస్తు అచ్చి.
- 13 క్యాకిరి బుల్చే, యూదునె యీనెను, గ్రీసుదెసొలింకె యీనెను, దాసునె యీనెను, స్వతంత్రలుయినెను, అమల్లా గుటె దేబిత్తరకు సె ఆత్మరె బాప్టీసం కడిగించో. అమల్లా గుట్టాక ఆత్మ సె అమె మనసురె పూరిపీసి.
- 14 దే అల్లా గుట్టాక అవయవముగా నారొయికిరి బడే అవయవమునె పనికిరి అచ్చి.
- 15 మీయ్యె అత్తొనీ సేడకు దేబిత్తరొల్లటా నిబులి పాదము కొయిల్లెత్తు మాత్రము దే బిత్తరొల్లట నికిరినీ.
- 16 ఈనె మియ్యె అంకి నీ సెడకు దే బిత్తరొటా నీబులి కన్నొ కొయిల్లెత్తమాత్రము దేబిత్తరొట యికిరిని.
- 17 దేల్లా అంకి సునివురో కేటే? సొబ్బి సునివురో ఈనె గొదొ దిగువురో కేటే?
- 18 ఈనె పురువు అవయవములరె ప్రతిటకు తా చిత్తప్రకారం దేరె రోయిదీసి.
- 19 సెడల్లా గుట్టాక అవయవమునె యినె దే తాసినా?
- 20 అవయవమునె బడెయినెను దే గుట్టాక.
- 21 సెడకు అంకి అత్తో సంగరె తువ్వు మెత్తె అవసరం నీబులి కొయినాసె; ముండొ, పాదమూనె సంగరె మెత్తె అవసరం నీబులి కొయినాసె.
- 22 సెత్తనీ దే గుటె అవయవమునెరె కిచ్చి మరి బలహిసంపనికిరి దిగదుసివో సెడ మరి అవసరం.
- 23 దేరె కే అవయవమునె గనతనిలాటబులి తలింబిగిలించో సె అవయవమునెకు మరి బూతు గనపరిసిలించో. నా సుందరముతల్లా అమె అవయవమునెకు బూతు ఈలా అందం కలిగిసి.
- 24 సుందరి తల్లా అమె అవయవమునెకు ఎక్కువగా సుంద్రికిరి తవ్వురో అవసరం నీ.
- 25 ఈనె దేరె వివాదము నీకిరి, అవయవమునెకు గుటెకు గుటె బూతుగా పరామర్శించిలాపనికిరి, పురువు తక్కుయిటికాక ఎక్కువ గనత కలిగించికిరి, దేకు అమర్చికిరి అచ్చి.
- 26 ఈనె గుటె అవయవము కొస్తొపొడిలాబెల్లె అవయవమునె సొబ్బి సెడసంగరె కొస్తొపొడిసి; గుటె అవయవము గనత పొందిల్లాబెల్లె అవయవమునె సొబ్బి సెడసంగరె సంతోసించుసి.
- 27 సెడపనికిరకా, తోమె క్రీస్తురో దేయికిరి రొయికిరి వేరు వేరుగా అవయవములీకిరి అచ్చి.

28 ఈనె పురుషు సంగమురె అగరె కుండిలింకు అపొస్తునె పనికిరి, సెడ తర్వాతరె కుండిలింకు ప్రవక్తానెపనికిరి, గురువు పనికిరి, అద్భుతానె కొరిలాపనికిరి, కుండిలింకు స్వస్థపరిచిల క్రుపావరమునె పనికిరి, కుండిలింకు సాయంకొరిల్లలింకె, కుండిలింకు ప్రబుత్వమునె కొరిలాపనికిరి, కుండిలింకు నానా బసానె కొతాలగిల పనికిరి నియమించిసి.

29 సొబ్బి అపొస్తులునా? సొబ్బి ప్రవక్తానెనా? సొబ్బి గురువునెనా? సొబ్బి అద్భుతానె కొరిలాలింకెనా? సొబ్బి స్వస్థపరిచిలా క్రుపావరమునె గలలింకెనా?

30 సొబ్బి బసానె సంగరె కొతాలగిలలింసొనా? సొబ్బి సె బసానె అర్థం కొయిలిసెనా?

31 క్రుపావరములరె స్రైస్థమైలట ఆసక్తిసంగరె పొందినిండి. యడ ఈనెను సర్వోత్తముమిలా బట్టొకు తొముకు దిగిదిలింబి.

13

ప్రేమ

1 మనమారొ బసా సంగరె దేవదూతలరొ బసానె సంగరె మీయ్యె కొతాలగినెను, ప్రేమ నిలాటయినె మ్రోగెడు కంచును గనగనలాడిల తాలముయికిరి రొంచు.

2 ప్రవచించిలా క్రుపావరము కలిగీకిరి మర్మములసొబ్బి జ్ఞానంసొబ్బి తెలిసిలాట యినెను, బొనొనుకు వెకలింబలబెల్లె పరిపూర్ణ విస్వాసము గలిగిలట యినెను, ప్రేమ నారొలటయినె మీయ్యె వ్యర్థమిల్లాట.

3 నీలలింకె కద్ది కోసం మో ఆస్తల్లా దినెను, మో దే అప్పగించినెను మోబిత్తరె ప్రేమ నారొయినె ప్రయోజనము కిచ్చినీ.

4 ప్రేమ జీవిత కలొ సహించిసి, దయ దిగిదూసి ప్రేమ యిర్నపొడిని; ప్రేమ డంబముగా ప్రవర్తించిని; సెడ ఉప్పొంగిని;

5 అమర్యాదగా సలిసీ; స్వప్రయోజనముగా విచారించిగినీ; బేగ రగ్గొపొడిసీ; అపకారముకు మనస్సురె రొయిదిగిన్ని.

6 దుర్నితి విసయంరె సంతోసంపొడితెనా సత్యముంరె సంతోసించుసి.

7 సొబ్బిటికు తెలిసి; సొబ్బిటికి నమ్మసి; సొబ్బిటికి నిరీక్సించిసి; సొబ్బిటికు ఓర్పు.

8 ప్రేమ జీవితాంతం రొసి. ప్రవచనములుయినెను నిరర్థకమునె ఊసి; బసానినెను టారుజుసి; జ్ఞానంయినెను నిరర్థకము వుసి;

9 అమె కుండేమట్టుకు తెలుసు, కుండేమట్టుకు ప్రవచించిలింబొ గానీ

10 పూర్ణమిల్లాట అయిలాబెల్లె నాపూర్ణమిలట్టా అంతరించజోసి.

11 మీ పిల్లాసా యికిరి రొల్లాబెల్లె పిల్లాసా పనికిరి కొతాలగించి, పిల్లాసా పనికిరి ఊహించిగించి, పిల్లాసా పనికిరి ఆలోచించి. ఉంచినె బొట్టయికిరి పిల్లాసారొ చేస్తలు మానిపెంచి.

12 ఉంచినె అద్దమురె దిగిల పనికిరి సూచనగా దిగిలింబొ; సెల్లె మూరె మూనొక్కిరి దుగుంచొ. ఉంచినె కుండేమట్టుకు తెలిసిగీకిరి అచ్చొ; సెల్లె మీ పూర్తిగా తెలిసిగిల్లా పనికిరి పూర్తిగా తెలిసిగుంచి.

13 ఈనె విస్వాసము, ఆస, ప్రేమ ఏ తింట తారొసి; ఆండ్రె స్రైస్థమైలాట ప్రేమాక.

14

ఆత్మబిత్తరె బడే వరాలు

1 ప్రేమ కలిగీకిరి రొయితె ప్రయత్నం కొరొండి. ఆత్మ సంబంధమైలా వరములకు ఆసక్తితీకిరి కోరుగునొండి. వినేసముగ తొమె ప్రవచన వరముకు కోరుగునొండి.

2 కిరుకుబుల్నే బసా సంగరె కొతాలగిల్లాట మనమనె సంగరె నీ పురుషు సంగరె కొతాలగిలిను; మనమ కెసినెను గ్రహించిని గాని సెయ్యె ఆత్మవల్లరె మర్మములకు కొతాలగిలీసి.

3 క్షేమాబివుద్ది హెచ్చరికయు ఆదరన కలిగిలాపనా, ప్రవచించలలింకె మనమసంగరె కొతానె లాగిలిసి.

4 బసాది కొతానగిలలింకె సెయ్యె క్షేమాబివుద్ది కొరుగూసి గాని ప్రవచించలింకె సంగమురె క్షేమాబివుద్ది కలుగును.

5 తొమె అల్లా బసాది కొతాలగిమంచెబులి కోరిగిల్లించి గాని తొమె ప్రవచించెమసి బులి మరి వినేసముగా కోరిగిల్లించి. సంగము క్షేమాబివుద్ది కడిగిరి నిమిత్తము బసాది కొతాలగిలాలింకె అర్థం కొయినగాని తాపనా ప్రవచించులలింకె స్రైస్థుడు.

6 మో జట్టుకారీనెలింకె, ఆలోచించొండి; బసాది కొతాలకుంటా మియ్యె తొ పక్కు. అయికిరి సత్యమును డొరొపొడిసిబులి జ్ఞానోపదేసం కొరిమంచెబులి ప్రవచించిమంచెబులి బోదించిమంచెబులి తొమె సంగరె నాకొతా నొగినె, మో వల్లరె తొముకు ప్రయోజనము కిర?

7 పిల్లనగొవిగాని వీనా గాని, నిర్ణీవ వస్తువునె వాయిచిలబెల్లె, గొలానె సంగరె బేదము నాకొరిలాబెల్లె, ఊదిలాటకిరో వాయిచిలటకిర బులి క్యేకిరి తెలుసు .

8 ఈనె బూర స్వస్థము నీలా ద్వని దిలబెల్లె యుద్దముకు కేసె తయారు మాసె?

9 సాకరాక తొమె స్వస్థమైలా కొతానె జిబ్బొ సంగరె పలికినె గని పలికిలట క్యేకిరి తెలిసివో? తొమె బా సంగరె కొతాలాగిల పనికిరి అచ్చొ.

10 లోకొరె కెత్తో బడే బసోనె అచ్చె, సెడ బిత్తరె గుటెనె స్వస్థమైకిరి తన్ని.

11 కొతానె అర్థం మెత్తె నాతెలిసినె. కొతలగిలాటకు మియ్యి పరదేసియిలా పనికరి తాసి, కొతాలాగిలాట మెత్తె పరదేసి పనికిరి తాసి.

12 తొమె ఆత్మసంబందమైలా వరమానె వినయంరె అసక్తిగలిగిలాలింకె సెడకు సంగముకు అబివ్రుద్ది కలిగిలా నిమిత్తము సె తొముకు విస్తరించిలా పనికిరి ప్రయత్నము కొరొండి.

13 బసో సంగరె కొతాలగిలాట అర్థం కొయిలాపనికిరి సక్తికలిగిలపనికిరి ప్రార్థన కొరుమంచె.

14 మియ్యి బసో సంగరె ప్రార్థన కొరినె మో ఆత్మ ప్రార్థనకొరసి గాని మో మనస్సు పాలువంచిగికిరి తన్ని.

15 ఈనె ఆత్మసంగరె ప్రార్థనకొరొంచి, మనస్సు సంగమురె ప్రార్థన కొరుంచి; ఆత్మ సంగరె గాంచి, మనస్సు సంగరె గాంచి.

16 నీనె తువ్వు ఆత్మసంగరె స్థాత్రము కొయిలాబెల్లె ఉపదేసము పొందిలట తువ్వు కొయిలాటకు గ్రహించి నీ సెడకు, తువ్వు క్రుతజ్ఞతాస్తుతులు కొయిలాబెల్లె ఆమెను బులి సెయ్యె క్యేకిరి కొయిసి.

17 తువుయినె బొల్లాకిరి క్రుతజ్ఞతాస్తుతులు చెల్లించిలీను ఈనె అగరె తల్లాట క్షమబివ్రుది పొందినీ.

18 మియి తొమె సొబ్బిలింకె కన్నా బూతు బసోనె సంగరె కొతాలాగిలించి; సెడకు పురువు సుత్తించిలించి.

19 ఈనెను సంగమురె బసొసంగరె దొస్టవేలు కొతానె కొతాలగువురో కన్నా, పొదరలింకు బోదకలిగిలాపనికిరి మో మనస్సు సంగరె పాట కొతానె కొతాలగివురో మేలు.

20 మో జట్టుకారీనెలింకె, తొమె బుద్ధివిసయంరె సన్నిపిల్లనెనికిర దుస్థత్వము వినయంరె సిసువులుగా రొయికిరి; బుద్ధి వినయంరె బొడిలింకె పనికిరి టారించి.

21*

అన్యబసోనె కొతలగిల మనమనె దీకిరి,

పొదరె మనమానె వొట్టోనె దీకిరి,

ఏ మనమనె సంగరె కొతాలగిపించొంచి;

సెల్లె ఈనెను తంకె మో కొతా సున్నింతె బులి ప్రబువు కొయిలీసి బులి లేకనానె రాసికిరి అచ్చి.

22 సెడకు బసోనె విస్వాసునెకు నీ అవిస్వాసింకె కాక సూచనయికిరి అచ్చి. ప్రవచించివురో అవిస్వాసులకు నీ విస్వాసులకు సుచనయికిర అచ్చి.

23 సంగముల్లా గుటెసారి మిసికిరి సొబ్బిలింకె బసో సంగరె కొతాలగిత్తలబెల్లె, ఉపదేసము పొందిలటయినెను మమోలుమనమనె అవిస్వాసులీనెను బిత్తరకు అయిలబెల్లె, తొమె బోడ కొతాలగిలిసో బులి కొయిగిల్లీసానా?

24 ఈనె సొబ్బిలింకె ప్రవచించితలబెల్లె అవిస్వాసింకె యినెను ఉపదేసము పొందిలటయినెను బిత్తరకు అయిలబెల్లె, సొబ్బిలింకె బోదవలరె సెయ్యె పాపిబులి గ్రహించికిరి, సొబ్బిలింకె వలరె విమర్శింపబొడిసి.

25 సెల్లె సెయ్యె మనస్సు గుట్టునె దొరెపొడసి. ఎడవలరె “పురువు సొత్తకా తొబిత్తరె అచ్చి!” బులి ప్రచురము కొరుకుంటా సెయ్యె సాగిలిపొడికిరి నమస్కారంకొరిసి.

సంగమురె క్రమము

26 మో జట్టుకారీనెలింకె, ఉంచినె తొబిత్తరె కిర జరిగిలీసి? తొమె మిసికిరి అయిలాబెల్లె జొనె గుట కీర్తన గైమంచె బులి అచ్చి; ఇంకజొనె బోదించిమంచెబులి అచ్చి; జొనె తాకు బయిలు పరిచిమంచెబులి ప్రకటనకొరిమంచెబులి అచ్చి; జొనె బసోసంగరె కొతాలగిమంచె బులి అచ్చి; జొనె అర్థం కొయిమంచి బులి అచ్చి; సారక సొబ్బి సంగముబివ్రుద్ది కలిగితె జరిగివొరో.

27 బసోసంగరె కెసింకెను కొతాలగినె, దీలింకె అవసరమైనె తిల్లింకె మించుకుండ, వంతులు పనికిరి కొతలగిమంచె, జొనె అర్థం కొయిమంచి.

28 అర్థం కొయిలాట నీనె సెయ్యె సంగమురె వొల్లాగా తమ్ముంచె గాని, తాసంగరె పురువు సెయ్యె కొతాలగివొచ్చొ.

29 ప్రవక్తానె దీలింకె తిల్లింకె కొతాలగివొచ్చు; తక్కిలాలింకె వివేచించిమంచె.

* 14:21 యెసయా 28:11, 12

30 ఈనె బొసిరిల్లా ఇంకజోనుకు కిరయినెను బయలుపొడినె అగరోట వల్లకిరి తమ్ముచె.

31 సొబ్బిలింకె సుక్కిగిల్లాపనికిరి సొబ్బిలింకె హెచ్చిరిక పొందిలపనికిరి తొమెసొబ్బిలింకె జొనె తర్వాతరె జొనె ప్రవచించివొచ్చు.

32 ఈనె ప్రవక్తానె ఆత్మసంగరె ప్రకటించె వరము స్వాదినంరె అచ్చి.

33 సాకరాక పరిసుద్దురో సంగము సొబ్బిటిరె పురువు సమాదానముకు కర్త గాని అల్లరికు కర్త నీ.

34 తిల్లాగటలింకె సంగమురె వల్లాగా తమ్ముచె; తంకె లోబొడికిరి తమ్ముచి గాని, కొతలాగితె తంకు అదికారం నీ.

యాకిరి లేకనములు కొయిలీసి.

35 తంకె కిర యినెను సుగ్గిమంచెబులికిరి, గొరొరె తంకె తంకెరో గొయితానెకు పొచ్చిరిమంచె; సంగమురె తిల్లాగలింకె కొతలాగివురో అవమానము.

36 పురువురో వాక్యము తొమె పక్కరె దీకిరకా బయలుకు జొసినా? తొమె పక్కు మాత్రమకా అయివొనా?

37 కెసినెను తా ప్రవక్తయినెను ఆత్మసంబందం యినెను బులిగినె, మియి తొముకు రసీలాట ప్రబువురె ఆజ్జలబులి సెయ్యె కచ్చితముగా తెలిసిగిమంచె.

38 ఈనె కెసినెను నాతెలిసిలాట ఈనెను నాతెలిసిపనికిరి రొమ్మురో.

39 కాబట్టి మో జట్టుకారీనెలింకె, ప్రవచించివురో ఆసక్తి సంగరె అపేక్కించెచాండి, బసొనె సంగరె కొతలాగివురో ఆపితెనాండి గాని,

40 సొబ్బిటికు మర్యాదగా క్రమముగా జరిగిమురొండి.

15

క్రీస్తురో పుర్నుద్దానం

1 ఈనె మో జట్టుకారీనెలింకె మీయి తొముకు కొయిలా సువార్తకు తొముకు తెలియపరిచిలీంచి తొమె అల్లా విస్వాసము నిలాకడగా టారించి.

2 తొమె నెడకు వొప్పిగినిసా, నెడబిత్తరె బుల్లికిరి అచ్చె. తొమె విస్వాసముకు నావ్యర్థమికుండ గాని, మియి కే ఉపదేసరూపంరె సువార్త తొముకు కొయించివొ సె ఉపదేసముకు తొమె గట్టిగా దరిగికిరిరోన్నె సె సువార్తవల్లరె తొముకు రక్కనకలిగిలాలింకె పనికిరి తాసా.

3 మెత్తెదిల్లా ఉపదేసముకు అగరె తొముకు అప్పజెప్పించి. సాకరాక, లేకనములు ప్రకారము క్రీస్తు అమె పాపలకు వలరె మొర్నిజిసి,

4 లేకనములురె రాసిల పనికిరి సమాదికొరికిరి, సెయ్యె తింట దినొరె బుల్లికిరి జీవం సంగరె ఉటిసి.

5 సెయ్యె పేతురుకు, తర్వాతరె పన్నెండులింకు అపోస్తలుకు దిగదీసి.

6 సె తర్వాతరె తాకు వెంబడించెలా పంచసాయి కన్నా బుతులింకు గుటె గడియరాక దిగదీసి. యంకె తంకెబిత్తరె బుడెలింకె ఉంచినెజాంక జీకిరి అచ్చె, ఈనె కుండిలింకె మొర్నిజిసి.

7 ఈనె సెయ్యె తర్వాతరె యాకోబుకు, సె తర్వాతరె అపోస్తలు సొబ్బిలింకు దిగదీసి.

8 సొబ్బిలింకన్నా కడపటి కలొరె జొరైలా మెత్తెకూడ ఆకరుకు దిగదీసి;

9 కిరబుల్నే మియి అపోస్తలు సొబ్బిలింకు బిత్తరె తక్కువైలాటని పురువు సంగముకు హింసించిలందరె అపోస్తలుబులిగితె అర్హతనిలాట.

10 ఈనెను మియికిర యాకిరి అచ్చివొ నెడ పురువుకు క్రుపవల్లరాక యాకిరి అచ్చి. ఈనె మెత్తె అనుగ్రహింపబొడిలా తా క్రుప నిస్ఫలము యిలాటనీ గాని, తంకె సొబ్బిలికంటా మియిబుతు ప్రయాస పొడించి. ప్రయాసపొడిలటా మియినీ, మెత్తె తొడైకిరి తల్లా పురువురో క్రుపాక.

11 మి యానెకిర తంకె యానెకిర, సాకరాక మియ్యి ప్రకటించిలించి, సాకరాక తొమెకూడ విస్వాసించొండి.

అం పుర్నుద్దానము

12 క్రీస్తు మొర్నొడికిరి ఉటికిరి అచ్చిబులి ప్రకటింపబొడిలాబెల్లె తొమెబిత్తరె కుండెలింకె మొరిజలలింకె పునరుత్థానముకు నీబులి క్యేకిరి కొయిలీసా?

13 మొరిజలలింకె పునరుత్థానముకు నారొన్నె, క్రీస్తు కూడ వుటికిరినీ.

14 ఈనె క్రీస్తు వుటికిరి నాతన్నె అమె కొరిలా ప్రకటన వ్యర్థమకా, తొమె విస్వాసముకు వ్యర్థమకా.

15 పురువు క్రీస్తుకు ఉటదీసిబులి, తా కోసం అమె సాక్షం కొయిలించో నీనా? మొరిజిలలింకె ఉటిసె పురువు తాకు ఉటిదిల్లనీ కాబట్టి అమ్మాక పురువురొ విసయంరె సారొ సాక్సిలునె పనికిరి దిగదిల్లించో.

16 మొరిజిలాలింకె నావుటిసె క్రీస్తు కూడ వుటిలానీ.

17 క్రీస్తు ఉటికిరిరొన్నె తొమె విస్వాసము వ్యర్థమకా, తొమెయింక తొమె పాపంబిత్తరకా అచ్చొ.

18 సెత్తనీ, క్రీస్తురె మొరిజిలాలింకె కూడా నసించిలా పనికిరిరాక.

19 అమె ఏ జీవిత కలో వరకాక క్రీస్తురె నిరిక్సింబిలాలింకె యీనె మనమానె సాబ్బిలింకె బిత్తరె అం కన్నా దొర్బాగ్యులునె కేసె రొన్నింతె.

20 ఉంచినినె మొరిజిలాలింకె బిత్తరె అగరె పలముగ క్రీస్తు మొర్నొదీకిరి ఉటికిరి అచ్చొ.

21 గుటె మనమ వల్లరె మొర్నొ అయిసి సెడకు గుటె మనమ వల్లరాక మొరిజిలాలింకె పునరుత్థానుము కలిగిసి.

22 ఆదాముదీకిరి సాబ్బిలింకె క్యాకిరి మొరిజిల్లీసెవొ, సాకరాక క్రీస్తురె సాబ్బిలింకె జీవురొ వూసి.

23 ప్రతిజానె తా, తా వరసానె చొప్పురె జీవురొ వూసి; అగరె పలము క్రీస్తు; సెడ తరవాత క్రీస్తు అయిలాబెల్లె తల్లలింకె జీవురొ వూసి.

24 సె తర్వాతరె సెయ్యె సాబ్బిటికు ఆదిపత్యముకు, సాబ్బిటిరె అదికారముకు, బలముకు మరికిరి తా బోయిలా పురువుకు రాజ్యము అప్పగించుసి; సెల్లె అంతము ఆసి.

25 కిరుకుబుల్నే తా సత్రువుల సాబ్బిలింకె తా పాదము తొల్లె రొయిదిల్లాజాంక క్రీస్తు రాజ్యపరిపాలన కొరిసి.

26 ఈనె చివరకు వొడించబొడిలా సత్రువూనెకు మొర్నొ.

27 పురువు సాబ్బిటికు క్రీస్తు పాదము తొల్లె లోపరిచికిరి అచ్చొ. సాబ్బిను లొబొడికిరి అచ్చొబులి కొయిలాబెల్లె తాకు సాబ్బికూడ లోపరిచిలాట తప్ప సాబ్బిను లోపరిచిబొడికిరి అచ్చొబుల్లా సంగతి వాస్తవమాక.

28 ఈనె సాబ్బిను తాకు లోపరిచిబొడికిరి తల్లాబెల్లె పురువు సర్వమురె సర్వమైలా నిమిత్తము పో తాకు సాబ్బిను లొపరిచిలా పురువుకు సెయ్యెకా లొబొడుసి.

29 పున్నరుతనము నారొనె మొరిలలింకె కోసం బాప్టిసం కడిగిలలింకె కిరకొరిసె? మొరిలలింకె మాత్రమ జీనె మొరిలలింకె కోసం తంకె బాప్టిసం కడివురొ కిరుకు?

30 ఈనె అమె గడిగడికు మొర్నొ దొరొసంగరె రొప్పురొకిర?

31 మో జట్టుకారీనెలింకె అమె ప్రబువుయిలా క్రీస్తు యేసురె ఏకమైతె మియ్యి దినొదినొకు మొరిజిలింబి బులి కొయిలించి.

32 మనమా పనికిరి, మియ్యి ఎపెసురె మ్రుగముల సంగరె లాగినె మెత్తె లబ్బొకిర? మొరిజిలాలింకె బులికిరి నాజీనె “అయిండి కల్లికు కైయిమా పిమా.”

33 మోసజితానాండి. దుస్థసాంగత్యము బొల్ల నలకు చెడమరుసి.

34 నీతి ప్రవర్తగలలింకె పనికిరి వుటికిరి, పాపము కొరితెనాండి; పురువు గురించి జ్ఞానము కుండిలింకు నీ. తొముకు లజ్జొ అయితె యాకిరి కొయిలించి.

పురుద్దానమురొ దే

35 ఈనె మొరిజిలాలింకె క్రేకిరి వుటసె? తంకె ఏటాపన దేసంగరె ఆసె బులి జీనె పొచ్చరిలిసి.

36 ఓ బుద్ధినిలాట, తువ్యు విత్తలట మొరిజినె గాని జీనీ నీనా.

37 తువ్యు విత్తిలాట గురించి దిగినె సెడ గోదుమ గింజ యినెను సరే, ఈనె కే గింజా యినెను సరే, సెడ గింజకాక విత్తిలిసి గాని జొర్నెలా దే విత్తువురొ నీ.

38 ఈనె పురువు తా చిత్తప్రకారము తువ్యు విత్తలటకు దే దూసి. ఈనె ప్రతి విత్తోనెకు సడరొ సాంత దే దిల్లీసి.

39 మోసొబ్బి గుటె విదమైలాట నీ. మనమరొ మోసొ వేరు, జంతువునె మోసొ వేరు, పక్కిరొ మోసొ వేరు, మచ్చొ మోసొ వేరు.

40 ఈనె మెగొనెరె దే అచ్చొ, బూమిరొ దే అచ్చొ; మెగొరొ దేనె మహిమ వేరు, బూమిరొ దే వేరు.

41 సూర్యని మహిమ వేరు, చంద్రుడురొ మహిమ వేరు, నకృతమునె మహిమ వేరు, మహిమరె గుటె నకృతముకు ఇంగుటె నకృతముకు బేదము అచ్చొ నీనా

42 మొరిజిలాలింకె పునరుత్థనుము సాకరాక. దే క్షయమైకిరి విత్తికిరి అక్షయమైల పనికిరి వుటసె;

- 43 గనహినమైలాలింకె బుజ్జిదిలాలింకు గనులుపనికిరి ఉటువురో వూసి; బలహినమైలా పనికిరి బుజ్జికిరి, బలమైలపనికిరి వుటువురో వుసి;
- 44 ప్రక్రతి సంబందమైలా దేపనికిరి బుజ్జిదికిరి ఆత్మసంబందమైలా దేపనికిరి వుటిసి. ప్రక్రతిసంబందమైలా దేయిలటా సెడకు ఆత్మసంబందమైలా దే కూడ అచ్చి.
- 45 ఏ వినయంరె ఆదాముకు “అగరె మనమా జీకుంటా మనమాయిసి రాసికిరి అచ్చి”. అగరె ఆదాము జీవించిల ఆత్మ యిసి.
- 46 ఆత్మ సంబందమైలాట అగరె కలిగిలాట నీనా, ప్రక్రతి సంబందమైలా అగరె కలిగిలాట; తర్వాతరె ఆత్మసంబందమైలాట.
- 47 అగరె మనమా బూసంబందమైలా మట్టిదికిరి జొర్నైలాట, దీటా మనమా పరలోకందికిరి అయిలాట.
- 48 మట్టిదికిరి జొర్నైలాట కెసో మట్టిదికిరి జొర్నైలాట సాటలింకాక, పరలోక సంబందం కేటవో పరలోక సంబందూనె సాటలింకాక.
- 49 ఈనె అమె మట్టిదికిరి జొర్నైలాటకు పోలిక పొగిలపనికిరి పరలోక సంబందియిలా పోలిక దరించికిరి అచ్చి.
- 50 మో జట్టుకారీనెలింకె మియ్యి కొయిలాట కిరబుల్నై రొగొతో మోసా పురువురో రాజ్యముకు స్వతంత్రించుగిను; క్షయత అక్షయతకు స్వతంత్రించిగిను.
- 51 ఇదిగొ తొముకు గుట కొయిలించి; అమె సొబ్బిలింకె గుమ్మినింతో గాని నిమిసమురె, గుటె రెప్పపాటురె, కడబూర మ్రోగలాబెల్లె అమె సొబ్బిలింకె మార్పు పొందుసి.
- 52 బూర మ్రోగుసి; సెల్లె మొర్నొకు అక్షయలుగా ఉటుసి, అమె మర్పు పొందుంచో.
- 53 నాసించిలాట ఏ దే అక్షయతకు పిందిగివలిసిలా అవసరం అచ్చి; మర్త్యమైలా ఏ దేకు అమర్త్యతకు పిందిమంచి.
- 54 ఏ నాసించిలాట పిందిగెల్లబెల్లె, ఏ మర్త్యమైలా అమర్త్యతకు పిందిగెల్లబెల్లె, విజయం అగరె మొర్నొ మింగిబొడుసు బులి రాసికిరిరోల్లా వాక్యము నెరవేరుసు.
- 55 ఓ మొర్నొనో, తో విజయం కేట?
- ఓ మొర్నొ, తో కొంట కేట?
- 56 మొర్నొ పాపము వల్లరె నాసింము కొరిలా సక్తి పొందుగుసి; పాపముకు దర్మసాస్త్రం వల్లరాక బలం పొందిగిలిసి.
- 57 ఈనెను అమె ప్రబువుయిలా యేసు క్రీస్తు మూలమురె అముకు జయము అనుగ్రహించి తల్లా పురువుకు స్తోత్రము కలుగుసు గాక.
- 58 ఈనె మో జట్టుకారీనెలింకె తో ప్రయాసము ప్రబువురె వ్యర్థమునీబులి తెలిసికిరి, స్తిరులుకు, నాకదిలాలింకె, ప్రబువు కార్యాబివృద్ధిరె కెబ్బుకును ఆసక్తి సంగరె రోండి.

16

అవసరం రొల్లాలింకు కోసం చందా

- 1 పురువురో మనమానె కోసం యిలా చందా వినయం యిని మియ్యి గలతీయ సంగమునెకు నియమించిలా పనికిరి తొమె కూడ కొరొండి.
- 2 మియ్యి అయిలాబెల్లె చంద నాపోగుకొరుకుండ సొబ్బి అద్దారొరె సొబ్బిలింకె సెయ్యె వర్దిల్లికొలది తాపక్కు కుండె పలియ్యె రొయిదిగిమంచె.
- 3 మియ్యి అయిలబెల్లె తొమె కాకు యోగ్యునె బులి బచ్చిగీకిరి పత్రికలుదూసో, తంకె అత్తరె తొమె చందాకు యెరూసలేముకు పొడొడుంచో.
- 4 మియ్యెకూడా జెవురో బొల్లటయిని తంకె మోసంగరె కూడ ఆసి.

పాలురో ఆలోచనలు

- 5 ఈనె మాసిదోనియరె బులితె జెమ్మబులిగిల్లించి కాబట్టి మాసిదోనియరె బులితె జెల్లాబెల్లె తొమె పక్కు అచ్చు.
- 6 సెల్లె తొమె పక్కరె కుండెకలో రొవుచ్చు, గుటెబెల్లె సెత్తో కలోల్లా తాంచికివో. సెల్లె మియ్యి జెల్లా చోటుకు తొమె మెత్తె పొడిదివొచ్చు.
- 7 ప్రబువు అనుమతి దినె తొమె పక్కరె బుతుకలో రొమ్మబులి కొయిగిల్లించి. సెడకు ఉంచినె బట్టో మొజీరె తొముకు దిగితె మెత్తె మనస్సునీ.
- 8 ఈనె పెంతెకొస్తు పొరొవొ దినో జాంక ఎపెసురె రోంచు.

9 కార్యనుకులమైలా బొల్లట అవకాసం మెత్తె పిటికిరి అచ్చి; ఈనె ఎదిరించలలింకె బడెమంది అచ్చె.

10 తిమోతి అయిలాబెల్లె సెయ్యె తొమెపక్కరె నిన్పంతగా రొమంచెబులి దిగిండి, మోపనకా సెయ్యె కూడా ప్రబువు పైటికొరిలిసి.

11 సెడకు కెసన్నా తంకు సన్ని దిగ దిగితనాండి. మోపక్కు అయితె తాకు సమాదానుము సంగరె పోడదెండి; అన్పబయినె, అప్పబొయినె సంగరె కూడ అయిమంచెబులి ఎదురు దిగిలింబి.

12 బయిల్లా అపొల్లోరె గురించి సంగతినె కిరబుల్చే, సెయ్యె బయినె సంగరె కూడ తొమె పక్కు జెమంచెబులి మియితాకు బడె బతిమాలిగింబి గాని, ఉంచినె అయితె తాకు కే మాత్రము మనస్సునీ, వీలు అయిలాబెల్లె సెయ్యె ఆసి.

ఆకరు కొతానె

13 మెలుకువగా టారింబి, విస్వాసంరె టారికిరి టారింబి, పారునముగలాలింకె పనికిరి టారింబి, బలవంతలైకిరి టారింబి;

14 తొమె కొరిలా పైటినల్లా ప్రేమసంగరె కొరొండి.

15 మో జట్టుకారీనెలింకె సైవనాను గొరొలింకె అకయరొ ప్రదమపలమైకిరి అచ్చెబులి, తంకె పురువురొ మనమానెకు పరిచర్య కొరితె తంకు తంకె అప్పగించిగీకిరి అచ్చెబులి తొముకు తెలుసు.

16 సెడకు మో జట్టుకారీనెలింకె, సెటాలింకు, సహాయము కొరుకుంటా ప్రయసపొడుకుంటా రొయికిరి తంకెల్లకు తొమె విదేయులైకిరి రొమంచెబులి తొముకు బతిమాలిగిలింబి.

17 సైవనాను, పొర్మానాతు, అకాయికు బుల్లలింకె అయిలందరె సంతోసింబిలింబి. తంకెనీలా లోటు తొమె తిర్చిసా.

18 మో ఆత్మకు తొ ఆత్మకు సుకము కలిగించినె ఈనె సెటాలింకు సన్మానించొండి.

19 ఆసియరె సంగములింకె తొముకు దండమూనె కొయిలీసె. అకుల ప్రీస్కీల్ల బుల్లలింకె, తంకె గొరొరె తల్లా సంగము, ప్రబువురె తొముకు బడె దండమూనె కొయిలీసె.

20 మో జట్టుకారీనెలింకె తొముకు దండమూనె కొయిలీసె. పవిత్రమైల్లా చుమ్మోలోగీకిరి, తొమె జోనుకు జోనె దండమూనె కొయిగీండి.

21 పాలు మియ్యి మో అత్తోసంగరాక వందనము రాసిలింబి.

22 కెసినెను ప్రబువుకు నాప్రేమించినె సెయ్యె సపింపబొడుసీ, ప్రబువు అయిలాబెల్లె

23 ప్రబువుయిల్లా యేసుక్రీస్తు క్రుప తొముకు తోడుగా తాసి.

24 క్రీస్తుయేసురె మో ప్రేమ తొమె సొబ్బిలింకె సంగరె తాసి. ఆమేను.

పాలు కొరింధీయులుకు రాసిన రెండో పత్రిక పాలు కొరింధీయులుకు రాసిన దీటో పత్రిక అగరో కొత

2 కొరింధీయులు అపొస్తులు పాలు సంగరె రాసిపించికిరి అచ్చి యెడ నుమారు 55-56 బొచ్చొరొనె క్రీస్తు జొరైల్లా తరవాత రాసికిరి అచ్చి 1:1 పాలు కొరిందిరె చర్చికు రాసిల దీట లేకకు యెడ దీటొరొ పాలు యెడ అగరె కొరిందియులుకు కటినవైల లేకలు రాసిసె బులి పండితులు నమ్ముసె 2:3-4; 2 రె సుచించిల లేకరె పత్రలు అమె పక్కరె నీ పాలు మాసిదోనియారె రొల్లాబెల్లె కొరిందియులుకు బడె రాసికిరి అచ్చి.

యెడ బడె వ్యక్తిగత ఇంక బావొద్వేగ లేక బులి కొరిందియ ప్రత్యేకమైలాట కొరిందిరె చర్చి గురించి తీతుకు దీకిరి తాకు లబించిల బొల్ల నివేదిక గురించి పాలు తా ఆనందం వ్యక్తం కొరిసి. ఏ లేకరె, యెరూసలేమురె విస్వాసులుకు సహాయంకొరితె కడిగిల్లా పలియ సేకరన పాలు సూచనలు దిల్లా విభాగంరె నో నిబందన దీకిరి దిల్లా గురించి వివరనాత్మక బోదన అముకు దిగిదిల్లి చర్చి పొక్కరెదీకిరి కుండె మంది తప్పు అపొస్తులు తాకు సెయ్యె ప్రాత్యహించితె పాలు వ్యతిరేకంగా చర్చిరె కుండె మంది మనమానె సత్రుత్వాకు ఉపయోగించిలి బులి తేలిసిలీసి తంకె పాలురొ అదికారి ఉంపరె అనుమానం వ్యక్తం కొరిలీసె యెడ యేసు అపొస్తులుగా తా అదికారి గట్టిగా ద్రువీకరించితె ప్రేరేపించిసి 2 కొరిందియులు ఆకరురె క్రీస్తు

సంగతీనె

1. పాలు సంగంకు సుబం బులి తా లేకకు ప్రారంభించిలిసి 1:1-7
2. తరువాత పాలు తా ప్రయానం గురించి మార్పు గురించి ఇంక నెడ గురించి తాకు అయిలా నివేదిక గురించి ఇంక తా అగరో లేకల గురించి కొతాలగిసి 1:8-7:16
3. సె తరువాత యెరూసలేమురె విస్వాసుల కోసం పలియ వసూలు గురించి పాలు సూచనలు దివురొ8:1-9:15
4. ఆకరుకు పాలు సెయ్యె అపొస్తుడుయిలందుకు గురించి తంకు వాదించిల తరువాత దర్శనం గురించి హెచ్చరిక దివురొ10:1-13:10

1 పురువు చిత్తమువల్లరె క్రీస్తు యేసురొ అపొస్తులువైల పాలుకు, అమె అన్న బయిలా తిమోతికు, కొరింతియరె రొల్ల పురువురొ సంగముకు, అకయరె రొల్ల పురువురె రొల్లలింకు సుబము బులి రాసికిరి అచ్చి.

2 అం బోయిలా పురువు దీకిరి ప్రబుయిలా యేసు క్రీస్తు దీకిరి క్రుప సమాదానముకు తొత్తె కలుగుసు గాక.

పాలు పురువుకు క్రుతజ్ఞతా కొయివురొ

3 కనికరము దిగిదిల్లా బో, సొబ్బి ఆదరనకు అనుగ్రహించిలా పురువు, అమె ప్రబువు యిలా యేసు క్రీస్తు బో యిలా పురువు స్తుతింపబొడిమాసి.

4 పురువు అముకు కే ఆదరన దీకిరి ఆదరించిలిసా, సే ఆదరన సంగరె యెడపనా కొస్టానె రొల్లలింకె యిలెనెను ఆదరించిలాటకు సక్తి గలిగిలాట యిలపని, సెయ్యె మో కొస్టా సొబ్బిటిరె అముకు ఆదరించిలిసి.

5 క్రీస్తురొ కొస్టానె మోవల్లరె క్యాకిరి విస్తరించిలిసెవో సాకిరాక క్రీస్తుసంగరె ఆదరనంకా అముకు విస్తరించిలిసి.

6 అమె కొస్టా పొడినెను తో ఆదరనకోసం రక్తన కోసం పొందుంచో అమె ఆదరన పొందినెను తో ఆదరన కోసం పొందుంచో. యే ఆదరన అమె కూడ పొందిలపనా సె కొస్టానె ఓపికదీ సహించితె కార్యసాదకము ఈలపనికిరి అచ్చి.

7 తొమె కొస్టానె క్యాకిరి పాలివారైకిరి అచ్చొవో, సాకిరాక ఆదరన తీకిరి పాలివారైకిరి అచ్చెబులి తెలుసును గనక తొముగురించి మో నిరీక్తన స్థిరమైకిరి అచ్చి.

8 మో జట్టుకారీనెలింకె ఆసియరె అముకు తటస్తించిలా కొస్టానె గురించి తొముకు నాతెలిసివురొ అముకు ఇష్టమునీ; సడ కిరబుల్నే అమె జీవించుంచో బుల్లా నమ్మకము నీనన్నా రొల్లపనాక, మో సక్తికి మించిల అత్యధిక బారము వల్లరె క్రుంగిజిల్లించి.

9 ఈనె మొర్పొదీకిరి ఉటుదిల్లా పురువు వల్లరె గని, మో సంగరె అమె నమ్మకము నారొల్లపన మొర్పొవూంచుబులి నిన్నయముగా మో మట్టుకు అముకు కలిగికిరి అచ్చి.

10 సెయ్యోసే గొప్ప మొర్నోదీకిరి అముకు తప్పించిసి, ఇంకా అగురుకంకా తప్పించుసి, ఇంకా అం కోసం ప్రార్థన కొరిలవలరె తొమె కూడ సహాయం కొరితందుకు సెయ్యో ఇంకా అగురుకు తొముకు తప్పించునుబులి తా సంగరె నిరీక్సన గలిగికిరి అచ్చొ.

11 సడవలరె బడేమంది ప్రార్థనతీకిరి, అముకు కలిగిలా క్రుపావరము కోసం బడేమంది సంగరె అం వినయమైల క్రుతజ్ఞతలు చెల్లింపబోడిసె.

పాలు తా ప్రనాలికకు మార్చిగీవురొ

12 అం అతిసయం కిడబుల్లె, లొకిక జ్ఞానము అనుసరించికిరి, పురువు గ్రహించిలా పరిసుద్దతతీకిరి నిస్కాపట్యముతీకిరి పురువురొ క్రుపకాక అనుసరించికిరి లోకంరె సలిలపనికిరి, వినేసముగా తొ పనికిరి సలుంచొబులికిరి, అం మనస్సాక్సి సాక్యదీతందుకాక.

13 తొమె చదివిగీకిరి పూర్తిగా గ్రహించిలా సంగితీనె తప్ప, మరికిచ్చిను తొముకు రాసిలనీ చివర జాంక యెడ ఒప్పుగుసెబులి నిరీక్సించిలించొ.

14 ఈనె అమె ప్రబువైల యేసురొ దినొసంగరె తొమె అముకు కారొ, సాకిరాక అమె తొముకు అతిసయం కారనమైకిరి తాంచొ బులి, తొమె కుండె మట్టుకు అముకు ఒప్పిగీకిరి అచ్చొ.

15 ఈనె యే నమ్మిలాటపనికిరి తొముకు దీటొ ఆసీర్వాదము మిల్లాపనికిరి అగరె తొపక్కుఅయికిరి.

16 తొం పక్కురెదీకిరి మాసిదోనియకు జేకిరి మాసిదోనియదీకిరి ఇంకా తొం పక్కుఅయికిరి, తొం సంగరె యూదయకు పొడిదిమ్మంచి బులి మీ బులిగించి.

17 సడకు మియ్యో యాకిరి ఉద్దేసిందికిరి నాయికుంటా సలించినా? వై, వై బులికిరి, నీ నీ బులి ప్రవర్తింతించిమంచిబులి మో ఆలోచనానె దే అనుసారంగా యోచించిలించినా?

18 పురువు నమ్మిదగిలాట గనుక అమె తొముకు కొయిలా వాక్యము వైబులి కొయికిరి నీబుల్లాపనికిరి రొన్నాసి.

19 అం దీకిరి, బుల్నే మో దీకిరి సిల్వాను దీకిరి తిమోతి సంగరె, తొంబిత్తరె ప్రకటించిలాట పురువు పో యిలా యేసు క్రీస్తు వై బులి కొయికిరి నీబుల్లలింకె రొన్నింతె గాని సెయ్యో వై బుల్లలింకె అచ్చొ.

20 పురువురొ వాగ్దానమూనె కెత్తెయినెను సొబ్బి క్రీస్తుతీకిరి వైబుల్లాపనాక అచ్చొ. గనుక అం ద్వారా పురువుకు మహిమ కలిగితందుకు సడా తా వలరె నిస్సయములైకిరి అచ్చొ.

21 తొం దీకిరంకా క్రీస్తురె టారికిరి అచ్చొ బులి అముకు స్థిరపరచికిరి అబిసేకించిలాట పురువాక.

22 సెయ్యో అముకు ముద్రపొక్కిరి, అం హ్రుదయమురె అముకు ఆత్మ బుల్లా సంచకరువుకు అనుగ్రహించికిరి అచ్చొ.

23 తొమంపరె కనికరము కలిగితందుకు మియ్యో ఇంకా కొరింతియకు అయిలాని. మొ పొర్నొసంగరె పురువొ సాక్సిగా లోగిలించి.

24 తొం విస్వాసము ఉంపరె అమె ప్రబువులుబులి యాకిరి కొయిలాని. గాని తొం ఆనందముకు సహకారుగా అచ్చొ. విస్వాసము వల్లరాక తొమె టారికిరి అచ్చొ.

2

1 ఈనె మియ్యో దుక్కొ దిన్నాసి బులి, మియి దుక్కొసంగరె తొం పక్కరకు బుల్లికిరి అయినాసిబులి మోమట్టుకు మియి నిచ్చయించిగించి.

2 మియి తొముకు దుక్కము కలిగించినె దుక్కొపొందిలాట తప్ప ఇంక కేసే మెత్తె సంతోసపరిచినారె?

3 మియి అయిలబెల్లె మెత్తె కావల్లరె మియి సంతోసం కలిగిమంచెవొ, తంకె వల్లరె మెత్తె దుక్కొ కలిగినాసిబులి ఏ సంగతీనె తొముకు రాసింది. ఈనె మో సంతోసం తొం అల్ల సంతోసం బులికిరి తొం సొబ్బిలింకంపరె నమ్మకం కలిగికిరి యాకిరి రాసింది.

4 తొముకు దుక్కొ కలిగిమంచెబులి నీగాని, తొంబిత్తరె కలిగిలా బడేబూతు ప్రేమకు తొమె, తెలిసిగిమంచెబులి, నిండు స్రమసంగరె మనోవేదన సంగరె బడే కందికుంటా రాసింది.

విరోదీనెకు క్షమించువురొ

5 కేసైనన్నా దుక్కొ కలిగించికిరి రొన్నె, మెత్తె మాత్రము నీ కుండెమట్టుకు తొముకల్లకు దుక్కొ కలిగించికిరి అచ్చొ. మియి వినేసబారము తాంపరె నామోపికిరి ఏ కొత కొయిలించి.

6 సాటకు తొంబిత్తరె బడేలింకు వల్లరె కలిగిలా ఏ సిక్నాక చాలు.

7 ఈనె తొమె ఇంక తాకు సిక్కు నాపొక్కిరి క్షమించికిరి ఆదరించువురో బొల్ల. గుటబెల్లె సెయ్యే అత్యధికమైలా దుక్కొరె కుంగిజివ్వొ.

8 ఈనె తావుంపరె తొం ప్రేమకు దిగదిమ్మాసిబులి తొముకు బతిమాలిగిలింబి.

9 తొమె సొబ్బి వినయొనెరె విదేయులైకిరి అచ్చెక్కివొ బులి తొం యోగ్యత తెలిసిగితై అగరె రాసింబి.

10 తొమె కిర గురింబి ఈనెను కాకు క్షమించిలిసొవొ మియి కూడా తాకు క్రీస్తు అగరె క్షమించింబి;

11 మియి కిరైనెను క్షమించికిరి తన్నె సొతాను అంవల్లరె మోసం నాకొరిలపనికిరి, తొం కోసం, సొతాను మాయకొతానె అముకు తెలుసు.

త్రోయరె పొలురో దుక్కొ

12 క్రీస్తు సువార్త ప్రకటించితె మియి త్రోయ పట్టుముకు అయిలబెల్లె, ప్రబువు మెత్తె పైటి కొరితె బొల్ల అవకాసం దీసి.

13 ఈనె మో బయిలా తీతు మెత్తె నాదిగదిలందరె మో మనస్సురె నెమ్మది నీకిరి తంకె పక్కరె సెలవు కడిగీకిరి సెట్టతీకిరి మాసిదోనియకు బయలుదేరింబి.

క్రీస్తురె విజయం

14 అం వల్లరె ప్రతి చోటురె క్రీస్తురో జ్ఞానము సువాసనకు దిగిపించుకుంటా తావుంపరె అముకు కెబ్బుకు విజయోత్సవము సంగరె ఊరేగించుకుంటా తల్లా పురువుకు స్తోత్రము.

15 రక్సింపబొడితల్లాలింకు నసించిజీతల్లాలింకు అమె పురువుకు క్రీస్తు సువాసన యికిరి అచ్చొ.

16 నసించిలాలింకు మొర్పొర్లమైలా వాసనగా, రక్సింపబొడిలాలింకు జీవార్లమైలా జీవపు సువాసనగా అచ్చొ.

17 ఈనె యే సంగతీనె చాటిలాట కేసే? అమె పురువురో వాక్యముకు మిసికిరి చెరిపిలా బడేలింకెపనికిరి నీకిరి, నిస్సాపట్టముమైలలింకె పనికిరి పురువు వల్లరె నియమించిలాలింకె బులికిరి, క్రీస్తురో సేవకునె పనికిరి పురువు అగరె బోదించిలింబొ.

3

నో నిబందనరో సేవకునె

1 అముకు అమాక బుల్లికిరి మెప్పించిగివురో మొదలు కొరిగిల్లింబొనా? కుండిలింకు కావలిసెల పనికిరి తొం పక్కరకు ఈనెను తొం పక్కరెతీకిరి ఈనెను, ఉత్తరము పొడిదివ్వొరో అముకు అవసరమునా?

2 అమె హ్రుదయల ఉంపరె రాసికిరి అచ్చి, మనమనె సొబ్బిలింకె తెలిసిగికిరి చదివిగిల్లింబొ అమె ఉత్తరము తొంనీనా?

3 పొత్తోపలక వుంపరెగాని సిరా సంగరె గాని నారాసికిరి మనమారొ హ్రుదయాం బుల్లా పలక ఉంపరె జీవంగలిగిలా పురువురో ఆత్మ సంగరె, అం పరిచర్య మూలంగా రాసిలా క్రీస్తు ఉత్తరము యికిరి అచ్చొబులి తొమె తెలియపరిచిలిసి.

4 కైంబిబుల్లె క్రీస్తుద్వారా పురువుంపరె అముకు విస్వాసమచ్చి అమె కొయిలింబొ.

5 అం వల్లరె కెడ్డెనను ఈలాపనికిరి ఆలోసించితందుకు అం మట్టుకు అమ్మాక సక్తి గలిగిలాలింకె నింతొ అముకు యే సక్తి పురువుతీకిరి కలిగికిరి అచ్చి.

6 సెయ్యొక అముకు నో నిబందనకు, బుల్లె రాసికిరిరోల్లా దర్మసాస్తం నీగని ఆత్మకాక సేవకులైతే అముకు సక్తి దీసి. రాసికిరిరోల్లా దర్మసాస్తం మొరుదూసి గని ఆత్మ జీలాపనికిరి కొరుసి.

7 మొర్పొక్కు కారనమైలా పరిచర్య, పొత్తోనంపరె చెక్కిలా అక్కరాలుకు సంబందించిలాట ఈనెను, మహిమ సంగరె మిసిలాట్టెసి. సడుకాక మోసే మో ఉంపరె ప్రకాసించితల్లా సే మహిమ తగ్గిజిల్లాట ఈనన్నా, ఇస్రాయేలు తా మోకు దిగినారినె.

8 యాకిరి తన్నుగా ఆత్మసంబందమైలా పరిచర్య కెత్తె మహిమగా రొసో?

9 సిక్సావిదికి కారనమైలా పరిచర్య మహిమ కలిగిలాటయినె నీతికు కారనమైనె పరిచర్య కెత్తో అదికమైల మహిమ కలిగిలాటగా రొసి.

10 అత్యధికమైలా మహిమ యెడకురోప్పురో వల్లరె యెడకు అగరె మహిమతల్లాటగా కొరువురో ఈసి. యే వినయంరె మహిమ నీలాపన అచ్చి.

11 నసించిజీతల్లాటాక మహిమగల్లాట్టెనె, టారిలాట ఇంకా బడే మహిమ కలిగిలాట్టెకిరి తాసి.

12 మెత్తె యే ఆస అచ్చి సాకరాక, బడే దైర్యముగా కొతలగిలింబొ*.

* 3:12 ఎ కొతనే సువార్త రాసికిరి అచ్చి

13 తగ్గజీతల్లాట మహిమరొ అంతముకు ఇస్రాయేలు తేరికిరి నాదిగిలాపనికిరి మోసే తా మో ఉంపరె మునుగు పొగ్గిచ్చి సాకిరక అమె నింతో.

14 ఈనె తంకె మనస్సునె కటినమైజీసె గనక ఆజిజాంక పుర్ననిబందన చదివితల్లాబెల్లె, సడ క్రీస్తురె సేరిపెసెబులి తంకు తెలియపర్చిబోడిలాని, సే మునుగాక టారీకిరచ్చి.

15 ఆజిజాంక మోసే గ్రందము తంకె చదివిలాబెల్లె మునుగు తంకె మనుసూనంపరె అచ్చి గని

16 “తంకె మనుసూనె ప్రబువాడుకు కెబ్బుకు బుల్లివేయో సెత్తెలె మునుగు కడిపూసి.”

17 ప్రబువాక ఆత్మ. ప్రబువురొ ఆత్మ కేటె తాసో సెట్టె స్వాతంత్ర్యం అచ్చి.

18 అమల్లా మునుగు నీలా మోసంగరె ప్రబువురొ మహిమకు అద్దం పనికిరి ప్రతిపలింపకొరికుంటా, మహిమ తీకిరి బడే మహిమకు పొందికుంటా, ప్రబువురొ ఆత్మసంగరె సే పోలికగాక మార్చబోడిలింబో.

4

మట్టి అండినె ఆత్మీయ సంపద

1 ఈనె యే పరిచర్య పొందిలందరె కనికరం పొందిలాలింకైకిరి అదైర్యం పొడినింతో.

2 ఈనె కుయుక్తిగా నా సలికుంటా, పురువో వాక్యమును వచనగా బోడకొయితనా, సత్యమును ప్రత్యక్షపరచిలందరె ప్రతి మనమకు మనస్సాక్సి అగరె అమె పురువు సముకంసంగరె మెప్పించిగీకుంటా, అవమానకరమైలా రహస్య కార్యమునెకు నిరాకించమాసి.

3 అమె సువార్త మరుగుకొరిలపనికిరి ఈనె నసించిలాలింకు వినయమురె మరుగుకొరిలాపనచ్చి.

4 పురువురొ మూ గలిగిలాటపనా రొల్ల క్రీస్తు మహిమరొ దిగిదిల్లా సువార్త ప్రకాసము తంకు ప్రకాసించికుంట నిమిత్తము యే యుగ సంబంద యీలా లోకొ పురువో అవిస్వాసులలింకె అమె మనస్సురె అంకికి నాదిగిదెల్లాపని కొరుసి.

5 ఈనె అమె అముకు గురించి, యేసు నిమిత్తము అమె తో పరిచారకులు బులి ప్రకటించిలింబో.

6 వొందారెతీకిరి హల్లో ప్రకాసించిమాసి బులి పలికిలా పురువాక తా మహిమ గురించెలా జ్ఞానము యేసు క్రీస్తుదీకిరి బయలుపరిచితె అమె వ్రుదయలురె ప్రకాసించిసి.

7 ఈనెను యే బలాదిక్యము అం వల్లరె నాకలిగిలాపనికిరి పురువురొ రొల్లపనా మట్టి అండినె యే సంపద అముకు నీ.

8 క్యాకిరి జెన్నెనూ కొస్టాపొడిలింబో ఇరికించిలలింకె నింతె; అపాయమురె అచ్చొ కేవలం ఉపాయము నీలలింకె నింతె;

9 చిత్రహింసానె అనుబవించింబో గని దిక్కునిలాలింకైకిరి నింతో. అముకు మరికిరి పొందినె ఈనె నాసనం ఈలానింతో.

10 యేసు జీవం అం దేరె దిగదిల్లాపనికిరి యేసురొ మోర్నొ అనుబవంకు అం దేనె కెబ్బుకు బోయిగెట్టింబో.

11 క్యాకిరిబుల్చే, యేసురో జీవం కూడ అం మనమరొ దేరె దిగదిల్లాపనికిరి, జీకిరి తల్లా అమె కెబ్బుకు యేసు కోసం మొర్నొకు అప్పగింపబోడిలింబో.

12 ఈనె అంబిత్తరె మొర్నొకు తొం బిత్తరె జీవముకు పైటి కొరిలీసి.

13 ఈనె “మీ నమ్మించి గనకాక కొతాలగిలింబి.” క్రుప బడే మనమానె దీకిరి ప్రజానె పురువురొ మహిమ నిమిత్తము క్రుత్జ్ఞతాస్తుతులు విస్తరించిలాపనికిరి, సోబ్బి తొం కోసమాక.

14 ప్రబువైలా యేసుకు ఉటదిల్లా యేసు దీకిరి అముకు కూడ ఉటిదీకిరి, తొంసంగరె కూడ తా అగరె టారదూసి బులి తెలిసి, అమె విస్వసించిలింబో గనక కొతలగిలింబో.

15 ఈనె విస్వసించిలందరె కొతలగించి బులి రాసిలాపనికిరి సే విస్వాసముకు దీకిరి కూడిల ఆత్మగల్గొలింకయికిరి,

విస్వాసం వల్లరె జీవురొ

16 ఈనె అమె అదైర్యపొడినింతో; అం పొదరొ వొండ్రపో క్రుసించిజెన్నున్నా, బిత్తరె వొండ్రపో దినెదినె సక్తికు పొందిలింబి.

17 ఈనె క్షనమాత్రమాక రొల్లా కుండె న్రమ, సడకు కెత్తోరెట్లునె అదికమైల అద్భుతమైల మహిమకు అముకు సిద్ధం కొరుకుంటా తల్లీసి. సడ కెబ్బుకు రొల్లా గొప్ప మహిమ సంగరె అనుబవించితల్లా కొస్టానె కిచ్చీనీ.

18 అమె దిగదిల్లాంచకు నాదిక్కుంటా అద్దుస్యమైలాంచ కోసం ఎదురు దిగిలింబో క్యాకిరి బుల్చే దిగదిల్లాంచ కుండె కలోక తాసి. ఈనె నాదిగదిల్లాంచ సాస్వతంగా తాసి.

5

1 బూమి ఉంపరె అం గొరొ, అం దే యీలా యే గొరొ బంగిజిన్నున్నా, పరలోకంరె అత్తోపైటిసికిరి పురువుదీకిరి బందిలాట నిత్యమైకిరి తల్లా గొరొ పరలోకంరె అముకు అచ్చి బులికిరి తెలుసు.

2 అమె దిగంబరులుగా నీకిరి కొన్నానె పిందిగిల్లాపనికిరి దిగదిలింఱొ. ఈనె పరలోకందీకిరి అయిలా గొరొ ఎడంపరె దరించిగిల్లా గొప్ప ఆస సంగరె ఎడబిత్తరె ఎదురుదిగిలింఱొ.

3 సీ దే దరించిగిల్లా బెల్లే అమె కొన్నానె నీలలింకె పనికిరి తన్నింతొ.

4 అమె యే లోకంరె తల్లా బెల్లే బొత్తికమైలా దేకు దరించిగిమ్మా గని పరలోకంరె తల్లాబెల్లే పరలోక సాస్వతమైలా దేకు దరించిగీకిరి సాస్వతంగా జీలాట పనికిరి మార్పు చెందుంఱొ.

5 సడ వల్లరె అముకు సిద్ధపరిచిలాట పురువు; ఈనె సెయ్యె తా ఆత్మ బుల్నే సంచకరువుకు అముకు అనుగ్రహించిలీసి.

6 ఈనె ఏ దే బిత్తరె రొల్లెత్తకలో ప్రబువుకు దూరుగా అయింఱొబులి తెలిసికిరి కెబ్బుకు ధైర్యముగలలింకె పనికిరి అచ్చొ.

7 ద్రుస్త వల్లరె నీకిరి విస్వాసము వల్లరాక సలిగిల్లింఱొ.

8 యాకిరి ధైర్యము గలిగీకిరి ఏ దేకు సడికిరి ప్రబువు పక్కరె* రొయితై ఇస్తపొడిలింఱొ.

9 ఈనె సడకు దే బిత్తరె తన్నున్నా దేకు సడిదిన్నున్నా, తాకు ఇస్తులూగ తమ్మాసిబులికిరాక అం లక్క్యం.

10 అమల్లా క్రీస్తు న్యాయపీటం అగరె టారిమంచె. కిరుకుబుల్నే ప్రతిజొనె దేసంగరె జరిగించిలా సెడ్డపైటి ఈనన్నా, సడ బొల్ల పైటి ఈనన్నా, నాబొల్లయినెను, తగిలపనికిరి ప్రతివలం పొందిమంచె.

క్రీస్తు ద్వారా పురువుకు స్నేహితులైవురొ

11 ఈనె అం ప్రబువు వినయమైలా డొరొ తెలిసికిరి మనమానుకు ప్రేరేపించిలింఱొ, అమె పురువుకు ప్రత్యక్షపరబొడిలాలింకైకిరి అచ్చొబులి నమ్మిలింఱొ. తొ మనుసూనంకా బొల్లె రొమ్మాసి బులి కోరిలింఱొ.

12 అముకు అమ్మాక తొ అగరె బుల్లికిరి మెప్పించుగిల్లానింతొ గాని, హ్రుదయంరె అతినయంనాపొడికిరి ఉంపరె రూపంరె అతినయంపొడిలలింకు ప్రత్యుత్తరం దీతె తొముకు ఆదారము కలిగిమాసిబులి అం వినయంరె తొముకు అతినయం కారనం కలిగించిలింఱొ.

13 కెడబుల్నే అమె బొడలింకె అయింఱొనా పురువు నిమిత్తమాక; స్వస్థబుద్ధిగలలింకె అయింఱొ తొ నిమిత్తమాక.

14 క్రీస్తురొ ప్రేమ అముకు సలిపించిలీసి; క్యాకిరి బుల్నే సొబ్బిలింకె కోసం జొనె మొరిజీసి. సడకు సొబ్బిలింకె మొరొరె పాలుపొందిలీసి.

15 జీవించిలలింకె ఇంక అగరె తంకోసం నీకిరి, తంకోసం మొరిజీకిరి బుల్లికిరి ఉటిలాట కోసం జీతె సెయ్యె సొబ్బిలింకె కోసం మొరిజీసి బులి నిచ్చయించిగింఱొ.

16 ఈనె ఇంక అగురుకు అం దే వల్లరె కాకు ఈనెను తెలిసిని. అమె క్రీస్తుకు దేరొ రీతిగా తెలిసిగీకిరితన్నె యెడకు అగరె తాకు సాకిరి తెలిసిని.

17 ఈనె కెసియినెను క్రీస్తురె రొన్నె సెయ్యె నోస్తుస్తి; పుర్నాట గతించిసి, ఇదిగొ నోట ఈసి.

18 సొబ్బిను పురువు వల్లరాక ఈసి; సెయ్యె అముకు క్రీస్తు వల్లరె తా సంగరె స్రతువుగా రొల్లబెల్లె జట్టుకారీనెగా మార్చిగీకిరి, పరిచర్య అముకు అనుగ్రహించిసి.

19 సడకిరబుల్నే, పురువు తంక అపరాదములుకు తంకె ఉంపరె నామోపుకుంటా, క్రీస్తురె లోకముకు తాసంగరె స్రతువుగా రొల్లబెల్లె జట్టుకారీనెగా మార్చిచిసి వాక్యముకు అముకు అప్పగించిసి.

20 ఈనె పురువు అం దీకిరి వేడిగిల్లాపనికిరి అమె క్రీస్తుకు రాయబారులుగా పురువు సంగరె స్రతువుగా రొల్లబెల్లె జట్టుకారీనెగా మారివాసి బులికిరి క్రీస్తు పక్కముగా తొముకు బతిమాలిగిల్లింఱొ.

21 కిరుకుబుల్నే అమె తాబిత్తరె పురువు నీతి ఈలాపనికిరి పాపం నాజనిలా తాకు అం కోసం పాపముగా కొరిసి.

6

1 ఈనె అమె తాసంగరె పైటిలింకెయీకిరి తొమె పొందిలా పురువు క్రువకు వ్యర్థము కొరిగితైనాబులి తొముకు వేడిగిలింఱొ.

2 “అనుకూల సమయంరె తొ ప్రార్థన సునిమి;

రక్కన దినొరె తొత్తె ఆదిగించిబులి” సెయ్యె కొయిలీసి నీనా! ఇదిగొ వుంచినాక అనుకూలమైలా సమయంరె,

* 5:8 ప్రబువు పక్కరె అర్థం పరలోకము

ఇదిగో ఎడాక రక్సన దినో.

3 అమె పరిచర్య నింద నాపొడుకుంటా నిమిత్తము కే వినయంరె ఈనెను అనుమానం కిచ్చి నాకలిగించికిరి,

4 ప్రతి వినయంరె పురువో తాసేవకునె బులి దిగిదీతె స్రమలబిత్తరె ఇబ్బందులురె ఇరుకులురె,

5 మడ్డొనెబిత్తరె చెరసాలబిత్తరె కొలీనెబిత్తరె ప్రయాసముబిత్తరె జాగరములబిత్తరె ఉపవాసములబిత్తరె ఓర్పుగలలింకెపనికిరి,

6 పవిత్రత సంగరె జ్ఞానము సంగరె దీర్ఘసాంతము సంగరె దయసంగరె పరిసుద్ధాత్మవల్లరె నిన్కపటమైలా ప్రేమసంగరె, పురువు పరిచారకులుయికిరి రొయికిరి సొబ్బి స్థితులరె అముకు అమ్మాక మెప్పుపొందిగిలింకె.

7 సత్యవ్యాకం బోదించిలావల్లరె పురువు బలమువల్లరె నాపొడికుంటా నీతి ఆయుదమునెకు కలిగికిరి కాపాడిగిల్లింకె,

8 గనత గనహీనతా వల్లరె సుకీర్తి దుస్కర్తులవల్లరె, అమె మోసంకొరిల్లలింకె పనికిరి రొయికిరి సత్యవంతునె

9 నాతెలిసిలా పనికిరి రొయికిరి బోల్లకిరి తెలిసిల్లలింకె; మొరిజిల్లలింకె పనికిరి రొయికిరి ఇదిగో జీకిరి రొల్లాలింకె; సిక్కిపొడిల్లలింకె పనికిరి రొయికిరి మొరిజిలా పనాలింకె;

10 దుక్కొపొడిలాలింకె పనికిరి రొయికిరి కెబ్బుకు సంతోసంచలలింకె పనికిరి; దరిదులమైకిరి బడేలింకు పలియతల్లలింకె కలిగించిలాలింకె; కిచ్చి నాతల్లలింకె పనికిరి రొయికిరి సొబ్బి కలిగిలాలింకె, అచ్చొ.

11 ఓ కొరిందియులులింకె, పూర్తి సత్య కొతలగిలింకె, అమె హ్రుదయము విసాలంగా అర్థమైలపనికిరి అచ్చొ.

12 తొం బిత్తరె అం అంతరంగం ఇరుకుగా నీ గాని, అం అంతరంగం ఇరుకుగా అచ్చొ.

13 తొం బిత్తరె అముకుతల్లా అంతరంగం ప్రతిపలముగ తొముకు తొమె హ్రుదయములుకు విసాలపరిచిగెండి తొమె మో పిల్లనెబులి తొసంగరె యాకిరి కొయిలింకె.

పొదరెలింకె ప్రెవనకు వ్యతిరేకించివురో

14 తొమె అవిస్వాసి నె సంగరె జట్టుగా రొయితనాండి. నీతికి దుర్నీతిసంగరె కిర జట్టు? హల్లోకు వొందారుకు కిర జట్టు?

15 క్రీస్తుకు సాతాను సంగరె కిర సంబంధము? అవిస్వాసిదీకిరి విస్వాసికు జట్టు కిర?

16 పురువురో మందిరంరె పొదరెలింకెవిగ్రహముల సంగరె కిర జట్టు?

అమె జీవమైలా పురువురో మందిరం యాకిరి అచ్చొ; నడకు పురువు యాకిరి సెలవు దిల్లీసి.

“మియి తంకెబిత్తరె రొయికిరి సంచరించికిరి,

మియి తంకె పురువు యాకిరి రొంచి

తంకె మో ప్రజలైకిరి తానె.”

17 ఈనె

“తొమె తంకె మొజిరె దీకిరి బయలుకు అయికిరి

వేరుగా రోండి.

అపవిత్రమైలాంచకు సూగిన్నాసి బులి ప్రబువు కొయిలీసి.

18 ఈనె మియి తొముకు చేర్చిగిల్లింకె,

తొముకు బో యికిరిఅచ్చొ,

తొమె మెత్తె పొనె జ్యోనెయికిరి అచ్చొ బులి

సర్వసక్తియిలా ప్రబువు కొయిలీసి.”

7

1 ప్రీయమైల జట్టుకారీనెలింకె, అముకు ఏ వాగ్దానమూనె అచ్చొ సెడకు పురువు డొరొసంగరె పరిసుద్ధత్తుకు సంపూర్తి కొరికిరి, దేకు ఆత్మకు కలిగిలా సొబ్బి కల్మానము దీకిరి అముకు పవిత్రుల పనికిరి కొరిగిల్లింకె.

పౌలురో సంతోసం

2 అముకు తొమె హ్రుదయములురె చేర్చిగిండి; అమె కాకు అన్యాయము కొరిలానింతో, కాకు చెరిపిలానింతో, కాకు మోసం కొరిలానింతో.

3 తొముకు సిక్సావిది కలుగుసిబులి మియి యాకిరి కొయిలనీ. మొరిజినెను గాని జీనె గానీ తొమె అమె కూడ రొమ్మంచెబులి తొమె అమె హ్రుదయలురె అచ్చొబులి మియి తెలుసుబులి కొయించినీనా.

4 తొమె ఉంపరె మియి బడే దైర్యముగా కొతలాగిలింకె, తొం కోసం మియి బడే గర్వింకెలింకె. ఆదరనసంగరె పూరికిరి అచ్చొ, అం స్రమరె సొబ్బిటికి మించిలా బడే బూతు సంతోసం సంగరె బడే ఆనందించిలింకె.

5 అమె మాసిదోనియకు అయిలాబెల్లె అముకు కెమాత్రము విస్త్రాంతి మిల్లాని. కాడుకు జెన్నెను అముకు కొస్టానె; బయిలురె కొలీనె బిత్తరె డొరొ రొయితవ్వి.

6 ఈనెను క్రుంగికిరి రొల్లబెల్లె ఆదరించిలా పురువు తీతు అయిలవల్లరె అముకు ఆదరించినె.

7 తీతు కొయిలా కొతనెవల్లరె, సెయ్యె తొమె అత్యబిలాసకు తొమె అంగలార్పుకు మో వినయమైకిరి తొముకు కలిగికిరి అత్యాసక్తికు అముకు కొయికుంట, సెయ్యె తొమె వినయంరె పొందిల ఆదరనవల్లరె కూడ అముకు ఆదరించినె ఈనె మియి యింకా బూతు సంతోసించించి.

8 మియి రాసిలా పత్రిక వల్లరె తొముకు దుక్కొలోగిలవల్లరె మియ్యి బాదపొడిల నీ; మెత్తె దుక్కొ కలిగినెను సె పత్రిక తొముకు కుండె కలోమట్టుకు దుక్కొ లొగొసిబులి తెలిసిగికిరి అచ్చి.

9 తొమె దుక్కొ పొడిలీసా బులి సంతోసించిలాని గాని తొమె దుక్కొపొడికిరి మారుమాస్సు పొందిసా బులి వుంచినె సంతోసించించిలింబి. కైంకిబుల్లె కే వినయలురె యినెను అంవల్లరె తొముకు నస్టం నాయీలాపనికిరి, పురువురొ చిత్తంరె దుక్కొపొడిసా.

10 పురువురొ చిత్తానుసారమైలా దుక్కొ రక్సనర్లమైలా మనస్సుకు కలిగించినె; ఏ మారుమనస్సు దుక్కొముకు జొర్నెదీన్ని. ఈనె లొకొసంబందమైల దుక్కొ మొర్నొకు కలిగించునె.

11 తొమె పురువు చిత్తం ప్రకారం పొందిలా ఏ దుక్కొ కెటవంటి జాగర్తకు కెత్తె దోసనివారనకు ప్రతివాదమునెకు కేటా ఆగ్రహముకు కెత్తె డొరొకు కేటె అబిలాసకు కెత్తె ఆసక్తికు కెత్తె ప్రతిదండముకు తొబిత్తరె జొర్నెపించిలీసా దిగొండి. సె కార్వము గురించి సొబ్బి వినయానెరె తొమె నిర్దొసుల్లెకిరి అచ్చొ బులి రుజువు కొరిగీసా.

12 మియి తొముకు రాసిలా సె దుస్కార్వము కొరిలాట నిమిత్తము రాసిలా నీ; తావల్లరె అన్యాయము పొందిలా తా నిమిత్తమికిరి రాసిలా నీ; మోవల్లరె తొముకు ఆసక్తి పురువు అగరె తొమె మొజిరె తెలిసిగితె రాసించి.

13 ఎడకు అమె ఆదరింపబొడించొ. సెత్త నీ, అముకు ఏ ఆదరన కలిగిలాబెల్లె తీతురొ ఆత్మ తొమె సొబ్బులింకె వల్లరె విస్త్రాంతి పొందిలా వల్లరె తాకు సంతోసముకు దిక్కిరె యింకా బూతు అమె సంతోసించించొ.

14 క్యాకిరిబుల్లె మియి తా అగరె తొమె వినయమైకిరి గొప్ప కొతానె కొయినెను మియి లజ్జొపొడిలానీ అమె యాకిరి సొబ్బిటికు తొమె సంగరె సొత్తె కొయించివొ సాకరాక అమె తీతు అగరె ఏ వినయమైకిరి కొయిలా గొప్ప కొతానె సొత్తాకబులి దిగిదీసె.

15 ఈనె తొమె దొరొసంగరె వనుకుసంగరె తాకు చేర్చిగిల్లిసా బులి సెయ్యె తొమె సొబ్బులింకె విదేయతకు జ్ఞాపకము కొరితల్లబెల్లె, బొల్తా సంబందం యింకా బూతు తొమె పక్కరె అచ్చి.

16 సొబ్బి వినయానెరె తొమె ఉంపరె మెత్తె ధైరం అచ్చి గనక సంతోసించిలింబి.

8

క్రైస్తవుడురొ సందా

1 మో జట్టుకారీనెలింకె మాసిదోనియ సంగముకు పురువురొ క్రువ దీసి బులి తంకు తెలియాకొరిలింబొ మిత్తె కావాలి.

2 కారిబుల్లె, తంకె బడె కొస్టావల్లరె పరీక్సంపబొడికిరి అత్యదికముగా సంతోసించినె. ఈనె తంకె నిరుపేదలులినెను తంకె దాత్రుత్వము బడె విస్తరించినె.

3 తంకె తా సామర్థ్యము వలరె నీకిరి సామర్థ్యము కన్నా బూతుగాను తా మట్టుకు సెయ్యె దీసె బులి తొముకు సాక్సం దిల్లింబొ.

4 పురువురొ మనమానెకు సహాయం కొరిలాబిత్తరె తొమె కూడా పాలుయిలాలింకె పని తమ్మంచె బులి బ్రతిమాలిగిలింబి.

5 సెత్తెనికిరి అగరె ప్రబువుకు, పురువురొ చిత్తంవల్లరె అముకు తంకును తంకె అప్పగించిగినె; యాకిరి కొరుసెబులి మియ్యి బులిగిల్లాని.

6 నెడకు తీతు ఏ క్రువకు యాకిరి పూర్వము మొదలుకొరుసొ సాకరాక నెడ తొమె ప్రేమపూర్వకము సేవా కొరుబులి అమె తాకు వేడిగిల్లింబొ.

7 తొమె ప్రతివినయమురె బుల్లె విస్వాసముబిత్తరె ఉపదేసంరె జ్ఞానంరె సొబ్బి జాగర్త సంగరె తొముకు మోపక్కురొల్ల ప్రేమరె క్యేకిరి అబివుద్ది యిలీసా సాకరాక తొమె ఏ సేవా వినయంరె కూడ అబివుద్ది యిలాపని దిగొండి.

8 ఆజ్ఞపూర్వకముగా తొ సంగరె కొయిలానీ; పొదరిలింకురొ జాగర్తకు తొముకు దిగిదీలా వల్లరె తొ ప్రేమ కెత్తె యదార్థమైలాటవొ మి తెలిసిగిమండె బులిగిల్లింబి.

9 తోమె అమె ప్రబువైలా యేసు క్రీస్తు క్రుపకు తెలుసుకి అచ్చినీనా? సెయ్యె పలియగలిగిలాట రొయికిరి తోమె తా దరిద్దం వల్లరె పలియరొల్లలింకె యీమంచెబులి తో నిమిత్తము దరిద్దుడు యీసి.

10 ఎడ గురించి మో ఉద్దేసం కొయిలింబి; బొచ్చురో అగరాక తోమె కే ఉపకారం కొరువురో మొదలదీసా సెడకు ఇంకా కొరువురాక బొల్ల.

11 సెడకు ప్రారంబించితె మనస్సు తొబిత్తరె క్యాకిరి కలిగిసా సాకరాక కలిగిలాకొలిది సంపూర్తియిల పనికిరి తోమె సె పైటినె ప్రసిద్ధంగా తోమె ఉంచినె నెరవేరుచొండి.

12 అగరె జొన్నె సిద్దమైలా మనస్సు కలిగీకిరి రొన్నె సక్తికి మించి నీ గాని కలిగిలాకొలిదీ దిల్లట ప్రితికరమవుసి.

13-14 పొదరలింకె తేలికగాను తోమె బారముగాను రొమంచె బులి ఎడ కొయిలానీ గాని. ఉంచినె తోమె సమ్ముద్ది తంకె అవసరముకు యింకాకెబ్బుకు తంకె సమ్ముద్ది తోమె అవసరముకు సహయైకిరి రొమ్మంచెబులి యాకిరి కొయిలింబి యాకిరాక దీటకు సమానంగా దిగువురో వూసి.

15 *“బూతు రొల్లటకు బూతు కిచ్చి మిగిల్లా నీ. తక్కువ రొల్లటకు తక్కువ కొదువ నీ” బులి లేకలురె రాసికిరి అచ్చి.

తీతు తా తోటి పైటిలింకె

16 తోమె వినయంరె మెత్తె కలిగిలా ఏ ఆసక్తికీ తీతు ప్రూదయంరె జొరైపించిలా పురువుకు స్త్రాత్రము.

17 సెయ్యె మో విన్నపాముకు అంగీకరించినీ గాని తాకు విసేసాసక్తి కలిగిలా వల్లరె తా ఇష్టంచొప్పురె తొపక్కరెకు బయిలుదేరికిరి అయిలీసి.

18 ఈనె సువార్త వినయంరె సంగముల సొబ్బిటికు ప్రసిద్దియిలా తోటి పైటితాకు తాసంగరె కూడ పొడదిలింబి.

19 సడనీకిరి అం ప్రబువుకు మహిమ కలిగిలా నిమిత్తము అమె సిద్దమైలా మనస్సు దిగిదీతె కోసం ఏ సహాయం కొరిలా వినయంరె పరిచారకులమైకిరి అంసంగరె కూడ సెయ్యె ప్రయాసం కొరుమురో బులి సంగమురె రొల్లాలింకె బచ్చిగీకిరి తాకు లొగ్గిచె.

20 ఈనె అమల్లా విస్తారమైలా దర్మము వినయంరె పరిచారకులమైకిరి అచ్చొ సెడకు కోసం అముంపరె కేసె తప్పు నాపొక్కిరి అమె జాగర్తగా దిగ్గీకుంటా తాకు పొడిదిల్లింబొ.

21 కెడబుల్నె ప్రబువు అంకి అగరె మాత్రమకా నీ మనమనె అంకి అగరె కూడ కెడ బొల్లవొ సెడకు కోసం బొల్లకిరి ఆలోచించిలింబొ.

22 ఈనె తంకె సంగరె కూడ అమె అం బయికు పొడిదిల్లింబొ. బడే సంగుతులురె బడే సారులు తాకు పరీక్నించికిరి తాకు సాయం కొరితె అసక్తికలిగిలాట బులికిరి, ఉంచినెను తోమె ఉంపరె కలిగిలా విసేసామైలా నమ్మకంవల్లరె బూతు ఆసక్తికలిగిలీసి బులికిరి తెలిసిగిలింబొ.

23 తీతు వినయంరె కేసె బులి కేసన్నా పొచ్చిరిలాబెల్లె సెయ్యె మో సంగరె తల్లాటబులి తోమె వినయమురె మో జత పైటితా యీకిరి అచ్చిబులి; అమె బయినె యీలలింకె పొచ్చిరినె తంకె సంగమురె చలితె క్రీస్తు మహిమమైకిరి అచ్చెబులి మీయి కొయిలింబి.

24 సెడకు తంకు తోమె ప్రేమ దిగదేండి. పొదరె సంగమునె తోమె కోసం కైంకు గొప్పగా కొయినంతెవొ తంకు రుజువు కొరొండి.

9

క్రైస్తువు విస్వాసునెకు సహాయం కొరివురో.

1 యూదయరె క్రైస్తువులు విస్వాసునెకు సహాయం కొరుబులికిరి తొముకు రాసివురో అవసరం నీ

2 తోమె మనస్సు సిద్దమైకిరి అచ్చిబులి మెత్తె తెలుసు. సెడకు బొచ్చొరో దీకిరి అకయ సిద్దపొడికిరి అచ్చి బులి కొయికిరి, మీయి తోమె కోసం మాసిదోనియలింకె అగరె అతిసయపొడిలింబి; తోమె ఆసక్తికు దిక్కిరి బడేలింకె ప్రేరేపింపబొడిసె.

3 ఈనె తొ కొసం అమె అతిసయం యే వినయములురె వ్యర్థము నాయీకిరి, మీయి కొయిల పనికిరి తోమె సిద్దముగా రొయితె ఏ విస్వాసునెకు పొడదింబి.

4 తోమె నాసిద్దపొడిసె గుణకలో మాసిదోనియలింకె యీనెను మోసంగరె కూడ అయికిరి తోమె సిద్దముగా నాతవ్వొరో దిగిలాబెల్లె, ఏ నమ్మకము కలిగికిరి రొయికిరి అమె లజ్జోపొడిలింబొ; తోమె కూడ లజ్జోపొడిసొబులి యింకా కొయివురో కిర?

* 8:15 నిర్గమకాండము 16.18

5 సెడకు కొతదిల్లా ప్రకారం దూంచొబులి తొమె కొయిలా దర్మము పిననారితనముగా నాదీకిరి దారాలముగ దిమ్మంచెబులి కొయికిరి, విస్వాసులింకె తొమె పక్కరకు అగరాక అయికిరి సెడకు సిద్ధం కొరితె తంకు కొయివురొ అవసరం బులిగించి.

6 కుండెమట్టుకు సాయం కొరిలాట కుండె లబ్బొకు బొల్ల పొందుగుసి, బొల్ల సహాయం కొరిలాట ప్రతిజోనె సెయ్యె దిమబులిగిలాట హూదయం సంగరె దిమ్మంచె;

7 పురువు సంతోసం సంగరె దిలాలింకు ప్రేమించిసి.

8 ఈనె సొబ్బిటిరె కెబ్బుకు తొబిత్తరె తొమె సర్వసముద్దిగలలింకె బొల్ల యాల ప్రతిపైటి కొరితె పురువు తొ ఉంపరె సొబ్బి రకాలు క్రుపకు విస్తరించిపారి.

9 ఏ వినయంరె

“సెయ్యె వెదజల్లికిరి దరిదునెకు దీసి

తా నీతి కెబ్బుకూ టారుసి” బులి రాసికిరి అచ్చి.

10 విత్తులాటకు విత్తోనె కైయితె కద్ది దిల్లా పురువు తొముకు యిత్తనాము దయకొరికిరి విస్తరించికిరి, తొమె ప్రతి వినయాంరె బొల్ల బగ్యముగలలింకెయితె, తొమె నీతిపలము వ్రుద్దికొరిసి.

11 యాకిరి, దారాలముగ దిల్లా మనస్సు వల్లరె అం దీకిరి పురువుకు క్రుతజ్ఞతాస్తుతులు చెల్లించిసి.

12 కెడబుల్లె ఏ సేవకు గురించి పరిచర్య పురువురొ మనమానె అవసరములు సహాయం కొరిలాట మాత్రమా నీకుండ, బడేలింకె పురువుకు చెల్లించిలా క్రుతజ్ఞతాస్తుతులు వల్లరె విస్తరించిలిసి.

13 కెడబుల్లె క్రీస్తుసువార్త అంగీకరించించొ బులి ఒప్పిగిలాట తొమె విదేయులులైలందరె, తంకె వినయముకు సొబ్బిలింకె వినయముకు ఎత్తె సహాయం కొరిలా వల్లరె, ఏ పరిచర్య వల్లరె తొమె యోగ్యత దిగదీలావల్లరె తంకె పురువుకు మహిమ పరిచిసి.

14 ఈనె తొంపుంపరె పురువు దిగదిలా అత్యధికమైలా క్రుపకు దిక్కిరి, తంకె తొమె నిమిత్తము ప్రార్థన కొరుకుంట, తొముకు దిగిమంచెబులి బడే ఆస కలిక్కిరి అచ్చె.

15 వివరించి నారిలా తా బహుమానం కోసం పురువుకు దండము.

10

పాలు తా సేవకు కాపాడిగివురొ

1 పాలుబుల్లా మియి తో అగరె రొల్లాబెల్లె తొబిత్తరె తగ్గించిగికిరి రొల్లా పనికిరి అగరె నీలాబెల్లె తొ సంగరె దైర్యమునారొల్లవనా మియ్యి యేసు క్రీస్తురె రొల్లా సాత్వికముకు దీనమనస్సు వల్లరె తొముకు వేడిగిలింపి.

2 దే ప్రకారము సలిలలింకె బులి అముకు గురించి కుండెలింకె కొయిగిల్లెసి నీనా? సాలింకె అగరె మియి తెగించికిరి కాటిన్యము దిగిదీమంచె బులి తలించిగిల్లించి గాని మియ్యి అయిలాబెల్లె సాట కాటిన్యముకు దిగిదినాసి బులి కొరుబులి మియ్యి తొముకు బతిమాలిగిల్లించి.

3 సెడ సొత్తకా లొకొరె జీవించినెను ఈనె లొకొసారముగా కొలీనెలగ్గినింతొ.

4 పురువురొ యుద్దోపకరణములు లొకొ సంబంధమైలటా నీగని. సత్రుబలం పొక్కిదిలాపని బలమురొల్లాపని అచ్చి.

5 అమె వితర్కములకు, పురువు గురించి జ్ఞానముకు అడ్డగించిలా ప్రతీ ఆటంకము పొక్కిదీకిరి, ప్రతి ఆలోచనకు క్రీస్తుకు లొబొడిలాపనికిరి కొరిలింపొ.

6 తొమె సంహూర్న విదేయతకు దిగదీలాబెల్లె సొబ్బిటికు అవిదేయతకు ప్రతిదండనకొరికిరి సిద్ధపొడికిరి అచ్చొ.

7 సంగతీనెకు ఉంపరె తొమె దిగిలీసొ, కెనన్నాను తాకు క్రీస్తుతా బులి నమ్మకం నారొనె, సెయ్యె క్యేకిరి క్రీస్తుతా సాకరాక అమె కూడ క్రీస్తులింకె బులి తా మనస్సురె సెయ్యె బులికిరి ఆలోచించిగిమంచె.

8 పొక్కిదిత్తె నీకిరి తొముకు బందితాక ప్రబువు అముకు అనుగ్రహించిలా అదికారం కోసం మియ్యి గుటకలో కుండె అదికముగా అతినయపొడినెను మియ్యి లజ్జోపొడిని.

9 మియ్యి రాసిలా పత్రికలు వల్లరె తొముకు డొరిపించిమంచె బులి నాదిగిదికుండ ఏ కొత కొయిలింపి.

10 తా పత్రికానె గనమైలాట బలమీలాట పనికిరి అచ్చి గాని తా దే రూపమురె బలహీనుడు తా కొతానె నిచ్చరముగా అచ్చి.

11 అమె తొ అగరె నీలాబెల్లె పత్రికలు సంగరె కొతానె ప్రకారము ఈలాలింకె పనికిరి అచ్చొ అగరె రొల్లబెల్లె పైటిసంగరె సాలింకె పనాక రొమ్మంచి బులి సాకిరి తంకె ఆలోచించిలిసి.

12 తాకు సెయ్యక మెచ్చిగిల్లీసి కుండెలింకెదీ జతపరిచిగితై ఈనెను తంకెది సరిదిగితై యీనెను అమె తెగించినంతో గాని తంకె తొనంగరె జొనె దీకిరి జొనె బచ్చిగీకిరి జొనుకు జొనె సరిదిగితైల్లందరె గ్రహించిగినారికిరి అచ్చె.

13 అమె ఈనె స్థాయికి మించికిరి అతినయపొడినింతో ఈనె తొమె రొల్ల గా జాంక అయిమంచిబులి పురువు అముకు నప్పికిరిదిల్లా స్థాయికి లోబొడికి అతినయించిలించో.

14 అమె క్రీస్తు సువార్త ప్రకటించికిరి తొంజాంక అయికిరి అచ్చి గనుక తో పక్కు నా అయిలపనా అమె మొ స్థాయి దాటికిరి జెల్లాలింకె నింతో.

15 అమె స్థాయికి మించికిరి ఎదుటలింకు ప్రయాస పలమూనెరె వొంతు రొల్లపనికిరి అతినయపొడండి తొం విస్వాసము అబివ్వుద్ది యిలా కొద్ది అముకు అనుగ్రహించిలా స్థాయికి బిత్తరాక సువార్త ఇంకా విసేసముగా ప్రకటించిలించో.

16 తొం చుట్టు పక్కరె తల్లా ప్రదేసమునెకు కూడ సువార్త ప్రకటించుబులి అమె తొం మూలముగా గనపరచబొడించో బులి నిరీక్పించిలించో గాని మరి ఇంకాజొనెరె స్థాయికి చేరికిరి సిద్దముగా తల్లా పైటి గురించి అమె అతినయపొడినింతో.

17 “అతినయపొడిలింకె ప్రబువురె అతినయపొడిమంచె బులి లేకనానై రాసికిరి అచ్చి.”

18 ప్రబువు మెచ్చిగిల్లాటాక యోగ్యుడు గాని తాకు సెయ్యె మెచ్చిగిల్లాట యోగ్యుడు నీ.

11

పాలు ఇంకా సారో అపొస్తులునె

1 కుండె వివేకముగా మియ్యి కొతలగిలానీ తొమె నహించిమంచి బులి కొరిలించి మో గురించి తొమె కిడయినెను సహించిమంచి.

2 దేవానక్కిది తో వలరె ఆనక్కి కలిగీకిరి అచ్చి కైంకిబుల్లె పవిత్రమైలా కన్య జొనె వొండ్రపో బుల్లె క్రీస్తుకు సమర్పించిమాసిబులి తొముకు ప్రమానం కోరించి.

3 సప్పా తా కుయుక్తి దీకిరి హవ్వకు మోసం కొల్లాపనాక తొం మనస్సునుకు చెరిపితె క్రీస్తువల్లరె రొన్నె సరలతదీకిరి పవిత్రత దీకిరి క్యాకిరి యీనెను తొలిగిజూసెకీవో బులి డొర్లించి.

4 కెడబుల్లె అయిలలింకె కేసెనను అమె నాప్రకటించిలాట యింకజొనె యేసు ప్రకటించినెను నినె తొమె నాకడిగిల్లింకె ఇంకాగుటె ఆత్మకు తొమె కడిగిల్లాట తొమె నా అంగీకరించిలాట యింకా గుటె సువార్త తొమె అంగీకరించితె తొమె తా గురించి సహించివురో బొల్లాక.

5 మియినె స్నేహమైలా ఏ “అపొస్తులు” కన్నా మియి కెత్తె మాత్రము తక్కువతా నీబులి తలంచిగిల్లించి.

6 కొతానెరె మియి ఓర్పునీలాట యినెను జ్ఞానమురె ఓర్పునీలాట నీ. ప్రతి సంగతినిరె సొబ్బిలింకె మొజిరె తొనిమిత్తము అమె సే జ్ఞానముకు దిగిదీతె అచ్చి.

7 తొముకు హెచ్చించిమంచెబులి తొముకు పురువు సువార్తకు సుచ్చరాక ప్రకటించిల్లించి మెత్తె మియి తగ్గించిగిల్లా వల్లరె పాపము కొరించినా?

8 తొముకు పరిచర్య కొరితె మియి ఏతరం సంగములు వల్లరె బొరొతొనొ కడిగీకిరి, తొముకు సాయం కొరితె సుచ్చిలాటయించి.

9 ఈనె మియి తొంపక్కరె రొల్లాబెల్లె మెత్తె అవసరం రొయికి తల్లాబెల్లె మియి కావుంపరె బారం మోపిలానీ; మాసిదోనియ దీకిరి బయినె అయికిరి మో అక్కర తీర్చినె. ప్రతి విసయంరె మియి తొముకు బారముగా నారొయికుండా జాగర్తపొడించి, యింకా అగరె జాగర్త పొడుంచి.

10 క్రీస్తు సత్యము మోబిత్తరె రొల్లావల్లరె అకయ ప్రాంతములురె మియి యాకిరి అతినయ నాపొడుకుంటా మెత్తె ఆటంకపర్చితె కా తరమునీ.

11 మియి కొయించినా తొముకు మియి ప్రేమించిలాని బులి? మియి తొముకు ప్రేమించిలించి బులి పురువుకు తెలుసు.

12 అతినయ కారనం కుజ్జిలాలింకె కే విసయమురె అతినయించిలీసోవో, సే విసయమురె తంకెను అంవల్లరాక అచ్చెబులి దిగిదిల్లా నిమిత్తము తంకు కారనం నామిలుకుంటా పిట్టిపీతె, మియి మో,

13 కెడబుల్లె సెటాలింకె క్రీస్తురొ అపొస్తులు వేసము దరించిగిల్లాలింకెపని రొయికిరి, సారో అపొస్తులునె మోసం కొరిలా పైటిలింకెపనికిరి అచ్చె.

14 ఎడ ఆచర్యము నీ; సాతాను తా హల్లో దూత వేసము దరించిగిల్లీసి.

15 సెడకు తా పరిచారకులకు నీతి పరిచారకులు వేసము దరించిగితై గొప్ప సంగతినీ. తంకె పైటినె వల్లరె తంకు అంతము కలుగుసి.

పాలు అపొస్తులు ఎట్టె బాదపొడిలీసి

16 మియి అవివేకి బులికిరి కేసె బులిగితైనాబులి యింకా కొయిలించి. సాకిరి బులిగినె మియి కుండె అతిసయపొడిలాపనికిరి మెత్తె అవివేకియాల పనికిరాక చేర్చిగిండి.

17 మియి కొయిలాట ప్రబువు కొతా ప్రకారము కొయిలాసీ గాని యాకిరి అతిసయపొడితె ఆదారము కలిగికిరి అవివేకిపని కొయిలించి.

18 బడెలింకె దే వినయమురె అతిసయపొడిలీసె సెడకు సాకిరి అతిసయపొడుంచి.

19 తొమె వివేకులైకిరి సంతోసం సంగరె అవివేకులకు సహించిలించి.

20 జొనె తొముకు దాన్యముకు లోపరిచినెను, జొనె తొముకు మింగిపినెను, జొనె తొముకు వసపరిచిగినెను, జొనె తాకు గొప్పకొరిగినెను, జొనె మూవుంపరె తొముకు మరినెను తొమె సహించిలిసా.

21 అమె బలహినులైకిరి రొల్లాపనికిరి అవమానంగా కొతలగిలించి. కే వినయంరే కేసినెను దైర్యము కలిగికిరి అచ్చి, సే వినయంరె మియికూడ దైర్యము కలిగిలాట; అవివేకము పని కొతలగిలించి సుమా.

22 తంకె హెబ్రీయునె? మియి కూడ హెబ్రీ తా. తంకె ఇస్రాయేలీయులించె నా? మియి కూడ ఇస్రాయేలీ తా. తంకె అబ్రాహాము సంతానము నా? మియి కూడ అబ్రాహాము తా.

23 తంకె క్రీస్తు పరిచారకులునెనా? బోడ తా పనికిరి కొతలగిలించి, మియి కూడ మరి బూతుగా క్రీస్తు పరిచారకుడు. మరి వినయముగా ప్రయాసపొడించి, మరి బడె సార్లు చెరసాలరె అచ్చి; అపరిమితముగా మడ్డెనె కయించి, బడె సార్లు మొర్నొ అపాయం సంగరె అచ్చి.

24 యూదునె వల్లరె పంచిబెల్లె గుటె తక్కువ ముప్పై తొమ్మిది మడ్డెనె కయించి.

25 తినిబెల్లె బడ్డెనె సంగరె మరిసె. గుటెసారి పొతోరోనె సంగరె మరిసె; తినిబెల్లె బొయితో బంగిజేకిరి ప్రమపొడించి; గుటె రత్తిదూసు సొంద్రొరె గడిపించి.

26 బడెసారులు ప్రయాసములురె, వొడ్డోనె వల్లరె ఆపదలునెరె, సారోనె వల్లరె ఆపదానెరె, మో సొంత మనమానె దీకిరి ఆపదానెరె, అన్యజనులు వల్లరె ఆపదానెరె, పట్టుమురె సె,

27 ప్రయాసం సంగరె, కొస్టానెసంగరె, తరచుగా జాగరనమునె సంగరె, బొక్కొ సొసా సంగరె, తరచుగా ఉపవాసము సంగరె, సిత్తో సంగరె, దిగంబరత్వము సంగరె రోంచి, యింకా కొయిలాంచ బడెంచ అచ్చె.

28 ఎడాక నికిరి సంగము సొబ్బిటి కోసం బాద అచ్చి. ఏ బారము దినో దినో మెత్తె కలిగిలీసి.

29 కెసినెను బలహినుడు వూసి? మియినె బలహినుడు నీనా? కెసినెను తొట్టుపొడిని? మెత్తెను మంట కలిగినీనా?

30 అతిసయ పొడికిరి తన్నె మియి మో బలహిసత వినయమైకిరి సంతలు కోసం అతిసయపొడిలించి.

31 మియి సారొకొతలగిలాని బులి కెబ్బుకు స్తుతింపబోడితల్లా అమె ప్రబువుయిలా యేసురో బొయిలా పురువు బుజ్జును.

32 దమస్కురె అరెత బుల్ల రొజా తొల్లా రొల్లా అదిపతి మెత్తె దరిగితె జొగలోదీకిరి దమస్కీయుల పట్టుముకు బద్రము కొరించి.

33 సెల్లె మియి కిటికిదీ గోడ ఉంపరెదీకిరి గంపలరె వొల్లిపొడికిరి తా అత్తోదీకిరి తప్పించిగీకిరి బాజించి.

12

పాలురొ దర్శనము ఇంకా ప్రకటించివురొ

1 మియి అతిసయించిమాసి, ఈనె నడవల్లరె ప్రయోజనంకిచ్చి అయిని. ప్రబువు దర్శినానె ప్రత్యక్తలు తొముకు కొయిమి.

2 క్రీస్తురొల్ల బెల్లె జొనె మనమకు తెలుసు సెయ్యె పదునాలుగు బొచ్చొరొనె అగరె తింటవొ మెగొరె కొనిగిబాజి సెయ్యె దే సంగరె కొనిగిబాజి బులి తెలిసినీ దే నీకిరి కొనిగిబాజి బులి మెత్తె తెలిసినీ సెడ పురువుకు తెలుసు.

3 సెట మనమానె తెలుసు సెయ్యె పరదైసురె కొనిగిబాజి వచింప సక్యము కాని కొతనె సునిసి సె కొతనె మనమనె పలికినాసి.

4 తా దే సంగరె కొనిగిబాజినీనా దేనికుంటా కొనిగిబాజినీనా మెత్తె తెలిసినీ. సెడ పురువుకు తెలుసు.

5 తా పనాట గురించి అతిసయించిలించి మో వినయము యినె మో బలహిసతరె నీకిరి యింగుటె విదముగా అతిసయించినీ.

6 అతిసయపొడితె నిచ్చుయించినను మియి సత్యంకా పలుకుంచి సెడకు అవివేకినీకిరి మోవల్లరె కేసినను దిగిలాట యీనను మోవల్లరె సునిలాటయినను మెత్తె మియి బూతు గనముగ

7 మెత్తె కలిగిలా ప్రత్యక్షతలు బహువిసేసముగా రొల్లావల్లరె మియి అత్యధికముగా హెచ్చినాపొడుకుంటా నిమిత్తము మెత్తె దేబిత్తరె గుట కొంట, మియి అత్యధికముగా హెచ్చిపొకుంటా నిమిత్తము, మెత్తె నలగొటితె సాతానురో దూతపనికిరి రొయిదీసి.

8 సెడ మోవక్కరెదీకిరి తొలిగిజమంచెబులి సెడ వినయంయికిరి ముమ్మారు ప్రబువుకు వేడిగిలించి.

9 సెడకు మో క్రుప తొత్తె చాలు; బలహీనతరె మొ సక్తి పరిపూర్ణమిలిసి బులి సెయ్యె మో సంగరె కొయిసి. సెడకు క్రీస్తు సక్తి మో ఉంపరె టారిలా వల్లరె, విసేసముగా బలహీనతలురె

10 మియి కెబ్బుకు బలహీనుడువొ సెల్లె బలవంతుడు గనక క్రీస్తు నిమిత్తము మెత్తె కలిగిలా బలహీనతలురె నిందలురె ఇబ్బందులురె హింసలురె ఉపద్రవములురె మియి సంతోసించిలించి.

పౌలు కొరింథీలు కోసం చింతించివురో

11 మియి బుద్ధిహితులుపన నటించిలించి తొమె మెత్తె బలవంతము కొరుసా. మియి తొవల్లరె మెప్పు పొందివలిసిలాట, క్యాకిరి బుల్నే మియి కెమాత్రము యిలాటానిననా మిక్కిలి స్త్రైష్టమైలా ఏ అపొస్తులుకన్నా మియి ఏ వినయంబిత్తరె తక్కువయిలాట నీ.

12 దిగిదిల్లాపైటీనె అద్బుతానె గొప్ప పైటీనె కొరివురో వల్లరె అపొస్తులురో గుర్తునె పూర్ణమైలా ఓర్పు సంగరె తొ మొజిరె సొత్తుగా దిగిపించిసి.

13 మియి తొముకు బారముగా రొన్నిబుల్లా వినయంరె తప్ప, యింకా కే వినయంరెయినె, పొదరి సంగములు కన్నా తక్కువలింకె యిసా? మియి కొరిలా ఏ అన్యాయముకు క్షమించొడి.

14 ఇదిగొ, తినెబెల్లె తొపక్కు అయితె సిద్ధముగా అచ్చి. అయిలబెల్లె తొముకు బారముగా తన్ని. మియి సొత్తుకు నీగాని తొమెకాక మియి కొరిలించి. పిల్లనె మాబోనె కోసం నీగని బో మాక పిల్లనె కోసం ఆస్తి కూర్చిమంచెనీనా.

15 సెడకు మెత్తె కలిగిల సొబ్బిటికి తొ ఆత్మానె కోసం బడె సంతోసముగా కర్చు కొరిమి; మియి తొ కోసమాక కర్చుయిజిమి మియి తొముకు కెత్తె బూతు ప్రేమించిలింకో సెత్తె తక్కువుగా మెత్తె ప్రేమించువొనా?

16 సెడ సాకిరి తమ్మురొండి. మియి తొముకు బారముగా నీగాని, యుక్తియిలట పనికిరి తొముకు తొత్తె మాయకొరికిరి జింకిగిల్లించి బులి కొయిగిల్లినె కీవొ.

17 మియి తొమె పక్కు పొడదిలాలింకె బిత్తరె కాసంగరె యినను తొముకు మాయకొరించినా.

18 తొపక్కు జేతండుకు తీతుకు హెచ్చరించికిరి తా సంగరె కూడ గుట బయికు పొడదించి తీతు తొముకు మోసం కొరికిరి తొపక్కురె కిరయినను జింకిగిచ్చినా? అమె గుట ఆత్మరె గుట పనికిరి చలిజెల్లానింతొనా?

19 మో జట్టుకారీనెలింకె అమె ఎత్తెజాంక అమె వినయమైకిరి తొముకు సమాదానం కొయిలింకో బులి తొముకు తొసీలీసికీవొ. పురువు అగరాక క్రీస్తురె కొతాలగిలింకో; ఇస్టమైలలింకె తొమె బొల్లె రొమ్మంచెబులి తొ కోసం ఎడానల్లా కొయిలింకో.

20 కైంకిబుల్నే మియి అయిలాబెల్లె తొమె మెత్తె ఇస్టమైలాలింకె పనికిరి తన్నారొ కీవొబులి, మియి తొముకు ఇస్టమైలా పనికిరి తన్నికీవొ యింకా కొలీనె అనూయ క్రోదము కక్కానె కొండెమునె గుసగుసానె ఉప్పొంగువురో అల్లరినె తాసె కిరవొ బులి,

21 మియి యింకా అయిలాబెల్లె మో పురువు తొమొజిరె మెత్తె సన్నిట కొరువొ బులి అగరె పాపం కొరికిరి తంకె జరిగించిలా అపవిత్రత జారత్వము పొకిరి పైటీనె నిమిత్తము పొచ్చుకు బుల్లికిరి నాపొందిలా బడెలింకె గురించి దుక్కొపొడివురో అయివొకీవొబులి డొరిజిలించి.

13

ఆకరు హెచ్చిరిక

1* ఏ తింటసారి మియి తొముకు పక్కు అయిలించి దీలింకె తిల్లింకె సాక్సినె తుండొరె ప్రతి కొతానె నిర్దారన వుసి యడ లేకనానెరె రాసికిరి అచ్చి.

2 మియి అగరె కొయించి; మియి ఉంచినె తొపక్కు రె నీనను దీటొసారి తొపక్కురె రొల్లాపనికిరి, అగరెదీకిరి పాపము కొరితల్లాలింకు మిగిల్లింకె సొబ్బిలింకు అగరె కొయిలాట కిరబుల్నే. మియి బుల్లికిరి అయిలబెల్లె కనికరము దిగిదినీ.

* 13:1 ద్వితీయోపదేశకాండము 19.15

3 క్రీస్తు మోదీకిరి కొతలగిలిసిబులి రుజువు కోరిలిసానా? సెయ్యె తొవుంపరె బలహినుడు నీ గానీ, తొవుంపరె సక్తిమంతుడైయికిరి అచ్చి.

4 బలహీనత వల్లరె సెయ్యె సిలువ పొగిసెగానీ, పురువు సక్తి వల్లరె జీలీసి. సాకరాక మియ్యె క్రీస్తురె గుటె యీలా కారనంగా బలహీనతరె అచ్చి సాకరాక తొత్తె సేవా కొరితె పురువు సక్తివలరె మియ్యె జీవించిలింబి

5 తొమె విస్వాసముగల్గిలింకె పనికిరి అచ్చెనా నీనా తొముకు తొమ్మాక సోదించిగికిరి దిగండి; తొముకు తొమ్మాక పరిక్సించిగిండి; తొమె బ్రస్తునె నీనె యేసుక్రీస్తు తొబిత్తరె అచ్చిబులి తొమె కోసం తొమ్మాక బుజ్జినింతొనా?

6 అమె బ్రస్తునె నీబులి తొమె తెలిసిగుంచొబులి మో నమ్మకం.

7 తొమె కే చెడ్డపైటి నాకొరుకుండ రొమ్మంచెబులి పురువుకు ప్రార్థించిలింబి. అమె యోగ్యునెపనికిరి దిగదీమంచెబులి నీ కాని, అమె అయోగ్యులుపనికిరి నాదిగదిల్ల తొమె బొల్లక కొరిమంచెబులి అం ఉద్దేసం.

8 అమె కేవలం సొత్త కోసం గానీ సొత్తకు వేతిరకంగ కిచ్చి కొరినారొ.

9 అమె బలహీనులిన్నెను తొమె బలవంతులులికిరి రొన్నె సంతోసింబిమో. ఎడవల్లరె, బుల్నే సంపూర్నునె యిమంచెబులి ప్రార్థించిలింబి.

10 సెడకు మియి దూరగా రొల్లబేల్లకా ఏ సంగితిసె రాసిలింబి. సాకిరి కోరినె మియి అయిలాబెల్లె మో అదికారం ఉపయోగించిలబిత్తరె కాటిన్యత దిగదిల్లా అవసరం రొన్ని. ఏ అదికారం ప్రబువు తొముకు పొక్కదిత్తె నికిరి, బందిత్తె దీసి.

ఆకరు బొల్ల కొతానె

11 ఆకరుకు, అన్నబయినె అప్పబొయినీనె, సంతోసింబొండి! పునరుద్ధన కోసం పాటుపొడొండి. ప్రోత్సహం పొందిగిండి. గుట్టె మనస్సు సంగరె రొండి. సాంతి సంగరె జిండి. ప్రేమ, సమాదానం పురువు తొంసంగరె రొసి.

12 పవిత్రమైల చుమ్మో లొగ్గికిరి జొనుకు జొనె దండము కొయిగిండి.

13 పరిసుద్దులల్లా తొముకు వందనమునె కొయిలీసె,

14 † ప్రబువైలా యేసు క్రీస్తు క్రుప పురువురొ ప్రేమ పరిసుద్దాత్మరొ సహవాసము తొముకల్లా తొడైకిరి రొమ్మంచె.

† 13:14 పరిసుద్దర్పందము, నూ సెట, గ్రీకు రె 12, 13 తింబ పుస్తకంరె రాసికిరి అచ్చి

అపోస్తులుడైన పౌలు గలతీయులుకు రాసిన పత్రిక అపోస్తులుడైలా పౌలు గలతీయులుకు రాసిన పత్రిక అగరో కొత్తా

యెడ పౌలు ద్వారాగా గలతీయులుకు రాసిలా పుస్తకం. సాకిరాక యెడ గలతీరె రొల్లా సంగాలుకు 48-57 బొచ్చురోనె మొజిరె కలొరె క్రీస్తు జొర్నెల్లా తర్వాతరె రొల్లా ప్రజానెకు పౌలు రాసిలా ఉత్తరం. సాకిరి బులి కచ్చితంగా కొయినారొ, సాకిరాక గలతీ ప్రజానె రోమా సామ్రాజ్యంరె రొల్లా గలతీయులుకు రాసిలాట. ముక్కముగా పౌలు యే ఉత్తరంకు ఎపెసు పట్టుము తీకిరి ఇంకా కొరంతి పట్టుం తీకిరి రాసిసి.

అపోస్తులుడైలా పౌలు గలతీరె రొల్లా పురువురో ప్రజానెకు ఇంకా యూదా ప్రజానె గురించి, యూదునె నీలా ప్రజానె గురించి రాసిలీసి. పౌలు మరి ముక్కంగా సారొ బోద గురించి ఇంకా యూదునె నీలాలికె యూదులంపరె తిరుగుబాటు గురించి, సాకిరాక పుర్నుబందనరె క్రీస్తు ప్రజానె యూదునెరో దర్మసాస్త్రం అనుసరించికిరి సలుగువురో గురించి, సాకిరాక సున్నతి సంగతి గురించి రాసిసి. ఈనె పౌలు సువార్తకు ప్రకటించువురో వల్లరె మాత్రమాక రక్సన పొందిగిమొబులి సాకిరాక క్రీస్తుయేసురె రొల్లా నమ్మకముద్వారాగ మాత్రమాక 2:16 యెడ ప్రజానె కొరిలా పైటికి పురువు ప్రతిపలంకు దయకు దిగదీసి.

సంగతీనె

1. పౌలు గలతీయ సంగస్తులుకు దండము బులి పత్రికకు ప్రారబించిసి 1:1-5
2. పౌలు తా గురించి ఇంకా సెయ్యె దర్మసాస్త్రం ఆదారం కొరిగీకిరి జీవించిలించి బులి కొయికుంట తా అర్హత గురించి కొయివురో 1:6-2:21
3. పౌలు రక్సనరె దర్మసాస్త్రం క్రుపరో ప్రాముక్కత కొయివురో 3-4
4. పౌలు బొల్ల క్రైస్తువులురో జీవినవిదానం గురించి పాటించల కుండె సలహాలు దివురో 5:1-6:10
5. చివరగా పౌలు పొదరె ఆచరించిలా సున్నతి బుల్లా నియమాలుకన్నా పురువు తాకు నో మనమ గా మార్చిలా సంగతికి గేపకం కొరిగీ బులికిరి దండము సంగరె ఉత్తరముకు ముగించువురో. 6:11-18

1 మనమానె ద్వారా నీకుంటా కే మనమ సంగరె ఈనన్నా నీకుంటా యేసు క్రీస్తు ద్వారాగ, తాకు మొరిజిల్లాలికె బిత్తరె తీకిరి సజీవంగా ఉడదిల్లా బో ఈలా పురువు ద్వారాగా అపోస్తులుడుగా డక్కిగిల్లా పౌలు బుల్లా మియ్యి,

2 ఈనె మో సంగంరె పాటు తల్లా విస్వాసులల్లా గలతీయ ప్రాంతంరె తల్లా సంగాలుకు సుబాలు కొయికిరి రాసిలా వినయొనె.

3 బోయాలా పురువు తీకిరి అం ప్రబువైలా యేసు క్రీస్తు తీకిరి తొముకు క్రుప, సాంతి కలిగిమాసి.

4 అం బోయాలా పురువురో ఇన్టం ప్రకారం క్రీస్తు అముకు ఉంచినె తల్లా దుస్థకలో తీకిరి చొడిపించిమాసిబులి అం పాపోనె కోసం తాకు సెయ్యక ఒప్పకొయిగిచ్చి.

5 పురువుకు సాబ్బిబెల్లె మహిమ కలిగిమాసి. ఆమేను.

ఇంగుటె సువార్త సీ

6 క్రీస్తు క్రుప ద్వారా తొముకు డక్కిలాటకు సడదీకిరి, ఇంగుటె సువార్త ఆడుకు తొమె ఎత్తో బేగా బుల్లికిరి పొలిజెవురో దిగితన్నే మెత్తె బడే ఆచ్చర్యం కలిగిలీసి.

7 అసలు “ఇంగుటె సువార్త బుల్లాట నీ,” ఈనె క్రీస్తు సువార్తకు వక్రీకరించికిరి తొముకు గలిబిలి కొరిలాలికె వొదిలింకె అచ్చె.

8 ఈనె అమె తొముకు ప్రకటించిలా సువార్త నీకుంటా ఇంగుటె సువార్తకు అమె యీనెను పరలోకం తీకిరి అయిలా దేవదూతన్నా తొముకు ప్రకటించినె, సెయ్యె పురువురో నరకసిక్కుకు జోసి.

9 సాకిరాక అమె అడకగరె కొయిలాపనికిరాక ఉంచినంకా ఇంకా కొయిలింవొ. తొమె అంగీకరించిలా సువార్త నీకిరి ఇంగుటె కేసైలా ప్రకటించినె, తాకు పురువు నరకసిక్కుకు పాత్రుడు.

10 ఉంచినె మియి మనమానొ మెప్పుకు కొరిగిల్లించినా? నోనె పురువురో మెప్పుకు కొరిగిల్లించినా? మియ్యి మనమానుకు సంతోసపర్చిమాసి బులిగిన్నే క్రీస్తుకు దాసుడు ఈనారింత.

పాలు అపోస్తలుడుగా క్యాకిరి ఈసి

11 మానే బయనె, మియ్యి ప్రకటించిలా సువార్త మనమానె ద్వారా అయిలాటనీబులి తొముకు తెలిసిమాసి.

12 మనమ తీకిరి మియ్యి సడకు పొందిలానియ్యి, మెత్తె కేసే సడకు బోదించిలానింతె, యేసు క్రీస్తాక స్వయంగా మెత్తె బయలుపర్చిసి.

13 మో అగరో యూదామత జీవితం గురించి తొమె సునిసా. మీ పురువురో సంగముకు గోరంగా హింసించుకుంటా నాసనం కొరుకుంటా రొయితమ్మి.

14 సెత్తెలె మెత్తె మో పూర్వికులురో సాంప్రదాయాలంపరె బడే ఆసక్తి తవ్వి. యూదా మత నిష్ట విసయంరె మో సొంత జతి మనమానె మో ఈడు కలిగిలా బడేలింకు మించిజేంచి.

15 ఈనెను మా పెట్టోరె మెత్తె ప్రత్యేకపరిచిగీకిరి, తా క్రుప సంగరె మెత్తె డక్కిలా పురువు మీ యూదునెనీలాలింకు తా పో గురించి ప్రకటించిమాసి బులి

16 సెయ్యె తాకు మో బిత్తరె బయలుపరిస్తే ఇష్టపొడిసి. సెత్తెలె ఎంట్లాక మీ నలహా కోసం యూదునె సంగరె సంప్రతించిలానీ గని బో నిర్ణయించిలా పోరో సువార్త ప్రకటించితె పొదరెలింకె పక్కాక జేంచి.

17 మో కన్నా అగరె అపోస్తలులాలింకు పక్కెనా, యెరూసలేముకైసన్నా జెల్లానీ, అరేబియా దెసాకు జేకిరి సే తర్వాతరె దమస్కు పట్టంకు బుల్లికిరి అయింది.

18 తింట బొచ్చురో ఈలాబెల్లె పేతురుకు పరిచయం కొరిగిమ్మాసి బులి యెరూసలేముకు జేకిరి తా పక్కరె పదిహేను దినొనె అచ్చి.

19 తాకు తప్ప అపోస్తలునెరె ఇంకా కాకూ మీ దిగిలాని, ప్రబువురో బయి యాకోబుకు మాత్రం దిగించి.

20 మీ తొముకు రాసితల్లా యే సంగతీనె గురించి పురువు అగరె నుచ్చిలానీ.

21 సే తర్వాతరె సిరియా, కిలికియ ప్రాంతమునెకు అయింది.

22 క్రీస్తురె తల్లా యూదయ సంగంలింకు మో మూ పరిచయం నీ. ఈనె

23 “అగరె అముకు హింసించిలాట సెయ్యె అగరె పాడుకొరితండుకు అయిలాట మతముకు ప్రకటించిలీసి” బుల్లా సంగతి మాత్రమాక సునికిరి,

24 తంకె మో ద్వారా పురువుకు మహిమ పర్చిసె.

2

పాలుకు అపోస్తలునె అంగీకరించువురో

1 పద్నాలుగు బొచ్చురోనే ఈలా తర్వాతరె మీ తీతుకు దరిగీకిరి బర్నబా సంగరంకా యెరూసలేముకు బుల్లికిరి జేంచి.

2 అమె జెమ్మాసి బులి పురువు సొప్పొరె కొయిలందరాక జేంచి. మో ప్రయాస వ్యర్థమైజెల్లీకివో బులి, నీనే వ్యర్థమైజేసి కివో బులి మీ పొదరెలింకు ప్రకటించితల్లా సువార్త కోసం విస్వాసులై ముక్కవైలా నాయికులుకు ప్రత్యేకంగా బోదించింది.

3 ఈనె మో పక్కరె తల్లా తీతు గ్రీసు దెసాతా ఈనన్నా సున్నతి పొందిమాసి బులి కేసే తాకు బలవంతం కొరిలానింతె.

4 క్రీస్తు యేసురె అముకు కలిగిలా స్వతంత్రముకు కనిపెట్టికిరి, అముకు బానిసలుగా కొరితె దిగితండుకు, రహస్యంగా కపట సహోదరులునె ప్రవేశించిసె.

5 సువార్త సత్యం మార్పు నీకుంటా, తొముకు పైటికైలా పనికిరి రొయితండుకు తొ మొజిరె రొమ్మాసి బులి తంకె సంగరె అమె గుట్టె గడియన్నా ఏకీబవించిలానింతె.

6 ఈనె నాయికులుగా బచ్చిగిల్లాలింకె మీ కొయిలా సందేసాలుకు మార్పునె కిచ్చి కొరిలానింతె. సే నాయకునె గొప్పలింకాక ఈనె తంకె మెత్తె ముక్కం నీ. పురువు మనమరొ పొదరె రూపు దిగిని.

7 ఈనె సున్నతి పొందిలా యూదునెకు బోదించితె పురువు పేతురుకు క్యాకిరి ఒప్పుకొయిసా, సాకిరాక సున్నతి నాపొందిలా పొదరెలింకు బోదించితండుకు మెత్తె ఒప్పుకొయిసి బులి తంకె గ్రహించిసె.

8 బుల్లీ, సున్నతి పొందిలా యూదునెకు అపోస్తలుడుగా రొయితండుకు పేతురుకు సామర్థ్యం దిల్లాటాక, అన్యమనమానెకు అపోస్తలుడుగా రొయితండుకు మెత్తంకా సామర్థ్యం దీసి.

9 నాయకులుగా నా తల్లా యాకోబు, పేతురు, యోహాను బుల్లాలింకె పురువు మెత్తె అనుగ్రహించిలా ప్రత్యేకమైలా పైటికి జనికిరి, అమె అన్యమనమానెకాక నీకుంటా, సున్నతి పొందిలాంకంకా అపోస్తలులుగా తమ్మాసి బులి కొయికిరి, తంకు సంగరె పాలిబాగస్తులైతే గుర్తుగా తంకె బత్తోకైలా అత్తోనుకు మో సంగరె, బర్నబా సంగరె దీసె.

10 తంకల్లా బీదలించెరో అవసరాలు తీర్చిమాసి బులికిరాక కోరినె. సాకిరి కొరితందుకాక మీ ఆసక్తి కలిక్కిరి అచ్చి బులి కొయిసి.

పాలు పేతురుకు విమర్శించువురో

11 ఈనె పేతురు, అంతియొకయకు అయిలబెల్లె సెయ్యె తప్పు కొరిసి గనక మీ తాకు మో అంపరె కొయించి.

12 కైంకిబుల్లె, యాకోబు పక్కరె తీకిరి కుండెమంది నాఅయిలా అగరె సెయ్యె పొదరెలింకె సంగరె కద్ది కైలీసి. తంకె అయిలాబెల్లె సున్నతి పొందిలాలింకు డొరికిరి పొచ్చుకు తైకిరి పొక్కు బాజేసి.

13 తల్లా యూదులంకా తా సంగరె మిసిజేకిరి కపట ఏసం పొగ్గిచ్చె. బర్నబా అంకా తంకపంట ఏసం వల్లరె మోసమైజేసి.

14 తంకె సువార్త సత్యంకు సల్లాంతె బులి, మీ దిక్కిరి సొబ్బిలింకగరె పేతురుసంగరె, “తూ యూదుడుగా తైకిరంకా యూదుడుపనికిరి నీకుంటా, అన్యడుపనికిరి జీవించిలబెల్లె, పొదరెలింకెనె యూదునెపనికిరి జీవించిమాసి బులి కైంకి బలవంతం కొరిలీను?” బులించి.

విస్వాసం వల్లరె యూదునె పొదరెలింకె రక్షించబొడివురో

15 అమె జొర్నొతీకిరి యూదునెమాక ఈనె, “అన్యమనమానెరె పాపోనె” నింతో.

16 మనమ యేసు క్రీస్తురె విస్వాసం రొగ్గువురో వల్లరాక పురువు నీతిమంతుడుగా తీర్చుసి ఈనె, దర్మసాస్త్రం ద్వారానీ. సే సంగతి జనిలా అమ్మంకా దర్మసాస్త్రం పైటినె వల్లరె నీకుంటా క్రీస్తు వల్లరె విస్వాసం ద్వారా పురువు ద్వారా నీతిమంతునెగా తీర్చు పొందితంతుకు యేసు క్రీస్తురె విస్వాసం రొగ్గించో. దర్మసాస్త్రంకు సంబందించిలా పైటినె వల్లరె కేసే నీతిమంతుడు బులి తీర్చు పొందినింతె నీనా.

17 ఈనె, పురువు అముకు క్రీస్తురె నీతిమంతునెగా తీర్చిమాసి బులి కుజ్జతన్నుగా అమె పాపోనెగా దిగదెన్నే, క్రీస్తు పాపముకు సేవకుడెసినా? సాకిరి కొయినాసి.

18 మీ పొక్కదిల్లాంచకు ఇంకా బందినే మెత్తె మియ్యాక అపరాదిగా కొరుగుంచి నీనా.

19 మీ ఈనె, పురువు కోసం జీతె, దర్మసాస్త్రం వల్లరె దర్మసాస్త్రం ద్వారా మొరిజేంచి.

20 మీ క్రీస్తు సంగరంకా సిలువ మొర్నొ పొందిగించి. ఇంక జీతల్లాట మియ్యి నియ్యి, క్రీస్తాక మో బిత్తరె జీలీసి. మీ ఉంచినె దేరె జీతల్లా జీక మెత్తె ప్రేమించికిరి, మో కోసం తాకు సెయ్యాక ఒప్పుగించిగిల్లా పురువురో పో అంపరె తల్లా విస్వాసం వల్లరాక.

21 మీ పురువురో క్రుపకు నిరర్థకం కొరిని. నీతి దర్మసాస్త్రం వల్లరె సాద్యమైనె క్రీస్తు మొరిజివ్వరో అనవసరమాక నీనా.

3

దర్మసాస్త్రం పైటినె ఇంక విస్వాసం

1 తెలివినిలా గలతీయులింకె, తొముకు మోసం కొరిలాట కేసే? సిలువకు పొగిబొడిలాట పనికిరి యేసు క్రీస్తు తొం అంకినె అగరె దిగిపించించో నీనా!

2 తొం ద్వారా మీ గుటె తెలిసిగిమ్మాసి బులిగిల్లించి. సడ కిడబుల్లె, దర్మసాస్త్రంకు సంబందించిలా పైటినె వల్లరె ఆత్మకు పొందిసోనా నీనే విస్వాసం సంగరె? సునువురో ద్వారా పొందిసోనా?

3 తొమె ఎత్తో బుద్ధి నీకుంటా అచ్చో? అగరె పురువురో ఆత్మ సంగరె మొదలుదీకిరి, ఉంచినె దేసంగరె పరిపూర్ణులైవోనా?

4 ఎత్తో కొస్టొనె పొడ్డాంచల్లా సుచ్చాటాకనా? సడానల్లా సుచ్చరాక జోసనా?

5 ఆత్మకు తొముకు అనుగ్రహించికిరి, తొంబిత్తరె అద్బుతానె కొరిపించితల్లాట, దర్మసాస్త్రంకు సంబందమైల పైటినె వల్లరెనా నీనే విస్వాసం సంగరె సునువురో వల్లరె కొరిపించిలీసినా?

6 అబ్రాహాము, “పురువుకు నమ్మిసి సడాక తాకు న్యాయంగా బచ్చిగీసి.”

7 సడుకాక, విస్వాసం రొగ్గిల్లాలింకాక అబ్రాహాము సంతానం బులి తొమె తెలిసిగిమ్మాసి.

8 పురువు విస్వాసం ద్వారా యూదునెనిలాలింకు న్యాయంగా తీర్చిమి బులి లేకనమురె అగుంతాక దిక్కిరి, తొ ద్వారా “మనమానల్లా ఆసీర్వదించబొడివె బులి అబ్రాహాముకు సువార్త అగుంతాక ప్రకటించిసి.”

9 ఈనె విస్వాసం సంబంధులాక విస్వాసంగల్లా అబ్రాహాము సంగరంకా ఆసీర్వదించబొడివె.

10 దర్మసాస్త్రం విదించిలా పైటినుకు సంబందించిలాలింకల్లా సాపం తొల్లచ్చె. కైంకిబుల్నే “దర్మసాస్త్రగ్రందంరె రాసికిరితల్లా విదులల్లా కొరితండుకు నిలకడగా నీలా ప్రతిమనమ సాపగ్రస్తుడు” బులి రాసికిరచ్చి.

11 *దర్మసాస్త్రం వల్లరె కేసైనా పురువు అగరె నీతిమంతుడు బులి తీర్చబొడిని బుల్లా సంగతి స్పష్టమాక. కైంకిబుల్నే “నీతిమంతుడు విస్వాసం వల్లరె జీవొ.”

12 దర్మసాస్త్రం విస్వాస సంబందమైలాటనీ గని సడరో నియమానెకు ఆచరించిలాట సడవల్లరాక జీవించువొ.

13 †ఆత్మ గురించి ఈలా వాగ్దానం విస్వాసం ద్వారా అముకు మిల్లాపనికిరి, సడుకాక, “మాను ఉంపరె యాలబొడిలా ప్రతిమనమ సాపగ్రస్తుడు” బులి దర్మసాస్త్రంరె రాసికిరచ్చి.

14 అబ్రాహాము షొందిలా ఆసీర్వచనం క్రీస్తు యేసు ద్వారా అన్యమనమానెకు కలిగితండుకు, క్రీస్తు అముకోసం సాపమైకిరి, దర్మసాస్త్రంరె సిక్ష్తీకిరి అముకు చొడిపించిసి.

దర్మసాస్త్రం ఇంకా వాగ్దానం

15 మో జట్టుకారీనె, మనమ రీతిగా కొతలగిలింపి; మనమానె నిర్నయించిలాట ఈనెను సడ స్థిరపరిచిలా తర్వాతరె ఇంకజొనెకేసే సడకు మరిపీనారె, సడకు కిచ్చి మిసినారె.

16 అబ్రాహాముకు తా సంతానముకు పురువు వాగ్దానాలు దీసి. నెయ్యె బడేలింకు గురించి బుల్లాపనికిరి, తో పిల్లానుకు బులి నా కొయికిరి జొన్నె గురించి కొయిలా పనికిరాక, “తో సంతానముకు బులి కొయిసి.” “సే సంతానం క్రీస్తాక.”

17 ‡మీ కొయిలాట కిడబుల్నే, చారసోయింపరె తిందొస్ట బొచ్చురోనె యీలా తర్వాతరె అయిల దర్మసాస్త్రం, పురువు అగుంతాక స్థిరపరిచిలా నిబందనకు పిట్టిపీని. సడరో వాగ్దానంకు వ్యర్థం కొరిని.

18 †సే వారసత్వం దర్మసాస్త్రం ద్వారా కలిగిలాపనికిరి ఈనె, ఇంక వాగ్దానము నా ఈలపనికిరాక. ఈనె పురువు అబ్రాహాముకు వాగ్దానము వల్లరాక వారసత్వం అనుగ్రహించిసి.

19 సాకిరైనే దర్మసాస్త్రం కైంకి? కాకోసం ఈనె సే వాగ్దానం కొరిసో సే సంతానం అయిలెత్తెజాంక సడ అమలురె అచ్చి. సడ మొజిమనమ ద్వారా దేవదూతానె సంగరె నియమించిసి.

20 మొజిరోమనమ అచ్చిబుల్నే జొనుకాక నీ గని, పురువు జొన్నాక.

దర్మసాస్త్రంమురొ ఉద్దేశం

21 దర్మసాస్త్రం పురువురొ వాగ్దానాలుకు వ్యతిరేకంనా? నీ. ఈనెమాను దర్మసాస్త్రం జీపించిగలిగిలాటైనె, సడవల్లరాక నీతి కలిగిత.

22 ఈనె యేసు క్రీస్తు వల్లరె విస్వాసం ద్వారా కలిగిలా వాగ్దానం విస్వసించిలాలింకు అనుగ్రహించితె లేకనము సొబ్బిలింకు పాపంరె బందించిసి.

23 విస్వాసం షొదరెనాపొడిలాబెల్లె విస్వాసం ప్రత్యక్ష్మమైలావరకూ, అమె దర్మసాస్త్రంకు మాత్రమాక పరిమితమైకిరి సడరో చెరరె అచ్చి.

24 ఈనె పురువు అముకు విస్వాసం ద్వారా నీతిమంతునెగా కొరికిరి క్రీస్తు పక్కు నలిపించితె, దర్మసాస్త్రం అముకు ప్రాదమిక బోదకుడుగా అచ్చి.

25 ఈనె విస్వాసం షొదరకు అయిసి గనక ఉంచినె ప్రాదమిక బోదకుడు తొల్లె తన్నింతో.

26 యేసుక్రీస్తురె విస్వాసం వల్లరె తొమల్లా పురువురొ పిల్లానె యికిరచ్చి.

27 క్రీస్తురె బాప్టిసం షొందిలా తొమల్లా క్రీస్తుకు పిందిగిచ్చి.

28 యాండ్రె యూదుడు బులి గ్రీసుదెసొట బులి నీ, దాసుడు బులి స్వతంత్రుడు బులి నీ. మొడ్రపో తిల్లపిల్ల బులినీ, యేసుక్రీస్తురె తొమల్లా గుట్టెకిరచ్చి.

29 * తొమె క్రీస్తుకు సంబందించిలాలింకైనే, అబ్రాహామురొ పిల్లానైకిరి, వాగ్దానం ప్రకారం వారసులైకిరచ్చి.

4

1 ఈనె మీ కొయిలాట కిరబుల్నే, వారసుడు సొబ్బిటికి కర్త ఈకిరితన్నెనూ పిల్లాసా ఈకిరి తల్లెత్తెకలో తాకు దాసుడుకు కే బేదమునీ.

* 3:11 రోమా 1, 7, హబక్కు 2, 4 † 3:13 ద్వితీ 21, 23 ‡ 3:17 నిర్గమ 12, 40 § 3:18 రోమా 4, 14 * 3:29 రోమా 4, 13

- 2 బో ద్వారా నిర్ణయించిలా దినో అయిలజాంక సెయ్యో సంరక్కుకులురో, గ్రుహనిర్వాహకునెరో ఆదీనంరె తాసి.
 3 సాకిరాక అమంకా పిల్లనైకిరి తల్లబెల్లె లోకనంబందమైలా మూలపటోనుకు లోబొడికిరి దాసులైకిరి అచ్చొ.
 4 ఈనె కలో పరిపూర్ణమైలాబెల్లె పురువు తా పోకు పొడిదీసి. సెయ్యో మనమగా మొట్టకు జొర్నైకిరి యూదునెరో దర్మసాస్త్రం తొల్లె జీసి.
 5 అమె పుసిగిల్లాపోనె ఈవాసిబులి, దర్మసాస్త్రముకు లోబొడికిరి తల్లలింకు చొడిపించితె దర్మసాస్త్రముకు లోబొడిలాటఈసి.
 6 సడుకాక తొమె పురువురో పోనె ఈకిరి అచ్చొ గనక “*అబ్బా, బొ” బులి డక్కిలా తా పోరో ఆత్మకు పురువు అం మనుసూనెబిత్తురుకు పొడిదీసి.
 7 ఈనె తు ఇంక దాసుడు నీ పోఆక. పో ఈనె పురువు ద్వారా వారసుడు.

పాలు గలతీయులు కోసం ఆలోసించువురె

- 8 నీ కల్రె ఈమె తొమె పురువుకు నాజనికిరి, సొత్తాక పురువునె నీలాలింకు దాసులైకిరి అచ్చొ,
 9 ఈనె ఉంచినె తొమె పురువుకు జనిలాలింకె, ఇంకా ప్రత్యేకించికిరి పురువు తొముకు తెలిసిగిచ్చి గనక బలహీనమైలాంచ, నాపైటికైలా మూలపైటీనేపు కైంకి జెల్లిసా? ఇంకా సడానుకు బానీసలుగా తమ్మాసిబులిగిల్లోనా?
 10 తొమె దినోనుకు, మసోనుకు ఉత్సవకలోనుకు, బొచ్చురోనుకూ ప్రత్యేకంగా ఆచరించిలీసాపని.
 11 తొం గురించి మీ పొడిలా కొన్డా వ్యర్థమైజోసికీవోబులి తొం గురించి డొరిజిల్లించి.
 12 మో జట్టుకారీనె, మీ తొం పనాట యీంచి గనక తొమ్మంకా మోపనాలింకె ఈవాసిబులికిరి తొముకు బతిమాలిగిల్లించి. తొమె మెత్తె అన్యాయం కొరిలానింతొ.
 13 కైంకిబుల్నే అగరెసారి మెత్తె దేరెనాబొల్లరినన్నా, తొముకు సువార్త ప్రకటించించి బులి తొముకు తెలుసు.
 14 సెత్తెల మో దేరె నాబొల్లెరోన్నన్నా సడకు దరికిరి తొమె మెత్తె త్రునీకరించిలానింతొ, నిరాకరించిలానింతొ గని పురువురో దూత పనికిరి, క్రీస్తుయేసు పనికిరి మెత్తె అంగీకరించిసా.
 15 తొమె కొయిగిల్లా దన్యత కిరైసి? వీలైనే తొం అంకీనె కడికిరి మెత్తె దీపేతో బులి తొం గురించి సాక్సం కొయిపారి.
 16 మీ తొముకు సొత్తో కొయిలందరె సత్తుయించినా?
 17 తంకె తొం మేలు కోరికిరి ఆసక్తి సంగరె వెంటాడిలాలింకెనింతె. తొమ్మాక తంకు పొచ్చాడె జెమ్మాసిబులికిరి తొముకు పొదురుకు మొకిదీతె దిగిలీసె.
 18 మీ తొం పక్కరె తల్లబెల్లెమాత్రమాకనీకిరి కెబ్బుకు బొల్లెవిసయోనెరె ఆసక్తిగా రొవురో బొల్లొక.
 19 మో సన్నిపిల్లనె, క్రీస్తు స్వరూపము తొం బిత్తరె దిగదిల్లజాంక తొం గురించి ఇంకామెత్తె ప్రసవవేదన కలిగిలీసి.
 20 తొం గురించి మెత్తె కిచ్చితోచిలీని. మీ ఉంచినాక తొం మొజుకు అయికిరి ఇంగుటపనికిరి తొం సంగరె కొతలగిమాసిబులిగిల్లించి.

హాగరు చార రొ ఉదాహరణ

- 21 దర్మసాస్త్రముకు లోబొడికిరి తమ్మాసిబులిగిల్లాలింకె, మెత్తెకోండి. తొమె దర్మసాస్త్రముకు సునిలీసానింతొనా?
 22 దాసి వల్లరె జొనె, స్వతంత్రాలు వల్లరె జొనె, దీలింకె పోనె అబ్రాహాముకు కలిగినె బులికిరి రాసికిరి అచ్చొనీనా?
 23 ఈనె దాసివల్లరె జొర్నైలాట దే రీతిగా జొర్నైసి. స్వతంత్రురాలుకు జొర్నైలాట వాగ్గానం ద్వారా జొర్నైసి.
 24 ఏ సంగతీనె అలంకార రూపముగా కొయిపారొ. ఏ తిల్లిలింకె దీట నిబందనలైకిరి అచ్చొ. తాండ్రె గుట సీనాయి పర్వతోకు సంబందించికిరి బానిసత్వంరె రొయితందుకు పిల్లానుకు బేయిసి. యెయ్యో హాగరు.
 25 ఏ హాగరు అరేబియా ప్రాంతంరె తల్లా సీనాయి పర్వతమాక. ప్రస్తుతం ఉంచినె తల్లా యెరూసలేము సడరొ పిల్లానెసంగరంకా బానిసత్వంరె అచ్చొ. గనక సీ నిబందన సడకు పొలికగా అచ్చొ.
 26 ఈనె ఉంపరె తల్లా యెరూసలేము స్వతంత్రముగా అచ్చొ. సడ అముకు మా.
 27 సడకు
 “పిల్లానుకు నాబేయిలా గొడ్డింటా ఆనందించు,”
 బేయితె బొత్తానె నాయిలంటా, బొట్ట దొందరానె దొందరా;
 క్యాకిరిబుల్నే గొయిత రొల్లాటరొ పిల్లానెకన్నా
 గొయిత నీలాటరొ పిల్లానె బడేలింకె అచ్చొబులి రాసికిరచ్చొ.

* 4:6 అరామికు బసారె అబ్బా బుల్నే నాన్నా బులి అర్థం

- 28 ఉంచినె తొమె మో జట్టుకారీనె, అమంకా ఇస్సాకుపనికిరి వాగ్గాసం వల్లరె జొరైలా పిల్లానైకిరచ్చొ.
- 29 సెత్తెలె దే ద్వారా జొరైలాట ఆత్మ ద్వారా జొరైలాటకు క్యాకిరి హింసించినో ఉంచినంకా సాకిరాక జరిగిలీసి.
- 30 ఈనె యెడ గురించి లేకనం కిరకొయిలీసి? “దాసికి తా పోకు గొడ్డిదె దాసి పో స్వతంత్రురాలురో పో సంగరె వారసుడు ఈకిరి తన్ని.”
- 31 సడవల్లరె మో జట్టుకారీనె, అమె స్వతంత్రురాలురో పోనాక గని దాసిరో పోనెనింతో.

5

క్రీస్తురె విడుదల

- 1 స్వతంత్రంగా రొయితందుకాక క్రీస్తు అముకు చొడిపించిసి. గనక, తొమె స్తిరంగా టారికిరి, ఇంకా బానిసత్వం బుల్లా కాడితొల్లె చిక్కితెనాండి.
- 2 దిగోండి; తొమె సున్నతి పొందినె క్రీస్తు వల్లరె కిచ్చిప్రయోజనం నీబులికిరి పాలుబుల్లా మియ్యి తొముకు కొయిలించి.
- 3 సున్నతి పొందిలా ప్రతిమనమ దర్మసాస్త్రముల్లా పాటించిమాసిబులికిరి మీ యింకా గట్టిగా కొయిలించి.
- 4 తొబిత్తరె దర్మసాస్త్రం వల్లరె నీతిమంతునెగా ఈవాసిబులిగిల్లాలింకె కేసెవో తంకె క్రీస్తుతికిరి బొత్తిగా వేరైజికిరచ్చె, క్రుప తీకిరి పొదురుకు బాజీసె.
- 5 క్యాకిరిబుల్లె, అమె విస్వాసం వల్లరె న్యాయం కలుగుసిబుల్లా నిరీక్సన సంగరె ఆత్మద్వారా ఎదురు దిగిలించొ.
- 6 యేసు క్రీస్తురె ఏకమైవురో వల్ల సున్నతి పొందినన్నా కిచ్చినీ, నాపొందినన్నా కిచ్చినీ, ఈనె ప్రేమసంగరె పైటికిరిలా విస్వాసమాక ముక్కం.
- 7 తొమె బొల్లొక దోండిలీసా. సత్యముకు నాఅనుసరించికుంటా తొముకు కేసె ఆపిసె?
- 8 ఏ ప్రేరన తొముకు డక్కిలా పురువు కే ఆటంకము వల్లరె కలిగిలాని.
- 9 పులిసిల పిండి కుండె ఈనన్నా ఉండల్లా పుల్ల కొరిపీవొ.
- 10 తొమె కెత్తెమాత్రం వేరేగా ఆలోసించినంతొబులికిరి ప్రబువురె తొ గురించి మీ గట్టిగా నమ్మిలించి. తొముకు కలవరం లొగిలాట కేసెనను సరాక సెయ్యె తగిల సిక్స అనుబవించుసీ.
- 11 మో జట్టుకారీనె, సున్నతి పొందిమాసిబులి మీ ఇంకా ప్రకటంచితన్నే ఉంచినెకంకా కైంకి హింసించబొడిలించి? సిలువకు గురించి అబ్యంతరముకు సున్నతి కడిపిలీసి నీనా?
- 12 తొముకు అబ్యంతరం పరిచిలాలింకె తంకు తంకెక అనిపిగివురో బొల్ల.
- 13 మో జట్టుకారీనె, తొమె స్వతంత్రులుగా రొయితె పురువు తొముకు డక్కిసి. ఈనె సే స్వతంత్రముకు దేరో ఆసానెకు ఆదారం నాకొరిగీకిరి, ప్రేమ సంగరె జొనుకు జొనె సేవ కొరిగిండి.
- 14 దర్మసాస్త్రముల్లా “తో పనికిరాక తో పక్కాలింకు ప్రేమించు” బులికిరి గుట్టె ఆజ్జరె సంపూర్ణమైకిరి అచ్చి.
- 15 ఈనె తొమె జొనుకు జొనె కమిడిగీకిరి కైపీనె జొను వల్లరె జొనె బొత్తిగా నసించుజెవ్వొకివో దిగ్గునొండి.

ఆత్మ ఇంకా దే సంబంధమైలాట

- 16 మీ కొయిలాట కిరబుల్లె ఆత్మద్వారా సలుగునొండి. సెత్తెలె తొమె దేరో ఆసానెకు నెరవేర్చినంతో.
- 17 దే ఆత్మకు ఆత్మ దేకు యిరోదంగా జింకుతోసి. ఎడానె గుటకు గుట వ్యతిరేకంగా అచ్చె. గనక తొమె కిర కొరివాసి బులి నిచ్చయించిగిచ్చొ సడానె కొరినింతో.
- 18 తొమె ఆత్మ సంగరె సలిగిన్నే దర్మసాస్త్రముకు లోబొడిలాలింకెనింతో.
- 19 దేకు సంబందించిలా కార్యానె స్పష్టంగా అచ్చె. సడానె కిరబుల్లె; జారత్వము, అపవిత్రత, కామవికారం,
- 20 విగ్రహారాదన, మాయకొతానె, ద్వేసం, కలహము, ఈర్ష్య, రగ్గొ, మత్సరమునె, క్రోధమునె, కక్యానె
- 21 బేదమూనె, విమతానె, అసూయానె, గోల కొరిలా నచ్చొ గిత్తోనె ఎడానల్ల. ఎడానె గురించి మీ అగరె కొయిలా పనికిరాక ఎడానుకు కొరిలాలింకె పురువురో రాజ్యొకు జెన్నారె బులికిరి తొముకు స్పష్టంగా కొయిలించి.
- 22 ఈనె ఆత్మ పలాలు కిరబుల్లె; ప్రేమ, ఆనందం, సమాధానం, దీర్ఘసాంతం, దయాలత్వం, బొల్లతనం, విస్వాసం,
- 23 సాత్వికము, ఆసానిగ్రహం. ఏటానెపనాంచకు విరోధమైలా నియమము కిచ్చినీ.
- 24 క్రీస్తుయేసు సంబందినె దేకు, సడరో దురాసానెకు సిలువ పొగిపిసె.
- 25 అమె ఆత్మ ద్వారా జీకిరి తన్నె సే ఆత్మ ద్వారా సలిగిమ్మా.

26 జోనుకు జోనె అహంబావం నీకుంటా కొలీనెనీకుంటా అనూయ నీకుంటా రొమ్మండి.

6

జొనొ బారాలునె జోనె బరించిగిండి

1 మో జట్టుకారీనె, తొ బిత్తరె జోనె కే తప్పునాకొరుకుంటా మిలిజిన్నే తొ బిత్తరె ఆత్మసంబందమైలాలింకె కేసన్నా, సాకిరి తప్పునాకొరుకుంటా బొల్లమనుసు సంగరె సే మనమకు బొల్లబట్టుకు దన్నెమాసి. తొమ్మంకా సడకు నాలొంగుకుంటా తాసొ.

2 జొనురొ బారముకు జోనె బరించిగిండి. సాకిరి కొరికిరి క్రీస్తు నియమముకు పూర్తిగా నెరవేర్పొండి.

3 కేసన్నా కిచ్చినీకుంటాతైకిరి తాకు సెయ్యాక గొప్పిటబులికిరి బచ్చిగిన్నే, తాకు సెయ్యాక మోసం కొరిగిల్లీసి.

4 ప్రతీ మనమ సెయ్యె కొరితల్లా పైటికి పరీక్సింకిరి దిగ్గిమ్మాసి; సెత్తెలె పొదరెలింకె వినయంరెనీకిరి తావల్లరాక తాకు అతిసయం కలుగుసి.

5 ప్రతీ మనమ తా గొబిరి సెయ్యాక బరించిగిమ్మాసినినా?

6 వాక్కు ఉపదేసము పొందిలా మనమ ఉపదేసింకిలాటకు బొల్లపదార్థాలుబిత్తరల్లా బాగం దిమ్మాసి.

7 మోసమైతెనా, పురువుకు ఎక్కిరించినారొ; మనమ కే విత్తొనె జల్లినే సే పచ్చాక కట్టుసి.

8 క్యాకిరిబుల్నే తా దేరొయిన్లప్రకారంగా విత్తొనె జల్లిలాట తా దేదీకిరి నాసనం బుల్లా పచ్చకు కట్టుసి, ఆత్మద్వారా విత్తొనె జల్లిలాట ఆత్మద్వారా నిత్యజీవం దిల్లా పచ్చకు కట్టుసి.

9 అమె మేలు కొరిలాటబిత్తరె నా యిసిగ్గీకుంటా రొమ్మండి. అమె నాఅలిసిజీకుంటా మేలు కొర్నే, తగిల కలై పచ్చ కట్టుంచొ.

10 ఈనె అముకు కలొ మిల్లాబెల్లల్లా సొబ్బిలింకా, మరీ ముక్కంగా సంగమురొ విస్వాసునెకు మేలు కొరిమండి.

ఆకరు డొరొ కొయివురొ సుబాలు

11 మో సొంత అత్తొనె సంగరె తొముకు కెత్తొ బొట్టక్కరాలు సంగరె రాసిలించొ దిగొండి.

12 దే వినయంరె బొల్లె దిగదమ్మాసిబులికిరి కొరిగిల్లాలింకె కేసెవొ, తంకె క్రీస్తు సిలువ వినయంరె హింస నాపొడుకుంటా రొయితందుకాక సున్నతి పొందిమాసిబులికిరి తొముకు బలవంతం కొరిలీసె.

13 ఈనె తంకె సున్నతి పొందిలాలింకె ఈసన్నా దర్మసాస్త్రముకు పాటింకినింతె; తంకె తొ దే వినయంరె గొప్పానె కొయిగినితె కోసం తొమె సున్నతి పొందిమాసిబులి కొరిలీసె.

14 ఈనె అం ప్రబువైల యేసుక్రీస్తు సిలువ వల్లరె తప్ప మరీ కేటగురించి అతిసయించువురొ మెత్తె దూరుయివాసి; సడవల్లరె మెత్తె లొకొ, లొకొకు మియ్యి సిలువ పొగ్గించొ.

15 నువస్తుస్తి పొందువుర్రాకగని సున్నతి పొందువురై నాపొందువురై కిచ్చినీ.

16 యే పద్దతి చొప్పురె చలిలాలింకల్లా బుల్నే పురువురొ ప్రజానెకు సొంతి క్రుప కలిగిమాసి.

17 మీ యేసురొ గుర్తునె మో దేరె పిందిగించి గనక ఎట్టెతికిరి కేసె యీనెనూ మెత్తె హింసింకితేనాండి.

18 అన్నబయినె అప్పబొయినె, అం ప్రబువైలా యేసుక్రీస్తు క్రుప తొ సంగరల్లా తమ్మాసి. ఆమేను.

పౌలు ఎపెసీయులుకు రాసిన పత్రిక పౌలు ఎపెసీయులుకు రాసిన పత్రిక అగరో కొత్త

ఎపెస్సి పత్రిక కొలస్సి పత్రిక వనాక క్రీస్తు జొర్రైలా తరవాత 60 వ బొచ్చురై రాసిసె యే లేక రాసిలింకె 1:1 వ వచనం ప్రకారము అపొస్తులు యాలా పౌలు పరిచయం కొరిగిసి యే పత్రికరై కొలస్సి పత్రిక వనాక తా సొంతమైల సుబవచనాలు నీనె యడ పౌలు దీకిరి రాసిబొడిసి బులి బడె మంది పండితులు కొయిలీసె యే కారనం వలరై సె చుట్టు పక్కరై రొల్లా ప్రాంతంరై సెట్టై రొల్ల బడె సంగాలుకు పొడిదివురై యాసి యే లేక పౌలు చెరసాలరై రొల్లాబెల్లై రాసికిరి అచ్చి. 3:14:16:20 వచనాలు తెలియపరిచిలీసె తుకికు ఎపెసు సంగముకు జెల్లాబెల్లై పౌలు తా ద్వార యే లేక పొడిదీసి 6:21-22.

ఆసియరై రొమీయులు రాజదాని పట్నంరై ఎపెసు గుటె పట్నం ఎ ఎపెస్సు పట్నం గ్రీకులురై దేవత యాలా అర్థమిదేవి గుడికి కెత్తో నా గలిగిలాట అపొస్తులు అపో 19:23-31ఎ ఎపెసు సంగము అగరై బడె బలంగా రొవురై యాకిరి అచ్చి ఉంచినె బడె బలహీనత యాజీకిరి అయిసి. ప్రకటన 2:1-7.

యే లేకరై పౌలు యేసు క్రీస్తు దీకిరి తా ప్రజానె పాపోనె కృమించికిరి రక్సించిగీకిరి క్యాకిరి ఏర్పర్చిగిచ్చో నకం బాగం వివరించికిరి అచ్చి యే లేకరై క్రీస్తు ముండొగా సంగము దే గా ఇంకా గొరొకు ముక్కమైల పొతోరై పన పొల్చికిరి కొయివురై ఈసి యే లేక తరవాత బాగంరై క్రైస్తువులు జీవించిల విదానం గురించి సూచనలు దివురై యాసి.

సంగతీనె

1. పౌలు ఎపెసు సంగముకు సుబం బులి కొయికిరి పరిచయం కొరిగిసి 1:1-2
2. పౌలు ఆండ్రై సంగము ఇంక క్రీస్తు ఇంక సంగం మొజిరై సంబంధం గురించి వివరించివురై 1:3-3:21
3. ఎట్టై పౌలు క్రైస్తువులురై జీవన విదానం గురించి రాసిసి 4:1-6:20
4. ఆకరుగా పౌలు కుండె సూచనలు కొయికుంట ముగించివురై 6:21-24

1 పురువురై యిస్టముచొప్పురై క్రీస్తుయేసురై అపొస్తులుడైలా పౌలు ఎపెసురై రొల్లా పురువురై ప్రజానెకు క్రీస్తుయేసురై విస్వాసం రొల్లాలింకు సుబం కొయికిరి రాసిలాట.

2 అం బోయాలా పురువుతీకిరి ప్రబువైలా యేసుక్రీస్తు తీకిరి తొముకు క్రుపా, సమాదానము కలిగివాసిబులి.

క్రీస్తురై ఆత్మీయ ఆసీర్వాదాలు

3 అం ప్రబువైలా యేసుక్రీస్తురై బోయాలా పురువు స్తుతింపబొడిమాసి. సెయ్యె క్రీస్తురై పరలోక విసయానెరై ఆత్మసంబంధమైలా సొబ్బి ఆసీర్వాదానె అముకు అనుగ్రహించిసి.

4 అమె తా అగరై పవిత్రంగా, దోసం నీకుంటా రొమ్మాసిబులి జగత్తుకు పునాది నాపోగిలా అగుంతాక, సెయ్యె ప్రేమసంగరై క్రీస్తురై అముకు ఏర్పాటు కొరిగిచ్చి.

5 తా యిస్టప్రకారమైలా దయాసంకల్పము చొపురై, యేసుక్రీస్తు ద్వారా తాకు పిల్లానె యాకిరి రొయితందుకాక, అముకు అగుంతాక తా కోసం నిర్ణయించిగీకిరి,

6 సడుకాక తా ప్రియమైలా పో ద్వారా సెయ్యె సుచ్చరాక అముకు అనుగ్రహించిలా తా క్రుప మహిమకు కీర్తి చెల్లించిమాసి.

7 పురువురై మహా క్రుప వల్లరాక, తా ప్రియమైలా పో యేసు రొగొతో *ద్వారా అముకు విడుదల, పాపకృమాపన కలిగిసి.

8 అముకు సంపూర్ణమైలా జ్ఞానవివేకము కలిగితె సేక్రుపకు అమంపరై విస్తరించిసి.

9 కలొ సంపూర్ణయిజెల్లాబెల్లై ఈవలిసిలా ఏర్పాటు వల్లరై, పురువు తా దయాసంకల్పము చొపురై తా చిత్తము గురించి సుచ్చిదిల్లా ఉద్దేశము అముకు తెలియపర్చిసి.

10 యే సంకల్పమువల్లరాక పురువు పరలోకంరై తల్లాంచ ఈనన్నా, బూమంపరై తల్లాంచ ఈనన్నా, సొబ్బిటికు క్రీస్తురై సమకూర్చిమాసిబులి సెయ్యె తాబిత్రరై ముండొగా నిర్ణయించిగిచ్చి.

11 పురువు తాకు ఇస్టమైలా నిబంధన దీకిరి అముకు బచ్చిగీకిరి, వారసునెగా కొరిసి. సెయ్యె తా ఇస్టం చొప్పురై సొబ్బిపైటికొరిలీసి.

* 1:7 రొగొతో బలి యాగం

12 ఈనె క్రీస్తుకు అగుంతా నమ్మిలా అం ద్వారా పురువురో మహిమకు గొప్ప కలిగిమాసి.

13 తొమ్మంకా సత్యవాక్కుకు బుల్మే రక్సన నువార్త సునికిరి, క్రీస్తురె నమ్మకం రొగ్గిచ్చొ. నడుకాక పురువు దిల్లా కొతా వల్లరె పరిసుద్దత్మసంగరె తొమంపరె ముద్రించబొడిసి.

14 పురువురో మహిమకు కీర్తి కలిగిమాసిబులి సెయ్యె సంపాదించిగిల్లా మనమానుకు విడుదల కలిగిలాదాకా ఆత్మ అం వారసత్వముకు హామీగా అచ్చి.

పాలురో ప్రార్థన

15 యే కారనం చొపురె ప్రబువైలా యేసురె తొ విస్వాసం గురించి పురువురో ప్రజానె గురించి తొమె దిగిపించిలా ప్రేమ గురించి మియ్యి సునిలాబెల్లెతీకిరి

16 తొ విసయమురె నామానుకుంటా మో ప్రార్థనలై పురువుకు క్రుతజ్ఞత చెల్లించిలించి.

17 ఈనె అం ప్రబువైలా యేసుక్రీస్తు పురువు, మహిమ గల్లా బో, తా జ్ఞాన ప్రత్యక్షతలుగల్లా మనుసుకు ఆత్మ తొముకు దిమ్మాసిబులి ప్రార్థించిలించి.

18 తొ మనోనేత్రాలూనె వెలిక్కిరి, అం డక్క గురించి నిరీక్సన కెటువంటిటవో, తా ప్రజానెరె తా మహిమగల్లా వారసత్వం కెత్తె ఐస్వర్యమో తొమె గ్రహించిమాసిబులి మో ప్రార్థన.

19 ఈనె విస్వసించిల అంబిత్తరె పైటికొరిల గొప్ప సక్తి యెడాక సడ గొప్ప సక్తి అంబిత్తరె పైటికొరిలీసి,

20 సే సక్తి వలరాక క్రీస్తుకు మొర్నొదీకిరి ఉటిదీకిరి ఇంకా పరలోకంరె తా బత్తొకైలాడుకు బొసరదీగిచ్చి.

21 క్రీస్తురో సొబ్బిఅదిపత్యం, అదికారం, ప్రబావం, ప్రబుత్వంకన్నా యే యుగంరె గానీ, అయితల్లా యుగంరె గానీ నాతల్లా సొబ్బినానెకన్నా బడె గొప్పగా తాకు హెచ్చించిసి.

22 తర్వాతరె పురువు సొబ్బిటుకు క్రీస్తు గొడ్డొనె తొల్లె రొక్కిరి, సంగముబిత్తరె సొబ్బిటంపరె తాకు ముండొగా నియమించిసి.

23 యే సంగం తా దే, సొబ్బిటికు సొబ్బివిదాలుగా పూరదీతల్లా పురువు పరిపూర్ణతైకిరచ్చి.

2

మొర్నొ తీకిరి జీకకు

1 అగరె తొమె అతిక్రమాలై పాపాలై ఆత్మీయతరె మొరిజీకిరి తల్లాపని అచ్చొ

2 సెల్లె పూర్వకలొరె తొమె యే లొకొ పద్దతీనుకు వాయుమండలసంబందమైలా అదిపతికి, బుల్మే అవిదేయతరె పైటికొరితల్లా ఆత్మకు అనుసరించికిరి చలిగిచ్చొ.

3 సొత్తాక అగరె అమల్లా యే అవిస్వాసిసె సంగరాక అమె దేరో దుస్త్వస్వభావం అనుసరించికిరి జింఛొ. దేకు మనుసుకు నచ్చిలాపనికిరి కొరుకుంటా, పొదర్లింకెపనికిరి స్వభావసిద్ధంగా పురువురో రగ్గొకు కారకునెగా అచ్చొ.

4 ఈనె పురువురో మహాకరున ఇంకా గొప్ప ప్రేమ తవ్వరో వల్లరె,

5 అమె అం అతిక్రమానె సంగరె ఆత్మీయంగా మొరికిరితల్లాబెల్లె, పురువురో క్రుపసంగరాక తొముకు రక్సన దీకిరి క్రీస్తుద్వారా అముకు జీపించిసి.

6 పురువు క్రీస్తుయేసురె అమె ఏకమైపురో వల్లరె అముకు తాసంగరంకా ఉటిదీకిరి, పరలోకంరె తాసంగరెపాటు సింహాసనం ఉంపరె బొసరదీగిచ్చి.

7 అయితల్లా యుగాలై క్రీస్తు యేసురె పురువు కొరిలా ఉపకారం ద్వారా అత్యదికమైలా తా క్రుపాసముద్ది అముకు దిగదీతే సెయ్యె యాకిరి కొరిసి.

8 తొమె విస్వాసం ద్వారా క్రుపసంగరాక రక్సన పొందిగిచ్చొ. యెడ తొము వల్లరె కలిగిలాటని, పురువాక బహుమానంగా దీసి.

9 సడ అం పైటిసె వల్లరె కలిగిలాటని గనక కేసే గొప్పానె కొయిగిన్నాసి.

10 అముకు పురువురో స్తుస్తిగా, పురువు అగరాక సిద్ధపరిచిలా బొల్లపైటిసె కొరితె కోసమాక అముకు క్రీస్తు యేసురె స్తుస్తిచిసి.

క్రీస్తురె ఏకమైపురో

11 ఈనె పూర్వం తొమె దేకుఅనుసరించిలా పొదరెలింకెనె. “దేద్వారా మనమానె అత్తరె సున్నతి పొందిలా యూదునె” తొముకు “సున్నతి నీలాలింకె” బులి డక్కితవ్వె బులి గుర్తించిగీండి.

- 12 సే కలొరె తొమె క్రీస్తుకు ఏరుగా అచ్చొ. ఇస్రాయేలురె పొరసత్వం నీలాలింకెపనికిరి వాగ్దాన నిబందనానెకు పొదర్లింకెపనికిరి, నిరీక్సన నీలాలింకెపనికిరి, లొకొరె పురువు నీలాలింకెపనికిరి అచ్చొ.
- 13 ఈనెను అగరె పురువుకు దూరుగా తల్లా తొమె ఉంచినె క్రీస్తు యేసురె క్రీస్తు రొగుతో ద్వారా పురువుకు పక్కరైసా.
- 14 సెయ్యోక అముకు సాంతి. సెయ్యో యూదునెకు యూదునెనీలాలింకు ఏకం కొరిసి. అం దీలింకు మొజిరె విరోదంబుల్లా అడ్డు గోడకు తా దే ద్వారా కూలమరిసి.
- 15 యాకిరి సే ఉబయులు తీకిరి గుట నో ప్రజకు స్తుస్థించితే విదులూనె, ఆజ్ఞానె తల్లా దర్మసాస్త్రముకు రద్దు కొరిసి.
- 16 తంకెబిత్తరె రొల్లా ద్వేసముకు క్రీస్తుసిలువ మొర్నొ ద్వారా సత్తుత్వముకు కడిపీకిరి, అంకు బయులుకు పురువు సంగరె ఏకం కొరికిరి మిసితె సాంతి కొరిమాసిబులి యాకిరి కొరిసి.
- 17 సడకాక యేసు అయికిరి పొదరెలింకెగా రొల్లా తొముకు పక్కరెగా రొల్లా తంకు సమాదాన సువార్త ప్రకటించిసి.
- 18 యేసు ద్వారాక తొమె అమ్మె గుట్టాత్మ ద్వారాక బోపక్కు చేరిగీపారొ.
- 19 ఈనె పొదర్లింకెలా తొమె ఉంచినె తీకిరి పొదర్లింకె పొదరొదెసాలింకెనింతొ. పురువురొ మనమానె సమానమైలా పొరులునె, పురువురొ కుటుంబం మనమానె.
- 20 క్రీస్తు యేసాక ముక్కయైలా మూలపొత్తొగా రొయికిరి అపోస్తులునె ప్రవక్తానె పొగిలా పునాదంపరె బందికరచ్చొ.
- 21 తా వల్లరాక తా కుటుంబం బుల్లా బంద బొల్లే అమిర్చికిరి, ప్రబువు కోసం పవిత్రమైలా దేవాలయంగా రూపొందుకుంటా అచ్చొ.
- 22 తాబిత్తరె తొమ్మంకా ఆత్మరె పురువుకు నివాసంగా రొయితె ఏకమైలీసా.

3

యూదునె నీలాలింకె కోసమాక పొలురొ పైటి

- 1 యే కారనం వల్లరాక యూదునెనీలాలింకె తొముగురించి క్రీస్తు యేసురో కైదీయైలా పొలు బుల్లా మియ్యి ప్రార్థించిలించి.
- 2 తొముకోసం మెత్తె అనుగ్రహించిలా పురువురొ క్రుపవినయమైలా తొ కోసం ప్రత్యేకమైలా బాద్యత దీసిబులి తొమె సునికిరి అచ్చొ.
- 3 పురువు నుచ్చిదిల్లా తా ప్రనాలిక మెత్తె తెలియపర్చిసి. అడ గురించి తొముకంకా తెలిసిలా సంగతి స్పష్టంగా రాసించి.
- 4 మీ రాసిలాంచకు తొమె చదివినె క్రీస్తు గురించి నుచ్చిదిల్లా సంగతీనె అర్థం కొరిగిపారొ.
- 5 యే నుచ్చిదిల్లా ప్రనాలిక ఉంచినె ఆత్మ ద్వారా పురువురొ పవిత్రమైలా అపోస్తులింకు ప్రవక్తానెకు వెల్లడికొరిలాపనికిరి పూర్వదినోనెరో మనమానుకు బయలుపర్చిలాని.
- 6 యే నుచ్చిదిల్లా ప్రనాలిక కిడబుల్నే, సువార్త ద్వారా అన్యజనులంకా యూదునె సంగరె క్రీస్తు యేసురె సమానమైలా వారసులూనె, గుట్టె దేబిత్తరొ బాగాలునె, వాగ్దానంరె పాలిబాగస్తునె ఈకిరి అచ్చె బుల్లాటాక.
- 7 మియ్యి సే సువార్తకు పైటిమనవైంంచి. పురువురొ సక్తిసంగరె తా క్రుప వల్లరాక యెడ సాద్యమైసి.
- 8 పురువురొ మనమానె సొబ్బిలింకెబిత్తరె అత్యల్పుడైలా మెత్తె అమె ఊహించినార్లా క్రీస్తు ఐస్వర్యముకు యూదునెనీలాలింకె సువార్త ప్రకటంచితె అవకాసం దీసి.
- 9 సొబ్బిటికి స్తుస్థికరైలా పురువురె అనాది తీకిరి నుచ్చుకిరి తల్లా సే నుచ్చిదిల్లా ప్రనాలికకు సొబ్బిలింకు వెల్లడి కొరితె పురువు సే క్రుపకు మెత్తె అనుగ్రహించిసి.
- 10 తా నుచ్చిదిల్లా ప్రనాలికరొ జ్ఞానం సంగము ద్వారా వాయుమండలమురొ ప్రదానులునె అదికారినె తెలిసిగిమ్మాసిబులి పురువురొ ఉద్దేసం.
- 11 సడ అం ప్రబువైలా క్రీస్తుయేసురె పురువు కొరిలా తా నిత్యమైలా ప్రనాలిక.
- 12 క్రీస్తుంపరె అముకురొల్లా విస్వాసం వల్లరాక తాదీకిరి అముకు ధైర్యం, పురువురొ సన్నిదికు ప్రవేసించితె స్వేచ్చు కలిగిసి.
- 13 సడవల్లరె తొముకోసం మెత్తె కలిగిలా హింసానె దిక్కిరి తొమె అధైర్యపొడితెనాండి. యెడానె తొముకు పైటికైతె కారనాలుగా తాసి.

క్రీస్తురొ ప్రేమ

- 14 యే కారనం వల్లరె బో అగరె మీ మోకాల్లు పొక్కిరి ప్రార్థించిలించి.

15 కైంకిబుల్నే పరలోకం, బూమంపరె తల్లా ప్రతీ కుటుంబం తా నారాక అంగీకరించబొడిలీసి.

16 పురువు తా బిత్తరె రొల్లా తా ఆత్మ ద్వారా తా గొప్ప మహిమకు తొముకు దీకిరి సక్తిసంగరె తొముకు బలపర్చుబులి మగిలించి.

17 ఈనె క్రీస్తు తొ హుదయాలై విస్వాసం ద్వారా నివసించిమాసి. తొమె తా ప్రేమరె సెరోనె సొచ్చికిరి స్థిరంగా రొమ్మాసి యెడాక మో ప్రార్థన.

18 సడవలరె పురువురొ మనమానె సొబ్బిలింకుసంగరె మిసికిరి క్రీస్తుప్రేమరె మొంచు, వెడల్పు, లోతు, ఎత్తు బడే పూర్తిగా గ్రహించిమాసి బులి,

19 జ్ఞానముకు మించిలా క్రీస్తు ప్రేమకు తెలిసిగిత్తే తగిలా సక్తి పొందివాసిబులి ఇంకా పురువురొ పోలికకు అయిమాసి బులి మో ప్రార్థన.

20 అం బిత్తరె పైటికొరిలా తా సక్తి ప్రకారం అమె మగిలాటకన్నా, ఊహించిలాటకన్నా బడే బూతు కొరిపారిలా సక్తి గలిగిలా,

21 పురువుకు, సంగమురె క్రీస్తు యేసురె తరతరమునెకు నిత్యము మహిమ కలిగిమాసి. ఆమేను.

4

సంగమురొ ఐక్యత

1 ఈనె ప్రబువు కోసం కైదీయైలా మియ్యి తొముకు బతిమాలిగిల్లాట కిడబుల్నే పురువు తొమె డక్కిలా డక్కకు తగిలపనికిరి జీవించండి

2 ప్రేమసంగరె జోసుకు జోనె సహించిగీకుంటా సంపూర్ణ వినయం, సాత్వికం, సమాదానం కలిగికిరి రొండి,

3 సమాదానం బుల్లా బందందీకిరి ఆత్మకలిగించిలా ఐక్యతకు కాపాడిగీకుంటా స్రద్ధ కలిగికిరి సలిగిమాసి.

4 దే గుట్టాక, ఆత్మ గుట్టాక సాకిరాక పురువు తొముకు డక్కిలా డక్క గుట్టాక నిరీక్సన గుట్టాక

5 ప్రబువు జోన్నాక, విస్వాసం గుట్టాక. బాప్టీసం గుట్టాక.

6 సొబ్బిలింకు బో ఈలా పురువు జోన్నాక. సెయ్యె సొబ్బిలింకన్నా ఉంపరె తల్లాట, సొబ్బిలింకె బిత్తరె అచ్చి సొబ్బిలింకె ద్వారా పైటి కొరిపించిలీసి.

7 ఈనె క్రీస్తు అనుగ్రహించిలా క్రుప నప్పకు దరికిరి అం బిత్తరె సొబ్బిలింకూ వరం దీసి.

8 యెడ గురించాక
సెయ్యె ఆరోహనమైలాబెల్లె

బందీనుకు చెరబిత్తురుకు కొడిబాజేసిబులి

తా మనమానుకు బహుమానాలు దీసిబులి లేకనంరె కొయికిరి అచ్చి.

9 “ఆరోహనమైజేసి” బుల్లా కొతకు అగరె సెయ్యె బూమి తొల్లుకు వొల్లిసి బులికిరంకా అర్థం దిల్లీసి.

10 సాకిరి వొల్లిలాటాక సెయ్యెక సొబ్బిటుకు వ్యాపించికిరి, మెగోనె మహా మెగొనల్లా దాటికిరి, బడే ఉంపురుకు ఎక్కికిరి అచ్చి.

11 సెయ్యె వరమానె దీకిరి కుండెలింకు అపోస్తునెగా, కుండెలింకు ప్రవక్తానెగా, కుండెలింకు సువార్తకులుగా, యింకుండెలింకు జోగులోనెగా, బోదకులుగా నియమించిసి.

12 సడద్వారా విస్వాసునెకు సేవా కార్యమునెకు సిద్ధం కొరిమాసిబులి క్రీస్తు దేరె క్షేమాబివుద్ది కలిగిమాసిబులి సెయ్యె యాకిరి కొరిసి.

13 ఇంకా అమల్లా విస్వాసంరె, పురువురొ పో గురించైలా జ్ఞానంరె గుట్టాకబావం కలిక్కిరి రొమ్మాసిబులి క్రీస్తు కలిక్కిరి రొల్లా పరిపూర్ణ పరిసతికి సమానమైలా వుద్ది చెందిమాసి.

14 సెత్తె అమె పసిపిల్లానె పనికిరి నీకుంటా మనమానె కపటం సంగరె, కుయుక్తి సంగరె తప్పు బట్టోకు జింకిమాసిబులి కల్పించిగిల్లా సొబ్బిరకాల బోదానె బుల్లా కదిలితల్లా అలానె, బా మణ్ణోనుకు పిట్టిగీకిరి నాబాజికుంటా రొమ్మా.

15 సడకు బదులుగా ప్రేమ సంగరె సత్యమాక కొయికుంటా సొబ్బి వినయాలై అముకు సిరస్సు యాకిరి తల్లా క్రీస్తు పనికిరి బొడుమా.

16 సెయ్యెక. తా దీకిరి సంగం బుల్లా దే బొల్లె అమిర్చికిరి, తాండ్రెతీకిరి ప్రతీ బాగాలూనె కీల్లు సంగరె మిసికిరి రొయికిరి, సడ తా సక్తికొద్ది పైటి కొరిలాబెల్లె ప్రేమరె సడకు క్షేమాబివుద్ది కలిగిలాపనికిరి అబివుద్ది చెందుసి.

క్రీస్తురె నో జీక

17 ఈనె తొమె ఎట్టెతీకిరి యూదునెనీలాలింకె సలిగిల్లాపనికిరి సలినాసిబులి ప్రబువు నారె తొముకు హెచ్చరించిలింబి.

18 కైంకిబుల్నే తంకె మనుసూనె అందకారమైజీకిరి తంకె హ్రుదయం కటినమైజిల్లందరె తంకె అజ్ఞానం వల్లరె సలిగీకిరి పురువురో జీవంతీకిరి వేరైజీసె.

19 తంకె లజ్జోనీకుంటా అత్యాస సంగరె బడేరకానెగా అపవిత్రమైలా పైటీనె కొరితె కోసం తంకె తంకాక కామవికారాలుకు బప్పకొయిగిల్లీసె.

20 ఈనె తొమె క్రీస్తు గురించి సుగ్గిల్లాట యెడనీ.

21 యేసురె సత్యం గురించి తల్లాట తల్లా పనికిరాక తొమె ఉపదేశం పొందిసా.

22 ఈనె తొమె అగరె జీవితముకు సంబందించిలాట, మోసకరమైలా దురాసవలరె చెడిజీకిరితల్లా తొ పుర్నస్వభావముకు సడదేండి.

23 తొం అంతరంగంరొ మనుసూనె నో ఈకిరి ఈవాసి.

24 నీతిరె యదార్లమైలా పవిత్రత కలిక్కిరి పురువు పొలికగా కొరిలా నో స్వభావంకు పిందిగివాసి.

25 అమె క్రీస్తు దేరె జొనుకు జొనె అవయవానె పనాలికె. గనక తొమె సారొకొతానె మానికిరి తొం సంగరొ మనమదీకిరి సత్యమాక కొయిమాసి.

26 రగో పొడువొచ్చు గని సడ పాపముకు బట్టొకడినాసి. తొం రగో బెల్లొ గుమ్మిలాదాకా రొన్నాసి.

27 అపవాదికు చోటు దీతేనాండి

28 చొరొపైటి కొరితల్లాట సడకు సడదిమ్మాసి. తా అత్తొనె సంగరె కొస్తొపొడికిరి పైటికొరికిరి అవసరం రొల్లాలింకు సాయం కొరిమాసి.

29 తొం తుండొతీకిరి చెడుకొతానె అయినాసి. సునిలాలింకు పైటికైలాపనికిరి తంకు అబివుద్ది కలిగిలా కొతానాక కోండి.

30 పురువురో పవిత్రాత్మకు దుక్కపరిస్సేనా. కైంకిబుల్నే తా నిచ్చయతముద్ద తొం విమోచన దినో దాకా తొమంపరె రొసి.

31 సమస్తమైలా దుష్టత్వం ద్వేసం, రగో, రొద్దం, అల్లరి, దూసన బుల్లా సడానల్లా సడదేండి.

32 సడకు బదులుగా హ్రుదయంరె కరున కలిక్కిరి జొనంపరె జొనె దయ దిగదేండి. పురువు తొముకు క్యాకిరి క్రీస్తురె కృమించిసా సాకిరాక తొమ్మంకా పొదర్లింకు కృమించిమాసి.

5

హల్లొరె జీవురో

1 ఈనె తొమె పురువురో ప్రియమైలా పిల్లానెపనికిరి తాకు పొలికిరి సలిగీండి

2 క్రీస్తు అముకు ప్రేమించికిరి అముకోసం పురువుకు ఇష్టమైల పరిమలమైలా అర్చనగా, తాకు సెయ్యాక బలిగా అప్పకొయిగిచ్చి. సడపనా ప్రేమకాక తొమ్మంకా కలిక్కిరి రొండి.

3 తొం బిత్తరె దర్మిపైటి, అపవిత్రత, పిసినారితనం, యెడనల్లా తన్నాసి. కనీసం తొమె సే నానెనన్నా టెక్కినాసి. యెడాక పురువురో మనమానెకు తగిలా ప్రవర్తన.

4 క్రుతజ్ఞత కొతానాక తొం తుండొ సంగరె అయిమాసి గని, అసబ్యమైలా కొతానె, మూర్ఖమైలా కొతానె, దీట అర్థాలు అయిలా కొతానె తొమె పలికినాసి. యెడానె తొముకు తగినింతె.

5 తొముకు తెలుసు దర్మిపైటిలింకు అపవిత్రమైలాలింకు, విగ్రహరదికులులింకు, అత్యాస కలిగిలాలింకు క్రీస్తుకు, పురువుకు చెందిలా దెసాకు అర్హత నీ.

6 నాపైటికైలా కొతానె కొయిలాలింకు వల్లరె పొడైజీతేనాండి. సడపనాంచ వల్లరె కొతా నాసున్నాలింకంపరకు పురువురో ఉగ్రత ఆసి.

7 సడకాక తంకు దూరుగా రొండి.

8 అడకగరె కలొరె తొమె వొందారైకిరి అచ్చొ. ఈనె ఉంచినె ప్రబువురె హల్లొ యికిరచ్చొ. హల్లొకు సంబందించిలాలికె పనికిరి సలిగీండి.

9 కైంకిబుల్నే హల్లొరొ పలం సాబ్బిరకాలుగా బొల్లతనం, న్యాయం, సత్యం దిగదెల్లీసి.

10 ఈనె ప్రబువుకు కిడ ఇష్టమో సడ ద్వారాగా సలిగీండి.

11 నాపైటికైలా వొందారొ పైటీనెరె నారొయికుంటా సడానుకు బదులుగా హల్లొరొ దన్నెయిండి.

12 కైంకిబుల్నే తంకె రహస్యంగా కొరితల్లా పైటీనె గురించి కొతాలగువురో కూడా బడే అవమానం.

13 ప్రతీ పైటి హల్లొ సంగరె పొదరకు ఆసి. సాకిరి పొదరెపొడ్డా హల్లొ ప్రతీస్థలంరె సత్యరూపముకు ప్రకాసించుకుంటాక తాసి.

14 సాకిరి పొదరె పొడ్డాట ప్రతీటా హల్లాక. సడకాక,

గుమ్మితల్లా తూ ఉటూ

మొరిజెల్లాలింకబిత్తరె తీకిరి ఉటూ

క్రీస్తు తో ఉంపరె ప్రకాసించువో బులి కొయిలీసి.

15 తెలివినీలాలింకెపనికిరినీకుంటా తెలివిగా జీతె జాగర్త పొడండి.

16 కలోకు బొల్లపైటీనె కోసం వాడిగిండి. కైంకిబుల్నే దినోనె బొల్టాంచని.

17 సడకాక తొమె తెలివినీలాలింకెపనికిరి నా తైకిరి ఈనె ప్రబువు ఇన్టం కిడవో తెలిసిగిండి.

18 మొద్దొ పీకిరి మత్తులైజితేనాండి. సడ నాసనం కొరుసి. ఈనె సడకు బదులుగా ఆత్మనంగరె పూరికిరి తాండి.

19 గిత్తోనెసంగరె సంగితం సంగరె ఆత్మ సంబందమైలా గిత్తోనెసంగరె జోనుకు జోనె బలపర్చిగికుంటా, ప్రబువు గురించి తొమె మనుసూనై గైకుంటా కీర్తించండి.

20 అం ప్రబువైలా యేసుక్రీస్తు నారె సొబ్బిటి గురించి బో ఈలా పురువుకు సొబ్బికల్లై క్రుతజ్ఞతాస్తుతీనె చెల్లించండి.

నైపోనె ఇంకా గొయితానె

21 క్రీస్తు ఉంపరె తల్లా బక్తి సంగరె జోనుకు జోనె లోబొడికిరి తాండి.

22 తిల్లాలింకె ప్రబువుకు లోబొడికిరి తల్లాపనికిరాక తంకు గొయితానుకు లోబొడిమాసి.

23 క్రీస్తు సంగముకు కేవిదంగా ముండొ యీకిరి అచ్చో సాకిరాక గొయిత తా నైపోకు ముండొ యీకిరి అచ్చి. తాకు సెయ్యాక సంగంకు రక్కకుడుగా అచ్చి.

24 సంగం క్రీస్తుకు లోబొడిలా పనికిరాక నైపోనె కూడా సొబ్బి వినయాలై తంగొయితానుకు లోబొడిమాసి.

25 గొయితానె, తొమ్మంకా సంగముకు క్రీస్తు ప్రేమించికిరి పొర్నొ దిల్లాపనాక తొ నైపోనుకు ప్రేమించిమాసి.

26 యీకిరి కొరికిరి సంగముకు వాక్యంబుల్లా పనిసంగరె దొయికిరి, పవిత్రం కొరిసి,

27 సడకు కలంకమైనా, ముడతలన్నా, సడానె పనాంచ కిచ్చీ నీకుంటా పవిత్రంగా నిర్దోసంగా మహిమైలా పనికిరి తా అగరె తారదీగిచ్చి.

28 సాకిరాక వొండ్రపోనె కూడా తంక సొంత దేనె పనికిరాక తంక నైపోనుకు ప్రేమించివలిసిలా బాద్యత అచ్చి. తా నైపుకు ప్రేమించిలాట తాకు ప్రేమించిగిల్లాపనికిరాక.

29 కేసీ తా దేకు ద్వేసింకిగిన్నీ, క్రీస్తు సంగముకు పోసింకికిరి సంరక్కించిగిల్లా విదంగా తంకె దే కు దిగుసు.

30 సడకాక అం అల్లా క్రీస్తు దేకు బాగాలైకిరి అచ్చి.

31 “లేకనానెరె కొయిలాపన యెడవల్లరాక వొండ్రపో తా బోకు మాకు సడికిరి తా నైపుకు హత్తుగునుసి, తంకెదీలింకె గుట్టె దే ఊసె.”

32 యే లోతైలా సత్యం అర్థం కొరిగించి. ఈనె మియ్యి క్రీస్తు గురించి సంగం గురించి కొయిలించి.

33 ఈనె తొ బిత్తరె ప్రతీ గొయిత తాకు సెయ్యె కెత్తె ప్రేమించిగిల్లీసో తా నైపోకంకా సాకిరాక ప్రేమించిమాసి. సాకిరాక నైపో తా గొయితకు గొరవించిమాసి.

6

పిల్లానె ఇంకా మాబోనె

1 పిల్లానె, ప్రబువురె తొ మాబోనుకు లోబొడికిరి రోండి. క్రైస్తవుడుగా యెడ తొ పైటి.

2 “తొత్తె మేలు కలిగిలాపనికిరి తో బోకు మాకు గొరవించు. యెడ వాగ్గానంరె మిసికిరి రొల్లా అగరొ ఆజ్ఞ పాటించిమాసి.”

3 సడ తొత్తె బూమంపరె దీర్గాయుసుకు దివ్వొ.

4 మాబోనె, తొ పిల్లానుకు రగొ పుట్టించితెనాండి. తంకు క్రీస్తురొ క్రమసిక్సనరె, బోదరె పుసాండి.

దాసీనె ఇంకా యజమానినె

5 సేవకులింకె, డొరొసంగరె వనుకు సంగరె, క్రీస్తుకు లోబొడిలాపనికిరి, యే లొకొరె తొ యజమానునెకు హుదయపూర్వకంగా లోబొడికిరి రోండి.

6 మనమానుకు సంతోసం పరిచిలా పనికిరి తంకె పొదర్లింకు దిగిదిల్లపని నీకుంట క్రీస్తు దాసునె బులి తెలిసిగీకిరి పురువుకు కెడ ఇస్టమె సడ కొరండి,

7 ప్రబువుకు కొరిలాపనికిరాక యిష్టపూర్వకంగా కొరండి.

8 దాసుడైనన్నా, స్వతంత్రుడైనన్నా, తొ బిత్తరె ప్రతీ మనమ సెయ్యె కొరిలా బొల్ల పైటికు ప్రబువు వల్లరె ప్రతిపలం పొందిగివొబులి తొముకు తెలుసు.

9 యజమానునే, తొమ్మంకా తొ దాసునె గురించి సాకిరాక ప్రవర్తించొండి. తొముకు తొ దాసునుకు జొన్నాక యజమాని పరలోకంరె అచ్చిబులి, సెయ్యె పక్కపాతం నీలాటబులి గ్రహించికిరి, తంకు బెదిరించివురో మానిగొండి.

పురువు పక్కరె తల్లా సొబ్బి ఆయుదాలు

10 చివరకు, ప్రబువురో మహాసక్తి ద్వారా తాబిత్తరె బలవంతులైకిరి రొండి .

11 తొమె సాతాను మాయకొతానెకు ఎదిరించితె సక్తి పొందిగిత్తందుకు పురువు దిల్లా సర్వాంగ కవచముకు పిందిగొండి.

12 కైంకిబుల్లె అం పొరాటం మనమానె సంగరె నీ. ఈనె వొందారొ సంబంధమైలా లొకొనాదూనె సంగరె, ప్రదానునె సంగరె, అదికారినె సంగరె, మెగోమండలాలై బిత్తరె దురాత్మానె సమూహానె సంగరె అమె పొరాడిలింబొ.

13 సడకాక తొమె యే ఆపదకలొరె తంకు ఎదిరించికిరి సక్తిమంతునెగా తారితె పురువు దీతల్లా సర్వాంగ కవచముకు పిందిగొండి.

14 తొం వొటకు సత్యం బుల్లా దట్టి, నీతి బుల్లా కవచం పిందిగొండి,

15 పాదమునెకు సాంతి సువార్త కోసం సిద్ధమనుసు బుల్లా చెప్పిలీనె పిందిగొండి.

16 సడసంగరె పాటు సత్తువు బిసిరిలా నియ్య బానమునెకు అడ్డిగిత్తందుకు పైటికైలా విస్వాసం బుల్లా డాలు పిందిగొండి.

17 ఈనె రక్కన బుల్లా సిరస్తానం, పురువురో వాక్కు బుల్లా ఆత్మకథం పిందిగొండి.

18 ఆత్మరె సొబ్బి కలొనె సొబ్బిరకాల ప్రార్థనానె, విజ్ఞాపనానె కొరుకుంటా రొండి. సడకోసం పూర్తి వట్టుదల సంగరె పురువురో మనమానె కోసం విజ్ఞాపనలూనె కొరుకుంటా సతనైకిరి రొండి.

19 సువార్త రహాస్యముకు దైర్యంగా కొయితె, మియ్యి కొతాలగితల్లాబెల్లె పురువు తా వాక్కుకు మెత్తె అనుగ్రహించిలా పనికిరి మో కోసమంకా ప్రార్థన కొరండి.

20 సంకెల్లు సంగరె రొల్లా మియ్యి యే సువార్త కోసం రాయబారి. మియ్యి యే సువార్తకు కెటువంటి దైర్యం సంగరె ప్రకటించిమాసో సెత్తాక దైర్యం సంగరె ప్రకటించిలపని మో కోసం ప్రార్థన కొరండి.

ఆకరు దండము

21 మో ప్రియమైలా బయి తుకికు ప్రబువురె నమ్మకమైలా సేవకుడు. తా ద్వారా మియ్యి క్యాకిరి అచ్చొ, కిడ కొరిలింబొ తొముకు తెలుసు.

22 అం సంగతీనె తొమె జనితందుకు, తొం మనునూనెకు ప్రోత్సహించితె తాకు తొం పక్క పొడదించి.

23 బో యాల పురువు, ప్రబువైలా యేసు క్రీస్తు సాంతికు విస్వాసం సంగరె దిగిపించిలా ప్రేమకు అన్నబయినె అప్పబొయినె అనుగ్రహించిమాసి గాక.

24 అం ప్రబువైలా యేసు క్రీస్తుకు నిత్యమైలాప్రేమ సంగరె ప్రేమించిలాలింకల్లా పురువు క్రుప కలిగిమాసి గాక.

పౌలు పిలిప్పీయులుకు రాసిన పత్రిక పౌలు పిలిప్పీయులుకు రాసిన పత్రిక అగరో కొత్త

ఎ పిలిప్పీ పత్రిక ఇంచుమించు క్రీస్తు జొర్రైలా 61 బొచ్చురోనె తరవాత పిలిప్పీరె రొల్ల విస్వాసులుకు రాసీలీసి పౌలు రొమా వట్టుంరె చెరసాలరె రొల్లాబెల్లె రాసికిరి అచ్చి 1:13 బులి కొయిమి ఎ ఉత్తరము పిలిప్పీ వట్టుంరె రొల్ల సంగముకు రాసిబొడిసి పిలిప్పీ గురించి అమె అపొస్తులు పుస్తకాలరె చదివించుచో ఎ పిలిప్పీ వట్టుం మాసిదొనియ దెసాకు రాజదాని వట్టుంపన అచ్చి ఎ పిలిప్పీ సంగమాక మాసిదొనియరె అగుంతా బందిల సంగం యే సంగం పౌలు సీల దీకిరి బందిపించిలబెల్లె గుటె సారి రత్తి అంకు చెరసాలరె రొయిదీసె అపొస్తులు 16 అద్యాయం.

ఎ లేక రాసిన పౌలు బడె ఉద్దేసము సంగరె రాసికిరి రొవ్వొచ్చు సెయ్యె చెరసాలరె రొల్లబెల్లె సంగమురె రొల్లలింకు పౌలు క్రుతజ్ఞత కొయివురో 4:10-19 ఇంకా చెరసాలరె రొల్లా పరిస్థితి రొవురో తిమోతి ఇంకా ఎప్రప్రదీతు సంగముకు పరిచయం కొరువురో 2:19-30 ఇంకా తంకు స్వాగతించికిరి తంకె నాయకత్వం అంగీకరించిలపన రాసికిరి అచ్చి.

సంగతీనె

1. పౌలు పిలిప్పీ సంగముకు సుబం బులి కొయికిరి లేకకు రాసిసి 1:1-2
2. పౌలు తా పరిస్థితి ఇంకా కుండె ఇబ్బంది లొగిల వినయోనె గురించి కొయివురో 1:3-2:30
3. సెయ్యె క్రైస్తవ జీవితం గురించి ఆచరించిల వినయం బడె సూచనలు దివురో 3:1-4:9
4. పౌలు పిలిప్పీ సంగం కొరిల సహాయం గురించి క్రుతజ్ఞత కొయివురో ఇంకా సుబం బులి కొయికిరి ముగించివురో 4:10-23

1 యేసుక్రీస్తుకు దాసులైలా పౌలు, తిమోతి పిలిప్పీ వట్టునంరె క్రీస్తు యేసుకు చెందిలా పరిసుద్దులు సొబ్బిలింకు సంగరొ బొడిలింకూ పరిచారకులూనెకు సుబం కొయికిరి రాసిలా సంగతులూనె.

2 అం బో ఈలా పురువు తీకిరి ప్రబువైలా యేసు క్రీస్తు తీకిరి తొముకు క్రువ, సాంతి కలిగిమాసి.

దండము ఇంకా ప్రార్థన

3 మియ్యి తొముకు కెబ్బుకూ జ్ఞాపకం దన్నెగిన్నన్నా పురువుకు క్రుతజ్ఞత కొయిగిల్లించి.

4 మీ తొ కోసం ప్రార్థించిలా ప్రతీసారి నడ ఆనందంసంగరె ప్రార్థన కొరిలింపి.

5 కైంకిబుల్నే సువార్త పైటి వినయంరె అగరె దినె తీకిరి ఉంచినె దాకా తొమె కొరిలా సహాయముకు దండము.

6 తొ బిత్తరె యే బొల్ల పైటి మొదలు కొరిలాట పురువాక. నడ యేసు క్రీస్తు బుల్లికిరి అయిల దినో వరకూ సే పైటి కొనసాగించికిరి పూర్తి కొరిపారో బులి మో గట్టి నమ్మకం.

7 తొ గురించి మీ యాకిరి బావించువురో న్యాయమాక. కైంకిబుల్నే తొమె మో మనుసురె అచ్చో. మీ కైదురె తల్లాబెల్లె, మీ సువార్త తరుపురె వాదించుకుంటా నడకు నిరూపించితల్లాబెల్లె తొమల్లా యే క్రువరె మో సంగరంకా పాలిబాగంలింకైకిరచ్చో.

8 క్రీస్తు యేసురో ప్రేమతీకిరి తొ కోసం మీ కెత్తె ఆపేక్కు కలిక్కిరచ్చో పురువాక మెత్తె సాక్కి.

9 తొ ప్రేమ జ్ఞానం సంగరె సంపూర్ణమైలా వివేచనసంగరె ఇంకా, ఇంకా వ్రుద్ది చెందికుంటా తమ్మాసిబులి మీ ప్రార్థించిలింపి.

10 సే విదంగా తొమె కెడ బొల్లో బచ్చిగిల్లబెల్లె క్రీస్తు అయిల దినోరె తొమె సొబ్బి విడుల నిర్దోసం నీలపన తప్పు నీలపన తమ్మాసి.

11 సడాకనీ పురువుకు మహిమ, స్తుతి కలిగిలాపని, తొమె యేసు క్రీస్తు ద్వారా కలిగిలా నీతి పలాలు సంగరె తొమె జీవితాలురె పరిపూర్ణముగా పూరికిరి తమ్మాసి.

క్రీస్తురె జీవురో

12 అన్యబయినె అప్పబొయినినె, మెత్తె సంబవించితల్ల సువార్త పైటి బడెవిస్తరించితాక బులి తొమె తెలిసిగిమాసి బులిగిల్లించి.

13 క్యాకిరిబుల్చే, మో బందానె క్రీస్తు కోసమాక కలిగినె బులి రొజాబవనం సొబ్బి స్థలాలురె తల్లా బతులుకు, సొబ్బిలింకు తెలుసు.

14 సెత్తాకనీ, ప్రబువు బిత్తరె రొల్లా అన్నబయినెరె అప్పబొయినెరె బడేలింకె మో బందకానె దీకిరి స్థిరమైలా విస్వాసం కలిక్కిరి, డొరొనీకుంటా పురువురో వాక్కు ప్రకటించితె బడే దైర్యం దన్నెగిచ్చె.

15 ఈనె కుండేలింకె అసూయసంగరె కలహబుద్ధిసంగరె, ప్రకటించిలీసె ఈనె కుండే మంది బొల్లుబుద్ధిసంగరె బోదించిలీసె.

16 ప్రేమసంగరె క్రీస్తుకు ప్రకటించిలాలింకు మియ్యి సువార్త తరువురె వాదించితందుకు నియమించిబొడించిబులి తంకు అరక.

17 ఈనె తల్లలింకె బందకాలె రొల్లా మెత్తె ఇంకా బడే బాద కలిగించిమాసి బులి సుద్ద మనుసుసంగరె నీకుంటా కక్కుసంగరె క్రీస్తుకు ప్రకటించిలీసె.

18 ఈనన్నా పర్వానీ. కపటం సంగరె ఈనన్నా సత్యం సంగరె ఈనన్నా, క్యాకిరైనా క్రీస్తుకు ప్రకటించువురో మాత్రం జరిగిలీసి. నడకు మియి సంతోసించిలింకి. ఇంకా అగురుకు కూడ సంతోసించిమి.

19 తొం ప్రార్థనానె వల్లరె, యేసు క్రీస్తు ఆత్మ సాయం వల్లరె మో యిడుదల కోసం యెడల్లా జరిగిలీసి బులి మెత్తె తెలుసు.

20 మియ్యి కే విసయంరైనన్నా లజ్జోపాలెనీబులి మెత్తె సంపూర్తిగా నిరీక్కున ఆసాబావం అచ్చి. ఈనె, సెత్తెలె పనికిరాక ఉంచినంకా మియ్యి జీక సంగరన్నా, మొరొవల్లరన్నా మో దే సంగరల్లా క్రీస్తుకు గనపర్చితల్లందుకు మెత్తె బడే దైర్యం అచ్చి.

21 మో మట్టుకైనే జీవురో క్రీస్తాక, ఈనె మొరువురో ఈనెనూ లబోఆక.

22 ఈనన్నా దే సంగరె జీవించుకుంట మో ప్రయాసకు పలితం తన్నే, సెత్తెలె మీ కిడ కోరిగివాసో మెత్తె తెలుసువురోనీ.

23 యే దీట మొజిరె మీ ఇరుకురె పొడిజేంచి. మీ లొకొకు సడికిరి క్రీస్తుసంగరె రొయిజిమ్మాసిబులి మో ఆస.

సొబ్బిటికన్నా సడాక మెత్తె మేలైలాట.

24 ఈనె మియ్యి దే సంగరె రొవ్వరో తొం కోసం బడే అవసరం.

25 సడ ద్వారా, తొమె విస్వాసంరె అబివుద్ది ఆనందం పొందితందుకు మీ జీకిరి తన్నే తొం సొబ్బిలింకు సంగరె మిసికిరితాంచి బులి మెత్తె తెలుసు.

26 ఈనె మియ్యి తొం పక్కు. బుల్లికిరి అయివురోవల్ల మో ద్వారా క్రీస్తు యేసురె తొమె గర్వింపితె కారనమైకిరి అచ్చి.

27 మియ్యి తొముకు దిగితె అయినన్నా, నా అయినార్నన్నా, సొబ్బిలింకె మిసికిరి సువార్త విస్వాసం ద్వారా పొరాడుకుంటా, గుట్టకబావం సంగరె టారికిరి అచ్చెబులి తొమె క్రీస్తు సువార్తకు తగిలాపనికిరి సలిగిత్తండి మియ్యి సునిలాపనికిరి యెడ బడే ముక్కము.

28 తొమె సత్తువూనెకు డొరితెనాండి. తొమె దైర్యంగా రొండి తంకు అపజయం, తొముకు రక్కున కలిగివొబులి తంకు జనిలా సూచన. యెడ పురువు వల్లరె కలిగిలా విజయమాక.

29 ఈనె తొమె క్రీస్తుకు విస్వసించిలాలింకాకనీ తా కోసం కొన్డానె అనుబవించితె, సేవించితె, అవకాసమంకా దీసి.

30 * అడకగరె మీ పొరాడిలా పొరాటంకు దిగిసా. సడగురించి సునిలించి. తొమ్మంకా సడాక పొరాటంరె పాలిబాగస్తులు యీపారొ.

2

క్రీస్తురో గొప్పతనం ఇంకా తగ్గింపు

1 ఈనె తొం జీవితాలె హెచ్చరించువురో యీనెనూ ప్రొత్సాహం ఈనన్నా, ప్రేమదీకిరి కెటువంటి ఆదరన ఈనన్నా, పురువురో ఆత్మ సంగరె కెటువంటి సహవాసం ఈనన్నా, దయ దిగిపించువురో, ఆదరించువురో ఈనన్నా తన్నే సడ క్రీస్తాక తొముకు బలపర్చిలీసి,

2 తొమల్లా గుట్టక మనుసు, గుట్టక రకమైలా ప్రేమ, ఆత్మరె ఏకత్వం, గుట్టక ఉద్దేశం కలిగితెకిరి మొ ఆనందముకు సంపూర్ణం కొరండి బులి తొం దీకిరి కొరిలించి.

3 కక్కు సంగరైనా, స్వార్థం సంగరైనా కిచ్చి కొరితెనా. విసయమైలా మనుసు సంగరె జొనుకు జొనె తొముకన్నా పొదరె గొప్పలింకెబులి బచ్చిగిత్తండి.

4 తొం బిత్తరె ప్రతీమనమ తా సొంతపైటీనాక నీకుంటా పొదర్లింకెరొ అవసరాలంకా దిగిమాసి.

* 1:30 అపో. కా 16, 19-40

- 5 క్రీస్తు యేసుకు తల్లా యే మనుసు తొమ్మంకా కలిక్కిరి తమ్మాసి.
 6 సెయ్యె పురువురొ స్వరూపం కలిగిలాట.
 పురువు సంగరె సమానంగా తైతే సడదిగిన్నాసిబులి బులిగిల్లాని.
 7 సడ బదులుగా, మనమ రూపంరె జొర్నైకిరి,
 దాసుడురొ రూపం దరించిగీకిరి తాకు సెయ్యెక సాబ్బిటికి సడదిపీసి.
 8 సెయ్యె ఆకారంరె మనమగా దిగదీకిరి మొర్నొదాక,
 బుల్నే సిలువ మొర్నొకంకా సెయ్యె విదేయత సంగరె సలికిరి తాకు సెయ్యెక లోబొడిసి.
 9 యే కారనం దీకిరి పురువు సాబ్బిటికన్నా
 సాబ్బి నానె కన్నా గొప్పగా హెచ్చించిసి.
 10 సడుకాక పరలోకంరె,
 బూమంపరె, * బూమి తొల్లె తల్లా ప్రతీ జొన్నె
 ముడుకూనె యేసు నారె వొంగిలాపనికిరి కొరిసి,
 11 ప్రతీ జొన్నె జిబ్బో బో ఈలా పురువురొ మహిమ కోసం
 యేసు క్రీస్తుకు ప్రబువుగా ఒప్పిగివ్వె.

లోకంరె బొత్తినె పనికిరి రొమ్మాసి

- 12 ఈనె మో ప్రియమైలాలింకె, తొమె కెబ్బుకూ లోబొడితల్లాపనాక, మీ తొం పక్కరె తల్లాబెల్లాకనీ, నీలాబెల్లంకా, డొరొ
 సంగరె వొనుకు సంగరె తొం సంపూర్ణమైల రక్కన కోసం కొనసాగించొండి.
 13 కైంకిబుల్నే తాకు ఇస్టమైలాట తొమె కొరితె, తొం బిత్తరె కెబ్బుకు పైటి కొరిలాట పురువాక.
 14 తొమె కొరిలాంచల్లా, నాగల్లిగికుంట, నా సొనిగికుంట కొరండి.
 15 సడవల్లరె తొమె మూర్కుల్లెలా చెడ్డ మనమానె మొజిరె దోసము నీలలింకెగా, నిందనీకుంటా, నిస్కులంకుల్లెకిరి
 పురువురొ పోనెగా జీవవాక్కుకు గట్టిగా దరిగిండి. లోకంరె తల్లాలింకె మొజిరె మెగోనొ చుక్కలు పనికిరి హల్లోగా రొమ్మాసి.
 16 తొమె సాకిరి కొరిలాబెల్లె క్రీస్తు బుల్లికిరి అయిలా దినుకు మియ్యి సుచ్చరాక కొస్తాపొడిలానీ బులికిరి మో పైటి వ్రుదా
 అయిలానీబులి మెత్తె జనుంచి. సడ వలరె గొప్పగా కొయిగిత్తె మెత్తె గుటె కారనం తాసి.
 17 ఈనె తొం విస్సాస్యాగంరె సడకు సంబందమైలా సేవరె మో పొర్నొ దారబోసినన్నా, † మీ ఆనందించికిరి తొం
 సంగరల్లా సంతోసించిమి.
 18 సాకిరాక తొమ్మంకా ఆనందించికిరి మో సంగరె సంతోసించండి.

తిమోతి ఇంకా ఎవప్రాదితు

- 19 తొం గురించి వార్త సునికిరి మెత్తె ప్రోత్సాహం కలిగిలాపనికిరి, ప్రబు చిత్తమైనె బేగా తిమోతికు తొం పక్కు
 పొడదిమ్మాసి బులిగిల్లించి.
 20 తిమోతి పనికిరి తొం గురించి పట్టించిగిల్లాట ఇంకా మో మనస్సుకు పంచిగిత్తె కేసే నింతె.
 21 సాబ్బిలింకె తంకె సొంతపైటీనాక దిగిల్లీసేగని, యేసు క్రీస్తు పైటీనె దిగిలీనింతె.
 22 తిమోతి తాకు సెయ్యెక రుజువు కొరిగిచ్చి. క్యాకిరిబుల్నే, బోకు పో క్యాకిరి సేవ కొరివొయో సాకిరాక సెయ్యె మో
 సంగరె సువార్తపైటీరె సేవ కొరిసి బులి తొముకు తెలుసు.
 23 సడుకాక మెత్తె కిడ సంబవించిలీసా తెలిసిలా వెంటరాక తాకు పొడదిమ్మాసి బులిగిల్లించి.
 24 మియ్యి బేగా ఆంచిబులి ప్రబువుద్వారా నమ్మిలించి.
 25 మో బయి, మో సంగరె జతపైటీతా, మో సంగరె సమానంగా పొరాడిలాట, తొం ప్రతినిది, మెత్తె అవసరమైలాబెల్లె
 సేవకొరిలాట యీలా ఎవప్రాదితుకు తొం పక్కు పొడదీతె అవసరం బులిగించి.
 26 సెయ్యె జబ్బు పొడిసిబులి తొమె సునిసా, గనక సెయ్యె తొముకు సాబ్బిలింకు దిగిమాసిబులి బడే బెంగదీగిచ్చి.
 27 సొత్తాక సెయ్యె జబ్బైకిరి మొర్నుకు పక్కరచ్చి ఈనె పురువు తాకు కనికరంచిసి. తాకాకనీ, దుక్కమంపరె దుక్కం
 నాఅయినూ మో ఉంపరంకా కనికరించిసి.
 28 ఈనె తొమె తాకు ఇంకా దిక్కిరి సంతోసించిలాపనికిరి, మో చింత తీరిమాసిబులి తాకు బేగా పొడదిల్లించి.

* 2:10 బుమి తొల్లె రొల్లె వొందరొ రొల్లె రాజ్యం మొర్నిజల్లలింకె రొసె బులి కొయితాసె † 2:17 తొం కోసం మొర్నిజన్నును

29 తాకు పూర్వానందం సంగరె ప్రబువు నారె మిసుగునొడి. సాలింకు గౌరంగా దిగొండి.

30 కైంకిబుల్నే సెయ్యె క్రీస్తు పైటిరె బడేమట్టుకు మొర్నొకంకా సిద్దమైసి. మెత్తె సేవ కొరితె తొమె నాతీర్చినార్లా మో అవసరాలు తొ బదులు తీర్చితె, సెయ్యె తా పొర్నొకంకా లెక్కకొరిలాని.

3

సాత్తాయిలా నీతి

1 ఆకరుగా, మో అన్నబయినె అప్ప బొయినీనె, ప్రబువురె ఆనందించొండి. యే సంగతీనాక తొముకింకా రాసివురో మెత్తె సమస్య కిచ్చీనియ్యి. నడ తొముకు క్షేమమాక.

2 దుస్టులైలాలింకు పైటినుకు జాగర్తగా తమ్మాసి. కుక్కురోసెవనాలింకోసం జాగర్త. తంకె తంకరో ఆచారాలసంగరె చీరిపీలాలింకె గురించి జాగర్తగా తమ్మాసి.

3 కైంకిబుల్నే, దే అంపరె ఆచారమూనె నమ్మకం నాదీగీకుంటా పురువురో ఆత్మసంగరె ఆరాదించుకుంటా, క్రీస్తు యేసురె అతిసయించుతల్లా అమ్మాక అసల్లైలా సున్నతి పొందిలాలింకె.

4 సాకిరియిలపని ఈనె, మియ్యి దేకు ఆదారం కొరిగీపారి. కేసైనా దే కు ఆదారం కొరిగీమాసి బులిగిన్నే, మియ్యి తంకన్నా బూతు కొరిగీపారి.

5 మియ్యి అట్టదినోరె సున్నతి పొందిగించి. ఇస్రాయేలుగా జొర్దైంచి. బెన్యామీను గోత్రముకు చెందిలాట. హెబ్రీ సంతానమురె జొర్దైలా హెబ్రీట. దర్మసాస్తం పాటించిలా వినయంరె పరిసయ్యుడుగా అచ్చి.

6 ఆసక్తి వినయంరె సంగముకు హింసించితే దర్మసాస్తం నీతి వినయంరె తప్పునీకుంటా సంపూర్ణవిదేయత సంగరె పాటించించి.

7 ఈనన్నా కిరకిరె మెత్తె లవోగా అచ్చెవో సడానుకల్లా క్రీస్తు గురించి నాపైటికైలాంచ బులిగించి.

8 నడ మాత్రం నీ మో ప్రబువైలా యేసు క్రీస్తుకు జనివురాక బడే బొట్ట సంగతి. నడకాక మరి నిచ్చయముగా మో ప్రబువైలా యేసుక్రీస్తురె బడేవిలువైలా జ్ఞానం కోసం సొబ్బిటికూ నొస్టాగా బచ్చిగిల్లించి. తా కోసం సొబ్బిటికు ఇష్టపూరకంగా తిరస్కరించించి. క్రీస్తుకు మాత్రమాక సంపాదించిగితే, సడానుకు చెత్త సంగరె సమానంగా బచ్చిగించి.

9 దర్మసాస్తంకు సంబందించిలా మో స్వనీతి నీకిరి, క్రీస్తుబిత్తరె విస్వాసము సంగరె నీతి, బుల్నే విస్వాసం ద్వారా పురువు అనుగ్రహించిలా నీతికలిగిలాటైకిరి తాబిత్తరె దిగదిమ్మాసి బులి కొరించి.

10 క్యాకిరైనా, తా మొర్నొ వినయంరె సమానఅనుబవం కలిగిలాటైకిరి, తాకు తా పునరుత్తానం బలముకు తెలిసిగిత్తందుకు, తా స్రమానెరె పాలుపొందితందుకు.

11 మెత్తె మీయాక మొర్నొతీకిరి ఉటికిరి జీకిరి అచ్చిబులి నిరీక్సనరె అచ్చి.

గమ్యం ఆడుకు దొముడువురో

12 యెడానుకల్లా మీ యింకా పొందిగిల్లాని గనక మీ యింకా సంపూర్ణుడైలాని. క్రీస్తు మెత్తె కిడకోసం దరిగిచ్చో నడకు మీ సొంతం కొరిగిమ్మాసి బులి ప్రయత్నం కొరుకుంటా అచ్చి.

13 ఈనెను అన్నబయినె అప్పబొయినీనె, నడకు మియ్యి ఉంచునాక సాదించించి బులి బులిగిల్లాని. ఈనె గుటే మాత్రం కొరిలించి. అడకగరె జరిగిలాంచ పసిరిజీకిరి, అగురుకు తల్లాంచ పొందితె కోసం బడేప్రయాస పొడిలించి.

14 నడకు క్రీస్తు యేసురె పురువురో డక్కకు సంబందించిలా పరలోకబహుమతి పొందితె కోసం గురి పక్కాక దొమ్మిడిలించి.

15 ఈనె అంబిత్తరె ఆత్మరె సంపూర్ణమైలాలింకల్లా యాకిరాక ఆలోసించిమాసిబులి ప్రోత్సహించిలించి. మరి కే వినయం గురించైనా, తొమె ఇంగుటే పనికిరి ఆలోసించినె నడకంకా పురువు తొముకు బయలు పరిచివో.

16 ఈనన్నా ఉంచినెజాంక అముకు మిల్లా నియమాలు దరికిరాక క్రమముగా సలిగిమ్మా.

17 అన్నబయినె అప్పబొయినీనె, తొమె మెత్తె పోలికిరి సలుగునొండి. అమె తొముకు మాదిరిగా తల్లా ప్రకారం సలిగిల్లాలింకు తంకు ఎంబడించొండి.

18 బడేలింకె క్రీస్తు సిలువకు మొర్నొకు సత్తువూనెగా సలిగిల్లినె. యెడానె గురించి తొముకు బడేసార్లు కొయికిరి, ఉంచినంకా కందికుంటా కొయిలించి.

19 నరకమాక తంకు అంతం. తంకు దేఆసలక తంకు పురువు. తంకె తంకె లజ్జోపొడివలిసిలా సంగతీనె గురించి గొప్పగా కొయిగిల్లినె. బూ సంబందమైలా సంగతీనంపరె మనస్సు దీగిల్లినె.

20 అమె పరలోకపారులునె. అం రక్కకుడైలా యేసు క్రీస్తు ప్రబువు సెట్టెతీకిరాక ఆసిబులి తా కోసం ఎదురు దిగిలింఱ్.

21 సొబ్బిటుకు తా అదికారం తొల్లె లోపరిచిగిత్తల్లా తా సక్తి సంగరె అం బలహీనమైలా దేనుకంకా తా మహిమ దేనెగా మార్చుసి.

4

సూచనలు

1 నడుకాక మో ప్రియమైలా అన్నబయినె అప్పబొయినీనె, తొంబుల్నే మెత్తె బడే ఇస్టం. తొముకు దిగిమాసిబులి మెత్తె బడే ఆసగా అచ్చి. మో ఆనందం మో కిరీటమైకిరి తల్లా మో ప్రియస్నేహితులూనే ప్రబువురె స్తిరమైకిరి తమ్మాసి.

2 ప్రబువురె గుట్టాక మనుసు సంగరె మిసికిరి తమ్మాసి బులి యువోదయకు, సుంటుకే సోదరినెకు బతిమాలిగిల్లించి.

3 వై, సొత్తయల సహకారీ, తొత్తంకా పొచ్చుర్లించి. సే మొట్టానె క్లెమెంతో సంగరంకా, మిగిల్లా మో సహకారీనె సంగరె సువార్త పైటిరె మో సంగరె ప్రయాసపొడిసె గనక, తంకు సహాయం కొరుబులి కోరిలింఱి. తంకునానె జీవగ్రందంరె రాసికిరచ్చె.

4 సొబ్బిబెల్లె ప్రబువురె ఆనందించొండి. ఇంకా కొయిలింఱి, ఆనందించొండి.

5 ప్రబువు బేగా అయిలీసి. తొం ముదుమైలా ప్రవర్తన సొబ్బిలింకూ తెలియపర్పొండి.

6 కేటగురించి చింత పొడితెనాండి ఈనె సొబ్బి వినయానెరె ప్రార్థనా విజ్ఞాపనానె సంగరె క్రుతజ్ఞతా పూరకంగా తొం విన్నపానె పురువుకు మగొండి.

7 సెత్తెలె సొబ్బిజ్ఞానముకు మించిలా పురువురొ సాంతి, యేసు క్రీస్తురె తొం మనుసూనుకు తొం ఆలోచనానెకు జొగులొ తాసి.

8 చివరకు, అన్నబయినె అప్పబొయినీనె, కే యోగ్యతన్నా, మెప్పున్నా తన్నామాను, కేట సత్యమైలాంచో, కేట గారమైలాంచో, కేట న్యాయమైలాంచో, కేట పవిత్రమైలాంచో, కేట రమ్యమైలాంచో, కేట బొల్ల నా కలిగిలాంచో, సడంపరె మనుసు లొగొండి.

9 ఈనె మో కొతానె వల్లరె పైటినె వల్లరె తొమె కిడ సుక్కిగీకిరి అంగీకరంచినెవో, మో బిత్తరె తల్లాపనికిరి కేట సునిసేవో, కేట దిగినెవో, సడానుకు కొరండి .సెత్తెలె సాంతికర్తయైలా పురువు తొముకు తొడైకిరి తాసి.

బహుమతి కోసం దండము కొయివురొ

10 మో గురించి తొమె ఉంచినెకైనన్నా ఇంకా ఆలోసించిలీసొబులి ప్రబువురె బడే సంతోసించించి. అడకగరె తొమె మో గురించి ఆలోసించిసొ గని తొముకు సర్దెలా సమయం మిల్లాని.

11 మెత్తె తక్కువైసిబులి మి యాకిరి కొయిలానియ్యి. మీ కే పరిస్థితిరె తన్నాన్నాసరాక, సే పరిస్థితిరె సంత్రుప్తి కలిక్కిరి తవ్వరొ సుగ్గించి.

12 దీనస్థితిరె తవ్వరొ తెలుసు, సంపన్న స్థితిరె తవ్వరొ తెలుసు. ప్రతీ వినయంరె సొబ్బి పరిస్థతిరె పెట్టొ పూరికిరి తవ్వరొ, బొక్కొసంగరె తైతండుకు, సమ్ముద్ది కలిక్కిరితైతె, కిచ్చినీకుంటా లేమిరె తవ్వరొ సుగ్గించి.

13 మెత్తె బలపరిచిలా క్రీస్తు వల్లరాక మీ సొబ్బి కొరిపారిలింఱి.

14 ఈనన్నా మో కొస్టానెరె పాలుబంటిగివురొ తొమె బొల్లపైటి కొరిసొ.

15 పిలిప్పీలింకే, మియ్యి సువార్తకు బోదించువురొ మొదలుదీకిరి మాసిదోనియ తీకిరి బయలుదేరిలాబెల్లె తొం సంగం గుట్టాక మెత్తె సహాయం కొరికిరి ఆదిగిచ్చి. యేసంగతి తొముకల్లా తెలుసు.

16 క్లెంకిబుల్నే తెన్నలోనీకరంకా తొమె బడేసార్లు మో అవసరం తీర్చితె సాయం కొరిసొ.

17 మీ బహుమానంకు ఆసించికిరి యాకిరి కొయివురొనీ, తొముకు ప్రతిపలం బడేట మిలిమాసిబులి ఆసించికిరి కొయిలింఱి.

18 మెత్తె సొబ్బి సారిపొడిలెత్తచ్చి. తొమె పొడదిల్లా సారొకోనె ఎపప్రాదితు సంగరె అందిసె. మెత్తె లోటు కిచ్చినీ. సడానె ఇంపైలా సువాసనగా, పురువుకు ఇస్టమైలా అర్చనగా అచ్చె.

19 ఈనె మో పురువు తా ఐస్వర్యం సంగరె క్రీస్తు యేసు మహిమరె తొం సొబ్బి అవసరాలుకల్లా తీర్చుసి.

20 అం బో ఈలా పురువుకు కెబ్బుకూ మహిమ కలిగిమాసి గాక. ఆమేను.

ఆకరు దండము

21 పురువురొ ప్రజానెకల్లా క్రీస్తు యేసురె దండము కోండి. మో సంగరె తల్లా అన్నబయినె అప్పబొయినినల్లా తొముకు దండము కొయిలీసె.

- 22 ఎట్టె తల్లా పురువురో ప్రజానెల్లా ముక్యంగా రొజా గొరె తల్లా తొముకు అబివందనము కొయిలీసె.
23 ప్రబువైలా యేసుక్రీస్తు క్రుప తొ సొబ్బిలింకె సంగరె తమ్మాసి గాక.

పాలు కొలస్సీయులకు రాసిన పత్రిక పాలు కొలస్సీయులకు రాసిన పత్రిక అగరో కొత

ఎ కొలస్సీ పత్రిక అపొస్తులు యీలా పాలు సంగరె రాసివురో యీసి 1:1 యే లేక పాలు క్రీస్తు జొరైలా తరవాత 60 వ బొచ్చురై రోమా పట్నంరె రొల్ల చెరసాలరె రొల్లబెల్లె రాసికిరి రొవొచ్చు కొలస్సీ ఎపెస్సీ పిలోమోను పత్రికలు సెయ్యె చెరసాలరె రొల్లబెల్లె రాసితండుకు యే పత్రికలు చెరసాల పత్రికలు బులి డక్కితోసె పాలు యే పత్రికలు కొలస్సీ పట్నంరె రొల్ల సంగముకు రాసిలీసి పాలు యే కొలస్సీ సంగముకు ప్రారంబించిలాని గాని 2:1సెయ్యె గొప్ప బాద్యత సంగరె యెడ గురించి రాసిలీసి ఈనె ఎపప్రాతు కొలస్సీ పట్నం దీకిరి అయిలాట గనుక యెయ్యక సె సంగముకు స్తాపించికిరి రొవొచ్చు.

పాలు కొలస్సీ సంగమురె రొల్ల కుండె తప్పుడు బోదానె గురించి దుక్కొపొడిసి నడ వలరె యే పత్రికరె బడె సాతం రాసిసె సెట్టె యూదారె క్రైస్తువులు బడెలింకె రొవురో వలరె సెట్టె రొల్ల క్రైస్తువులు పొర్పొనంపరె యూదా నిమాలకు ప్రత్రికాగా సున్నతి కొరిగిమంచి బులి బలవంతం కొరితవ్వె ఈనె పాలు క్రైస్తువ్యంరె పురువుకు అంగీకరించితె క్రీస్తు అంగీకరించితె తప్ప కిచ్చిని 1:17-20 ఈనె యే బోదానె సొబ్బి మనమానె ఆలోచన సంగరె అయిలాట సొబ్బి యెడ వలరె కిచ్చి నీ బులి 2:8 కొయిసి.

సంగతీనె

1. పాలు కొలస్సీ సంగముకు సుబం బులి లేక ప్రారంబించిసి 1:1-2
2. సెయ్యె యే లేకరె క్రీస్తు గురించి గొప్పగా రాసుకుంటు కొలస్సీ సంగము తప్పుడు బోదానె గురించి స్పదించి రాసిలీసి 1:3-3:4
3. సే విదంగా పాలు పత్రికలు సొబ్బిటిరె నగానికి సగం బొల్ల క్రైస్తుత్వము జీవన విదానం గురించి సూచనలు రాసిసి 3:5-4:6
4. ఆకరుగా పాలు సుబం బులి కొయికుంట యే లేక వేరె సంగాలురె చదివించిమాసి బులి సలహా దీకుంట ముగించిసి 4:7-18

¹ పురువురో చిత్తప్రకారం యేసు క్రీస్తురో అపొస్తులుడైలా పాలు అం బయి తిమోతి,
² క్రీస్తురె నమ్మకస్తులైలా అన్నబయిసుకు అప్పబొయినీనెకు కొలస్సీరె తల్లా క్రీస్తురో ప్రియమైలా పురువురో ప్రజానెకు సుబం కొయికిరి రాసిలా సంగతీనె. అం బోయాలా పురువు తీకిరి క్రుపా సాంతి కలిగిమాసి గాక.

క్రుతజ్ఞత ప్రార్దన

³ అమె కెబ్బుకూ తొముగురించి ప్రార్దన కొరితల్లాబెల్లెల్లా ప్రబువైలా యేసుక్రీస్తు ద్వారా పురువుకు క్రుతజ్ఞతలు చెల్లించిలింఛో ప్రార్దన కొరిలింఛో.

⁴ యెడ వలరె క్రీస్తు యేసంపరె తొమె దీగిల్లా నమ్మకం గురించి పురువురో మనమానెంపరె తొమె దైపించిలా ప్రేమ గురించి అమె సునింఛో.

⁵ యే సత్యవాక్కు బుల్లా సువార్త తొం పక్కు అగుంతా అయిలాబెల్లె యే నిరీక్సన సంగరె తల్లా ప్రేమ. విస్వాసం పరలోకంరె తొంకోసం రొయిదీకిరి అచ్చి.

⁶ యే సువార్త లొకొకల్లా పలింఛుకుంటా, వ్యాపించిలాపనికిరి తొమె పురువురో క్రుప గురించి సునికిరి సత్యముగా గ్రహించిలాబెల్లెతీకిరి తొం బిత్తరంకా పలింఛుకుంటా వ్యాపించిలీసి.

⁷ అం ప్రియమైలా ఎపప్రా అం సంగరె పైటికొరిలా సహదాసుడు, సెయ్యె యేసుక్రీస్తుకు నమ్మకమైలా సేవకుడు తా ద్వారా తొమె యే సంగతీనె సుగ్గిచ్చి.

⁸ సెయ్యక ఆత్మబిత్తరె పొందిల తొం ప్రేమకు అముసంగరె తెలియపర్చిసి.

⁹ సడుకాక యే సంగతి సునిలాబెల్లెతీకిరి అమె తొం కోసం ప్రార్దన కొరివురో మానిలానింతో, తొమె సంపూర్ణ జ్ఞానం, ఆత్మసంబంధమైలా వివేకం కలిగిలాలింకైమాసిబులి, తా చిత్తముకు పూర్తిగా గ్రహించిలాలింకైమాసిబులి పురువుకు కొరిగిల్లించి.

¹⁰ సెల్లె సొబ్బి బొల్లపైటిన్తే తొమె పలింఛుకుంటా, పురువుకు సంబందించిలా జ్ఞానం బిత్తరె బొడుకుంటా, సొబ్బి వినయొనెరె ప్రబువు సంతోసించిలా పనికిరి, తాకు తగిలాపనికిరి తొమె సలిగిండి.

11 మహిమా ప్రభావములుసంగరె కలిగిలా తా సక్తి తోముకు సొబ్బివిదమైలా సామర్థ్యం దీకిరి బలపరిచిమాసిబులి పురువుకు కోరిగిల్లించో. సడాక తోముకు ఓర్పుకు, వట్టుదలసంగరె సలిగితే సక్తికు కలిగించుసి.

12 హల్లో సంబందించిలా తా మనమానెరో వారసత్వమురె అముకు పాలిబాగస్తులుగా కొరిలా బోకు తోమె సంతోసం సంగరె క్రుతజ్ఞతా చెల్లించిమాసి.

13 సెయ్యె అముకు వందారో సంబందమైలా రాజ్యోఅదికారంతీకిరి చోడిపించికిరి, తా ప్రియమైలా పోరో రాజ్యోరె రొయిదీసి.

14 సే పో బిత్తరాక అముకు విడుదల పాపకృమాపన కలిగిలీసి.

క్రీస్తురో వ్యక్తిత్వం ఇంకా పైటి

15 క్రీస్తు నాదిగదిల్లా పురువురో స్వరూపం. సొబ్బిస్తుస్థికల్లా అదికారిగా సెయ్యె అగరె పోగా జోర్నో యికిరచ్చి.

16 క్యాకిరిబుల్నే మెగొనైతల్లాంచన్నా బూమంపరెతల్లాంచన్నా, అంకికి దిగదిల్లాంచనె నాదిగదిల్లాంచనె, సడానె సింహాసనానైనా, ఆదివత్సాలైనా, ప్రబుత్వానైనా, అదికారినినె యే ప్రపంచమురె సొబ్బి తా ద్వారా కలిగినె. తా కోసమాక కలిగినె.

17 క్రీస్తు సొబ్బిటికి అగరె తల్లాట. సెయ్యె సొబ్బి సడ సడరో చోటురె నిర్నయించిబోడిసి.

18 సెయ్యోక సంగంబుల్లా దేకు ముండో. సొబ్బి అదికారినికె మూలమైలాట సెయ్యోక. సొబ్బిటరె తాకు అగరె స్తాసం కలిగితందుకు మొరిజిల్లాలింకుబిత్తరెతీకిరి సజీవుడుగా ఉటువురోబిత్తరె సెయ్యె మొదటిట.

19 పో బిత్తరె పురువుతత్వం సర్వసంపూర్ణత నివసించిమాసిబులి పురువాక స్వయంగా నిర్నయించిసి.

20 పో ద్వారా లోకొకల్లా తా సంగరె సమాదానపరిచిగితే పురువు ఇన్స్టాడిసి. మెగొబిత్తరె, బూమంపరె తల్లా సొబ్బిటకు తా పోరో రొగుతో* సిలువంపరె వొలికించువురో ద్వారా కొడిగీకిరి అయిమాసిబులి పురువురో నిర్నయమైసి.

21 ఈనె గుటెబెల్లె తొమ్మంకా పురువుకు దూరుగా నాజనిలాలింకెవనచ్చో. తొ చెడ్డపైటినె వల్లరె విరోదబావం సంగరె పురువుకు సత్తుమానెగా అచ్చో.

22 ఈనె ఉంచినె తా అగరె తోమె పరిసుద్దులుగా, నిర్దోసీనెగా, అపరాదాలు నీకుంట తైతందుకు తా పోరో దేమొర్నొసంగరె, తోముకు పురువు తా జట్టుకారీనెగా కొరిగిచ్చి.

23 యెడ ఈవాసిబుల్నే తోమె విస్వాసంరె స్థిరంగా తైకిరి, తోమె సునిలాంచ మెగొతొల్లె తల్లా స్తుస్థికల్లా తోముకు ప్రకటించిలా సువార్త వల్లరె కలిగిలా నిరీక్సన తీకిరి నాబాజీకుంటా స్థిరంగా తమ్మాసి. యే సువార్తకు పాలు బుల్లా మియ్యి సేవకుడైకిరచ్చి.

సంగముకు గుటె సేవకుడుగా పాలు కొరిలా పైటి

24 ఉంచినె తొ కోసం మీ పొడితల్లా హింసానె సంతోసించిలింబి. సంగంబుల్లా తా దే కోసం క్రీస్తు పొడిలా కొస్టానె తక్కువైలాంచబిత్తరె మో వొతు మో దే ద్వారాగా సంపూర్తి కొరిలింబి.

25 ఈనె ప్రకటించవలీసిలా పురువురో వాక్కుకు సంపూర్తిగా తెలియపర్చితందుకు పురువు మెత్తె ఒప్పుకొయిలా బాద్యతప్రకారం మియ్యి సంగముకు పరిచారకుడైంబి.

26 యే రహాస్యం యుగయుగాలు తీకిరి తరతరమునె తీకిరి మర్మమైకిరి అచ్చి. ఈనె ఉంచినె సడకు పురువు తా మనమానుకు బయలుపర్చిసి.

27 మనమానె సొబ్బిలింకు యే మర్మంరో మహిమైస్వర్యం క్యాటవో తెలియపర్చిమాసిబులి పురువు తలంచిసి. యే మర్మం తొ బిత్తరె తల్లా యేసు క్రీస్తాక .సెయ్యోక పురువురో మహిమ. తోమె తా మహిమరె పాలిబాగస్తులు యీసా.

28 తా గురించాక అమె ప్రకటించిలింబో. సొబ్బి మనమానుకు క్రీస్తురె పరిపూర్ణులుగా కొరికిరి పురువు అగరె టారదిమ్మాసిబుల్లా యే ఉద్దేశం సంగరాక అమె సొబ్బి విదమైలా జ్ఞానం సంగరె సొబ్బిలింకూ హెచ్చరించుకుంటా బోదించిలింబో.

29 యెడకోసమాక మీ స్రమపొడిలింబి. మో బిత్తరె బలంగాపైటి కొరితల్లా తా మహాసక్తి వల్లరాక మీ పోరాటంపైటి కొరితె ప్రయాసపొడ్డింబి.

2

1 తొ కోసం, లవోదికయ గాలింకె కోసం, మెత్తె నాతెలిసిలలింకె కోసం మీ కెత్తె పోరాడిలింబో తోముకు కొయిమా బులిగిలింబి.

* 1:20 పోరో రొగితో పోరో బలియాగం

2 తంకల్లా ప్రేమరె గుట్టెకిరి, సంపూర్ణంగా గ్రహించికిరి, ఆసీర్వాదానెకల్లా పొందిగీకిరి, పురువురొ మర్మమైకిరితల్లా క్రీస్తుకు స్పష్టముగా జనివురొ వల్లరె, తంకె మనసునురె ఆదరన పొందిమాసిబులి తంకసాబ్బిలింకోసం పోరాడిలింబి.

3 జ్ఞానం, తెలివితేటలునె సాబ్బిసంపదలల్లా క్రీస్తు బిత్తరాక నుచ్చికిరి అచ్చె.

4 సోద కొతానె కొయికిరి కేసైనా తోముకు మాయ నాకొరుకుంటా తమ్మాసిబులి యే సంగతినె తోముకు కొయిలింబి.

5 మియ్యి దే వినయంరె దూరుగా తన్నున్నా, ఆత్మవినయంరె తొ సంగరాక తైకిరి, తొ బొల్లప్రవర్తన, క్రీస్తురె తోముకు తల్లా బలమైలా విస్వాసం దిక్కిరి ఆనందించిలింబి.

యేసుక్రీస్తురె సంపూర్ణమైలా జీవితం

6 ఈనె తోమె ప్రబువైలా క్రీస్తు యేసుకు అంగీకరించిలాపనికిరి తాబిత్తరె మిసికిరి టారింబి.

7 తా బిత్తరె స్థిరంగా నాటిగీకిరి టారింబి. తాంపరాక తొ జీకానుకు బందిగిండి. తోముకు బోదించిలా రీతిగా విస్వాసంరె సెరోనె పారికిరి టారింబి. క్రుతజ్ఞతలు చెల్లించువురొ వినయమురె విస్తరించికిరి టారింబి.

8 క్రీస్తుకు నా అనుసరించుకుంట మనమానో సాంప్రదాయానెకు, యే లొకొ సంబందమైలా మూలపటోనెకు అనుసరించికిరి, మోసకరమైలా నిరర్థకమైలా తత్వజ్ఞానం సంగరె తోముకు మాయ కొరికిరి కేసీ నాలొంగదీగీకుంటా జాగర్తగా రోండి.

9 కైంకిబుల్నే దైవత్వమురొ సాబ్బిసంపూర్ణతల్లా తా దేగా క్రీస్తురె నివసించిలీసి.

10 ఈనె తా బిత్తరె తోమ్మంకా సంపూర్ణులైకిరి అచ్చొ. సెయ్యె సాబ్బి ప్రదానులంపరె, అదికారినెంపరె సిరసైకిరి అచ్చి.

11 మనమానో అత్తొనె సంగరె కొరిలాపనికిరినీకుంటా, పురువు తా బిత్తరె తోముకు నున్నతి కొరిసి. స్వబావ రీతిగా దే బిత్తరె తల్లా పాప స్తితి కడిపీవురాక క్రీస్తురె తోమె పొందిలా నున్నతి.

12 తోమె బాప్తీసం ద్వారా తా సంగరె కుంతిదీకిరి, ఈనె మొరిజిల్లాలింకుతీకిరి తాకు సజీవంగా ఉడదిల్లా పురువు సక్తంపరె తోముకు తల్లా విస్వాసం వల్లరె తోమంకా తా సంగరె సజీవంగా ఉటిసా.

13 ఈనె గుటెబెల్లె తోమె కొరిల అపరాదాలు వల్లరె ఇంకా దర్మసాస్తం నీలా పొదరెలింకెగా తోమె మొరికితన్నుగా, సెత్తెలె సెయ్యె క్రీస్తురె తోముకు జీపించిసి. అం అపరాదములుకు క్షమించిసి.

14 అముకు విరోముగా రాసికిరి తల్లా రునపత్తముకంకా, సడకు సంబందించిలా నియమ నిబందనానెకు సెయ్యె పుంచిపేసి. సెయ్యె సడానుకల్లా కడికిరి సిలువంపరె మేకూనె సంగరె మరిసి.

15 ఈనె సిలువంపరె సెయ్యె బొడిలింకు, అదికారినెకు ఓడించికిరి, తంకు బందీలుగా కొరికిరి తా విజయోత్సవము ఊరేగింపురె సాబ్బిలింకె అగరె దిగదీకిరి తంకెదీకిరి విడుదల ప్రకటించిసి.

16 ఈనె కైలా వినయమురె, పీలా వినయమురె, పొరువొ దినోనె, ఆమాస, విస్త్రాంతి దినో పనా వినయమునెరె తోముకు కేసీ నియమాలు నా దీకుంటా దిగ్గునొండి.

17 యెడానల్లా జరగవలిసిలాంచకు నీడవనాంచ. సడరొ సాత్తయిలా స్వరూపం క్రీస్తురె అచ్చి.

18 దేవదూతలకు ఆరాదన కొరుకుంట బడే వినయం దిగిదీకుంట ప్రత్యేకమైల దర్శనం గలిగిలలింకెపన గొప్పలు కొయికుంట రొల్లలింకె తొ ఉంపరె తోముకు తీర్పు నాకొయిలపన దిగిండి యే కారనం వలరె దే సంబందమైల ఆసానె తొలుగుజూసె.

19 తాపనాట సిరసుగా తల్లా క్రీస్తు యేసుకు అంటిగీకిరి తన్నీ. సే సిరసు వల్లరాక దేఅల్లా పోసించబొడిలీసి. సే సిరసు వల్లరాక కీల్లు సంగరె, నరమూనె సంగరె దే గుట్టెగా తల్లీసి. పురువు వలరె వ్రుద్ది సంగరె అబివ్రుద్ది చెందిలీసి.

క్రీస్తురాక మొర్యొ, జీక

20 తోమె క్రీస్తు సంగరంకా లొకొరొ సాంప్రదాయానె వినయంరె మొరిజిల్లలింకె, ఇంకా సడానె తొల్లె జీలాపనికిరి మనమానె నియమానెకు కైంకి అనుసరించిలీసా?

21 “సడ దరిగిన్నాసి, చక్కి దిగినాసి, సడ సూగిన్నాసి.” సే విదులుకు లొబొడివురొ కైంకి?

22 యే ఆజ్ఞానె, సాబ్బి, నా పైటికైలాంచ కోసం మనమానె కొరిలాంచాక. సడానల్లా పద్దతినె, బోదానె మాత్రమాక.

23 అండిబిత్తరె మనమానె తంకె ఇష్టమైలా దేవదూత ఆరాదనలు సంగరె దేకు కటిసంగా అదుపురె దీగిత్తండుకాక. ఈనె దే కొరికానెకు అదుపురె దీగిల్లా వినయంరె సడానె కేమాత్రము పైటికైసి.

3

1 ఈనె తొముకు క్రీస్తు సంగరె సజీవులుగా ఉటదీసి గనక ఉంపరె తల్లాంచకాక కుజ్జండి. నెట్టె క్రీస్తు పురువురో బత్తోకైలాడుకు బొసికిరి అచ్చి.

2 ఉంపరె తల్లాంచంపరాక మనుసు లొగ్గునండి. బూ సంబందమైలాంచంపరె మనుసు లొగ్గితైనాండి.

3 కైకిబుల్నే తొమె మొరిజీసా, ఈనె తొ జీవం క్రీస్తు సంగరె పురువురె నుచ్చిదీకిరి అచ్చి.

4 అముకు జీవమైకిరి తల్లా క్రీస్తు ప్రత్యక్ష్మమైలాబెల్లె తొమ్మంకా తా సంగరె మహిమరె ప్రత్యక్ష్మమైవో.

పుర్వజీక ఇంకా నో జీక

5 ఈనె బూలొకొరె తల్లా తొ అవయవానెరె పైటికొరితల్లా, దర్పిపైటికు, అపవిత్రతకు, కామాతురతకు, దురాసకు, విగ్రహారాదనైలా పలియఆస మొరదీపేండి.

6 సడానె వల్లరె పురువురో ఉగ్రత రగ్గొ తా కొతా నానున్లాలింకంపరకు ఆసి.

7 పూర్వం సడ అమె వుంపరె ఏలుబడిరోల్లబెల్లె తొమె సడనెరో ఆసానె అనుసరించికిరి సలిగిచ్చొ.

8 ఉంచినెనె తొమె రగ్గొ, ఆగ్రహము, దుష్టత్వము, దూసన, కచడ కొతానె కల్లా సడదిగిమ్మాసి.

9 జొనుసంగరె జొనె సొరుకొతానె నాలగండి. కైకిబుల్నే తొమె తొ పూర్వస్వభావముకు సడరో పైటినుకు కడిపీసా.

10 జ్ఞానము కలిగిల నిమిత్తము సడకు స్రుస్థించిలాట పొలికచప్పురె నోయికిరి కొరిలాంచ నో స్వభావము దరించిగికిరి అచ్చి.

11 యెడపనా యూదునె నీలలింకె బులి, యూదుడు బులి బేదంనీ. సున్నతి పొందిలాటబులి సున్నతి నాపొందిలాటబులి బేదంనీ. పరదేసిబులి, సాదేసెస్తుడు బులి, దాసుడుబులి స్వతంత్రుడుబులి నియ్యి. క్రీస్తాక సర్వం, సొబ్బిలింకెబిత్తరె తల్లాట సెయ్యక.

12 ఈనె పురువు ఏర్పాటు కొరిగిల్లాలింకె తంకె పరిసుద్దులు ప్రియమైలాలింకెపనికిరి, తొమె కనికరం గల్లా మనుసుకు, దీనత్వంకు, సాత్వికంకు, సహనముకు దరించిగిత్తండి.

13 కేసెనన్నా తాకు కీడు కొరిసె బులి జొనె బులిగిన్నె, జొనుకు జొనె సంహించిగికుంటా జొనుకు జొనె క్షమించిగునొండి. ప్రబువు తొముకు క్షమించిలాపనికిరి తొమ్మంకా క్షమించొండి.

14 యెడానుంపరకల్లా పరిపూర్వతకు సంబందించిలా ప్రేమకు దరించుగునొండి.

15 క్రీస్తు అనుగ్రహించిలా సమాదానం తొ మనుసునురె ఏలుమురోండి. యెడకోసమాక తొముకు గుట్టె దే గా డక్కిసి. ఇంకా క్రుతజ్ఞతగా తమ్మాసి.

16 క్రీస్తు వాక్కు తొ బిత్తరె సమ్ముద్దిగా తమ్మురోండి. సంపూర్వజ్ఞానం సంగరె జొనుకుజొనె బోదించుగునొండి. బుద్ధి కొయిగితైనాండి. తొ మనుసునై క్రుతజ్ఞత కలిక్కిరి గిత్తొనె సంగరె, పద్యాలు సంగరె ఆత్మ సంబందమైలా రాగానె సంగరె పురువుకు గిత్తొనె గాండి.

17 ఈనె కొతా సంగరె ఈనన్నా, పైటిసంగరె ఈనన్నా, తొమె కేట కొరినన్నా ప్రబువైలా యేసు ద్వారా బో యీలా పురువుకు క్రుతజ్ఞతాస్తుతులు చెల్లించుకుంటా తా నారె కొరండి.

నో జీవితంరె జొనుకు జొనె సంబందం

18 నైపోనె, తొ గొయితానుకు లోబొడికిరి రొమ్మంచి. యెడ ప్రబువుకు తగిలా ప్రవర్తన.

19 గొయితానె, తొ నైపోనుకు ప్రేమించండి. తంకు సంగరె కటిరంగా తైతైనాండి.

20 పిల్లానె, సొబ్బి వినయొనెరె తొ మాబోరో కొతా సునండి. యెడ ప్రబువు వల్లరె మెచ్చిగివలిసిలాట.

21 బోనే మానే, తొ పిల్లారొ మనుసు నిరాసనాపర్చుకుంట తంకు రగ్గొ రేపితైనాండి.

22 దాసులూనె, మనమానుకు మెప్పించిమాసిబులి బయలుకు దిగిదిమ్మాసిబులి నీకుంటా ప్రబువుకు దొరుపొడుకుంటా అంగీకరించిలపన సొబ్బి వినయొనెరె తొ ఉంపరె నాయకునెకు లోబొడికిరి తమ్మాసి.

23 తొమె కే పైటికొరినన్నా మనుసుపూర్తిగా కొరండి. మనమానె కోసం నీకిరి ప్రబువు కోసం బులి బావించికిరి కొరండి.

24 ప్రబువుతీకిరి వారసత్వం తొముకు బహుమతిగా మిల్లీసిబులి తొముకు తెలుసు. ప్రబువైలా క్రీస్తుకు తొమె సేవ కొర్గీసా బులి గుర్తులొగ్గిండి.

25 అన్యాయం కొరిలాటకు సెయ్యొ కొరిలా అన్యాయముకు తగిలా పలం మిలివో. కైంకు బుల్నే పురువురో తీర్పురె పక్కపాతం రొన్ని.

4

1 యజమానులునే, పరలోకం తోముకు జోనె యజమాని అచ్చిబులి గుర్తించిగిండి. తొ దాసునెకు న్యాయమైలాట, సరైలాట కొరండి.

సూచనలు

2 ప్రార్థనరె స్తిరంగా తైకిరి, క్రుతజ్ఞతానె చెల్లించుకుంటా సతనైకిరితాండి.

3 మీ బందకాలురె తైతందుకు కారనమైలా క్రీస్తురొ మర్మము గురించి బోదించిలా పనికిరాక మో కోసం ప్రార్థన కొరండి,

4 పురువురొ వాక్కుకంకా ప్రకటించితే మెత్తె అనుకూల సమయం దిమ్మాసిబులి మో కోసం పురువుకు ప్రార్థన కొరండి.

5 సమయముకు నా వొరదగీకిరి సద్వినియోగం కొరిగీకుంటా, సంగముకు బయలురె తల్లాలికె పక్కరె జ్ఞానం సంగరె మసులుగునొండి.

6 తొ కొతానె కెబ్బుకూ సమాదానంగా తమ్మాసి. తొ కొతాలగిలాట నున్నొ పొగిలా పనికిరి రుచిగా తల్లాపని దిగ్గిమ్మాసి. సాకిరాక తొమె కాకు కెటువంటి జవాబు దిమంచె బులి తెలిసిగీపారొ.

ఆకరు దండమునె

7 ప్రియమైలా బయి నమ్మకమైలా సేవకుడు ప్రబువురె మో సహదాసుడైలా తుకికు మో సంగతీనల్లా తొముకు కొయివొ.

8 ప్రత్యేకించికిరి తొముకు అం సంగతీనె కొయితందుకు తొ మనుసూనుకు ప్రొత్పహించితె ఆకు తొ పక్కు పొడదిల్లించి.

9 ఆ సంగరంకా తొ గా మనమ, నమ్మకమైలా ప్రియమైలా బయి ఒనేసిముకు తొ పక్కు పొడదిల్లించి. తంకె యిట్టెరొ సంగతీనల్లా తొముకు కొయివొ.

10 మో సంగరంకా చెరసాలరె తల్లా అరిస్తార్కు, బర్నబాకు పక్కరె బందువైలా మార్కు తొముకు దండము కొయిలీసె. యే మార్కు తొ పక్కు అయిలాబెల్లె చేర్చిగిండి. బులి తొముకు అగరాక కొయించినీనా.

11 ఈనె యూస్తు బులి నా తల్లా యేసు కూడా తొముకు దండము కొయిలీసె. అంకల్లా సున్నతి పొందిలా యూదునెరొ విస్వాసునెరె తల్లాలికె. అంకాక పురువురొ రాజ్యో కోసం మో సంగరె పైటి కొరిలాలికె. అంకె మెత్తె ఆదరనగా అచ్చె.

12 తొ బిత్తరంకా జోనె క్రీస్తు యేసు సేవకుడైలా ఎపప్రా తొముకు దండము కొయిలీసె. పురువురొ చిత్తంసొబ్బిటిరె తొమె సంపూర్ణులైకిరి నిచ్చయత కలిగికిరి నిలకడైకిరి తమ్మాసిబులి యెయ్యె కెబ్బుకూ తొ కోసం తా ప్రార్థనానె పొరాడిలీసి.

13 యెయ్యె తొ కోసం, లవొదికయలింకె కోసం, హియెరాపొలి లింకె కోసం బడే ప్రయాస పొడిలీసి. యెడ తా గురించి మో సాక్షం.

14 ప్రియమైలా వైద్యుడు లూకా, దేమా తొముకు దండము కొయిలీసె.

15 లవొదికయరె తల్లా అన్నబయినుకు, నుంపాకూ, తంగొరొబిత్తరె తల్లా సంగముకు దండము కోండి.

16 యే పత్రిక తొమె చదివిలా తర్వాతరె లవొదికయ సంగరంకా చదివిపించొండి. సాకిరాక మియ్యె లవొదికయ సంగముకు రాసికిరి పొడదిల్లా పత్రికకు తొమె దన్నైపించిగీకిరి చదువుగునొండి.

17 ఈనె సాకిరాక, “ప్రబువుబిత్తరె తొత్తె ఒప్పకొయిలా పరిచర్య నెరవేర్చితె జాగర్తపొడు” బులి అర్కిప్పు కు కోండి.

18 పాలు బుల్లా మియ్యె మో అత్తొ రాత సంగరె తొముకు దండము కొయిలించి. మో బందకానెకు గేపకం కొరుగునండి. పురువురొ క్రుప తొముకు తోడుగా తమ్మాసి గాక.

పాలు తెస్సలోనికయులకు రాసిన మొదటి పత్రిక పాలు తెస్సలోనికయులకు రాసిన అగరె పత్రిక అగరె కొత్త

తెస్సలోనికయ గుట్టో పత్రిక పాలు దీకిరి రాసివురో ఈసి 1:1. యె ఉత్తరం క్రీస్తు జొరైలా తర్వాతరె 51 వ బొచ్చురె రాసికిరి రొవ్వొచ్చు. ఇంకా బైబులై రాసికిరి రొల్లా ఉత్తరాలై పాలు రొ మొదటి ఉత్తరం బులి కొయివొచ్చు. ఏ ఉత్తరం పాలు కొరంతి పట్నంరె రొల్లాబెల్లె తెస్సలోనికలింకు రాసిలాపనికిరచ్చి. ఈనె అపో .కార్యాలు అపో 17:1-10. ప్రకారం యెడ తా దీటోసువార్త ప్రయానం నమయంరె రాసికిరి రొవ్వొచ్చు. యె సంగమురె అపోస్తులు కార్యములు పుస్తకముకు దరిగీకిరి యెడ కుండెలింకె యూదునె కుండెలింకె గ్రీకులు సంగరె ఏర్పొడిలా సంగం బులి కొయిగిల్లినె.

పాలు యె సంగముకు స్తాపించిలాతర్వాతరె సెట్టె బడెసమయం తంకసంగరె తన్నారెలందరె సెట్టె తల్లా విస్వాసులుకు బలపర్చితె యె ఉత్తరం రాసికిరి రొవ్వొచ్చు. యె ఉత్తరంరె బడె సంగతినె గురించి కొయిసి. ముక్కముగా సాదారనమైలా, ఇంకా క్రైస్తువులు క్యాకిరి జీమాసా సాదారనమైలా సూచనలునె దీసి. యాండ్రె పాలు రొ దీటోసారి అయివురో గురించి కొతాలగీసి. కైంకిబుల్నే తెస్సలోనికరె రొల్లా విస్వాసినె తా దీటో రాకడ గురించి బడె ఆసక్తి దిగదీతైంతె. ఈనె సెట్టెతల్లా విస్వాసినె పురువుకు ఇస్తమైలా జీకానె కలిగితమ్మాసిబులి తంకు ప్రోత్సహించితందుకాక క్రీస్తురో దీటోరాకడ గురించి కొయికిరి రొవ్వొచ్చు. 1 తెస్సలోని 5:6-8

సంగతినె

1. పాలు పురువుకు దండము చెల్లించికిరి సంగముకు సుబాలు కొయికుంటా ఉత్తరం ప్రారంబించువురో. 1
2. యెట్టె పాలు తిమోతి దన్నెలా వార్తకు స్పందించికుంటా తారొ తర్వాతరె కొరివలిసిలాంచ గురించి కొయివురో. 2-3
3. తర్వాతరె పాలు యెసురో దీటో రాకడ గురించి కొతలక్కుంటా నడకోసం క్రైస్తువులు తంకె జీకానెకు క్యాకిరి సిద్ధపర్చిగిమ్మాసా కుండె సూచనానె దెవురో 4:1-5:15
4. యె ఉత్తరం సంగమురె తల్లా ప్రతీలింకె తప్పకుంటా చదివిమాసి బులి కొయికుంటా సుబాలు సంగరె ముగించువురో. 5:16-28

దండము

1 బో యాలా పురువురె ప్రబువైల యెసుక్రీస్తు దీకిరి రొల్ల తెస్సలోనిక రొ సంగముకు పాలు, సిల్వాను, తిమోతి సుబం బులి కొయికిరి రాసిలాట. క్రుప, సమాదానం తొముకు ఈవాసి.

తెస్సలోనికయులురో జీకానె, విస్వాసం

2 అం బో యాలా పురువొ అగరె తొం కోసం జ్ఞాపకము కొరిగీకిరి, అం ప్రార్దనలై విజ్ఞాపనము కొరిగిల్లించొ.

3 విస్వాసముదీకిరి కూడిల తో పైటి, ప్రేమదీకిరి కూడిల తో ప్రయాసముకు, అం ప్రబువైలా యెసుక్రీస్తురె నిరీక్సనదీకిరి కూడిల తో ఓర్పుకు, తొం సొబ్బిలింకె కోసం కెబ్బుకూ అం బో యాలా పురువు అగరె క్రుతజ్ఞతాస్తుతులు చెల్లించిలించ్చొ.

4 క్యాకిరిబుల్నే పురువు వల్లరె ప్రేమించబొడిలా అన్న బయినె అప్పబొయినీనె తొముకు ఏర్పరిచిగిల్లా సంగతి అముకు తెలుసు.

5 అం సువార్త, కొతాదీకిరి మాత్రమాక నీ. సక్తిదీకిరి, పరిసుద్ధాత్మదీకిరి, సంపూర్న సత్యందీకిరి తొం పక్కు. అయికిరి తొం గురించి అమె తొం వల్లరె క్యాకిరి సలిగించెవో తొముకోసమాక బులి తొముకు తెలుసు.

6 పరిసుద్ధాత్మ వల్లరె కలిగిలా ఆనందం దీకిరి గొప్ప కొస్టానెరె, తొమె అమె కొయిలా బోదకు అంగీకరించికిరి, అం పనికీరాక యీనె ప్రబువుకు పోలికిరి సలిలాపనికిరి అచ్చొ.

7 ఈనె మాసిదొనియరె అకైయరె తల్లా విస్వాసినె సొబ్బిలింకు తొమె మాదిరిగా అచ్చొ.

8 కైంకిబుల్నే తొం పక్కరెతీకిరి ప్రబువు వాక్యము మాసిదొనియకు అకైయకు జేసి. సెట్టె మాత్రమాకనీ, ప్రతీ చోటురె పురువుంపరె తొముకు తల్లా విస్వాసము పొదురుకయిసి గనక, అమె కిచ్చి కొయివలిసిల అవసరంనీ.

9 తొం పక్కరె అముకు కెటువంటి ఆహ్వానం మిలిసో, సెట్టెరో మానమానె తొంకోసం అముకు కొయిలీనె. ఈనె తొమె విగ్రహానెకు సడిదీకిరి, జీవముగలిగిలా సత్యవంతుడైలా పురువుకు దాసులైతందుకు.

10 ఈనె పురువు, మొరొ తీకిరి ఉటిపించిలా తా పో యేసు బుల్నే అయితల్లా ఉగ్రత తీకిరి అముకు తప్పించితల్లాట సెయ్యాక పరలోకం తీకిరి ఆసి బులి తా గురించి ఎదురుదిగితె. తోమె పురువాడుకు క్యాకిరి బుల్లిసోవో సే సంగతి తంకాక కొయిలీసె. సెయ్యాక అయితల్లా ఉగ్రత తీకిరి తప్పించుసి.

2

తెస్సలొనికరె పాలురో సేవ

- 1 అన్నబయినె అప్పబొయినీనె, తోం పక్కరకు అమె అయిలాట వ్యర్లము ఈలాని బులి తోముకు తెలుసు.
- 2 ఈనె, యెట్టెకు నా అయిలా అగరె, అమె పిలిప్పు గారె అగరె కొన్ణానె పొడికిరి, అవమానము పొడికిరి, కెత్తో వ్యతిరేకమురొన్నున్నా, తా సువార్త తోముకు బోదించితాకా అముకు పురువు దైర్యము దీసిబులి తోముకు తెలుసు.
- 3 కైంకి బుల్నే అం బోద కపటమైలాట నీ బులి, అపవిత్రమైలాట నీ, మోసమైలాట నీ,
- 4 సువార్తకు అముకు అప్పగించితె యోగ్యునె బులి పురువు వల్లరె బచ్చిలలింకె యీకిరి, మనమానుకు సంతోసపర్చిలాలింకెపనినీకిరి, అం మనుసూనెకు పరీక్షించిలా పురువుకాక సంతోసపరిస్తే బోదించింలించో.
- 5 తోమె జనికిరి రొల్లాపనికిరి అమె పొంగిపించిలా కొతా ఈనెను, పలియంపరె ఆస సంగరె నుచ్చిదిల్లాకొతానె ఈనెను కెబ్బే ఉపయోగించిలాని సడకు పురువాక సాక్సి.
- 6 ఈనె తోం వల్లరె గాని తంకె వలరె గాని, కావల్లరెనన్నా గనత పొందిమాసి బులి అమె కోరిలానింతో.
- 7 అమె క్రీస్తుకు అపొస్తులునె ఈకిరి తల్లందుకు బోడుతనం కొరితందుకు సమర్లునె యీకిరి తన్నున్నా, అమె తగ్గించిగికిరి దుద్దొదిల్లమా తా సొంత పోనుకు దిగిల్లాపనాక, అమె తోం మొజరె సాదువునె యీకిరి అచ్చో.
- 8 తోమె అముకు బడె ప్రియులైకిరి అచ్చో గనుక తోమంపరె బడె సారద గల్లాలింకయీకిరి పురువురో సువార్తకు మాత్రమాక నీకుంటా అం పొర్నొనె కూడ తోముకు దీతె సిద్ధపొడికిరి అచ్చో.
- 9 అన్నబయినె, అం ప్రయాస, కొన్ణానె తోముకు జ్ఞాపకము అచ్చినీనా. అమ్మె తోముకు పురువురో సువార్త ప్రకటించిలా బెల్లె కాకూ బారమైకిరి తన్నాసి బులి రత్తిదూసు కొన్ణాపొడించో.
- 10 విస్వాసులైలా తోం అగరె అమె కెత్తో పవిత్రంగా, నీతిగా, నిందనీకుంటా సలిగించో సడకు తోమ్మాక సాక్సి, పురువొకా సాక్సాక.
- 11 బో తా పిల్లానె సంగరె సలిలాపనికిరాక అమె తోం బిత్తరె ప్రతిలింకె దీకిరి సలిగిల్లించోబులి తోముకు తెలుసు.
- 12 తా రాజ్యముకు, మహిమకు తోముకు డక్కితల్లా పురువుకు తగిలాపనికిరి తోమె సలిగిమ్మాసి బులి అమ్మె తోం బిత్తరె ప్రతిలింకు హెచ్చిరించుకుంటా, ధైరపర్చుకుంటా సాక్సం దీకుంటా
- 13 తోమె అగరె అం దీకిరి పురువురో కొతయాల సందేసముకు అంగీకరించులబెల్లె సడ మనమాండ్రొ కొత పనకా నీకుంటా పురువురో కొతపనికిరి అంగీకరించుసా. సే కారనం సంగరె, అమ్మె కెబ్బుకు పురువుకు క్రుతజ్ఞతాస్తుతులు చెల్లించిలింకో. తోమె అంగీకరించిలా సే సందేసముకు సొత్తాక సడ పురువురో కొతాక. సడ విస్వసించుల తోంబిత్తరె పైటి జరిగించిలీసె.
- 14 వై అన్నబయినె, అప్పబొయినీనె, తోమె యూదయ ప్రాంతంరె క్రీస్తుయేసురె తల్లా పురువురో సంగమునెకు పొలికిరి చలిగిల్లీసా. తంకె యూదునె వల్లరె అనుబవించుల హింసానాకా ఉంచినె తోమ్మంకా తోం సొంతదెసొలింకువల్లరె అనుబవించిలీసా.
- 15 సే యూదునె తంకె పాపొనె కెబ్బుకు సంపూర్తి కొరితందుకు ప్రబువైలా యేసుకు, ప్రవక్తానెకు మొరదీకిరి అముకు హింసించుసి,
- 16 పురువుకు నా నమ్మిలా పొదరెలింకె రక్సన కలిగితందుకు తంకెదీకిరి అమె నా కొతాలగుకుండా అముకు ఆటంకపర్చుసి, పురువుకు నాయిస్థమైలలింకు మనమానె సొబ్బిలింకు పగస్తునె యీకిరి అచ్చె. పురువురో రగ్గో చివరకు తంకెంపరకు ఆసి.

పాలు తంకు ఇంగుటెబెల్లె మిసితె ఆసపొడివురో

- 17 అన్నబయినె, అప్పబొయినీనె అమె దే వల్లరె కుండె కలొ తోముకు ఎడబాసికిరి తన్నెను, మనస్సుదీకిరి తోమె పక్కరె రొయికిరి, బడె ఆస సంగరె తోం మూ దిగిమాసి బులి బడె ప్రయత్నంకొరించో.
- 18 ఈనె అమె తోం పక్క అయివాసిబులిగించో; పాలు బుల్లా మియ్య బడె సార్లు అయివాసి బులి బులిగించి ఈనె, సాతాను ఆటంకపర్చుసి.

19 కైంకిబుల్నే మో నీరీక్ననైనన్నా, ఆనందం ఈనన్నా, అతినయమైనన్నా కిర? అం ప్రబువైలా యేసు అయిలా సమయమురె తా అగరె టారెలాలింకె తొమ్మాకనీనా?

20 సొత్తాక అం గనత ఆనందం తొమ్మాక యీకిరి అచ్చొ.

3

1 ఈనె అమె సహించినారీనన్నా ఏతెస్సు పట్నంరె అమె జొన్నె ఈనెను తమ్మాసి బులి నిచ్చయించిగీకిరి,

2 యే హింసానే మూలముగా తొ బిత్తరె కేసె కూడ విస్వాసం వినయమురె తొమె పొచ్చుకు నాబాజీకుంటా ఆదరించితె, బలపరిచితె క్రీస్తు సువార్తరె పురువురొ సేవకుడు అం సంగరె పైటికొర్లా అన్నబయి యీలా తిమోతికు తొ పక్కు పొడిదీంచొ.

3 ఈనె ఏ సోదనానె అయిలాబెల్లె పొచ్చుకు నాబాజీకుంటా తైతే, యే కొస్టానె అనుబవించిమంచి బులి పురువాకా నియమించిసి బులి తొమె తెలిసిగీండి.

4 అమె తొ పక్కరె తల్లాబెల్లె “అమె స్తమానె పొడిమాసి బులి” అగరాక తొ సంగరె కొయింబొ నీనా! తొముకు తెలిసిలా పనాక ఉంచినె సాకిరాక జరిగినె.

5 సడకాక మియ్యి ఇంక తన్నారికిరి, సోదకుడు తొముకు సోదించుసి కీవోబులి, అం ప్రయాస వ్యర్థమైజెవ్వోకివో బులికిరి, తొ విస్వాసముకు క్యాకిరచ్చొ తెలిసిగిమ్మాసిబులి తిమోతికు పొడిదీంచె.

6 తిమోతి ఉంచినె తొ పక్కరీకిరి అం పక్కు అయికిరి, తొ విస్వాస ప్రేమ గురించి అముకు కొయిసి. అమె తొముకు దిగిమాసిబులి ఆన పొడిలా పనాక తొమ్మంకా అముకు దిగిమాసిబులి ఆన పొడిలీసా బులి, అముకు ప్రేమ సంగరె కెబ్బుకూ జ్ఞాపకం కొరిగిల్లీసా బులి తొ గురించి సంతోసమైలా కబురు అముకు దన్నెసి.

7 సడవల్లరె అన్నబయినె అప్పబొయినె, అం యిబ్బంది సొబ్బిటిరె కొస్టానె సొబ్బిటిరె తొ విస్వాసముకు దిక్కిరి తొ వినయమురె ఆదరన పొందించొ.

8 కైంకిబుల్నే, తొమె ప్రబువుబిత్తరె స్థిరముగా టారికిరి తన్నే అమంకా సంతోసంగా జీకిరితల్లాపనాక.

9 పురువు అగరె తొ వల్లరె అమె కడిగిల్లాంచ యావత్తు ఆనందము సంగరె పురువుకు తగిలపనికిరి క్రుతజ్ఞతాస్తుతులు క్యాకిరి కొయిపారొ

10 అమె తొ మో దిక్కిరి తొ విస్వాసంరె రొల్లా లోపముకు తీర్చిలాపనికిరి అనుగ్రహించుబులి రత్తి, దూసు నాచడదినన్నా పురువుకు మనుసుపూర్తిగా పొచ్చుర్లింబొ.

11 అం బో యీలా పురువుకు అం ప్రబువైల యేసుకు అముకు నిరాటంకముగా తొవక్కు కొడిగీకిరి ఆసి.

12 తా పరిసుద్దులు సొబ్బిలింకె సంగరె మిసికిరి అయిలబెల్లె అం బో యీలా పురువు అగరె తొ హ్రూదయనె పరిసుద్ధత వినయంరె నిందనీలపనికిరి రొల్లాపని ప్రబువు స్థిరపరచుసి.

13 సాకిరాక అం ప్రబువైలా యేసు తా పరిసుద్దులు సొబ్బిలింకు సంగరె అయిలాబెల్లె అం బో యీలా పురువు అగరె తొ మనుసూనెకు పరిసుద్ధముగాను కెటువంటి నింద నీలాపనికిరి సెయ్యె తొముకు స్థిరపర్చుసి.

4

పురువుకు సంతోసపరిచిలా జీక

1 చివరిగా అన్నబయినె, అమె ప్రబువైయిలా యేసు ద్వారా తొముకుదిల్లా ఆజ్ఞానె తొముకు తెలుసు. ఈనె తొ యాకిరి సలికిరి పురువుకు సంతోసంకొరిలపని అంవల్లరె సుగ్గిల్లాపనికిరి తొమె సలిగిల్లీసా.

2 ఏ వినయమురె తొమె సెల్లెసెల్లెకు అబివ్రుద్ది పొందిమాసిబులి ప్రబువైల్లా యేసురె ప్రోత్సహించిలింబొ.

3 తొమె పరిసుద్దునె యీతాక, తొమె జారత్వముకు దూరుగా రొవ్వరొ పురువురొ యిష్టంయికిరి అచ్చొ.

4 తొబిత్తరె ప్రతిలింకె, తా నైపా సంగరె క్యాకిరి రొమ్మాసా పరిసుద్ధంగా గౌరవంగా రొమ్మాసా తెలిసిగునోండి.

5 తొమె పురువుకు నా జనిలా పొదరెలింకె పనికిరి కామాబిలాస కలిక్కిరి రొయితెనాండి.

6 యే వినయంకు కేసె అతిక్రమించినాసి. తా అన్నబయినెకు మోసం కొరినాసి; కైంకుబుల్నే మియి అడకగరె తొముకు కొయికిరి సాక్యముదిల్ల ప్రకారము ప్రబువు యడసొబ్బి వినయంరె ప్రతిదండన కొరుసి.

7 పరిసుద్దులైకిరి జీతాక పురువు అముకు డక్కిసి, కామవికారునె పనికిరి రొయితండుకు డక్కిలాని.

8 ఈనె ఉంచినె కేసె మో బోదకు అంగీకరించినె తంకె మనమానుకు అంగీకరించెవరొ నీ గని, అముకు తా పరిసుద్ధాత్మకు అనుగ్రహించిలా పురువుకాక నిరాకరించిలిసి.

9 అన్న బయినె ప్రేమ గురించి తోముకు కేసె రాసితె అవసరము నీ; తోమె జొన్నెకు జొన్నె క్యాకిరి ప్రేమించిగిమంచెవో పురువు తోముకు కొయిసి.

10 సాకిరి తోమె మాసిదోనియరె తల్లా అన్న బయినె సొబ్బిలింకు తోమె ప్రేమించిలీసా. అం అన్న బయినె, తోమె ప్రేమ దికిరి ఇంక బూతుగా రొమంచె బులి ప్రోత్సహించిలింఛో.

11 తో సొంతపైటిసె కొరిగిల్లాటరె తో అత్తోసెసంగరె పైటికొరిగిమంచె బులి ఆస కలిగికిరి రొమ్మాసిబులి, తోముకు ప్రోత్సహించిలింఛో.

12 సంగము బయిలై రొల్లాలింకె ఉంపరె మర్యాదగా సలిగీకిరి, తోముకు తక్కువ కిచ్చి నికుండ అమె తోముకు ఆజ్ఞాపించిలా ప్రకారము తోమె పొదరిలింకంపరె ఆదారపొడితెనాండి.

ప్రబువురో రాకడ

13 అన్నబయినె అప్పబొయినీసె, నిరీక్సన నీలా పొదరిలింకె పనికిరి తోమె బాద నాపొడికుంటా, మొరిజిల్లాలింకు గురించి తోముకు నా తెలిసివురో మెత్తె ఇస్టంనీ.

14 యేసు మొరిజికిరి బుల్లికి ఉటిసిబులి అమె నమ్మిలాపనికిరి, సే ప్రకారము యేసురె మొరిజిల్లాలింకు పురువు తాసంగరె కూడ దరిగీకిరి ఆసిబులి విస్వసించిలింఛో.

15 అమె ప్రబువు కొతా ప్రకారం తోముకు కొయిలాట కిరబుల్నే ప్రబువు అయిలాజాంక జీకిరితల్లా అమె మొరిజిల్లాలింకె కన్నా అగరాక చేరిగిన్నింతో.

16 ఆర్బాటముదీకిరి, ప్రదానదూత సబ్బముదీకిరి, పురువు బూర దీకిరి పరలోకందీకిరి ప్రబువు వొల్లికి ఆసి. క్రీస్తురె మొరిజిల్లాలింకెల్లా అగరె ఉటుసె.

17 సె తర్వాతరె సజీవులైకిరి తల్లా అమె తంకె సంగరె ఏకముగా ప్రబువుకు ఎదిరిగితై ఆకాసమండలముకు మెగోసె ఉంపరె కొడుజోసి. ఈసె అమె కెబ్బుకూ ప్రబువు సంగరె కూడ రొంఛో.

18 ఈసె తోమె ఏ కొతాసె సంగరె జొనుకు జొసె ఆదరించిగీండి.

5

పురువురో రాకడ కోసం సిద్ధపొడివురో

1 అన్నబయినె అప్పబొయినీసె, కలోసె గురించి, సేసమయాసె గురించి మియి తోముకు రాసితె అవసరంనీ.

2 సాకిరి రత్తిబెల్లె సారొ క్యాకిరి ఆసొ ప్రబువు దినొ సాకిరి ఆసిబులి తోముకు బొల్లికిరి తెలుసు.

3 మనమాసె “నెమ్మదిగా అచ్చి, డొరొకిచ్చినీబులి కొయిగీకుంట” పనిదీగీకిరి తల్లా మొట్టకు ప్రసవవేదన బొత్తాసె అయిలాపనికిరి తంకు అకస్మాత్తుగా నాసనము ఆసి గనక తంకె కెమాత్రము తప్పించిగిన్నారె.

4 అన్న బయినె అప్పబొయినీసె, తోమె రత్తినంబందమైలలింకెనింతో గనక సెయ్యె అయిలా దినొ తోముకు సారొ అయిలాపనికిరి తన్ని.

5 తోమె సొబ్బిలింకె హల్లో పిల్లాసె దూసి పిల్లాసెయికిరి అచ్చొ గనక తోమె రత్తి సంబందించిలాలింకెనింతో వొందారెలింకె నింతో.

6 ఈసె పొదరిలింకెపని నాగుమ్మిజికిరి మత్తులుపని నారొయికిరి సతనైకిరి రొండి.

7 గుమ్మిజిల్లాలింకె రత్తిబెల్లె గుమ్మిజోసె, మత్తుగా తల్లాలింకె రత్తిబెల్లె తంకె పీకిరి మత్తుగా తాసె.

8 అమె హల్లో సంబందికులుగా అచ్చొ గనక మత్తులునాయికుంటా, విస్వాస ప్రేమబుల్లా కవచము, రక్సనబుల్లా నిరీక్సన సిరస్తానముకు పిందిగిమండి.

9 కైంకిబుల్నే అం ప్రబువైలా యేసు క్రీస్తు సంగరె రక్సన పొందిగిత్తాక అముకు బచ్చిగిచ్చి ఈసె ఉగ్రతకు ఎదిరిగితై నీ.

10 అమె మొరిజికిరి తన్నెను, జీకిరి తన్నెను సె అయిలబెల్లె తాసంగరె మిసికిరి జీతాక అం కోసం సెయ్యె మొరిజిసి.

11 సడకు తోమె ఉంచినె కొరిలాపనాక జొనుకు జొసె ఆదరించిగీకిరి జొనుకు జొసె క్షేమాబివుద్ది కలిగికిరి రొండి.

చివరి సలహాలు ఇంకా దండము

12 ఈసె అన్నబయినె అప్పబొయినీసె, తోమె ప్రయాసపొడుకుంటా ప్రబువురె తోముకు ఉంపరెలింకెపని రొయికిరి తోముకు బుద్ధికొయిలలింకు గౌరవించండి.

13 తంకె పైటిబట్టి తంకు ప్రేమసంగరె మిక్కిలి గనముగా బచ్చిగిమంచెబులి కొరిగిల్లింఛో; ఈసె తొబిత్తరె తోమె సమాదానముగా రొండి.

14 అన్నబయినె, అమె తొముకు బోదించిలించి కిరబుల్నే అక్రమముగా సలిగిలలింకు బుద్దికొండి, దైర్యము చెడిలాలింకు దైర్యముకొండి, బలహీనులుకు ఊత దెండి, సొబ్బిలింకె ఉంపరె దీర్గసాంతిముగలిగి రొండి.

15 కేసైనా కీడుకు ప్రతికీడు కాకైనను నా కొరుకుంట దిగెండి; తొమె జొన్నెఉంపరె జొనె మనమానె సొబ్బిలింకె ఉంపరె కెబ్బుకు బొల్లకొరితె అనుసరించికిరి సలండి.

16 కెబ్బుకు సంతోసంగా రొండి;

17 నా సడిదికుండ కెబ్బుకు ప్రార్దన కొరొండి;

18 ప్రతి వినయంరె క్రుతజ్ఞతాస్తుతులు చెల్లించొండి. యాకిరి కొరువురొ పురువురొ ఇస్టంకు కొరికిరి యేసు క్రీస్తురె మిసికిరి అచ్చొ.

19 పురువురొ ఆత్మ వెలిగించిమాసి బొత్తి నుగిదీతెనాండి.

20 ప్రవచించువురొ నిర్లక్యము కొరితెనాండి.

21 సొబ్బిటికు పరీక్సించికిరి కిర బొల్లవొ సడకు కొరొండి.

22 ప్రతి విదమైల కీడుకు దూరుగా రొండి.

23 సమాదానకర్తయిల్లా పురువు తొముకు సంపూర్ణంగా పరిసుద్దపరిచివురొ గాక. తొ ఆత్మ, జీవము దేకు అమె ప్రబువుయిలా యేసుక్రీస్తు అయిలబెల్లె నిందానీలపనికిరి, సంపూర్ణంగా రొల్లపనికిరి కాపాడిమాసి.

24 తొముకు డక్కిలాట నమ్మకం యీలాట గనక సెయ్యె సాకిరి కొరుసి.

25 అన్నబయినె, అమె కోసం ప్రార్దన కొరొండి.

26 పవిత్రమైలా చుమ్మొలోగ్గికిరి అన్నబయినె సొబ్బిలింకె దండమానె కొరొండి.

27 అన్నబయినె సొబ్బిలింకె ఏ పత్రిక చదివికిరి నుందెమంచెబులి ప్రబువు నారె తొముకు ఆదేసించిలించి.

28 అమె ప్రబువైలా యేసుక్రీస్తు క్రుప తొముకు తోడైకిరి రొమ్మాసి.

పాలు తెస్సలొనికయులకు రాసిన రెండో పత్రిక పాలు తెస్సలొనికయులకు రాసిన దీటో పత్రిక అగరో కొత

తెస్సలొనికకు రాసిలా దీటో పత్రిక అపోస్తులుడైలా పాలు అత్తోదికిరి రాసివురో ఈసి. 1:1 గుట్టో పత్రిక రాసిలా తర్వాతరె యే ఉత్తరం క్రీస్తు జోర్వైలా తర్వాతరె 51 వ బోచ్చురె రాసికిరి రొవ్వొచ్చు. పాలు ఇంకా కొరంతి పట్టుంరె రొల్లబెల్లాక తెస్సలొనికలింకు యే ఉత్తరం రాసికిరి రొవ్వొచ్చు. అపో 17:1-10 లో రొల్లా వచనాలు బట్టి యే సంగము సెయ్యో దీటో సువార్త ప్రయానంరె స్తాపించికిరి రొవ్వొచ్చు. అపోస్తులు కార్యాలు పుస్తకమురె కొయిలాపనికిరి కుండెలింకె యూదునె ఇంకా కుండెలింకె గ్రీకులింకె సంగరె మిసికిరి తల్లా సంగముగా కొయితాసె.

తెస్సలొనిక సంగస్తులు దీటో రాకడ గురించి ఎక్కువుగా ఆసక్తి దిగిపించువురో వల్లరె పాలు తా దీట పత్రికలై చివరి దినోనె గురించి ఇంకా క్రీస్తు దీటో రాకడ గురించి ఎక్కువుగా రాసివురో ఈసి. యే దీట ఉత్తరాలై సకానుకు సకం చివరి దినోనె కోసమాక రాసికిరి అచ్చి. యాండ్రె పాలు సోమరితనం గురించి హెచ్చరించుకుంటా తంకె తంకద్ది కోసం ప్రతీ మనమ పైటి కొరిమాసిబులి కొయిసి. 3:6-10

సంగతినె

1. పాలు తా గురించి ఇంకా తా సంగరె పైటికొరిలాలింకె గురించి పరిచయం కొరికుంటా ఉత్తరం ప్రారంభించువురో 1:1-2
2. ఎట్టె పాలు తెస్సలొనిక రె రొల్లా సంగము గురించి పురువుకు దండము కొయికుంటా తంకోసం ప్రార్థించువురో. 1:3-12
3. పాలు చివరి దినోనె గురించి కొతలగువురో 2
4. పాలు చివరి దినోనె బద్దకస్తులు గురించి వ్యతిరేకించికిరి పైటి కొరిమాసి బులి కొతలగువురో. 3:1-15
5. పాలు ఇంగుటబెల్లె సంగముకు సుబాలు కొయికిరి ముగించువురో. 3:16-18

అబిదండము

- 1 అం బో యాల పురువు దీకిరి ప్రబువైల యేసుక్రీస్తురె రొల్ల తెస్సలొనిక సంగముకు పాలు, సిల్వాను, తిమోతి సుబం బులి కొయికిరి రాసిలాట.
- 2 బో యాల పురువుదీకిరి ప్రబువైల యేసుక్రీస్తుదీకిరి క్రుప సమాదానము తొముకు కలిగిమాసి.

అయితల్లా క్రీస్తురో తీర్పు

3 అన్న బయి అప్పబోయినె, అమె కెబ్బుకు తొం గురించి పురువుకు క్రుతజ్ఞతాస్తుతులు చెల్లించితె ప్రేమకలిక్కిరి అచ్చొ. యెడ బోల్లాక క్యాకిరిబుల్నే తొం విస్వాసము దినోదినో బడె అబివుద్ది కలిగిలీసి. తొమె సొబ్బిలింకె బిత్తరె ప్రతిలింకె ఎదుటిలింకె ఉంపరెదిగిదెల్లా ప్రేమా విస్తరించిలీసి.

4 సడవల్లరె తొం హింసలు సొబ్బిటిరె, తొమె సహించితల్లా స్రమానెబిత్తరె, తొం ఓర్పుకు విస్వాసముకు దిక్కిరి, అమె పురువురో సంగములురె తొం వల్లరె అతిసయపొడిలింకె.

5 కెడకోసం తొమె స్రమపొడిలీసావొ సె పురువురో రాజ్యముకు తొమె యోగ్యునె బులి బచ్చిగివురోవల్లరె, తొమె యాకిరి ఓర్పుగివురో పురువురో న్యాయమైలా తీర్పురె తొమె యోగ్యులైకిరి అచ్చొ.

6 తొముకు స్రమలోగిలాలింకు స్రమానె, స్రమపొడితల్లా తొముకు అం దీకిరి కూడ విస్త్రాంతి దీతందుకు పురువుకు న్యాయమాక.

7 పురువుకు నాజనిలాలింకు, అం ప్రబువైలా యేసు సువార్తకు నాలోబొడిలలింకు ప్రతిదండం కొరుసి.

8 ప్రబువైలా యేసు తా ప్రభావంకు దిగిదిల్లా దూతలసంగరె కూడ పరలోకముదీకిరి నియ్యజొల సంగరె దిగిదీకిరి,

9 సెయ్యో తా ప్రభావం తీకిరి ఏర్పరిచిగిల్లాలింకు నిత్యమైలా సిక్కుకు ఒప్పకొయివొ.

10 తా సముకము దీకిరి సెయ్యో ప్రభావమురో మహిమదీకిరి గొడ్డికిరి, నిత్యనాసనము బుల్లా సిక్కు పొందిగివ్వె. క్యాకిరిబుల్నే అమె తొముకు దిల్లా సాక్స్యము తొమె నమ్మిసా.

11 సడసంగరె అం పురువువల్లరె ప్రబువైలా యేసు క్రీస్తువలరె క్రుప దీకిరి తొంబిత్తరె అం ప్రబువైలా యేసు నారె తా సంగరె తొమె మహిమపొందిలాపనికిరి,

12 మేలు కొరిమాసిబులి తోముకు కలిగిలా ప్రతి ఆలోచనకు, విస్వాసయుక్తమైలా ప్రతి కార్యముకు బలందీకిరి సంపూర్ణము కొరికుంటా, అం పురువు తా డక్కకు తోముకు యోగ్యునెగా బచ్చిగిల్లాపనికిరి తొ కోసం కెబ్బుకూ ప్రార్థన కొరిలింఱొ.

2

నియమ సాస్త్రముకు నాఅనుసరించెలా మనమ

1 ఈనె మో అన్నబయినె, అప్పబొయినె అం ప్రబువైలా యేసుక్రీస్తు అయిలాబెల్లె, అమల్లా తా సంగరె మిసికిరి తైతండుకు, తోముకు బతిమాలిగిల్లించి తొమె బేగా మనుసూనై కలవరం నీకుంటా, నా బెదురుకుంటా తమ్మాసిబులి కొరిగిల్లించొ.

2 ఈనె యెడ కోసం అం బోదరె, ప్రవచనాలై, ఇంకా ఉత్తరాలై కొయివురో ఈనన్నా అం ప్రబువు దినో ఉంచినాక అయిలాపనికిరి కొయినెను తొ ఆలోచనలై గాని కొతానై గాని కలవర పొడితెనాండి.

3 దర్మసాస్త్రముకు నాలోబొడిలాట చివరి విరోధినాయికుంటా సే దినో అయిని. నడవల్లరె కేసైనను, కేవిదంగా యినెను మోసం నాయాజీకుంటా దిగ్గునొండి. తా గమ్యం నరకం.

4 యెయ్యె పురువుబులి కోసి, కిర పూజింపబొడుసా, నడానుకల్లా ఎదిరించుకుంటా, నడంపరల్లా తాకు సెయ్యాక హెచ్చించిగీకుంటా, సెయ్యె పురువుబులి, పురువో మందిరంరె బొసురుసి.

5 మియ్యి తొసంగరె తల్లబెల్లె ఎడల్లా తోముకు కొయించి. నడ తోముకు గుర్తునీనా?

6 ఈనె దర్మవిరోధి తా సొంత కలై పొదరె పొడుసిబులి. తాకు అడ్డగించిలాట కిడో తోముకు తెలుసు.

7 ఈనె సెయ్యె ఉంచినె స్రమపొడితల్లాలింకు అం దీకిరి కూడా నెమ్మది దూసి. ఈనె యెడానెల్లా ప్రబువైలా యేసు తా గొప్ప దేవదూతానె దీకిరి దిగిదిల్లాబెల్లె కొరుసి.

8 సెయ్యె నియ్యజొలానె సంగరె అయిలాబెల్లె కేసినే పురువుకు నిరాకరించెలీనెవో ఈనె అం ప్రబువైలా యేసుక్రీస్తు సువార్తకు నాఅంగీకరించెలాలింకు సిక్కించుసి.

9 ప్రబువు తాగొప్ప మహిమ అగరె తంకు ప్రత్యేకపర్చికిరి నిత్యమైలా సిక్కిదీకిరి నాసనముకు పొడదూసి.

10 తా మహిమదీకిరి అయిలా దినై విస్వసింఱెలాలింకల్లకు ఇంకా తా ప్రజానెకు ప్రసంసించుసి. కైంకిబుల్నే అమె తోముకు కొయిలా సందేసం తొమె నమ్మిసా.

11 మేలు కలిగిమాసిబులి తొబిత్తరె విస్వాసం సంగరె కలిగిలా ప్రతి ఆలోచన, ప్రతిపైటి బలముసంగరె సంపూర్ణి కొరితల్లా అం పురువురో డక్కకు తొమె యోగ్యులుగా బచ్చిమాసిబులి తొకోసం కెబ్బుకూ ప్రార్థనకొరిలింఱొ.

12 యే విదంగా అం పురువురో, అం ప్రబువైలా యేసుక్రీస్తురో క్రుప వల్లరె తొదీకిరి అం ప్రబువైలా యేసురో నా ఇంకా తాదీకిరిపాటు తొమ్మంకా మహిమపొందివొ.

రక్సన కోసం బచ్చిగిల్లాలింకె తొమ్మాక

13 ప్రబువు ప్రేమించెలా అన్నబయినె అప్పబొయినె, ఆత్మ తోముకు పరిసుద్ధపర్చిలందరె, తొమె సత్యముకు నమ్మిలందరె, రక్సన పొందితె పురువు తోముకు అగుంత దీకిరి బచ్చిగిచ్చి గనక అమె తొవల్లరె కెబ్బుకు పురువుకు క్రుతజ్ఞతాస్తుతులు చెల్లించెలించొ.

14 తొమె యాకిరి రక్సంపబొడికిరి అం ప్రబువైలా యేసుక్రీస్తురో మహిమకు పొందిమాసిబులి, సెయ్యె అం సువార్త వల్లరె తోముకు డక్కిసి.

15 ఈనె అన్నబయినె అప్పబొయినె, కెబ్బుకు గుటెపనాక రొయికిరి అమె తుండొ కొతవల్లరె యినెను అం పత్రిక వల్లరె యినెను తోముకు సత్యమురె బోదించెలా విదానాలై స్థిరంగా రొండి.

16 అం ప్రబువైలా యేసు క్రీస్తుకు, అముకు ప్రేమించికిరి, తా క్రువరె నిత్యమైలా ఆదరన, ఇంకా నిచ్చయత, నిరీక్సనకు అనుగ్రహించిమాసి.

17 సాకిరాక బొల్లకొయివురో విసయంరె కెబ్బుకూ జొసుకు జొనె ప్రొత్సాహించిగీకుంటా బలపర్చిగిండి.

3

అం కోసం ప్రార్థన కొరొండి

1 చివరగా అం అన్నబయినె అప్పబొయినీనె, తొం మొజిరె జరిగితల్లా పనికిరి ప్రబువు వాక్యము బడే వ్యాపించికిరి మహిమపర్చిలా నిమిత్తం అం కోసం ప్రార్థన కొరొండి.

2 సాకిరాక అమె మూర్కులు ఇంకా దుష్టులుతీకిరి తప్పించిగిల్లా పనికిరి అమె కోసం ప్రార్థన కొరొండి; ఈనె అంకొతానంపరె తంకు సొబ్బిలింకు విస్వాసంనీ.

3 ఈనె ప్రబువు నమ్మదగిలాట; సెయ్యె తొముకు స్థిరపర్చికిరి దుష్టుడుతీకిరి కాపాడువొ.

4 అమె తొముకు ఆజ్ఞాపించిలాంచకు తొమె కొరిలీసా బులి, ఇంకా కొరువొబులి ప్రబువురె తొం గురించి నమ్మకము కలిగికిరి అచ్చొ.

5 పురువురె ప్రేమ, క్రీస్తు దిగిపించిలా ఓర్పు తొముకు కలిగిలాపనికిరి ప్రబువు తొమె మనుసూనెకు ప్రేరేపించుసి.

బద్ధకం గురించి హెచ్చరించువురొ

6 అం అన్నబయినె అప్పబొయినీనె, అంవల్లరె పొందిలా బోద ప్రకారము నాకొరికిరి బద్ధకముగా సలిగిల్లా ప్రతి అన్నబయినె పక్కరెతీకిరి తొలగిజమ్మాసిబులి అమె ప్రబువు యీల యేసు క్రీస్తు నారె తొముకు ఆజ్ఞాపించిలించ్చొ.

7 అముకు పోలి క్యాకిరి సలిగిమ్మాసివొ తొముకు తెలుసు. అమె తొం మొజిరె బద్ధకముగా సలిగిల్లానింతొ.

8 కాపక్కరె సుచ్చరె కద్ది కడిగిల్లానింతొ. అమె తొంబిత్తరె కాకూ బారంగా రొన్నాసిబులి ప్రయాస సంగరె కష్టాలుసంగరె రత్తిదూసు పైటికొరికుంటా జీంచొ.

9 తొమె అముకు పోలికిరి సలిగిమంచెబులి అముకు అమె మాదిరిగా దిగిపించిగిమ్మాసిబులి యాకిరి కొరించొ. ఈనె అముకు తొంవుంపరె అదికారం నీకిరి నీ.

10 ఈనె అమె తొంపక్కరె తల్లాబెల్లె కేసెనెను నాపైటికొర్నే సెయ్యె కద్దికైనాసిబులి తొముకు ఆజ్ఞదీంచొ నీనా!

11 తొంబిత్తరె కుండెలింకె కేపైటి నాకొరికుంటా పొదలింకె జోలుకు జేకుంటా, బద్ధకముగా సలిగిల్లిసాబులి సునిలించ్చొ.

12 సాలింకె మెల్లిగ పైటికొరికుంటా, సొంతముగ సంపాదించిగిల్లా కద్ది కైమంచిబులి అం ప్రబువైలా యేసుక్రీస్తు నారె తంకు ఆజ్ఞపూర్వకముగా హెచ్చరించిలించ్చొ.

13 ఈనె అన్నబయినె తొం యీనె బొల్ల పైటినె కొరితె విసిగితెనాండి.

14 ఏ పత్రికవల్లరె అమె కొయిలా కొతానుకు కేసెనెను నాలొబొడినె తంకు కనిపెట్టికిరి, సెయ్యె లజ్జోపొడిలపనికిరి తాసంగరె స్నేహం కొరితెనాండి.

15 ఈనెను తంకు సత్తువూనెగా నాదిక్కిరి అన్నబయినె బులిగీకిరి బుద్దికొండి.

ఆకరు కొతానె

16 సమాదానకరైలా ప్రబువు సెయ్యక కెబ్బుకూ ప్రతి విదముసంగరె తొముకు సమాదానం అనుగ్రహించుసి. ప్రబువు తొముకు తోడైకిరి తాసి.

17 పాలు బుల్లా మియి మో సొంత అత్తో సంగరె వందనముబులి రాసిలించి. ప్రతి పత్రికరె మీ క్యాకిరి రాసించ్చొ యెడాక ప్రత్యేకించితె గుర్తు.

18 అం ప్రబువైలా యేసుక్రీస్తు క్రుప తొముకల్లా తోడైకిరి రొమ్మాసి.

పాలు తిమోతికు రాసిన మొదటి పత్రిక పాలు తిమోతికు రాసిన అగరె పత్రిక అగరె కొత్త

గుట్టో తిమోతి పత్రిక అపో. పాలు తా సిస్యుడైలా తిమోతికు రాసితల్లా పత్రిక. యే పత్రిక క్రీస్తు జొర్నైలా 62-64 యె మొజికలై రాసికిరి రొవ్వొచ్చు. యే పత్రిక పాలు జీవితంరె చివరిగా రాస్తల్లా పత్రిక. యే పత్రికె పాలు తిమోతి గురించి తా సొంత పో గా బడేసార్లు కొయివురో యీసి. పిలిప్పీ 2:22; 1 తిమోతి 1:2,18.

పాలు సంగముకు బదులుగా మనమానో నానె సంగరె రాసిలా చార ఉత్తరాలై యెడ గుట. తల్లాంచ 2 తిమోతి, తీతుకు, పిలోమోను. యే గుట్టో తిమోతి పత్రికరె బడే సూచనలునె దీసి. తాండ్రె సంగం ప్రార్థన గురించి 2:1-15 ఇంకా సంగం బొడిదిల్లలింకెరొ అర్థత గురించి 3:1-13 ఇంకా సారొబోదకు గురించి హెచ్చరిక 1:3-11; 4:1-5; 6:2-5 యెడకు దరికిరి పాలు సంగాలు మొజిరె బొట్టాలింకెగా క్యాకిరి తమ్మాసా తొమోతికు తర్పిదు దివ్వరో. యె గుట్టో తిమోతి పత్రికరె సంగబొడిలింకెకె ఇంకా స్త్రానికనాయకులు సంగముకు క్యాకిరి నలిపించిమాసో బడే సిద్ధాంతాలు ఉంచినెదాకా ఉపయోగించిగిల్లాపనికిరి అచ్చె.

సంగతీనె

1. పాలు తిమోతికు సుబాలు కొయికుంటా ఆరంబించువురో. 1:1-2
2. పాలు తిమోతికు సారొబోదకులు గురించి జాగర్తబులి హెచ్చరించువురో. 1:3-11
3. పాలు యేసుక్రీస్తుకు కేవిదంగా క్రుతజ్జుడైకిరి అచ్చొ వివరించువురో. 1:12-19
4. పాలు తిమోతికు ఆరాదన గురించి, సంగబొడిలింకె గురించి సూచనలు దివ్వరో. 2:3
5. పాలు తిమోతికు చివరి సూచనలు దీకుంటా ఉత్తరముకు ముగించువురో. 4:6

దండము

¹ అం రక్కకుడైలా పురువు వల్లరె అం నిరీక్సన యీల క్రీస్తుయేసు రొ ఆజ్జ ప్రకారము క్రీస్తుయేసు రొ అపోస్తులుడు యీలా పాలు రాసితల్లా సంగతీనె.

² విస్వాసము వల్లరె మో సొత్తైల పో యీలా తిమోతికు సుబం బులి కొయికిరి రాసిసి. బో యీలా పురువుసంగరె అమె ప్రబువైల క్రీస్తుయేసు దీకిరి క్రుప కనికరముకు సమాదానము తొత్తై కలుగుసి గాక.

సారొబోదకు నాకొరుకుంటా గద్దించువురో

³ మియ్యి మాసిదోనియకు జేతన్నుగా సారొబోదానె కొరితల్లా కుండెలింకు హెచ్చరించితందుకు మియి తొత్తై ఎపెనురె రొమ్మాసిబులి ఆజ్జాపించించి.

⁴ కల్పించిల కతానె హద్దులునీలా వంసావలీనె, విస్వాస సంబందమైలా పురువురో ఏర్పాటు నీకుంటా వివాదము పుట్టించితల్లా ఎడానుకు నడదిమ్మాసిబులి తంకసంగరె కో బులిసి.

⁵ ఉపదేసం సారము కిరబుల్పే, బొల్ల హ్రుదయందీకిరి, బొల్ల మనసాక్సిదీకిరి, నిస్కపటమైలా విస్వాసముదీకిరి కలిగితల్లాట ప్రేమాక.

⁶ కుండెలింకె యెడానుకు సడికిరి బాజీకిరి, తంకె నాపైటికైలా బోదానెరె పొడిజీనె.

⁷ తంకె కొయిలాట యీనెను, నిచ్చయమైలపనికిరి రూడిగా కొతానెకైనెనూ అర్థం నాకొరిగిన్నార్నన్నా దర్మసాస్త్రంరొ ఉపదేసకులైకిరి రొమ్మాసి బులిగిల్లీనె.

⁸ దర్మసాస్త్రము సడ ఉపయోగించిలాటకు దరికిరి, సడ బొల్లబులి అముకు తెలుసు.

⁹ ఈనె యే దర్మసాస్త్రము బొల్లలింకు కోసం దిల్లానీబులి జ్ఞాపకం దీగిండి. దర్మవిరోదూనెకు, అవిదేయునెకు, బక్తిహీనునెకూ, పాపోనెకూ, అపవిత్రానెకు, మతదూసకునెకూ, మా బోనుకు మొరదిల్లాలింకూ, నరహంతకునెలింకూక.

¹⁰ ఇంకా దర్మిపైటికొల్లాలింకు, పురుసుసంయోగులుకు * మనమానుకు చొరిపీలాలింకు, చొరొకొతానె కొయిలాలింకు, చొరొకొతాలగిలాలింకు, చొరొసాక్సం కొయిలాలింకు, ఇంకా బొల్లబోదకు విరోదంగా కొతలగిలాలింకు దీసి.

* 1:10 మొడ్రపోనెసంగరె గత్తపైటినె కొరిలాలింకె .

11 మహిమగల్గా ఆసీర్వాదముకు కారణమైలా పురువుదీకిరి మెత్తె ఒప్పకొయిలా యే ఉపదేశము సువార్తలురె రొయిదివ్వరో ఈసి.

పురువురో కనికరముకు క్రుతజ్ఞతలు

12 మెత్తె బలపరిచికి తా పరిచర్యకు నియమించికిరి అమె నమ్మకైలాట పనికిరి బచ్చిగిల్లా ప్రబువుయిలా క్రీస్తు యేసుకు క్రుతజ్ఞతలు చెల్లించిలించి

13 కైంకిబుల్నే అగరె కల్రె దూసించిలాట, హింసిచిలాట, బాదించిలాటైలా మెత్తె, పురువుంపరె విస్వాసం నీనన్ననూ, కిరకొరిలింఱో మీ నాజనినన్నా. పురువు మో ఉంపరె కనికరము దిగదీసి మియి నా తెలిసికిరి అవిస్వాసము వల్లరె కొరించి గనక కనికరింపబోడించి.

14 ఈనె అం ప్రబువురో క్రుప, క్రీస్తు యేసు ద్వారా విస్వాసమును ప్రేమ, అత్యధికముగా అనుగ్రహించిసి.

15 మియి సొత్తాక కొయిలించి పాపోనెకు రక్సంచితె క్రీస్తుయేసు లోకొకు అయిలాపని వాక్యము నమ్మితె పూర్నాంగికారమైలాట. సే పాపోనె బిత్తరె మియ్యి అగరోట.

16 ఈనెను నిత్యజీవము నిమిత్తము తాకు విస్వాసించిలాలింకు మియ్యి మాదిరిగా రొల్లపనికిరి యేసు క్రీస్తు తా పూర్నమైలా దీర్గసాంతముకు సె ప్రదాన పాపియిలా మోవుంపరె దిగిదీలాపనికిరి మియ్యి కనికరింపబోడించి.

17 సకల యుగమునెరె రొజైకిరి, అధ్రుస్యుడైలా అద్వితీయ పురువుకు గనత మహిమ కెబ్బుకూ కలిగిమాసి.

18 మో పోయిలా తిమోతి, తువ్వ విస్వాసమురె బొల్ల మనస్సాక్కి కలిగిలాటయికిరి, తో కోసం అగరాక కొయిలా ప్రవచనములు, ఏ బొల్ల పోరాటం పోరాడివాసిబులి సడకు ఏ ఆజ్ఞకు తొత్తె అప్పగించిలించి.

19 బొల్ల మనస్సాక్కి కుండిలింకె వొంకిదీకిరి, విస్వాసంరె తొలిగిజికిరి అచ్చె.

20 తంకె బిత్తరె హుమెనై, అలెక్సంధ్రు అచ్చె. అంకె ఇంకా నాదూసించకుంటా సిక్కింపబోడితాక సాతానుకు అప్పగించించి.

2

సంగమురె ఆరాదన

1 అగుంతా తొమల్లా ప్రజానె కోసం పురువుకు ప్రార్థనలు, విజ్ఞాపనలు, క్రుతజ్ఞతలు కొరుమాసిబులి ఆజ్ఞాపించిలించి.

2 అమె నెమ్మదిగా, సుకముగా జితే నిమిత్తము, బుల్నే, రొజానె కోసం, అదికారినెసాబ్బిలింకె కోసం, పొదరలింకె కోసం విజ్ఞాపనానె, ప్రార్థనలు కొరొండి.

3 యడ బొల్లట అమె రక్సకుడుయిలా పురువురో అంకికి అనుకూలమైకిరి అచ్చి.

4 తా, మనమానె సాబ్బిలింకె రక్సనకడిగికిరి సత్యము గురించి అనుబవజ్ఞానముగలిగిల పనికిరి రొమ్మంచెబులి ఆసపొడిలీసి.

5 పురువు జొన్నాక, పురువుకు మనమానెకు మొజిరె తల్లాట జొన్నాక; సెయ్యె క్రీస్తుయేసు బుల్లా మనమ.

6 సెయ్యె సాబ్బిలింకు కోసం విమోచన కలిగిమంచెబులి తాకు సెయ్యాక సమర్పించిగినిసి. యడ గురించిలా సాక్యము దీతె సరైలా కలొరె దివ్వొరొయిసి.

7 ఏ సాక్యము దీతండుకు మియ్యి ప్రకటించిలలింకెపని, అపొస్తులుడుగా, విస్వాసము, సత్యము వినయమురె పురువుకు నా నమ్మిగిలలింకు బోదకొలలింకెగాను నియమించిసి. మియ్యి సారొకొతా కొయిలాని సొత్తాకా కొయిలించి.

8 ఈనె ప్రతిస్తలమురె వొండ్రపొ రగ్గొకు వాదనలకు సడికిరి, పవిత్రమైలా అత్తొనె సంగరె ప్రార్థన కొరిమంచెబులి కోరిగిల్లించి.

9 ఈనె తిల్లాపిల్లానె అనుకువుగా తైకిరి, స్వస్తబుద్ధి గలిగిలాట ఈకిరి, సరైలా కొన్నానె పిందిగీకిరి, సోకుజటానెదీకిరి ఈనెను, సున్నదీకిరి ఈనెను, ముత్యములుదీకిరి ఈనెను బడే కరీదైల కొన్నానె సంగరె అలంకరించిగిన్నాసి.

10 ఈనె పురువురోబక్కి కలిగిలా తిల్లాపిల్లనుకు, తగిలపనికిరి బొల్లపైటీనె సంగరె తంకు తంకాక అలంకరించిగిమ్మాసి.

11 తిల్లాపిల్ల వల్లాగ రొయికిరి, సంపూర్న విదేయతదీకిరి సుగ్గీమంచి.

12 తిల్లాట వల్లాగ రొమ్మంచిగాని, ఉపదేశంచితె ఈనెను, వండ్రపొ ఉంపరె బొడతనం కొరితె ఈనెను తాకు అదికారం దిల్లానీ.

13 అగరె ఆదాముకు తరువాతరె హవ్వకు నిర్మించబోడినె నీనా?

14 ఈనె ఆదాము మోసపొడిచిలాని గాని, తిల్లాట మోసపొడికిరి పురువురో ఆజ్ఞకు మీరిసి.

15 ఈనెను తంకె స్వస్థబుద్ధి కలిగికిరి, విస్వాస ప్రేమ, పరిసుద్ధతనంగరె నిలకడగాటారికిరి తన్నె, సినుప్రసూతి సంగరె సెయ్యె రక్షింపబోడిసి.

3

సంగ నాయకులురో అర్హతలు

1 కేసెనెను సంగమురె బోడోపదవి ఆసింపిలపనా సెటెలింకు బోడోపైటి అపేక్షించించిలీసా బులి కొతా నమ్మదగిలాట.

2 బోడ మనమ యీలట నిందారహితుడును, జొన్నాక నైపో వండ్రపోకు, మితానుబవుడును, స్వస్థబుద్ధిగలిలలింకె, మర్యాదదిల్లలింకె, అతిదిప్రియుడుకు, బోదించితె తగిలాటైకిరి తమ్మాసి.

3 మొద్దో నాపీలాటైకిరి తవ్వాసి, రగ్గో తన్నాసి, సాత్వికుడైకిరి మర్యాద తైకిరి, కొలీనె నాలగిలాట పనికిరి, పలియ ఆస తన్నాసి.

4 సంపూర్ణ మాన్యత కలిగికిరి, తా పిల్లానుకు బొల్ల బట్టోరె సలిపించిగీకిరి, తా గొరొలింకు బొల్లెవలిలాటైకిరి రొమ్మంచి.

5 కేసెనెనూ తా గొరొలింకు సరిగా దిగినార్చే, సెయ్యె పురువురో సంగముకు క్యాకిరి దిగిపారి?

6 సెయ్యె గర్వాండుడైకిరి తన్నాసి, అపవాదికు కలిగిలా సిక్సావిదికి నాలోబోడిలాపనికిరి పరిపూర్ణ విస్వాసం కలిక్కిరి తమ్మాసి.

7 ఈనె సెయ్యె నిందపాలు నాయాకిరి, మనమానె సొబ్బిలింకు సంగరె గౌరవించబోడిమాసి. అపవాది వలరె నా పొడుకుంటా, సంగము బయలురె బొల్ల సాక్యము కలిగిలాటపనికిరి రొమ్మంచి.

సంగమురె పరిచారకులురో అర్హతలు

8 సాకిరాక పరిచారకులు మాన్యలైయికిరి, దీరజిబ్బొ కలిగిలాలింకె, మొద్దోపికారీనె, దుర్లాబముకు ఆసింపిలాలింకె పనికిరి రొన్నాసి. బొల్ల బుద్ధి కలిక్కిరి రొమ్మాసి.

9 తంకె పవిత్రమైలా విస్వాస సత్యంకు పవిత్రమైలా మనస్సాక్సి దీకిరి కొయితె కలిక్కిరి రొమ్మంచి.

10 ఈనె తంకె అగరె పరీక్షింపబోడిమంచి. తరువాత తంకె అనిందులు ఈనె పరిచారకులుగా రొవ్వొచ్చు.

11 సాకిరాక పరిచర్యకొరిలాలింకెరో నైపోనె పొదరలింకు గౌరవించికిరి, బొల్ల గునొ కలిక్కిరి, నీలాకొతానె నాకొయిలలింకె పనికిరి, తగ్గించిగిల్లా స్వబావము కలిగీకిరి, సొబ్బి వినయములరె నమ్మకంగా రొమ్మంచి.

12 పరిచర్య కొరిలాలింకు జొన్న నైపోక తవ్వాసి. సెయ్యె తా పిల్లలకు తా గొరొలింకు బొల్లె దిగిమ్మాసి.

13 పరిచారకులు ఈలలింకె సే తా పైటి బొల్లె కొరిలాటైకిరి తమ్మాసి. బొల్ల పదవికు సంపాదించిగిరి క్రీస్తుయేను బిత్తరె విస్వాసం దీకిరి బడే దైర్ఘ్యము కలిగిలాలింకె యీపారె.

గొప్పీట యితె మర్మము

14 తో పక్కు బేగా అయికిరి తొత్తె దిగిమాసిబులి నిరీక్సన సంగరె యే ఉత్తరం తొత్తె రాసిలించి.

15 ఈనెను మియ్యి ఆలస్యం కొరువురో వల్లరె పురువురో మందిరమురె, జీవముగల పురువురో సంగమురె, తువ్వకాకిరి ప్రవర్తించిమాసా సెడ తొత్తె జనిమంచి బులి యే సంగతినెకు తొత్తె రాసిలించి. సె సంగము సత్యమునకు ఆదారమైకిరి అచ్చి.

16 దైవ బక్తి గురించి కేసే నిరాకరించినార్లా నుచ్చిదిల్లా సంగతి అచ్చి.

సెయ్యె ఆత్మద్వారా నీతిపరుడుబులి దిగిపించబోడికిరి

మనమరూపం దరించిగీకిరి

దేవదూతానె సంగరె దిగదూసి.

సెయ్యె ప్రపంచరె రొల్లాసొబ్బిలింకె నమ్మిలాపనికిరి

సొబ్బి దెసొనై రక్సన ప్రకటించికిరి

సెత్తెలెపరలోకముకు ఆరోహనమైజోసి.

4

సారోబోదకులు

1 ఈనె ఆత్మ తేటగా కయివురో కొయిలాట కిరబుల్చే, యే చివరి దినోనై కుండెలింకె సారోకొతా వేసదారన వల్లరె మోసంకొర్లా ఆత్మలదీకిరి. బుత్తొనె బోదరె లక్సం లొక్కిరి, విస్వాస బ్రష్టునె ఈజేసి.

- 2 సె సారోకొతా, సుర్రకా పొగిల మనస్సాక్సియాలాలికె పని చెడు బోద కొరిలీసె.
 3 బ్యూ నిసేదింఛికిరి, సత్యవిసయమైకిరి అనుబవజ్ఞానముగల విస్వాసీనె క్రుతజ్ఞతాస్తుతులు చెల్లించికిరి కడిగిల్లా నిమిత్తము పురువు స్రుస్థించిలా కద్ది వస్తువునుకు కుండె కైయివురో మానిపింపించెబులి కొయిలీసె.
 4 పురువు స్రుజించిలా ప్రతి వస్తువు బొల్టాక. క్రుతజ్ఞతాస్తుతులు చెల్లించికిరి కడిగిల్లాబెల్లె కిచ్చి కూడా నిసేదింఛిలాటనీ.
 5 క్యాకిరిబుల్వే సడ పురువురో వాక్యము వల్లరె ప్రార్థన వల్లరె యానెను పవిత్రం కొరివురో ఊసి.

యేసు క్రీస్తురో బొల్ల సేవకుడు

- 6 ఏ సంగతీనెకు అన్నబయినెకు వివరించినె, తువ్వు అనుసరించికిరి అయితల్లా విస్వాస సుబోద సంబందమైలా వాక్యము సంగరె బొడుకుంటా క్రీస్తుయేసుకు బొల్ల పరిచారకుడయికిరి తాను.
 7 అపవిత్రమైలా మొంతినె కొతానె సడిదికిరి, దేవబక్తి విసయమురె తొత్తె తువ్వు సాదకము కొరిగును.
 8 దే సంబందమైలా పైటి కుండెమట్టుకు ఉపయోగంవుసిగాని దైవబక్తి ఉంచినె జీవం విసయమురె అయితల్లా విసయమునెరె వాగ్దానము సంగరె కూడా సొబ్బి విసయమురె ఉపయోగకరంగా ఊసి.
 9 ఏ వాక్యము సత్యమైలాట సడకు నమ్మిలాట పూర్నాంగీకారముకు యోగ్యమైకిరి అచ్చి.
 10 మనమానెసొబ్బిలింకు రక్కకుడు, ఈనె విసేసముగా విస్వాసులకు రక్కకుడైలా జీవముగల పురువురె అమె నిరీక్సన రొగ్గించొ గనుక యడ నిమిత్తము ప్రయపొడికిరి పాటుపొడిలింఛొ.
 11 ఏ సంతలు తంకు కొయికిరి బోదించొడి.
 12 తొ బెండకలో కేసెను తొత్తె నన్నిదిగ నాదికుంటా, కొతానెదీ, ప్రవర్తనదీ, ప్రేమదీ, విస్వాసముదీ, ప్రవిత్రరె, విస్వాసునెకు మాదిరిగా రొడి.
 13 మియ్యి అయిలా జాంక చదివిలాటరె, హెచ్చరించితీరె బోదించుటరె జాగర్తాగ రొడి.
 14 బొడిలింకె హస్తనికేపనము కొరిలాబెల్లె ప్రవచనము తొత్తె అనుగ్రహించబొడిలాబెల్లె తొబిత్రరె ఆత్మ వరముకు నిర్లక్యం కొరితెనా.
 15 తొ అబివుద్ది సొబ్బిలింకు తేటగా దిగిదిల్లా నిమిత్తము ఎడకు మనుసుపూరు సాదన కొరిండి.
 16 తొ గురించి తొ బోద గురించి జాగర్త కలిక్కిరో. ఎడబిత్రరె బొల్లకిరి రొ; తువ్వు యాకిరి కొరికిరి తువ్వు తొ బోద సునిలాలింకు రక్సింఛుగునుసు.

5

పొదరెలింకంపరె విస్వాసులురో బాద్యత

- 1 బొడిలింకు నాగద్దించుకుంటా బోపనికిరి బావించికిరి కోండి. బెండలింకు అన్నబయినెగా బావించిగిండి.
 2 వయసురె బొడుమొట్టానెకు మానె పనికిరి బులిగిండి, పూర్తిపవిత్రతరె దిండ మొట్టానెకు అప్పబొయినె బులిగికిరిబావించొండి.
 3 సొత్తాక అనాదుల్లెలా రండిలింకు గొరవింఛొండి.
 4 ఈనె కె రండిలింకె యానెను పిల్లానె గాని నత్తిని గాని నత్తి గాని రొల్లాపనెనే, అంకె అగరె తా గొరొలింకు బక్తి దిగదీతె, తంకె మా బోకు ప్రత్యుపకారము కొరితండుకు సుగ్గిమ్మంచె; యెడ పురువురో అంకికి బొల్లెకిరి అచ్చి.
 5 ఈనె సొత్తాకా కేసినీలా రండింట జొన్నాక తన్నె, పురువు ఉంపరె తా నిరీక్సనరొయిదిగికిరి, విజ్ఞాపనలబిత్రరె ప్రార్థనబిత్రరె రత్తిదూసు పురువు సహాయం కోసం దిగిమంచె.
 6 సుకబోగములుబిత్రరె ప్రవర్తించిలాట జీకిరి రొన్నన్నా మొరిజిల్లాలింకె పనికిరి అచ్చి.
 7 తంకె నిందారహితులైకిరి రొల్లాపని యాకిరి ఆజ్ఞాపించండి.
 8 ఈనె కేసె యానెను స్వకీయునెకు, విసేసముగా తా గొరొలింకు, నాసంరక్సింఛిగిన్నే సెయ్యె విస్వాసత్యాగము కొరిలాటపనికిరి అవిస్వాసికన్నా చెడ్డాటైకిరి తాసి.
 9 అరవై బొచ్చొరోనె కన్నా తక్కువ వయస్సు నీకుంటా, జొనె వండ్రపోకాక నైపోయాకిరి తన్నే రండింటగా గొనివొచ్చు.
 10 ఈనె బొల్లక్తియలకు నా కడిగిల్లా రండింట తా పిల్లనెకు పుసికిరి, పరదేసునెకు ఆతిద్యంఠికిరి, పరిసుద్దులురో గొడ్డొనె దొయికిరి, స్రమపొడిలాలింకు సహాయము కొరికిరి, ప్రతి సత్కార్యము కొరితె సమర్పించిగిమ్మాసి.
 11 ఈనె బెండలింకయిలా రండిలింకు లెక్కరె చేర్చిగితెనాండి; కిరకుబుల్వే అంకె క్రీస్తుకు సడికిరి లొకొ ఆసానెరె పొడికిరి ఇంకా బ్యూ కొరిగిమ్మాసి బులిగివ్వె.

12 ఈనె తంకె అగరెకొరిలా ప్రమానంకు సడదీసెబులి తీర్పుపొందిలాలింకెకిరి అచ్చె.

13 ఈనె తంకె గొరొ గొరొకు బుల్లుకుంటా, సొమరులయితె మాత్రమాక నీకిరి, నాకొతలగిలా కొతానెకొయికుంటా, పొదర్లింకెజోలికు జేకుంటా అచ్చె. సమాయంకు వ్యేదం కొరికుంటా కలిగిలలింకె పనికిరి తాసె.

14 గనక దిండతిల్లపిల్లనె బ్యాకొరిగీకిరి పిల్లనె బేయికిరి గొరొకు జాగర్తాగ దిగ్గికుంటా, నిందించితె విరోదికు అవకాసం దివ్వరో బొల్లనీబులికొరిగిల్లించి.

15 యెడకగరాక కుండిలింకె బట్టోదీకిరి బాజీకిరి సాతానుకు వెంబడించినె.

16 విస్వాసురాలైలా కె మొట్టరో గొరొయానెను కుటుంబంరె యీనెనూ రండిలింకె తన్నెమాను, సంగముకు బారమునీకుంటా రండిలింకు సహాయము కొరొండి. నెల్లె సంగం సొత్తాక దిక్కునీలాలింకు సాయంకొరిపారి.

17 బొల్లకిరి పాలనకొరిలా బొడిలింకె, విసిసముగా వాక్యమురె సుక్కిలాబిత్తరె, ఉపదేసము కొయిలాటబిత్తరె ప్రయాసపొడిలాలింకె, దీటొతునె సన్యాసముకు అర్హులుగా బచ్చిమంచె.

18 సడకు లేకసము కొయిలాపనికిరి నూర్చితల్లా ఎద్దురొమ్మాతికు చిక్కము పొగితెనాండి కిరుకుబుల్నే పైటితా బొర్తొనొకు అర్హతయిలాట.

19 ఈనె దీలింకె తిల్లింకె సాక్సినెరొన్నె గాని బొడిలింకె ఉంపరె నిందకు అంగీకరించితెనా.

20 పొదరిలింకె డొరొపొడిలా పనికిరి పాపము కొరిలాలింకు సొబ్బిలింకె అగరె గద్దించు.

21 దుష్టబుద్ధి సంగరెయీనెను పక్కపాతము సంగరెయీనెను కిచ్చినాకొరుకుంటా, మియ్యి మీ కొయిలా కొతానుకు సునిమంచెబులి పురువు అగరె, క్రీస్తుయేసు అగరె, బచ్చిగిల్లా దేవదూతానె అగరె తొత్తె గద్దించిలింకె.

22 పురువు పైటికోసం బచ్చిగితై బేగా కా అంపరె యీనెను అత్తోపొగితెనాండి. పొదరిలింకెరొ పాపమురె పాలితాయీకిరి రొయితనాండి. తువ్వ పవిత్రముగా రొల్లాపనికిరి దిగ్గును.

23 ఈనె పనినాపీకుంటా తో పెట్టో జబ్బుకు కెబ్బుకూ అయిలా బలహీనతానె కోసం ద్రాక్సారసము కూడా కుండె కడిగునొండి.

24 కుండెలింకె పాపము బొల్లె దొరొపొడికిరి న్యాయపు తీర్పుకు అగరాక సలిలీసె, ఈనె ఇంకా కుండిలింకెరొ పాపొసె తంకె సంగరె జెల్లీసె.

25 సాకిరాక బొల్ల పైటినె బొల్లె దీగదిల్లీసె, సుచ్చిలాట కిచ్చి దొరొనాపొడుకుంటా రొన్ని.

6

1 పురువురొ నాకు, తా బోదకు నాదూసించిలాపనికిరి దాన్యత్వముబుల్లా కాడి తొల్లె రొల్లాలింకె తంకరొ యజమానులుకు సంపూర్ణమైలా గనతకు అర్హులుబులి బచ్చిమంచె.

2 విస్వాసులైలా యజమానునె గల్లా దాసునె తంకె యాజమానునె అన్నబయినె బులిగీకిరి తంకు నాసడిదీకిరి, తంకె సేవాపలము పొందిలాలింకె విస్వాసునెకు ప్రియులైకిరి అచ్చెబులి ఇంక బడె ఎక్కువుగా తంకు సేవ కొరిలాపనికిరి రొమ్మంచె.

సారొబోదానె సొత్తైలా సంపద

ఏ కొతానె బోదించిలింకు హెచ్చరించొండి.

3 కేసైయీనెను అం ప్రబువైలా యేసుక్రీస్తురొ గుట బొల్లకొతానెకు, దైవబక్తికి అనుకూలమైలా బోదకు నాఅంగీకరించుకుంటా, బిన్నమైలా బోదానె కొర్చే.

4 సెయ్యొకిచ్చి నాజనికిరి కొలీనె గురించి వాగ్వాదమునె గురించి అనవసరంగా ప్రయాసపొడుకుంటా గర్విష్టుడైవొ. ఎడవల్లరె దిగినార్లాబుద్ధి, కలహము, దూసనానె దురనుమానాలు,

5 తంకె చెడిజిల్లా మనస్సు కలిక్కిరి సత్యమునీలా బడెవివాదాలు దీగీకిరి పురువురొ బక్తి కొరువురొ వల్లరె బడె లవొ ఆసి బులిగితోసె.

6 అమె కలిక్కిరితల్లాట సంగరె, సొత్తయిల పరిసుద్ధత తాకు కెత్తోలవొ.

7 అమె యే లోకొకు కిచ్చి దన్నయిలనింతో, ఆండ్రెదీకిరి కిచ్చి దరిగిజెన్నారొ.

8 ఈనె కద్ది, కొన్నానె కలిగికిరితన్నె సడసంగరె త్రుప్తి పొడికిరి రొమ్మండి.

9 పలియగలిగిలాలింకె ఈవాసి బులి ఆసపొడిలాలింకె తంకె సోదనరె, మోసంరె, అవివేకమైలా కొస్తొనెరె దురాసలురె పొడుసె. ఈనె సాటానె మనమానుకు నష్టమురె నాసనమురె బుడ్డిపూసె.

10 క్యాకిరిబుల్నే పలియాస సమస్తమైలా కీడుకు కారనం. కుండిలింకె సడకు ఆసించికిరి విస్వాసముదీకిరి బాజీకిరి బడే బాదానె వల్లరె తంకు తంకాక బుసిగివ్వె.

వ్యక్తిగతమైలా హెచ్చరికలు

11 ఈనె పురువురో మనమా! తూ ఈనె యెడకల్లాసడిదీకిరి, నీతికి, బక్తికి, విస్వాసముకు, ప్రేమకు, ఓర్పుకు, సాత్వికముకూ సంపాదించిగితై ప్రయాసపొడండి.

12 నిత్యజీవము పొందితె తొత్తె తువ్వాక బొల్ల పోరాటం పోరాడు. సడకు పొందిగినితే తువ్వు పురువుదీకిరి డక్కబొడికిరి బడే సాక్కులగరె తువ్వు బొల్ల ఒప్పుకోలు కలిగీకిరి తల్లందరె సే జీవం కోసం తొత్తె డక్కిగిచ్చి.

13 సొబ్బిజీవీనెకు ఆదారమైలా పురువు అగరె, క్రీస్తుయేసు అగరె, పొంతి పిలాతు పక్కరె దైర్యముగా ఒప్పిగీకిరి, సాక్సం దిల్లా క్రీస్తుయేసు అగరె తోముకు ఆజ్ఞాపించిలించి.

14 అం ప్రబువైలా యేసుక్రీస్తు అయిలాజాంక తువ్వు నిస్కలంకముగా, నిందనీకుంటా యే ఆజ్ఞానె అంగీకరించికిరి సలిగీకిరి విస్వాసం సంగరె రొమ్మాసి బులి తొత్తె ఆజ్ఞాపించిలించి.

15 ఆసీర్వాదం కారకుడు, సర్వాదికారి సరైలకలోరె సే ప్రత్యక్షతకు దిగుదూసి. సెయ్యాక సర్వాదిపతి రొజానుకు రొజా, ప్రబువూనెకు ప్రబువైకిరి ఆసీర్వాదానెకు కారకుడైకిరచ్చి.

16 కేసే నాజెన్నాల్లా తేజస్సురె సెయ్యె మాత్రమాక తైకిరి మొర్వొనీలాట యికిరచ్చి. మనమానై కేసే తాకు దిగిలాంతె, కేసే దిగినారె. తాకు గనత సాస్వతమైలా ప్రబావము కలిగీకిరి తాసి.

17 యే లోకొరె పలియగలిగిలాలింకె గర్వంనాపొడుకుంటా, స్తిరమునీలా పలియంపరె నమ్మకం నారొగ్గీకుంటా, సుకముగా అనుబవించితె సొబ్బిఅముకు బడే బూతు దీతల్లా పురువుంపరె నమ్మకము దీగిమంచిబులి ఆజ్ఞాపించు.

18 బొల్ల పైటీనె బుల్లా పలియ కలిగిలాలింకె, దానగుసం కలిక్కిరి, తంకపలియరె పొదర్లింకు బాగందిల్లాలింకైకిరి తమ్మాసిబులి తంకు ఆజ్ఞాపించు.

19 తంకె సత్యమైలా నిత్యజీవమును సంపాదించిగితై నిమిత్తము, అయితల్లా కలోకు బొల్లపునాది తంకోసం పొగ్గుచ్చె.

20 ఓ తిమోతి, తొత్తె అప్పగించిలాటకు కాపాడిగీకిరి, అపవిత్రమైలా సుచ్చు కొతానుకు, జ్ఞానం బులి మాయకొతానె కొయిలా మూర్కంగా దొందర్లాలింకు దూరుగాతాండి.

21 సే విసయమురె ప్రవీనునె బులి కుండిలింకె కొయిగీకిరి విస్వాసవిసయమురె తప్పిజీసె. పురువురో క్రువ తొత్తె తోడుగా తమ్మాసి.

పాలు తిమోతికు రాసిన రెండో పత్రిక పాలు తిమోతికు రాసిన దీటో పత్రిక అగరో కొత్త

దీటో తిమోతి పత్రిక పాలు తా సిస్యుడైల తిమోతికు రాస్తల్లా పత్రిక. యే పత్రిక పాలు తా జీవితం చివరగా రాస్తల్లా పత్రిక. యెడ పాలు రోమారె బందీగాతల్లా సమయంరె రాసికిరి రొవ్వొచ్చు. 1:16 పాలు తిమోతి సంగరె బడే వక్కరె సంబందం కలిక్కిరి రొవ్వొచ్చు వల్లరె తాకు పోగా బడేసార్లు కొయివురో ఈసి .పిలిప్పీ 2:22; 1 తిమోతి 1:2,18.

పాలు సంగముకు బదులుగా మనమానో నానె సంగరె రాసిలా చార ఉత్తరాలై యెడగుటె. తల్లాంచ 1 తిమోతి, తీతుకు, పిలోమోను. యే దీటో తిమోతి పత్రిక రొమారాజ్యంరె క్రైస్తువులుకు గొప్పహింసలు కలిగిలా సమయంరె రాసికిరి రొవ్వొచ్చు. యే పత్రిక పాలు చెరసాలై రొయితల్లాబెల్లె తిమోతికు కొస్టోనై దైర్యంగా టారితె సూచనలు దిల్లీసి. ఇంకా గుట్టో తిమోతి పత్రిక పనికొక తిమోతికు సారోబోదకులు గురించి బడే హెచ్చరికలు దివ్వరో. 1 తిమోతి 1:16-18 అడాకనీకిరి ఇంకా అగురుకు బడే కొస్టోనై ఆసెబులి తిమోతికు కొయివురో.

సంగతీనె

1. పాలు తిమోతికు సుబాలు కొయికుంటా ప్రోత్సాహించికిరి ఉత్తరం ఆరంబించువురో. 1:1-18
2. పాలు తిమోతికు సహించిగీకిరి దైర్యంగా రొమ్మాసి బులి ప్రోత్సహించువురో. 2:1-13
3. పాలు తిమోతికు కుండె సాదారణమైలా సూచనలు దివ్వరో. 2:14-26
4. పాలు జరగవలసిలా సంగటనానె గురించి హెచ్చరించుకుంటా సరైలాసమాదానం దివ్వరో గురించి కొయివురో. 3:1-4:8
5. పాలు తిమోతి గురించి కుండె పొరపాట్లుకు కడికిరి దిగిపించికుంటా ఉత్తరముకు ముగించువురో. 4:9-22

దండము

- 1 క్రీస్తుయేసురె రొల్లా జీవము గురించి వాగ్దానము దీకిరి పురువురో చిత్తము వల్లరె క్రీస్తుయేసు అపొస్తులుడైలా పాలు,
- 2 ప్రియమైలా పో యాల తిమోతికు సుబం బులి రాసివురో. బో యాల పురువు దీకిరి అమె ప్రబువైలా క్రీస్తుయేసు దీకిరి క్రుప, కనికరము సమాదానము కలిగిమాసి.

సువార్తకు నమ్మకస్తులైకిరి రొవురో

- 3 మీ సేవించితల్లా పురువుకు పూర్న ఆత్మ సంగరె మో పితరులు పనికిరి క్రుతజ్ఞతలు చెల్లించిలించి. మో ప్రార్థనలై నాపసిరిజీకిరి తొత్తె జ్ఞాపకము కొరిగీకిరి రత్తి దూసు కెబ్బుకూ, తాకు క్రుతజ్ఞత చెల్లించిలించి.
- 4 సాకిరి మో సంతోసం పరిపూర్ణమైలా పనికిరి తో అంకీనెరె పని తల్చిగీకిరి, మెత్తె సంపూర్ణానందము కలిగితె తొత్తె ఇంకా బేగా దిగిమాసి బులిగిల్లించి.
- 5 సే విస్వాసము అగరె తో అవ్వ ఈలా లోయికు, తో మా యాల యునీకేకు తల్లా విస్వాసము తువాంక కలిక్కిరి అచ్చు బులి నిచ్చయముగా మీ నమ్మిలించి.
- 6 సే కారసం వల్లరె మీ తో ఉంపరె మో అత్తోనె లొక్కిరి అబినీకించికిరి, తొత్తె కలిగిల పురువురో క్రుపావరముకు అబివుద్ది కొరిగిమాసి బులి తొత్తె జ్ఞాపకము కొరిలించి.
- 7 పురువు అముకు సక్తి, ప్రేమ, ఇంద్రియనిగ్రహము గల ఆత్మకాక దీసి గాని పిరికిలింకె యాల ఆత్మదిల్లాని.
- 8 ఈనె తువ్వ అం ప్రబువు విసయమైలా సాక్యము గురించి, తా కైదీయైలా మో గురించి ఈనెను, నాలజ్ఞోపొడికుంటా, పురువురో సక్తి వల్లరె సువార్త నిమిత్తమైలె స్రమానుబవంరె అం సంగరె బాగస్తుడైకిరి తమ్మాసి.
- 9 అం పైటినె బట్టి నీకిరి, తా సొంత సంకల్పము వల్లరె, క్రుప వల్లరె, అనాది కలోరాక క్రీస్తుయేసు వల్లరె దిల్లా క్రుప సంగరె అముకు రక్సించికిరి తా సొంతమనమానెగా కొరిగిచ్చి.
- 10 ఈనె ఉంచినె అం రక్సకుడు క్రీస్తు యేసురె ప్రత్యక్షపర్చిలా యే సువార్త వల్లరె మొర్నొకు ఓడించికిరి నిత్యజీవముకు బయలుపర్చిసి.
- 11 పురువు మెత్తె అపొస్తులుడుగా, బోదకుడుగా సువార్త ప్రకటించితె బచ్చిగిచ్చి.

12 ఈనె నే కారనం వల్లరె యే కొస్టానె అనుబవించిలింబి గాని, మియ్యి నమ్మిలాట తెలుసు గనుక సెయ్యె మెత్తె అప్పగించిలా పైటి మెత్తె నియమించిలా దినొజాంక కొనసాగించుసి బులి పూర్తిగా నమ్మిగిల్లించి.

13 క్రీస్తుయేసురె రొవ్వొలిసిలా విస్వాసము, ప్రేమ కలిగిలాలింకైకిరి, తువ్వ మో వల్లరె సునిలా సత్యవాక్కుకు మాదిరిగా కడిగీకిరి సడకు పాటించు.

14 తొత్తె అప్పగించిలా నే బొల్ల విసయొనె అం బిత్తరె నివసించిల పరిసుద్దాత్మ సక్తి సంగరె కాపాడిగిండి.

15 ఆసియరె తల్లలింకల్లా మెత్తె సడిదికిరి బాజీసె బుల్లాసంగతి తొత్తె తెలుసు. తంకె వుగెల్లు హెర్మోగెనే బుల్లాలింకె సెట్టొలింకాక.

16 ప్రబువు ఒనేసిపోరు గొరొలింకల్లా ప్రబువు కనికరము దిగదిమ్మాసి. కైంకిబుల్నే సెయ్యె బడేసార్లు మెత్తె ఆదరించసి. మియ్యి కైదిరె తల్లాబెల్లెంక సెయ్యె లజ్జొపొడిలాని,

17 ఈనె సెయ్యె రోమాకు అయిలా ఎంట్లాక మీ మిల్లెత్తెవరకూ మెత్తె స్రద్దగా కుజ్జిసి.

18 ఈనె సెయ్యె ఎపెసురె కెత్తె ఉపచారం కొరిసో సడ తువ్వ బొల్ల జనిసు. నే దినొరె సెయ్యె ప్రబువు వలరె కనికరము పొందిమాసి.

2

యేసుక్రీస్తురొ బొల్ల సైనికుడు

1 మో పో, తూ ఉంచినె క్రీస్తుయేసురె క్రుపదికిరి బలవంతుడుయికిరి రో.

2 తువ్వ బడేలింకె సాక్సినె అగరె మోవల్లరె సునిలా సంగతీనకు పొదరిలింకు బోదించితె సామర్ద్యముగల నమ్మకమైలా మనమానెకు అప్పగించు.

3 క్రీస్తుయేసురొ బొల్ల సైనికుడుపనికిరి మో దీకిరికూడ కొస్టానుకు అనుబవించు.

4 సైనికుడు కేసయీనెను యుద్దముకు జేతల్లాబెల్లె, తా దండురె చేర్చిగిల్లా అదికారికు సంతోసం కొరిమంచె బులికిరి, ఏ జీవనపైటినిరె చిక్కిగిన్నీ.

5 ఈనె కెలోకారి నియమంప్రకారం నాకెలినె, తాకు బహుమానం మిల్చీ.

6 కొస్టాపొడిలా వ్యవసాయకుడాక అగుంతా పచ్చపలితం పొందిగివ్వొ.

7 మియ్యి కొయిలా కొతా ఆలోచించిగిండి; సాబ్బి విసయాలై అర్థం కొరిగిత్తె ప్రబువు తొత్తె వివేకం దూసి.

8 దావీదు సంతానమురె జొర్నైకిరి మొర్నొదికిరి ఉటిలా యేసుక్రీస్తు కోసం కొయితల్లా సువార్తాక మీ ప్రకటించిలింబి బులి జ్ఞాపకం కొరిగిండి.

9 మీ నేరస్థుడు ఈకిరి తల్లపనికిరి, నే సువార్త విసయంరె గొలుసునె సంగరె బందించిగికిరి కొస్టాపొడిలింబి, ఈనెను పురువురొ వాక్యముకు బందించినారినె.

10 సడవల్లరె పురువుసంగరె ఏర్పర్చిగిల్లా మనమానె కోసం, నిత్యమైలా మహిమ సంగరంకా క్రీస్తుయేసు వల్లరె రక్షన పొందిమాసిబులి మియ్యి సాబ్బిటికు ఓర్చిగిల్లించి.

11 యే కొతా నమ్మకమైలాట, క్యాకిరి బుల్చే,

అమె తాదీపాటు మొరిజెల్లాలింకె ఈనె

తాదీకిరికూడ జీమో.

12 అమె సహించిలా లింకె ఈనె,

తాదీకిరాంక ఏలుంచొ.

తాకు అమె తెలిసినిబులి కొయినె,

సేయంకా అముకు తెలిసిని బులి కొయివొ.

13 అమె నమ్మకం నీలాలింకె ఈనెను,

సెయ్యె అమంపరె నమ్మకంగా తాసి;

సెయ్యె తా ప్రవర్తనకు విరోధముగా కిచ్చికోరినారి.

పురువుదీకిరి అంగీకరించబొడిలా పైటితా

14 సునిలాలింకు చెడమరితాక గాని మరి కిడకు నాపైటికైలా కొతానె కోసం వాదం లొగ్గితైనాండిబులి, ప్రబువు అగరె తాకు యదార్థంగా గద్దించికిరి ఏ సంగతీనె తంకు జ్ఞాపకము కొరిండి.

15 పురువు అగరె అంగీకరించబోడిలా పైటితా పనికిరి, నాలజ్జోపొడిలా పైటితా పనికిరి, సత్యవాక్యముకు బొల్లకిరి వివరించువురో బిత్తరె తొత్తె తువ్వు పురువుకు దిగిపించిగిత్తే జాగ్రహాడు.

16 నాపైటికైలా సుచ్చు కొతానెకు దూరుగతాండి. సా కొతలగిలాలింకె మరి బడే బక్తిసీలాలింకె ఊసె.

17 దేకు కైపీలా గా పాకిర్లాపనికిరి, తంకొతానె పాకుసె, తంకబిత్తరె హుమెనైయు, పిలేతు సాబోదకొరిలీసె.

18 తంకె పునరుత్థానము గతించిజేసిబులి కొయికుంటా సత్యం వినయమురె తప్పిజీకిరి, కుండిలింకురో విస్వాసముకు చెడమరిలీసె.

19 ఈనెను పురువురో స్థిరమైలా పునాది నిలకడగా అచ్చి. ప్రబువు తా లింకు ఎరక బుల్లాట ప్రబువు నాకు ఒప్పిగిల్లా సాబ్బిలింకు దుర్నితిదీకిరి బాజిమ్మాసి బుల్లాట సడకు ముద్రగా అచ్చి.

20 గుట గొరె బడే పాత్రనె తాసె. తాండ్రె కుండె వెండి గిన్నానె, కుండె సున్న గిన్నానె, ఇంకాకుండె బడ్డినెదీకిరి, మట్టిదీకిరాంక కొర్లాంచ తాసె, తాండ్రెబిత్తరె కుండె విలువరోల్లా పనికిరి ఇంకుండె విలువనీలాంచ పనికిరి ఉపయోగించబోడివె.

21 కేసెయినెను ఎడబిత్తరె నాచేరికిరి తాకు సెయ్యక పవిత్ర వర్చిగిన్నె సెయ్యె పరిసుద్ధంకొరిగీకిరి, యజమానుడు వాడిగిత్తే అర్హతయిలా సాబ్బి సత్కార్యములుకు సిద్ధపర్చిబోడికిరి విలువ నిమిత్తమైలా పాత్రయికిరి అచ్చె.

22 తువ్వు బెండరో ఆసానె సడదీకిరి, పవిత్ర హుదయం కలిగీకిరి నీతిరె, విస్వాసమురె, ప్రేమరె, సమాదానముకు సంపాదించిగిత్తె ప్రబువుకు ప్రయత్నం కొరొండి.

23 బుద్ధిహీనిలైలాపనికిరి నాపైటికైలా లగానుకు దూరుగాతా సాటనెల్లా కొలీనెకు బట్టో కడుసె.

24 ప్రబువురో దాసుడు, కొలీనె నాలక్కుంటా సాబ్బిలింకె ఉంపరె దయగలికిరి బొల్ల సహనము సంగరె బోదించితె సమర్థుడైకిరి రొమ్మాసి. ఇంకా కీడు సహించిలాట్టెకిరి రొమ్మంచి.

25 సత్యంకు తెలిసిగీకిరి మారుమనుసు పొందితె పురువు తంకు అవకాసం దీసి బులి వివేకం కలిక్కిరి తో విరోదీనెకు సరికొరుమాసి.

26 సడవల్లరె అపవాది తా ఇష్టము చొప్పురె బందించికిరి అంకె సడరో ఊరి తీకిరి మెలుకువ కలిక్కిరి తప్పించిగిపారె.

3

ఆకరి దీనొనె

1 ఆకరుదినోనె అపాయకరమైల కలోనె ఆసెబులి తెలిసిగీండి.

2 కైంకిబుల్నే మానమానె స్వార్థపరులులింకె, పలియంపరె ఆసగల్లాలింకె, బడాయిలింకె, గొప్పానె కొయిగిల్లాలింకె, దూసించిలాలింకె, మా బోసుకు అవిదేయునె, క్రుతజ్ఞతనీలాలింకె, బక్తిసీలాలింకె.

3 అనురాగం నీలాలింకె, దయనీలాలింకె, అపవాదిలింకె, నాపొడిలాలింకె, క్రూరులు, సత్యముకు ద్వేసించిలాలింకె.

4 మోసం కొరిలాలింకె, మూర్కులింకె, గర్వం రొల్లలింకె, పురువుకన్నా సుకోనెకు బడేప్రేమించిలలింకె.

5 తంకె ఉంపరకు బక్తిరోల్లాలింకెపనికిరి రొయికిరి సడరో సక్తంపరె ఆదారపొడినింతె. సాలింకు దూరుగా రొండి.

6 తంకె కుండెలింకెరో గొరొనె బిత్తరెకు అయికిరి బడే దురాసలసంగరె పాపం సంగరె చిక్కిగీకిరి బలహీనమైలా మొట్టానుకు లోపర్చిగీకిరి తంకంపరె లవొకు పొందుసె.

7 కుండెలింకె మొట్టానె కెబ్బుకు సుగ్గిమ్మాసిబులివివ్వె గని ఈనె సత్యంకు తెలిసిగిన్నారె.

8 ఈనె యన్నే, యంబ్రే నా గల్లాలింకె మోసేకు ఎదిరించిలాపనికిరి అంకె చెడిలా మనస్సు కలిగీకిరి, విస్వాసవినయమురె బ్రస్తులైకిరి సత్యముకు ఎదిరించిలీసె.

9 ఈనెను తంకరో అవివేకము క్యాకిరి దొరెపొడిలీసో సాకిరాక అంకె దీలింకె కూడా సాబ్బిలింకగరె దొరెపొడుసె. గనుక అంకె ఇంక అగురుకు జెన్నారె.

ఆకరి సలహాలు

10 ఈనె తువ్వు మో బోదకు, మో ప్రవర్తనకు, మో ఉద్దేశముకు, మో విస్వాసముకు, మో దీర్ఘసాంతముకు, మో ప్రేమకు, మో ఓర్పు సంగరె సలుగునోండి,

11 అంతియొకయ, ఈకొనియ, లుస్త్ర బులి కొయిలా పట్టుములై మెత్తె కలిగిలా హింసలుకు ప్రమాదాలుకు, తెలిసిగిల్లాటయికిరి మెత్తె వెంబడించు. సే హింసలకు సహించించి గాని, సడబిత్తరెదీకిరి ప్రబువు మెత్తె తప్పించిసి.

12 క్రీస్తుయేసురె బొల్లబక్తి సంగరె జిమాసిబులి బులిగిల్లాలింకు హింసలు ఆసె.

13 ఈనె దుర్మార్గునె, వంచకునె పొదరిలింకు మోసం కొరుకుంటా తంకెంకా మోసం యిజీకిరి చెడిజూసె.

- 14 తువ్వ సుగ్గీకిరి సత్యంబులి తెలిసిగిల్లాంచ కా వల్లరె సుగ్గీచ్చో సే సంగతి తెలిసిగీకిరి, సడబిత్తరె నిలకడగా రొండి.
- 15 క్రీస్తుయేసురె రొవ్వలిసిలా విస్వాసము సంగరె రక్కనార్దమైలా జ్ఞానము తొత్తై కలిగించితె సక్తిగల పరిసుద్ద లేకనానెకు సన్నిబెల్లె దీకిరి తూ తెలిసిగిసు గనుక,
- 16 పురువురొ ప్రేరేపన వల్లరె అయిలా లేకనానెకు ఉపదేసించితె, కండించితె, తప్పు దిద్దితె, నీతిసంగరె జీతె ఉపయోగకరంగా అచ్చి.
- 17 సడవల్లరె దైవజనుడు సిద్ధపొడికిరి ప్రతి బొల్లపైటికు పరిపూర్ణముగా సిద్ధపొడికిరి అర్హత కలిక్కిరి రొమ్మాసి.

4

- 1 పురువు అగరె జీకిరితల్లాలింకు, మొరిజిల్లాలింకు తీర్పు తీర్చితె క్రీస్తుయేసు అగరెకు, సే అయిలాబెల్లె తా రాజ్యముతోడుగా, మియ్యి తొత్తై కచ్చితంగా కొయిలాట కిరబుల్లె.
- 2 వాక్యము ప్రకటించొండి; సొబ్బి సమయాలై ప్రయాసపొడికుంటూ, సంపూర్ణమైలా దీర్గసాంతముదీకిరి ఉపదేసించికిరి కండించికిరి గద్దించికిరి బుద్ధికోండి.
- 3 కైంబుల్లె మనమానె బొల్లబోదకు సహించినారికిరి, సునితె నాయిస్థపొడిలా కన్నొనెగలిగిలాలింకె యీకిరి తంక చెడుకోరికలూనె కోసం అనుకూలమైలా బోదకొరిలాలింకు తంకోసం పొగుకొరిగుచ్చె.
- 4 తంక సత్యముకు నాసునుకుంటూ పుట్టిగించిలాకొతానె సునితందుకు ఇస్థపొడుసె.
- 5 ఈనె తువ్వ సొబ్బి వినయాలై తగ్గించిగీరి తమ్మాసి. సువార్త పైటిరె కొస్టాపొడికిరి, తో పరిచర్యకు సంపూర్తిగా నెరవేర్పు.
- 6 మియి ఉంచినాక మో పొర్నొకు అర్పించిలా కలో అయిసి, మియి జెవ్వొలిసిలా కలో పక్కరకు అచ్చి.
- 7 బొల్ల పొరాటం పొరాడించి. మో పైటిముగించించి. మో విస్వాసముకు కాపాడిగించి.
- 8 ఉంచినె మో కోసం విజయకిరీటం రొయిదీకిరి అచ్చి. సే దినె నీతిగల్గా న్యాయదిపతియైలా ప్రబువు సడ మెత్తెనూ, మెత్తాకనీకిరి తా రాకడకోసం ఎదురుదిగిలా సొబ్బిలింకూ అనుగ్రహించుసి.

వ్యక్తిగత సలహాలు

- 9 మో పక్కరకు బేగా అయితె ప్రయత్నము కొరు.
- 10 దేమా ఏ లొకొకు ప్రేమించికిరి మెత్తై సడికిరి తెస్సలొనీకకు జేసి. క్రేస్కీ గలతీయకు, తీతు బుల్లాట దలమతీయకు జేసి.
- 11 లూకా మాత్రమాక మో పక్కరె అచ్చి. మార్కుకు తో సంగరె దనిగీకిరి ఆయి, సెయ్యె పరిచారముకు నిమిత్తము మెత్తై ప్రయోజనకరమైలాట.
- 12 తుకికు బుల్లాటకు ఎపెసుకు పొడదీంచి.
- 13 తువ్వ అయిలాబెల్లె మియ్యి త్రోయరె కర్పు పక్కరె సడిదిల్లా మో అంగీకు, పుస్తకమునెకు, ముక్కయైలా చొమ్మో కయితోసుకు దరిగీకిరి ఆయి.
- 14 అలెక్సంద్రు బుల్లా కంచరీట మెత్తై బడే కీడు కొరిసి. తా పైటివలరె ప్రబువు తాకు ప్రతిపలము దూసి.
- 15 తా వినయంరె తువ్వ జాగర్తాగ తా, సెయ్యె మో కొతానుకు బడే ఎదిరించినె.
- 16 మియ్యి అగరె సమాదానము కొయిలాబెల్లె కేసినెనూ మో పక్కమురె తారీలానింతె, సొబ్బిలింకె మెత్తై సడిదీకిరి బాజీసె. యెడ సెల్లె తంకు పురువు నేరముగా బచ్చినాసి.
- 17 ఈనె మో దీకిరి సువార్త సంపూర్ణముగా ప్రకటించొడిలా నిమిత్తము, పురువుకు నా నమ్మిగిలలింకు సడ సునిలా నిమిత్తము, ప్రబువు మో ప్రక్కరె టారికిరి మెత్తై బలపర్చిసి గనక మియ్యి సింహము తుండొ దీకిరి తప్పించబొడించి.
- 18 ప్రబువు ప్రతి మోసకరమైలా పైటినెదీకిరి మెత్తై తప్పించికిరి తా పరలోకరాజ్యముకు జెల్లాపనికిరి మెత్తై రక్సింఱుసి. కెబ్బుకూ తాకు మహిమ కలిగిమాసి.

ఆకరి దండమూనె

- 19 ప్రిస్కీలకు, అకులకు, ఒనేసిపోరు గొర్లింకు దండమూనె
- 20 ఎరస్టు కొరింతియరె రొయిజీసి. త్రోపీయు జబ్బుపొడిలందరె తాకు మిలేతు గారె సడిదీకిరి బారైంచొ.
- 21 చిత్తోకలో నా అయిల అగరె తువ్వ అయితందుకు ప్రయత్నము కొరు. యుబూలు, పుదే, లీను, క్లొదియ ఇంకా అన్నబయనె సొబ్బిలింకె తొత్తై దండమూనె కొయిలీసె.
- 22 ప్రబువు తో ఆత్మకు తోడైకిరి రొమ్మాసి. క్రుప తోముకు తోడైకిరి రొమ్మాసి.

పాలు తీతుకు రాసిన పత్రిక పాలు తీతుకు రాసిన పత్రిక అగరో కొత్త

సంగముకు బదులుగా జోనె మనముకు సంబోదించిలాపనికిరి పాలు రాసిలా చార ఉత్తరాలై తీతుకు రాసిలా ఉత్తరం గుటె. మిగిల్లా తింట 1 తిమోతి, 2 తిమోతి, ఇంకా పిలోమోను. పాలు తీతుకు రాసిలీసి. ఈనె సే ఉత్తరముకు పొదరకు చదవుగలిగిలాపనికిరి రాసిసి. అమె యెడకు తెలిసిగివ్వొచ్చు. కైంకిబుల్నే సెయ్యె తా అర్హతలుకు అపోస్టిగా వివరించిసి. తీతు సెత్తెలాక తెలిసికిరి రొవ్వొచ్చు. 63-65 బొచ్చురోనె మొజిరె పాలు యే ఉత్తరం రాసిసి.

క్విట్టు దీవిరె తల్లా సంగాలుకు నాయకత్వం వహించిమాసి బులికిరి పాలు తీతుకు సూచన దీకుంటా పాలు యే ఉత్తరం రాసిసి. సంగమురె నాయకులుకు బచ్చిగివురో ఇంకా సిక్సన క్యాకిరి దిమ్మాసో తీతుకు సుక్కికిరి సెయ్యె తాకు సూచనలు దీసి. తిమోతికు రాసిలా ఉత్తరాలు తా ఉత్తరం సంగబొడలింకెకు ఉత్తమ ప్రమానాలంపరె క్యాకిరి రొయిదిమ్మాసో వివరించుసి. సంగాలు ఇంకా యే కల్లో సంగ నాయకులు నాయకత్వంలింకు అవసరమైలా ప్రమానాలంపరె జాగర్తగా స్రద్ధ వహించిమాసి.

సంగతినె

1. పాలు దైవబక్తిగల నాయకులుకు నియమించు బులికిరి తీతుకు ఆదేశించువురో. 1:1-16
2. దైవబక్తిగల జీకానె గడిపితందుకు ప్రజలకు సిక్సన దేబులి పాలు, తీతుకు ఆదేశించువురో. 2:1-3:11
3. చివరగా, పాలు తా ప్రనాలికలుకు పంచిగీకిరి సుబాలు పొడదివ్వరో ద్వారా ముగించువురో. 3:12-15

దండము

1 పురువురో దాసుడు యేసుక్రీస్తు అపొస్తులుడైలా పాలు పురువుదీకిరి బచ్చిగిల్లా మనమానుకు విస్వాసంరె సలిపించుకుంటా సత్యమైలా బట్టోకు బోదెంతె బచ్చిగిల్లాటైకిరి అచ్చి.

2 సారొకొతా నాకొయిలా పురువు అముకు అనాది కలొరాక అముకు వాగ్దానము కొరిలా సే జీవమాక నిరీక్సనదీకిరి కూడిలా నిత్యజీవము.

3 ఈనె సే సమయంరె తా వాక్యము ద్వారా యెడ కోసం తెలియపర్చిసి. యెడ అం రక్సకుడైలా పురువురో ఆజ్ఞ ప్రకారం మెత్తె అప్పగించిలాటకు మియ్యి ప్రకటించిలింబి.

4 యెట్టె అం సొబ్బిలింకె విస్వాస విసయంరె మో సొత్తాయిల పో తీతుకు సుబం బులి కొయికిరి రాసిలింబి. అం బోయిలా పురువు ఇంకా అం రక్సకుడైలా క్రీస్తుయేసురో క్రుప కనికరము సమాదానముకు తొత్తె అనుగ్రహించిమాసి.

క్రీతు గారె తీతురో సేవ

5 మియ్యి తొత్తె ఆజ్ఞాపించిలా పనికిరి తువ్వ లోపాలు రొన్నే సరికొరికిరి, సొబ్బి పట్టుములురె సంగబొడలింకెకు నియమించితె నిమిత్తము మియ్యి క్రీతురె తొత్తె సడిదీకిరి అయింబి.

6 కేసైనెనూ కేవిదమైలా నిందానె నీకుంటా జోనె నైపోకాక కలిక్కిరి, అవిదేయునెగా నీకిరి విస్వాసినె గల్లాపిల్లానె కలిక్కిరి తల్లాలింకు సంగబొడలింకెగా రొయిదివ్వొచ్చు.

7 కైంకిబుల్నే అద్యక్కుడు పురువురో గ్రుహనిర్వాహకుడు గురింబి నిందసీలాపనికిరి తమ్మాసి. సెయ్యె యదార్దంగా రొల్లాటైకిరి రొమ్మంబి. రగ్గోనీకుంటా తమ్మాసి. పీకారైకిరి తన్నాసి. మరిలాటైకిరి తన్నాసి. దుర్లాబముకు నాఆసించిలాటైకిరి తమ్మాసి.

8 చుట్టాలుకు గౌరవించిలాటైకిరి, బొల్లుబుద్ధిగలిగిలాటైలిరి, నీతిమంతుడైకిరి, పవిత్రుడుగా, ఆసానెకు అదుపురె లొగ్గిల్లాటైకిరి, బొల్లుప్రవర్తన కలిక్కిరి రొమ్మాసి

9 సెయ్యె బొల్లు బోద విసయంరె మనమానుకు హెచ్చరించుకుంటా, ఎదిరించిలాలింకు ఒప్పించితె సక్తికలిగిలాటైకిరి, ఉపదేశము ప్రకారం నమ్మిలా బోదకు గట్టిగా దరిగీకిరి రొమ్మంబి.

10 కైంకిబుల్నే యూదులై బడెలింకె, ప్రత్యేకంగా సున్నతికు ఆదారం కొరిగిల్లాలింకె, అవిదేయులైకిరి, తిరుగుబాటు కొరికిరి మోసం కొరిలాలింకె పనికిరి అచ్చె.

11 తంక తుండోనె బుజ్జిపించిమాసి. కైంకిబుల్నే తంకె పలియ కోసం నాఉపదేశించివలిసిలాంచకు ఉపదేశించుకుంటా అక్రమము కోసం బడె కుటుంబానెకు పాడుకొరిలీసె.

12 తంకెబిత్రం బుల్నే తంకె సొంత ప్రవక్తానెరె జోనె యాకిరికొయిసి క్రేతీయులునె కెబ్బుకూ సారొకొతాలగిలాలింకు, చెడమరిలాలింకెగా, దేబద్దకం రొల్లాలింకె, కద్దికారింకెపనికిరి అచ్చె.

13 ఏ సాక్యము సొత్తాక. ఏ హేతువు సంగరె తంకె యూదుల కల్పనా కతలకు,

14 సత్యము సంగరె తొలిగిజీసిబులి మనమానె కట్టడలకు లక్యమునాలొకొండ, విస్వాసవినయమురె స్వస్థులగు నిమిత్తము తంకు కటినముగా గద్దించొండి.

15 బొల్లలింకు సొబ్బి బొల్లాట గాని, చెడిలా అవిస్వాసముదీకిరి రొల్లలింకు సొబ్బి అపవిత్రమాక. తంకె హుదయంరె తంకె మనస్సాక్కిరె చెడిజీకిరి అచ్చె.

16 పురువుకు తెలుసును బులి తంకె కొయిగునె గాని, అసహ్యులు, అవిదేయునె, ప్రతి బొల్ల పైటినె వినయమురె చెడిజీల్లాలింకె యికిరి, తంకె పైటినెవల్లరె నిర్లక్ష్మంగా అచ్చె.

2

బొల్ల నియమానె బోదించువురొ

1 తువ్వ బొల్ల ఉపదేశంకు సొబ్బిలింకూ అనుకూలమైలా బొల్ల నియమానె బోదించు.

2 కైంకిబుల్నే బొట్టలింకె బడె అనుబవం కలిగిలాలింకె, మర్యాదగా రొయికిరి, స్వస్థబుద్ధి కలిగిలాలింకె యాకిరి, విస్వాస ప్రేమ, సహనములురె లోపమునీలాలింకె పనికిరి రొమ్మంచి బులి బుద్ధికొండి,

3 సాకిరాక మొంత్రి మొట్టానె గొరొపుడ్డినె, బడె మొద్దొ పీకారీనె పనికిరి నా రొయికుంటా, బొల్లప్రవర్తన దీకిరి డొరొబీతి గలిగిలాలింకె పనికిరి రొమ్మంచిబులి, పురువురొ వాక్యము అవమానంగా నారొయికుంటా దిగిమ్మంచి బులి బుద్ధి కొండి.

4 సాకిరాక దిండ మొట్టానె తా గొయితానుకు లోబొడికిరి, తా గొయితకు పిల్లలనెకు ప్రేమించిలాపనికిరి,

5 ఇంకా తంకె మనుసుకు ఆదీనంరె దీగీకిరి పవిత్రంగా బొల్ల ఇల్లాలుగా తంకె గొయితానుకు లోబొడికిరి పురువురొ కొతానుకు అవమానం నాఅయికుంటా సిక్సన దేండి.

6 సాకిరాక స్వస్థబుద్ధి గలిగిలాలింకె పనికిరి రొమ్మంచెబులి బెండలింకు హెచ్చరించొండి.

7 తో బోదరె నీతిసంగరె నమ్మకంరె తొత్తె తువ్వక తో బొల్ల ప్రవర్తనరె పొదరిలింకు మాదిరిగా రొ.

8 తో ఉపదేశము మోసంనీలాట్టెకిరి, బొల్లపనికిరి కేసే అవమానం నాకొరుకుంటా తొ విరోదానె అం గురించి లజ్జొపొడివలిసిలాట కిచ్చినాకొయినాల్లా విదంగా తో ఉపదేశంరె పొదర్లింకు అవమానం నాకొల్లాపనికిరి తో బోదానె తమ్మాసి.

9 దాసులైలలింకె సొబ్బి వినయొనెదీకిరి ఉపదేశముకు, తో యాజమానులకు ఎదురుకొతా నాకొయికుంట తాకు సంతోసపర్చొండి,

10 సాకిరాక కెడయొనెను అపహరింపక, సంపూర్ణమైలా బొల్ల నమ్మకము దిగిదీకిరి, సొబ్బి పైటినెదీకిరి అం రక్కుకుడు యాల పురువు తంకు సంతోసము లొక్కుంటా, తంకు లోబొడికిరి తల్లాపనికిరి హెచ్చరించొండి.

11 కైంకిబుల్నే మనమానె సొబ్బిలింకు రక్సన కలిగిలాపనికిరి పురువు తా క్రుప దిగిదీసి.

12 అమె బక్తినీలా, యే లోకొ సంబందమైలా దురాసలకు సడిదీకిరి, పురువుకు ఇస్థమైలా బొల్లజీకానె జీలాపనికిరి సేక్కుప అముకు సలిపించుసి.

13 ఈనె మహపురువూ అమె రక్కుకుడుయిలా యేసుక్రీస్తురొ మహిమ ప్రత్యక్ష్మమైలా సే దినో కోసం నిరీక్సనదీకిరి ఎదురుదిగిలించ్చొ.

14 సెయ్యొ సమస్తమైలా చెడ్డపైటినెదీకిరి అముకు విమోచించికిరి, బొల్లపైటి కొరితండుకు సక్తిగల మనమానుకు తా కోసము పవిత్రం కొరిగీకిరి తా సొత్తుగా కొరిగిత్తండుకు తాకు సెయ్యొక అం కోసం అర్పించిగిచ్చి.

15 యడ గురించి బోదించికుంటా, హెచ్చరించుకుంటా సంపూర్ణ అధికారముదీకిరి సున్నాలింకు కండించుకుంట. తొత్తె కేసే నాత్తునీకరించుకుంటా దిగ్గిత్తు

3

క్రైస్తవుడురొ ప్రవర్తన కలిక్కిరి రొండి

1 అదిపతినుకు అదికారినెకు లోబొడికిరి విదేయులుగా రొమ్మంచెబులి, ప్రతి బొల్లపైటికొరితె సిద్ధపొడికిరి రొమ్మంచి.

2 మనమానె రొల్లాపనికిరి సంపూర్ణమైలా సాత్వికముకు దిగిదీకుంట, కాకును నా దూసించికుంటా, కొలీనె నా లక్కుండ సమాదానమైయికిరి రొమ్మంచె బులి, తంకు జ్ఞాపకము కొరు.

3 కైంకిబుల్నే అమె కూడ గతంరె అవివేకులైకిరి, అవిదేయులైకిరి మోసమైజికిరి, బడేవిదములైలా దురాసలుకు, బోగములకు బానిసలుగా రొయికిరి, దుస్వత్వముదీకిరి అనూయదీకిరి కలోగడుపుకుంటా, అసహ్యాగా జొన్నెకు జొనె ద్వేసించుకుంటా రొయితమ్మె.

4 అమె రక్కకుడుయిలా పురువు బిత్తరె దయ, మనమానె పక్కరె తాకురొల్ల ప్రేమరె ప్రత్యక్ష్మమైలాబెల్లె.

5 అమె నీతిరె సలికుండ కొరిలా పైటినె మూలమురె కాక, తా కనికరము సంగరె మారుమనును సంబందమైలా పని వల్లరె, పరిసుద్ధాత్మ అముకు నోస్వభావము కలిగించితె అముకు రక్షించిసి.

6-7 అం రక్కకుడైలా యేసుక్రీస్తు ద్వారా. పురువు పరిసుద్ధాత్మ సముద్ధిగా దీసి. అమె తా క్రుపవల్లరె నీతిమంతునె పనికిరి తీర్చబొడి, నిత్యజీవమురొ నిరీక్సన ద్వారా వారసునెగా కొరిసి.

8 ఏ కొతా నమ్మకమైలాట గనుక పురువురె విస్వాసలోగిలలింకు సత్ప్రియలకు ఇష్టం సంగరె కొరితండుకు మనస్సులోక్కిరి రొల్లాపనికిరి తో ఏ కొతానుకు ద్రుడముగా కొయిమంచి బులి కొరిగిల్లించి. యడ బొల్ల మనమానెకు ప్రయోజనకరంగా అచ్చి.

9 గాని, అవివేక వాదములుకు వంసావలీనెకు, లగానెకు, దర్మసాస్త్రముకు సంబందమైలా కొలీనెకు గురించి నాపైటికైలా పనికిరి అచ్చి గనుక సడకు దూరుగా రోండి.

10 విబేదమునె కలిగించిల మనమానెకు గుటె దీటా బేల్లె బుద్ధికొయిలా తరువాత తంకు సడిదెండి.

11 సెటువంటిట బట్టోతప్పిజేకిరి తాకు సెయ్యె సిక్స విదించిగితై పాపము కొరిలీసె బులి తువ్వు తెలిసిగితై.

ఆకరి హెచ్చిరికలు

12 ఈనె నికొపొలికు అయికిరి సిత్తోకలై సెట్టె గడిపిమంచిబులి మియ్యి నిర్మయించిగించి గనుక మియ్యి అరైమానుకు యీనెను, తుకికు యీనెను తో పక్కరకు పొడదిల్లించి సెట్టె మో పక్కరకు అయితండుకు ప్రయత్నము కొరు.

13 న్యాయవాదియైలా జేనాను అపొల్లోనుకు బేగా పొడదే; తంకు కిచ్చి తక్కువ నీకుంటా దిగు.

14 అంలింకె పలింపు నీలా నిమిత్తము తంకె అవసరముకు దీకిరి సమయానుకూలంగా బొల్లక్రియలక బొల్ల కొరువురొ సుగ్గిమంచె.

15 మో పక్కరె రొల్లా సొబ్బిలింకె తొత్తె దండమూనె కొయిలీసె. విస్వాసము వల్లరె అముకు ప్రేమించిలాలింకు మో వందనములు కోండి. క్రుప తొం సొబ్బిలింకు తోడైకిరి రొమ్మంచి.

పౌలు పిలేమోనుకు రాసిన పత్రిక పౌలు పిలేమోనుకు రాసిన పత్రిక అగరో కొత

పిలేమోను బుల్గా సన్ని పుస్తకముకు అపోస్తలుడు యీలా పౌలు రాసిసి 1:1. పౌలు చెరసాలరె తల్లాబెల్లె యే ఉత్తరం రాసిసి. బుల్లె సెయ్యె రోము పట్నం తీకిరి రాసిలీసి బులి కొయివొచ్చు. బుల్లె క్రీస్తు జొరైలా 61 బొచ్చురోనె తర్వాతరె రాసిసి. నడక సమయమురె సెయ్యె కొలస్సిలింకు కూడా పత్రిక రాసిసి.

సెయ్యె పిలేమోను బుల్గా మనమకు యే ఉత్తరం రాసిసి. పిలేమోను సంగరో సబ్యుడు ఇంకా యజమాని. పౌలు పిలేమోను దీకిరి తా తీకిరి పొలిజెల్లా సేవకుడైలా ఒనేసిముకు సిక్సించితెనాబులికిరి పొచ్చురితె, పౌలు తాకు లేక రాసిసి. కైంకిబుల్లె రోమా చట్టం ప్రకారంగా ఒనేసిముకు మొరదీతె పిలేమోనుకు హక్కు అచ్చి. నడకు ఒనేసిముకు క్రైస్తవ సోదరుడుగా అంగీకరించుబులి పిలేమోనుకు ప్రోత్సహించితె పౌలు తా వాదనానెకు సునిపించిసి. ఇంకా ఒనేసిముకు పౌలు సంగరె మిసికిరి సేవ కొరితె అనుమతించుబులికిరి కొయిసి 1:13-14.

సంగతినె

1. పౌలు పిలేమోనుకు దండము కొయివురో 1:1-3
2. సెత్తెలె పౌలు ఒనేసిము తరువురె పిలేమోనుకు తా సహోదరుడుగా అంగీకరించుబులి మగువురో 1:4-21
3. పౌలు సందర్శించిమాసి బుల్గా ఉద్దేశంకు ప్రకటించువురో ద్వారా ముగించికిరి సుబాకాంక్సలు పొడదివురో 1:22-25

దండము

¹ క్రీస్తుయేసు కోసం కైదీయైలా పౌలు, ఈనె అం అన్నబయిల తిమోతి అం ప్రియుడు అందికిరి పైటి కొరితల్లా పిలేమోనుకు,

² ఈనె అం అప్పబొయిని యీలా అప్పియకు మిసికిరి పోరాడిలా అర్కిప్పుకు, ఇంకా తో గొరై రొల్లా సంగముకు సుబం బులి కొయికిరి రాసితల్లా సంగతినె.

³ అం బో యీలా పురువు పక్కరెదీకిరి ప్రబువైలా యేసుక్రీస్తు దీకిరి క్రుప సమాదానము తొముకు కలిగిమాసి.

పిలేమోనురో ప్రేమ, విస్వాసము

⁴ బైయాలా పిలేమోను, తోకోసం మీ ప్రార్థన కొరిలా ప్రతీసారి పురువుకు క్రుతజ్ఞతలు చెల్లించిలింపి.

⁵ కైంకి బుల్లె పురువురో మనమానెంపరె తొత్తె తల్లా ప్రేమ, ఇంకా అం ప్రబువైలా యేసంపరె తొముకు తల్లా విస్వాసముకు మీ సునింపి.

⁶ క్రీస్తు దీకిరి తొమె రొప్పురో వల్లరె తొముకు కలిగిలా ప్రతి స్రేస్తమైలా ఆసీర్వాదము వినయంరె తువ్వ అనుబవపూర్వకంగా జనువురో వల్లరె తొందీకిరి తల్లాలికె తో విస్వాసంరె బాగస్తులు యీమంచి బులి మో ప్రార్థన.

⁷ అన్నబయి, పురువురో మనమానెరొ హుదయమునె తో ద్వారా విస్రాంతి పొందిలందుకు తో ప్రేమ వల్లరె మెత్తె గొప్ప ఆనందము ఆదరన కలిగిసి.

పౌలు ఒనేసిము కోసం విజ్ఞాపన

⁸ యే కారనం దీకిరి కొరివలిసిలా నడ గురించి తొత్తె ఆజ్ఞాపించితె క్రీస్తురె మెత్తె బడె ధైర్యము కలిగికిరి అచ్చి.

⁹ ఈనె, మియ్యి తొత్తె ప్రేమించిలింపి గనుక బొడ్డూట్టినన్నా మియ్యి ఉంచినె క్రీస్తుయేసు కోసం కైదీ యీకిరి రొల్లా పౌలు బుల్గా మియ్యి ఒనేసిము కోసం ప్రేమసంగరె విజ్ఞాపన కొరిగిల్లించి.

¹⁰ మో బందకాలురె మియ్యి జొరొకొరిలా ఆత్మీయ పో ఒనేసిము కోసము తొత్తె విజ్ఞాపన కొర్లించి.

¹¹ సెయ్యె గుటిబెల్లె తొత్తె నాపైటికైలాటాక గని, ఉంచినె తొత్తె, మెత్తె పైటికైలాటగా యీసి.

¹² మో పొర్నో వనాట యీలా తాకు తో పక్క బుల్లికిరి పొడదిల్లించి.

¹³ మియ్యి సువార్త కోసం బందికానారె రొల్లాబెల్లె తో బదులుగా సెయ్యె మెత్తె పరిచారము కొరితె తాకు మోపక్కరె రొయిదిగిమంచిబులిగించి.

¹⁴ ఈనె తో మేలు బలవంతముగా, మెత్తెనాకొరుకుంటా ఇస్టపూరకమైలాటగా రొమ్మాసిబులి తో అనుమతి నీకుంటా కొరితందుకు మెత్తె ఇస్టము నీ.

15 సయ్యో తో పక్కరె కెబ్బకూ రొయితాక కుండె కలొ తొత్తె దూరైసి.

16 సయ్యో కెబ్బకూ దాసుడుగా నా రొయికుంటా దాసుడు కన్నా బడే ప్రియవైలా అన్నబయిగా విసేసముగా ప్రబువురె తొత్తె మెత్తె బడే పైటికైలాట.

17 కాబట్టి తువ్వు మెత్తె తో తోటి పైటిలింకె పని బులిగిన్నే మెత్తె చేర్చిగిల్లాపనాక తాకు చేర్చుగును.

18 సయ్యో తొత్తె కి నస్టమైనన్నా కలిగించినె తొత్తె కిరైనా రునము రొన్నన్నా సడ మో లెక్కరె రాసుగును.

19 పాలు బుల్లా మియ్యి మో స్వహస్తముదీకిరి యే కొతా రాసిలించి సడ మియ్యక తీర్చిమి. ఈనెను తో ఆత్మ విసయంరె తువ్వు మెత్తె రునపొడికిరి అచ్చు బులి మియ్యి ప్రత్యేకముగా కొయితెవనరంనీ.

20 సడకు మో అన్నబయి, ప్రబువు తో వల్లరె మెత్తె ఆనందము కలిగిమురొ క్రిస్తుదీకిరి మో హుదయమురె త్రుప్తి కలిగించు.

21 మియ్యి కొర్లాటకన్నా తువ్వు బడేట కొరువు బులి జనికిరి మో కొతా సునుసుబులి తొత్తె రాసిలించి.

22 సడక నీ, తో ప్రార్థన మూలముగా మియ్యి తో పక్కరకు అయివురొ జరుగుసి బులి నిరీక్కించిలించి గనుక మో కోసం బొస తయారు కొరు.

ఆకర్ష దండము

23 క్రిస్తు యేసుసంగరె మో దీకిరి కైదీయైలా ఎపప్రా తొత్తె దండము కొయిలీసి.

24 ఈనె మో దీకిరి పైటికొరిలా మార్కు, అరిస్తార్కు, దేమా, లూకా దండమూనె కొయిలీసి.

25 అం ప్రబువువైలా యేసుక్రిస్తు క్రుప తొముకల్లా తోడైకిరి తమ్మాసి.

హెబ్రీయులుకు రాసిన పత్రిక హెబ్రీయులుకు రాసిన పత్రిక అగరో కొత

హెబ్రీయులు పుస్తకం ప్రోత్సాహకరమైలా పత్రిక. యెడ యేసు బడంచ పుర్ననిబందన ప్రవచనాలుకు క్యాకిరి నెరవేర్చిసో దిగిపించిలీసి. యెడ ఉపన్యాసం పనికిరి రాసివురో యీసి. హెబ్రీయులు పుర్న నిబందన గురించి 60 కు ఉంపరె ప్రవచనాలు అచ్చె. యెడానె యేసురె క్యాకిరి నెరవేరిసేయో ఇంకా యూదునెరో ప్రదానయాజకుడురో విదులుకు స్పష్టముగా దిగిపించిలీసి. యే కారనంగా యూదు క్రైస్తువులుకు ప్రోత్సహించితె యే పుస్తకం ఉద్దేశించబోడిసి. యేసు దర్మసాస్త్రముకు క్యాకిరి పూర్తి కొరిసో, సడ ద్వారా యాజకూనె ఇంకా బలీనె అర్పించిలా అవసరం నీకుంటా హెబ్రీయులు పుస్తకమురె దిగిదివ్వె. యేసు సొబ్బి పాపోనెకు, ఇంకా సొబ్బి కలోనుకు గుట్టెబెల్లాక బలి అర్పించిసి. అం కల్రె క్రైస్తువులు కూడా పురువుంపరె నమ్మకం దిగివురో ఇంకా తా ఉంపరె నమ్మకముకు సాద్యం కొర్లా మనమగా యేసుక్రీస్తుకు అనుసరించితె హెబ్రీయులుకు రాసిలా పత్రికరె ప్రోత్సాహముకు పొందివొచ్చు 12:21.

హెబ్రీయులుకు రాసిలా పత్రిక కేసె రాసిసేవో కాకు తెలిసిని. ఈనె పండితులు అపోస్తులుడెలా పాలు, లూకా నీనే బర్నబా రాసికిరి రొవ్వొచ్చుబులి కొయిసె. ఇంకా రాసిలా తారీకు కూడా తెలిసిని గని, క్రీస్తు జొర్నోకు 70 బొచ్చురోనె అగుంతాక యెడ రాసికి రొవ్వొచ్చు బులికిరి బడెలింకె నమ్మితోసె. కైంకిబుల్నే క్రీ .న. 70 రె యెరూసలేము నాననమైసి. ఈనె యే పత్రిక రాసిలాలింకె యెరూసలేము గురించి ఇంకా నాననం యీలాని. హిబ్రూ పుస్తకం రోము పట్టుమురె రాసిసె 13:24 ఈనె మరి యెడ బడె సంగాల్రె ప్రసారమైసి.

సంగతీనె

1. పురువురో ప్రవక్తానె ఇంకా దేవదూతనెకన్నా యేసు గొప్పిట బులి రచయిత దిగదీసి 1:1-4:13
2. యెట్టె సెయ్యె యెరూసలేమురె పురువు మందిరంరె సేవకొర్లా యాజకూనెకన్నా యేసు గొప్పిటబులి దిగదూసి 4:14-7:18
3. పురువు మోసేకు దిల్లా దర్మసాస్త్రం ద్వారా పురువు తా ప్రజానెసంగరె కొరిగిల్లా పుర్న ఒప్పందం కన్నా యేసు పరిచర్య గొప్పిట 8:1-10:31
4. యేసు సొబ్బివిదాలుగా గొప్పిట బులి వివరించిలా తర్వాతరె, రచయిత బడె ఆచరనాత్మకమైలా సూచనలు దూసి 10:32-13:17
5. ఆకరుగా రచయిత కుండె ప్రోత్సాహకమైలా కొతానె సంగరె ఇంకా సుబాకాంకలు సంగరె పత్రికకు పూర్తి కొరిసి 13:18-25

తా పో ద్వారా పురువు కొతలగువురో

- 1 పూర్వకల్రె బడె సమయాల్రె బడె విదాలుగా పురువు ప్రవక్తానె ద్వారా అం పితురులు సంగరె కొతాలగిసి.
- 2 ఈనె యే కల్రె చివరగా తా పోకు సొబ్బిటంపరె వారసుడుగా నియమించిసి. తా ద్వారా ప్రపంచముకల్లా కొరిసి.
- 3 సెయ్యె పురువు మహిమ దీకిరి తేజస్సుకు, సెయ్యె దైవత్వము గల్లా పోలిక పిందిగీకిరి, తా సక్తిగల కొతాదీకిరి సొబ్బిటుకు నిర్వహించికిరి మనమానో పాపం వినయమురె క్షమించిలాట్టెకిరి సొబ్బిటంపరె అదికారి యీకిరి, తంకె కన్నా కెత్తో స్నేహమైకిరి, రొల్లా పరలోకంరె గొప్పతా యీలా పురువురో బత్తోకైలా అత్తోఆడుకు బోసిరిసి.

పో దూతలు కన్నా గొప్పతా

- 4 పురువు తా పోకు దేవదూతలకన్నా కెత్తో స్నేహమైలా నా దీసి. సే నా సొబ్బిటకన్నా గొప్పిట.
- 5 ఈనె పురువు తా దూతానె సంగరె కొయిలాని.

తువ్వ మో పో,

మియ్యి ఆజి తొత్తె బో యీంచి.

మియ్యి తొత్తె బోబులి

ఇంకా సెయ్యె మెత్తె పోబులికిరి.

- 6 ఈనె పురువు తా అగుంతా పోకు యే లొకొకు ఇంకా పొడదిల్లాబెల్లె

పురువురో దూతలల్లా తాకు

నమస్కారము కొరిమంచిబులి కొయిలీసి.

7 ఈనె తా దూతానె ఆత్మ యీకిరి,

తా సేవకునెకు నియ్య జోలానెగా కొరిగిల్లాట బులి

తా దూతానె గురించి కొయిలీసి.

8 ఈనె తా పో గురించి

ఈనె పురువు తో సింహాసనము కెబ్బుకూ తాసి,

తో పరిపాలన తో ప్రజానెకు న్యాయమైలాటగా *తాసి బులిసి.

9 తువ్వ నీతికి ప్రేమించికిరి దుర్నీతికు ద్వేసించును

సడకాక పురువు తో తోటిలింకెంపరల్లా

తోత్తె హెచ్చించిలాపనికిరి

ఆనందపొడిలాపనికిరి ఏర్పర్చిగిచ్చి.

10 ఈనె ప్రబూ తువ్వ ఆదిరాక బూమికి పునాది పొగిను.

మెగొనంకా తో అత్తోనె సంగరాక కొరిను.

11 సడ అంతం యీజూసి ఈనె తువ్వ తాను.

సడాసల్లా కొన్నానెపనాక పుర్నయిజెవో.

12 చొక్కాపనాక సడకు మడిచిపూసు.

సడకు కొన్నపనాక మార్చిపీవు ఈనె

తువ్వ కెబ్బుకూ గుట్టెపనాక తాను.

తో బొచ్చోరోనె తగ్గినింతె బులి కొయిలీసి.

13 ఈనె మియ్యి తో సత్తువూనెకు

తో గొడ్డోనెకు పిడచెక్కపనికిరి కొర్లాజాంక

మోబత్తో కైల అత్తో ఆడుకు బొసురోబులి

తా దూతానె సంగరె కా గురించి ఈనెన్నా కెబ్బైనన్నా కొయిలాని.

14 ఈనె ఉంచినె యే దేవదూతానె కేసెబుల్నే పురువుకు సేవకొరిలా ఆత్మానెగా రక్కన పొందిలాలింకు పురువు పొడదిల్లా పరిచారకులైకిరి అచ్చో.

2

గొప్ప రక్కన

1 సడకు అమె అగుంతా సునిలా సంగతీనెకు సడదీకిరి నాతప్పిజీకుంటా తాంత్రో విసయాలై బడే జాగర్త కలిగికిరి రొమ్మంచి.

2 కైంకిబుల్నే దేవదూతానె సంగరె అం పూర్వికులుకు దిల్లా వాక్యము సత్యమైలాట. సడకు అంగీకరించికిరి నాచలిగిల్లాలింకె సడకు తగిలా సిక్కు పొందిగివ్వె.

3 ఎత్తె గొప్ప రక్కనకు అమె నిర్లక్ష్మము కొర్నే క్యాకిరి తప్పించిగీపారో? సా రక్కన ప్రబువు బోదించిలందరె ఆరంబమైకిరి, తంకెదీకిరి కూడ సున్లాలింకెదీకిరి అముకు సాత్తోబులికిరి నిరూపించబోడిసి.

4 పురువు తా చిత్తందీకిరి అద్బుతానెదీకిరి ఆచ్చర్యకార్యాలుదీకిరి బడే పరిసుద్ధాత్మ వరాలు సంగరె తా సాక్కుం దీసి.

అముకు రక్కన బిత్తురుకు సలిపించిలాట

5 అమె కొతాలగితల్లా యే లోకం బుల్నే అయితల్లా సే లోకముకు పరిపాలించితె పురువు తా దూతానెకు అదికారం దిల్లాని.

6 *ఈనె జొనె గుటెపక్కరె యాకిరి ద్రుడముగా సాక్కుం కొయిలీసి.

ఓ దేవా తువ్వ మనమకు జ్ఞాపకము కొరిగిత్తె సెయ్యె కేపాటీట.

సాదారనమైలా మనమకు దరిపించిగిత్తె కేపాటీట.

7 తువ్వ తంకు దేవదూతనెకన్నా కొంచెము తక్కువగా కొరిసు.

* 1:8 పురువాక తొ రాజ్యం * 2:6 కీర్తన, 8; 4-6

మహిమ గౌరవం సంగరె తాకు కిరీటం లొగిను.

⁸ తో అత్తోపైటంపరె తంకు అదికారం దీను.

తా గొడ్డొనెత్తోల్లె సొబ్బి రొయిదీను.

సెయ్యె సొబ్బి లోపర్చిలాబెల్లె తంకు

నాలోపర్చికుంటా కేటకు సడదిల్లాని.

ఉంచినె అమె సొబ్బి తాకు

లోపరచబొడువురో ఇంకా దిగిలానింతో.

⁹ ఈనె పురువురో క్రుపవలరె సెయ్యె ప్రతి మనమ కోసం మొర్నొ అనుబవించిలపనికిరి దూతానెకన్నా కుండె తక్కువలింకెపనికిరి కొర్లా యేసు మొర్నొ పొందిలా వల్లరె మహిమా ప్రబావము దీకిరి కిరీటం పిందిలాపనికిరి తాకు దిగిలింబొ.

¹⁰ కా నిమిత్తము సొబ్బి అచ్చొ కా వలరె సొబ్బి కలిగిలీసా సెయ్యె బడెలింకయిలా పోనుకు మహిమకు దన్నెతండుకు తా రక్తనకర్తకు కొస్టోనె ద్వారా సంపూర్ణుడుగా కొరితె తాకు ఇస్తమైసి.

¹¹ పరిసుద్దం కొరిలాలింకు పరిసుద్దం యీలాలింకు సొబ్బిలింకు జొన్నాక బో. యే కారనం దీకిరి తంకు అన్నబయినె, అప్పబొయినీనెగా డక్కితండుకు యేసు లజ్జోపొడిలాని.

¹² † సడకు సెయ్యె పురువుదీకిరి

తూ కొరిలాంచ గురించి,

తో నా గురించి మో అన్న బయినుకు ప్రకటించిమి.

ఈనె సమాజం మొజరె తో గిత్తో గైకిరి స్తుతించుంచి బులిసి.

¹³ ‡ ఈనె “మియ్యి తాకు నమ్మిగీకిరి అచ్చి” బులి ఇత్తో “మియ్యెను పురువు మెత్తె దిల్ల పిల్లానెను బులి కొయిలీసి.”

¹⁴ ఈనె సే పిల్లానె మనమరొ దేకు పిందిగిల్లా యేసురో రొగొతో మొసా గలిగిలాలింకె యీలందరె సే ప్రకారమాకా మొర్నొరో అదికారం కలిగిలా అపవాదిరో సక్తికు మొర్నొదీకిరి నాసనం కొరిసి.

¹⁵ ఈనె యాకిరి జీవిత కలో అల్లా మొర్నొడొరోదీకిరి దాస్యముకు లోబడిలాలింకు చొడిపించిసి.

¹⁶ † సెయ్యె దేవదూతానె సాయం కొరితండుకునీ. ఈనె యెడకు బదులుగా అబ్రాహామురో సంతానముకు సాయం కొరితండుకాక అయిసి బులి స్తుస్తమైలీసి.

¹⁷ ఈనె మనమానె పాపం క్షమాపన కలిగితె పురువురో దయగల నమ్మకమైలా ప్రదానయాజకుడుగా రొయికిరి సొబ్బి వినయాలై సెయ్యె తా అన్నబయినె అప్పబొయినీనుకు పాలివాడుగాయిసి.

¹⁸ సెయ్యె సొదింపబొడికిరి స్రమపొడిసి గనుక, సొదింపబొడిలాలింకు సహాయము కొరితె అచ్చి.

3

యేసు మోసే కన్నా గొప్పీట

¹ పురువుసంగరె డక్కుబొడిలా మో తోటి విస్వాసులైలా అన్నబయినె అప్పబొయినీనె! అమె పొందిగిల్లా విస్వాసము వల్లరె అం ప్రదానయాజకుడుగా పురువు ద్వారా పొడదిల్లా యేసంపరె మనుసు దీగునొడి.

² పురువురో గొరై మోసే నమ్మకముగా రొల్లపనాక యెయ్యెకూడ సెయ్యె నియమించిలా సొబ్బిపైటిరె నమ్మకముగా అచ్చి.

³ యెయ్యె మోసేకంటే బడె మహిమకు అర్హుడుగా యేసుకు బచ్చిగిచ్చి. గొరొకన్నా సడ బందిలాట బడె గనత పొందుసి.

⁴ ఈనె ప్రతిగొరొకు కేసొజొనెదీకిరి బదింపించునె. యెడసొబ్బి బందిలాట పురువు జొన్నాక.

⁵ పురువు అగురుకు కొయితల్లా సంగతీనెకు సాక్స్యార్థముగా మోసే పరిచారకుడైకిరి పురువు గొరొబిత్తరల్లా నమ్మకముగా అచ్చి.

⁶ ఈనె క్రీస్తు పో యాకిరి తా గొరొ వుంపరె నమ్మకముగా అచ్చి. ధైర్యము, నిరీక్సన వలరె ఉత్సాహముకు చివరదాకా స్థిరముగా రొన్నే అమ్మాక తా గొరొ యాకిరచ్చొ.

పురువురో ప్రజానెకు విస్త్రాంతి

⁷ ఈనె సడకు పరిసుద్దాత్మ యాకిరి కొయిలీసి.

ఉంచినె తోమె పురువురో స్వరము సునిలపనైనే

⁸ ఈనె బొనొరె సొదన దినొరె

తొం పితరులు పురువుకు విరోధంగా రగ్గో పుట్టించిలాపనికిరి

తొం మనుసునుకు కటినము కొరిగిత్రెనాండి.

9 నలపై బొచ్చొరొనె మో కార్యమునెకు దిక్కిరి,

తొం పితరునె మెత్తె పరీక్షించికిరి సోదించినె.

10 ఈనె మియ్యి సే తరములింకె వల్లరె విసిగిజేంచి

తొమె కెబ్బుకు తొం హుదయ ఆలోచనరె తప్పిజిల్లీసా.

మో బట్టోనుకు తెలిసిగిన్నార్లీసా.

11 గనక మియ్యి రగ్గోసంగరె తంకు ప్రమానము కొర్లాపనికిరి

తంకె మో విస్త్రాంతిరె ప్రవేసించినింతె బులి కొయిలించి.

12 అన్నబయినే జీవముగల్లా పురువు నడికిరిబాజిల్లాపనికిరి విస్వాసమునీల దుస్త్వూదయము తొంబిత్రె
కేసెయినెను గుటెబెల్లె అచ్చికివోబులి బులి జాగ్రత్తగా దిగ్గునోండి.

13 యెడకు బదులుగా పాపము వల్లరె కలిగిలా బ్రమదీకిరి తొంబిత్రె కేసెనను కటినపర్చిగికిరి నారొల్లపనికిరి ఆజి బుల్లా
సమయము తల్లాబెల్లాక ప్రతిదినె జొనుకు జొనె బుద్దికొయిగిండి.

14 కైంకిబుల్నే అగరెదీకిరి అముకు తల్లా ద్రుడ విస్వాసము అంతముదాకా గట్టిగా దరిగిన్నే క్రీస్తురె బాగస్తులైకిరి రోచొ.

15* ఆజి తొమె తా స్వరం సునిలాపనెనే

తొం పితరులు పనికిరి పురువుకు విరోధంగా బుల్లికిరి,

తొం హుదయములుకు కటినపర్చిగిన్నాసి

బులి లేకనాల్రె రాసికిరి అచ్చి.

16 †పురువురొ గొల సునికిరి తాకు విరోధంగా రగ్గో పుట్టించిలా యే ప్రజానె కేసే? అంకల్లా మోసే ద్వారా ఐగుప్తు దీకిరి
బయలుదేరికిరి అయిలాలింకాక నీనా?

17 కా అంపరె నలపై బొచ్చొరొనె సెయ్యె రగ్గో పొడిసి? పాపము కొర్లాలింకంపరాక నీనా? తంకల్లా మొడానెగా బొనొరె
జొడిజీసె.

18 తా విస్త్రాంతిరె ప్రవేసించినింతెబులి కా గురించి ప్రమానము కొరిసి? అవిదేయులైలలింకె గురించాకనీనా.

19 ఈనె అవిస్వాసము సంగరె తంకె జెన్నారినెబులి గ్రహించిలించొ.

4

1 తా విస్త్రాంతిరె ప్రవేసించిమంచి బుల్లా వాగ్దానము ఇంకా టారికిరిరొల్లా తొంబిత్రె కేసెనను గుటెబెల్లె సే వాగ్దానము
నాకడిగీకుంటా తప్పిజిమ్మొకివో బులి డొరొ కలిగికిరి తమ్మంచి.

2 తంకె ప్రకటించిలాపనికిరి అముకంకా సువార్త ప్రకటించబొడిసి. ఈనె తంకె సునిలలింకెదీకిరి విస్వాసము కలిక్కిరి
మిసికిరినింతె గనుక సునిలా వాక్యము తంకు వ్యర్థమైజేసి.

3 ఈనె స్రుస్తి ఆరంబం తీకిరి తా సొబ్బిపైటిసె సంపూర్తి కొరికిరి అచ్చి.

యే విస్త్రాంతి గురించి గనక మియ్యి రగ్గోసంగరె

తంకు ప్రమానము కొర్లాపనికిరి తంకె మీ విస్త్రాంతి

దూంచిబుల్లా దెసారె తంకె ప్రవేసించినింతె బులి కొయిలించి.

సెయ్యె కొయిలా కొతా సునికిరి

విస్వాసులైలా అమె సే విస్త్రాంతిరె ప్రవేసించిలించొ.

4 ఈనె “పురువు నత్తరొ దినొరె తా కార్యముసొబ్బి ముగించికిరి విస్త్రమించిసి” బులి నత్తర దినొగురించి సెయ్యె గుటె
పక్కరె కొయికిరి అచ్చి.

5 యెడానీకిరి యేచోటురాక తంకె మోవిస్త్రాంతిరె ప్రవేసించినింతె బులి కొయికిరి అచ్చి.

6 ఈనెను కేసో కుండె మంది విస్త్రాంతిరె ప్రవేసించుసెబుల్లా కొతా నిచ్చయము గనక అగరె సువార్త సునిలాలింకె
విస్వసించిలానింతె గనక ప్రవేసించిలానింతె.

7* “ఆజి తొమె పురువురొ కొతా సునిలాపనెనే

తొం మనుసూనెకు కటినపర్చిగిత్రెనాండి”

బులి బడే పొచ్చాడే కొయిలా ప్రకారము ఎత్తెకలో
అయిలా తరువాత దావీదు గ్రందమురె
ఆజి బుల్లా గుట దినోరె నిర్మయించిసి.

8 †యెహోసువ తంకు విస్త్రాంతి కలిగించినె సే తరువాతరె పురువు వాగ్దానం కొరిలా ఇంగుట దినోగురించి సెయ్యె
నాకొయికుంటా రొయిత.

9 గనక పురువు సత్తరొ దినోరె విస్త్రాంతి కడిగిల్లాపనాక పురువురొ మనమానుకంకా విస్త్రాంతి అచ్చి.

10 ‡కైకిబుల్నే పురువు తా పైటీనుకు ముగించికిరి విస్త్రమించిలా ప్రకారము తా విస్త్రాంతిరె ప్రవేసించిలాట కూడ తా
పైటీనుకు ముగించికిరి విస్త్రమించుసి.

11 గనక అవిదేయత వల్లరె తంకె పొడిజెల్లపనికిరి అంబిత్తరె కేసినను నాపొడిజీకుంటా సే విస్త్రాంతిరె
ప్రవేసించితందుకు ప్రయత్నం కొరిమండి.

12 కైకిబుల్నే పురువురొ వాక్యము సజీవమైలా బలముగలిగిలాటైకిరి దీటఅంచుగలిగిలా కత్తిపనాట కెటువంటి
కడ్లముకన్నా వాడిగా రొయికిరి పొర్నొఆత్మానెకు కీల్లుకు మూలుగునెకు యిడకడుకుంటా దూరికిరి ప్రూదయమురొ
తలంపూనెకు ఆలోచనానెకు పరిక్సించిలీసి.

13 ఈనె పురువురొ ద్రుస్తిరె నాదిగిదిల్లాట కిచ్చిసి. అమ్మె సొబ్బీ దిగితల్లా పురువుకాక లెక్క కొయిమాసి. సే పురువురొ
అంకీనెకు యే స్రుస్తిరె రొల్లా సొబ్బి మరుగునీకిరి తేటగా అచ్చి.

యేసాక గొప్పు ప్రదాన యాజకుడు

14 పురువురొ సముకముద్వారా జెల్లా పురువురొ పో యిలా యేసు బుల్లా గొప్పు ప్రదానయాజకుడు అముకు అచ్చి
గనక అమె పొందిగిల్లా విస్వాసముకు గట్టిగా దరిగిమ్మా.

15 అం ప్రదానయాజకుడు అం బలహీనతానె దీకిరి, అం దీకిరి సమాన అనుబవం కలిగిలాట. సొబ్బివిసయాలై
అంపనాక సోదంపబొడినన్నా సెయ్యె పాపం నీలాటైకిరి అచ్చి.

16 గనక అమె కనికరం పొందికిరి సమయానుకూలమైల సహాయము కోసం క్రుప పొందితె దైర్యము సంగరె క్రుపా
సింహాసనం పక్కరకు జెమ్మా.

5

1 ప్రతి ప్రదానయాజకుడు మనమానెతీకిరి ఏర్పాటు కొరిగీకిరి పాపోనె కోసం అర్చనానెకు బలీనెకు అర్పించితె పురువు
వినయమైలా కార్యములు జరిగించితె మనమానె గురించి నియమించబొడిసి.

2 సెయ్యంకా బహీనతసంగరె ఆవరింపబొడికిరి తల్లందరె సెయ్యె కిచ్చి నాఅరకైలాలింకంపరె బట్టోతప్పిలాలింకంపరె
ఓర్పుకలిగిలాటైకిరి అచ్చి.

3 *సే కారనం వల్లరె మనమానె పాపోనె కోసం క్యాకిరొ సాకిరాక తా కోసంకూడా కోసం అర్చనము కొరివలిసిలాటైకిరి
అచ్చి.

4 †ఈనె కేసినన్నా యే గనత తాకు సెయ్యొక పొందిగిన్ని గని అహరోనుకు డక్కిపించిలాపనికిరిరాక పురువుదీకిరి
డక్కిపించికిరి ప్రదానయాజకుడుగా యే గనత పొందుసి.

5 ‡సాకిరాక క్రీస్తుకూడ ప్రదానయాజకుడైతందుకు తాకు సెయ్యొక గౌరవించబొడిలాని గని,
తువ్వ మో పో బులి

మియ్యి ఉంచినె తొత్తె జొర్నొకొరించి బులి
తాదీకిరి కొయిలాపనాక తాకు పురువు హెచ్చించిసి.

6 §సే ప్రకారమాక
తువ్వ మెల్కీసెదెకురొ క్రమము చొప్పురె నిరంతరము తల్లా
యాజకుడుగా అచ్చు బులి ఇంగుట పక్కరె కొయిలీసి.

7 * యేసు బూమంపరె రొల్లా దినోనై గొప్పు కందసంగరె అంకిరె పని కడిగీకిరి, తాకు మొర్నొ తీకిరి రక్సించిలాటకు ప్రార్దన
కొరిసి. యాచనలకు సమర్పించికిరి తగ్గంపు జీక కలిగికిరి రొల్లాబల్లె సెయ్యె అంగీకరించబొడిసి.

8 సెయ్యె పో గా రొయికిరి సెయ్యె పొడిలాస్త్రమవల్లరె విదేయతకు సుగ్గిచ్చి.

† 4:8 ద్వితీ 31, 7 యెహోసువా 22, 4 ‡ 4:10 ఆదికాండము 2, 2 * 5:3 లేవి 9, 7 † 5:4 నిర్గమ 28, 1 ‡ 5:5 కీర్తన 2, 7 § 5:6 కీర్తన
110, 4 * 5:7 మత్త 26, 36-46; మార్కు 14, 32-42; లూకా 22, 39-46

9 ఈనె సెయ్యె సొబ్బి వినయాలై సంపూర్నుసిద్ది పొందిలాటైకిరి తాకు విదేయులైలాలింకు నిత్యమైలా రక్కనకు దీతందుకు కారకుడైకిరి అచ్చి.

10 ఈనె తాకు పురువు యాజకుడైలా మెల్కినెదెకురో క్రమము చొప్పురె ప్రదానయాజకుడుగా పురువు నిర్నయించిసి.

విస్వాసం తీకిరి బాజిల్లాలింకు హెచ్చరించువురో

11 యెడగురించి అమె కొయివలిసిలాంచ బడే సంగతీనె అచ్చెగాని తొమె సునితె బద్దకస్తులైలందరె వివరించువురో కొస్టా.

12 కలోసంగరె దిగినె తొమె బోదకునెగా తమ్మాసి గని పురువురో కొతానె వినయంరె అగరో మూలపటోనెకు తొముకు ఇంకా జొనె కొయివురైలీసి. తొమె దుద్దోపిలాలింకెవనాక అచ్చొ గాని బలమైలా కద్ది కైలాలింకె పనికిరినింతో.

13 ఈనె దుద్దోపిలా సొబ్బిలింకె పిల్లానాక గనక నీతె వాక్యవినయమురె తప్పు ఒప్పునె గురించి అనుబవజ్ఞానం నీలాటపనికిరి అచ్చి.

14 పరిపూర్నులు అయిలాలింకె తంకె అనుబవం సంగరె మేలు కీడులుకు ఆలోసించిలా జ్ఞానం కలిగికిరి తాసె. తంకాక బలమైలా కద్ది కావాలి.

6

1 కాబట్టి క్రీస్తు బోదరో మూలపటోనె గురించి పదేపదే చర్చించువురో మానిగికిరి పరిపూర్నుత పొందితే అగురుకు పరిపూర్నుత పొందితందుకు కొనసాగించిమా. గోరమైలా పైటినె సడికిరి, మారుమనస్సు పొందివురో, పురువురె విస్వాసము.

2 బాప్టిసం గురించి బోద, ముండొంపరె అత్తొనెపొగిలాట గురించి మొర్లిలింకె పునరుత్థానముకు నిత్యమైలాతీర్పు బుల్లాయే పునాదీనె ఇంక ఇంకా నాపొక్కుంటా రొమ్మండి.

3 పురువు అనుమతిదిన్నే అమె అగురుకు సాకిరి కొరిమండి.

4 విస్వాసంరె తొలిగిజిల్లా జొనె ఇంకా పచ్చాత్తాపం బిత్తురుకు క్యాకిరి అయిపారి? గుట సారి ఎలిగించబోడికిరి, పరలోకసంబందమైలా వరముకు చక్కిదిక్కిరి పరిసుద్దాత్మరె పాలుపొందికిరి.

5 పురువురో వాక్యముకు అయితల్లా కలోరో సక్తుల గురించి అనుబవపూర్వకంగా తెలిసిగిల్లాలింకె.

6 ఈనె తంకవినయమురె పురువురో పొకు ఇంకా సిలువపొగితె సొబ్బిలింకగరె తాకు అవమానము కొరిలీసె గనుక సాలింకు ఇంకా మారుమనుసు పొందిలాపనికిరి కొరువురో అసాద్యము.

7 కైంకిబుల్నే నేల సడంపరె అత్తమానూ పొడిలా పనిపీకిరి కేసె బిల్లోకొరిలీసో తంకు అనుకూలమైలా పచ్చకు పచ్చిపించికిరి పురువు ఆసీర్వాదం దూసి.

8 ఈనె కొటానె తుప్పానె గచ్చ తీగానెకు సడంపరె బోడదిల్లాబెల్లె సడ నాపైటికైలాట బులి వినర్జించిలాటబులి సాపము పొందిలాట బులి ఆకరుకు నియ్య దీకిరి పుడ్డుపూసె.

9 గనక ప్రీయమైలాలింకే, అమె యాకిరి కొయినన్నా తొమె అడకన్నా బొత్తైలా రక్కనకరమైలా స్థితిరాక అచ్చొబులి గట్టిగా నమ్మిలించొ.

10 తొమె కొల్లా కార్యముకు తొమె విస్వాసునెకు పరిచర్య కొరికిరి ఇంక పరిచర్య కొరువురో వల్లరె తా నా దీకిరి దిగిదిల్లా ప్రేమకు పనిరిజితె పురువు అన్యాయస్తుడునీ.

11 అమె కేట గురించి ఎదురు దిగిలించొ సడ పొందితె ఆసక్తి దిగిపించిలాలింకెపనికిరి ఆకరి వరకూ రొమ్మాసి బులి మో గొప్ప ఆస.

12 తొమె బద్దకస్తులైకిరి నీకుంటా విస్వాసం దీకిరి, ఓర్పుదీకిరి పురువు దిల్లా వాగ్దానముకు పొందిగిమ్మాసి బులి అం ఆస.

నమ్మకమైలా పురువురో వాగ్దానం

13 పురువు అబ్రాహాముకు వాగ్దానము కొరిలాబెల్లె తాకన్నా గొప్పీటనీ గనక స్వయంగా తా తోడు బులికిరాక యే ప్రమానము కొరిసి.

14 కచ్చితముగా మియ్యి తొత్తె ఆసీర్వదించుంచి బులి సొత్తాక తొత్తె బడేజనముగా విస్తరించుంచి బులి కొయిసి.

15 సీ కొతా నమ్మిలా అబ్రాహాము ఓర్పుదీకిరి ఎదురు దిగిసి. గనక పురువురో వాగ్దానపలము పొందిగిచ్చి.

16 మానమానె తంకన్నా గొప్పిట తోడు బులి ప్రమానము కొరుసె. తంకె ప్రతీ వివాదముకు ప్రమానం దీకిరాక పరిస్కారము జరిగివో.

17 పురువు తా వాగ్దాన విసయమురె తా ఉద్దేశముకు నామార్చిగిల్లాటైకిరి, వాగ్దానముకు పొందిగితై వారసులైలాళింకు సడ స్పష్టము కొరిగిచ్చి. సడవల్లె వాగ్దానముకు తా ఉంపరె ప్రమానం కొరికిరి ద్రడపర్చిగిచ్చి.

18 సడకు మార్పునీలా యే దీట విసయాలై పురువు సారొకొతాకొయిని. సెయ్యె దిల్లాంచ కోసం ఎదురు దిగిలాళింకు గొప్ప ప్రోత్సాహం కలిగిలాపనికిరి యాకిరి కొరిసి.

19 యే నిరీక్సన అం జికానెకు నాపిట్టిగిబాజికుంటా స్థిరముగా రొయిదీతె లంగరు పనికిరి. సడ కచ్చితముగా స్థిరముగా, తెరబిత్రెకు ప్రవేశించిలాపనికిరి కొరిలీసి.

20 కెబ్బుకు మెల్కీసెదెకు క్రమము చొప్పురె ప్రదానయాజకుడైలా యేసు తాండ్రెబిత్రె అంకన్నా అగరె అమె పక్సముగా ప్రవేశించిసి.

7

యాజకుడైలా మెల్కీసెదెకు

1 * అబ్రాహాము యుద్ధంరె చార్లింకు రొజానుకు ఓడించికిరి బుల్లికిరి అయితల్లాబెల్లె సాలేముకు రొజా ఇంకా గొప్ప పురువురొ యాజకుడైలా మెల్కీసెదెకు అబ్రాహాముకు మిసిగీకిరి తాకు ఆసీర్వదించిసి.

2 సెల్లె అబ్రాహాము సొబ్బిఅండ్రె దొస్టావొంతు తాకు దీసి. సెయ్యె సాలేము రొజాయిలందరె తా నా కు అగరె నీతికి రొజాబులికిరి తరువాత తా నాకు సమాదానపు రొజాబులి అర్ధం.

3 మెల్కీసెదెకు బో గురించైనన్నా మా గురించైనన్నా వంసావలి కోసమైనా జొర్నొ మొర్నొ గురించన్నా ఆదారానె నీలాటైకిరి, జీలాకలోల్లా నిత్యము యాజకుడైలా పురువురొ పో కు పోలికిరి అచ్చి.

4 దిగోండి యెయ్యె కెత్తో గొప్పిటో. మూల పురుసుడైలా అబ్రాహాము యుద్ధమురె సెయ్యె పొందిగిల్లా సొబ్బివస్తువూనెరల్లా దొస్టావొంతు దీసి.

5 ఈనె లేవిరొ పోనె యాజకత్వము పైటి పొందిలాళింకె తంకన్నబయినె అబ్రాహాము వంసమురె జొర్నైనన్నా, దర్మసాస్త్రము చొప్పురె తా సొంత మనమానైలా ఇస్రాయేలు ప్రజానె పక్కరె దొస్టావొంతుకు కడిగిత్రందుకు ఆజ్జకు పొందికిరి అచ్చె.

6 గాని మెల్కీసెదెకు లేవీ వంసముకు నాచెందినన్నా, పురువురొ వాగ్దానాలు పొందిగిల్లా అబ్రాహాము పక్కరె దొస్టావొంతు కడిగీకిరి తాకు ఆసీర్వదించిసి.

7 ఆసీర్వాదం పొందిలాటకన్నా ఆసీర్వాదం దిల్లాట గొప్పిటబులి కొయితె సందేహం నియ్యి.

8 ఈనె లేవి క్రమముకు దిగినె మొర్నొకు గురైలాళింకె దొస్టావొంతు కడిగిల్లీసె. గాని మెల్కీసెదెకు క్రమము చొప్పురె దిగినె కెబ్బుకూ జీవించిలాట కడిగిచ్చి బులి లేకనము కొయిలీసి.

9 ఈనెమాను గుటె విదముగా కొయిమాసిబుల్నే అబ్రాహాము దొస్టావొంతు దిల్లాపనికిరైనే దొస్టావొంతు కడిగిత్రల్లా లేవియులుకూడా దొస్టావొంతు పురువుకు దిల్లాపనికిరాక.

10 క్యాకిరిబుల్నే అమె సడ గురించి కొతాలగినె మెల్కీసెదెకు అబ్రాహాముకు మిసిగిల్లాబెల్లె లేవీ ఇంకా జొర్నైలాని గాని తా పితరులురొ దెరాక అచ్చి.

11 సె లేవీయులు యాజకూనెగా సంపూర్ణముగా కొర్నే అహారోసుకు బదులుగా, మెల్కీసెదెకు యాజకుడు క్రమమురె ఇంకాజొనె యాజకుడు అయివలీసిలా అవసరం రొయితానీ.

12 ఎడానీకిరి యాజకూనె మార్చబొడినే యాజకదర్మము కూడా మార్చబొడుసి.

13 కా గురించి యే సంగతీనె కొయిసెవో సే అం ప్రబువు వేరె వంసమురె జొర్నైసి. సే వంసమురోట కేసైనను కెబ్బే బలిపీటము పక్కరె పరిచర్య కొరిలానింతె.

14 అం ప్రబువు యూదా సంతానమురె జొర్నైసి బుల్లాట స్పష్టమాక .సె గోత్రవిసయమురె యాజకూనె గురించి మోసే కిచ్చికోయిలాని.

మెల్కీసెదెకు పోలికిరి రొల్లా వేరె పూజరి

15 మెల్కీసెదెకు పోలికిరి రొల్లా వేరె యాజకుడు అయికిరి అచ్చి బులి అమె కొయిలా సంగతీనె బడే స్పష్టముగా అచ్చె.

* 7:1 ఆదికాండము 14, 17-20

16 సెయ్యో మనమానో ఆజ్ఞానెకు నియమాలు వల్లరె యాజకుడుగా నియమించబోడిలాని గాని నిత్యము జీకిరిరోల్ల సక్తిదీకిరి యాజకుడుగా నియమించబోడిసి.

17 క్యాకిరిబుల్నే తువ్వు నిరంతరము మెల్కీసెదెకు క్రమము చొప్పురె యాజకుడైకిరి అచ్చుబులి తా వినయంరె లేకనానె కొయిలీసె.

18 సె దర్మసాస్త్రము కేటకు సంపూర్వసిద్ధి కలిగించిలాని గని అగరెదిల్లా ఆజ్ఞ బలహీనమైలాట్టెలందరె ప్రయోజనంనీలందరె సడకు నివారనకొరికిరచ్చి.

19 కైంకిబుల్నే మోసేకు దిల్లా దర్మసాస్త్రం కేటకు పరిపూర్తి కొరిలాని. ఈనె అముకు గొప్ప నిరీక్సన దీసి సడ ద్వారా అమె పురువు పక్కు చేరిగిల్లించో.

20 యెడ వినయంరె పురువు ప్రమానము కొరిసి. ఈనె పొదర్లింకె యాజకూనెగా రొయితె కేసే ప్రమానం కొరిలానింతె.

21 ఈనె

యేసు ప్రమానము ద్వారా యాజకుడు యీసి.

ఆ వినయమురె పురువు తాసంగరె తా కొతా నామార్చిగీకుంటా

కెబ్బుకూ యాజకుడుగా తాసు బులి ప్రబువు

ప్రమానం కొరిసి బులి కొయిసి.

22 యే ప్రమానం ద్వారా యేసు స్రేస్తమైలా నోనిబందనకు బాద్యుడైసి.

23 ఈనె బడేలింకె యాజకూనె యీసెగాని మొర్నొ వల్లరె సే యాజకపైటికి కొనసాగించినారెసి.

24 ఈనె యెయ్యో నిరంతరము జీకిరిరోల్లాట గనుక మార్పునీలా యాజకత్వము కలిగిలాటయీసి.

25 యెయ్యో తా సంగరె పురువు పక్కు అయిలాలింకు పక్సముగా, విజ్ఞాపనము కొరితండుకు నిరంతరము జీవించిలీసి గనుక తంకు సంపూర్వముగా రక్సించితె సమర్థుడైకిరి అచ్చి.

26 యేసు పవిత్రుడు, నిర్దోసి, కల్మసంనీలాట, పాపొనెరె, నాచేరుకుంటా ప్రత్యేకముగా రొల్లాట మెగొమండలముకన్నా వేరుగా హెచ్చయిలాట్టెకిరి యాట ప్రదానయాజకుడు అముకు సొరిపొడిలాట.

27 యెయ్యో పొదరె ప్రదానయాజకూనె వల్లరె అగరె తా సొంత పాపొనె కోసం తర్వాతరె ప్రజానె పాపొనె కోసం దినెదినెకు బలీనెకు అర్పించితె అవసరంనీకుంటా సొబ్బిలింకుకోసం గుట్టెబెల్లాక తాకు సెయ్యోక బలి అర్పించిగిచ్చి.

28 దర్మసాస్త్రము బలహీనమైలా మనమానుకు ప్రదానయాజకూనెగా నియమించిసి. గాని దర్మసాస్త్రము తర్వాతరె అయిలా ప్రమానము తా పొ ద్వారా నియమించబోడికిరి సంపూర్వము కొరిసి.

8

యేసాక అం ప్రదాన యాజకుడు

1 అమె వివరించితల్లా సంగతీనె సారాంసం కెడబుల్నే, అముకు సాటపనా ప్రదానయాజకుడు జోనె అచ్చి. సెయ్యో పరలోకంరెరోల్లా గొప్పిట* సింహాసమునకు బత్తోకైలా అత్తో ఆడుకు ఆసీనుడైకిరి బొసిరికిరి అచ్చి.

2 సెయ్యో అతిపరిసుద్ధస్తలమురె బుల్నే మనమసంగరె నీకిరి ప్రబువాక స్థాపించిలా సొత్తాయిలా గుడారముకు పరిచారకుడు యీకిరి అచ్చి.

3 ప్రతీ ప్రదానయాజకుడు అర్చనలకు ఇంకా బలీనెకు పురువుకు బలిదీతె నియమించబోడిసి. సాకిరాక అం ప్రదానయాజకుడు కిడైనా అర్పించవలీసికిరచ్చి.

4 దర్మసాస్త్రం ప్రకారము అర్చనానె అర్పించితె యాజకూనె అచ్చె. గనుక యెయ్యో బూమంపరె రొన్నే కెబ్బుకూ ప్రదానయాజకుడుగా రొయితాని.

5 మోసే గుడారము అమర్చిగిల్లాబెల్లె పొరొతో ఉంపరె తొత్తె దిగిదెల్ల మాదిరి చొప్పురె సమస్తముకు కొరితండుకు జాగర్తపొడు బులి పురువుదీకిరి హెచ్చిరింపబోడిల ప్రకారమురె యే యాజకూనె పరలోకసంబందమైలా వస్తువూనెరొ నీడ రూపమైలా గుడారము బితైరె సేవ కొరిలీసె.

6 ఈనె యేసు ఉంచినె మరిబూతుయాల వాగ్గానాలురె నియమించిలా మరిబూతుయాల నిబందనకు పురువుకు మనమానెకు మొజిరొవ్యక్తిగా గొప్ప సేవకత్వము పొందికిరి అచ్చి.

7 కైంకిబుల్నే సే అగరె నిబందన లోపము నీలాట యీనె దీటోనిబందనకు అవకాసం రొయితని.

8 † ఈనె పురువు తా మనమానో తప్పునె తెలిసిగీకిరి యాకిరి కొయిలీసి

* 8:1 మహామహుని † 8:8 యిర్మియా 31, 31-34

“ప్రబువు ఇదిగో గుటె కలో అయిలీసి.

సెల్లె ఇస్తాయేలు గొరొలింకెదీకిరి యూదా
గొరొలింకెదీకిరి మియ్యి నో నిబందన కొరుంచి బులి కొయిసి.

9 ఎడ మియ్యి ఐగుప్తు దెసా దీకిరి

అంకె పితరులుకు దోరకు రప్పించితె

తంకు అత్తో దరిగిల్లా దినో దీకిరి మియ్యి

కొరిలా నిబందనపనాట నీ.

కెడబుల్నే తంకె మో నిబందనరె నమ్మకంగా నింతె

గనుక మియ్యి తంకు వినయంరె

పట్టించిగిల్లానీ బులి కొయిలీసి.

10 సె దినో ఈనె తరువాత ఇస్తాయేలు

గొరొలింకు సంగరె మియ్యి కొరిలా నిబందన కిడబుల్నే

తంకె మనసురె మో దర్మవిదీనె రొయిదించి

తంకె హుదయము ఉంపరె సడ రాసుంచి

మియ్యి తంకు పురువో యాకిరి తాంచి

తంకె మెత్తె జనముగా తాసె.

11 తంకె బితైరె కేసెను

‘ప్రబువుకు తెలిసిగిన్నెంతె’ బులి

తా పట్టనంలింకె యానెను తంక అప్ప

బోయినీనె ఈనెను బోదించినీ

ఈనె తంకెబితైరె చెన్నిలింకె మొదలుదీకిరి

బోడొలింకె జాంక సొబ్బిలింకె మెత్తె తెలిసిగివ్వె.

12 మియ్యి తంకె తప్పునె క్షమించికిరి

ఇంకా తంకె పాపోనె కెబ్బుకూ గుర్తు కొరిగిన్ని బులి కొయిసి.”

13 పురువు నో నిబందన బులి కొయివురో వల్లరె అగరోట పుర్నునిబందనగా కొరిసి. కిడబుల్నే కిడపుర్నాటవో సడ అంతరించిజీతె సిద్ధముగా అచ్చి.

9

బూమంపరె ఇంకా పరలోకంరె ఆరాదన

1 అగరె నిబందనరె ఆరాదనకు నియమానె ఈనె యేలోకో కూడ పరిసుద్దస్తలం నియమాలు దివ్వరో యాసి.

2 కైంకిబుల్నే అగరె గుటె గుడారము ఏర్పర్చబోడిసి తాండ్రె బొత్తిస్తంబముకు, బల్లకు, సడ వుంపరె రొయిదిల్లా పురువుకు అర్పించిలా రొట్టినె అచ్చె. సడకు పరిసుద్దచోటు బులి నా.

3 దీటో తెరకు తెనిపోక్కరె అతిపరిసుద్దమైలా చోటురె గుడారము తాసి. సడ బడే అతిపరిసుద్దస్తలం.

4 తాండ్రె సాంబ్రానీ దూపంపొగిలా సున్న పెడి అచ్చి. సొబ్బియాడుకూ సున్నరేకులుదీకిరి రొల్లా నిబందన మందసము అచ్చి. సే మందసమురె మన్నా సంగరె తల్లా సున్నరొ గిన్నె, చిగిరించిలా అహరోసు అత్తోబడ్డి, రాసికిరి రొల్లా దీట నిబందన పలకలు అచ్చె.

5 సడంపరె కరునావీటముకు ఉంపరె మహిమ సంగరె రెక్కానె పిటిగీకిరి రొల్లా కెరూబులు అచ్చె. ఈనె ఉంచినె వివరముగా కొయివురో యాసి.

6 యెడ యాకిరి ఏర్పాటు కొరిలాబెల్లె యాజకూనె సేవకొరికుంటా, నిత్యము అగరె గుడారము బిత్తురుకు జోసె.

7* గాని బొచ్చురె గుటెబెల్లె మాత్రమాక ప్రదానయాజకుడు జొన్నె తా కోసం తా మనమానె కోసం నాతెలిసికుంటా కొరిలా పాపోనె కోసం పురువుకు అర్పించిలా రొగొతో దరిగీకిరి దీటోవ గుడారమురె ప్రవేసించివో.

8 ఎడవల్లరె సే అగరె గుడారము ఇంకా నియమించిలాబెల్లె అతిపరిసుద్దచోటురె ప్రవేసించిలా బట్టరె డొరొపొడిలానీ బులి పరిసుద్దాత్మ తెలియపర్చిలీసి.

* 9:7 లేవీయాకాండము 16, 2-34

9 సె గుడారము వుంచినె కలోకు ఉదాహరణగా అచ్చి. యే ఉదాహరణరో అర్థం కిడబుల్నే మనస్సాక్కి విసయమురె ఆరాదికుడైలాటకు సంపూర్ణత నాకలిగించినారా అర్చనానెకు, జంతుబలీనెకు అర్పించినె.

10 ఎడ నో క్రమము జరిగిలా కలో అయిలాజాంక నియమించిబొడిసి. కైకుంట, పీకుంటా బడే విదములయిలా సుద్దికరన పద్దతినె సొబ్బి దేరో ఆచారమునె మాత్రమాక.

11 ఈనె క్రీస్తు అయితల్లా మేలులువిసయమురె ప్రదానయాజకుడుగా అయికిరి, సెయ్యె నిత్యమైలా విమోచన సంపాదించికిరి అత్తోనెదీకిరి నాకొర్లాట నీకిరి, యే స్రుస్తికి నానంబందించిలాట, మరి గనమైలా పరిపూర్ణమైలా గుడారము సంగరె సేవకొర్లీసి.

12 మేకలురో గయినెరో రొగొతోసంగరె నీకిరి సొబ్బిలింకరో నిత్యమైలా రక్కన కోసం తా సొంత రొగొతోదీకిరి గుట్టెబెల్లాక అతిపరిసుద్దచోటుకు ప్రవేసించినె.

13 కైంకిబుల్నే మేకలరో, ఎద్దులరో రొగొతోకు మలినమైలాలింకంపరె గయిదూడరో పోసా జల్లువురో వలరె దే బయల్లె పవిత్తం కలిగిలీసి.

14 నిత్యుడైలా ఆత్మ సంగరె తాకు సెయ్యె పురువుకు నిర్దోసిపనికిరి అర్పించిగిల్లా క్రీస్తురో రొగొతో నిర్దీవమైలా ఆచారమునె సడికిరి అమె జీవముగలిగిలా పురువుకు సేవించితె తో మనస్సాక్కి కెత్తో బడే సుద్దికొరిసి.

15 యే కారనం వలరె అగరె నిబందన కలోరె జరిగిలా అపరాదము దీకిరి విడుదల కలిగితె సెయ్యె మొర్నొ పొందితండుకు పురువుసంగరె డక్కబొడిలాలింకెపనికిరి నిత్యమైలా వారసత్వం గురించి వాగ్దానము పొందితె నిమిత్తము సెయ్యె నో నిబందనకు మొజిరో మనమగా అచ్చి.

16 మొర్నొసాననం కేటె అచ్చొ సెట్టె మొర్నొ సాననం రాసిలాలింకెరో మొర్నొ అవసరము.

17 సె నియమం రాసిలాలింకె మొర్నొ పొందినాక సడ చెల్లుసి. సడ రాసిలాలింకె నామొర్లీన్నే సడ కెబ్బుకైనన్నా చెల్లుసి.

18 ఈనె యే కారనం వలరె అగరె నిబందనకూడ రొగొతో నాఉపయోగించిలాపనెనే చెల్లుబాటు యిలానీ.

19 దర్మసాస్త్రం ప్రకారమురె మోసే ప్రతి ఆజ్ఞకు మనమానె సంగరె కొయిలా తరువాత సెయ్యె పనిదీకిరి, రొగొతోరంగు గల్లా, గొరెబల్లొనెదీకిరి, హిస్సొపు దీకిరి, గయిస్త్రొ, మేకలురో రొగొతోనె కడిగీకిరి మనమానంపరె దర్మసాస్త్రం ఉంపరె జల్లిసి.

20 “సే తరువాత మోసే తంకనంగరె పురువు యే నిబందన రొగొతో తొముకు దిల్లీసి యెడకు నిబందన గుర్తుగా ఆచరించు బులి కొయిసి.”

21 సాకిరాక గుడారము ఉంపరె సేవ పాత్రానె సొబ్బిటంపరె సే రొగొతో జల్లిసి.

22 ఈనె దర్మసాస్త్రప్రకారమురె సొబ్బి వస్తువునెకు రొగొతోదీకిరి సుద్ది కొరిమంచిబులి, రొగొతో నాచించించికుంటా పాపకృమాపన కలిగినీ బులి కొయిపారో.

క్రీస్తురో బలియాగం దీకిరి పాపోనెకు కడిపీవురో

23 పరలోకంరె రొల్లాంచకు పోలికిరి రొల్లా వస్తువునె యాంచ బలీనె వలరె సుద్దికొరువురో అచ్చి బులి ఈనె పరలోక సంబంధమైలా యెడకంటె స్రేస్తమైలా బలీనె వలరె సుద్దికొరుమాసి.

24 సడ వల్లరె సొత్తయిలా పరిసుద్దచోటురె పోలికిరి మనమానె అత్తోనె సంగరె కొరిలా పరిసుద్దచోటురె క్రీస్తు ప్రవేసించలానీ గాని, ఉంచినె అం కోసం పురువుకు సన్నిదిరె దిగిదీతండుకు పరలోకమురె ప్రవేసించినె.

25 సెత్తాక నీ, ప్రదానయాజకుడు ప్రతీ బొచ్చురో గయిస్త్రొ రొగొతో కడిగీకిరి అతిపరిసుద్దచోటురె ప్రవేసించినె, ఈనె క్రీస్తు సాకిరి బడేసార్లు తాకు సెయ్యె అర్పించిగితె ప్రవేసించిలానీ.

26 సాకిరి ఈనెమాను జగత్తుపునాది మొదలు దీకిరి సెయ్యె బడే సారులు స్రమపొడివురో యిసి. ఈనె సెయ్యె యుగములు సమాప్తిరె తాకు సెయ్యె బలిగా అర్పించిగితెండుకు పాపం కడిగితె గుటెసారి ప్రత్యక్యపర్చబొడిసి.

27 మనమానల్లా గుటె సారి మొర్నొపొందిమంచి బులి నియమించబొడిసి. సే తరువాత పురువు సంగరె తీర్పు తీర్చబొడుసి.

28 దీటోసారంకా క్రీస్తుకూడ బడే పాపోనె బరించితె గుటెసారి అర్పించిబొడికిరి తా కోసం కనిపెట్టికిరి రొల్లాలింకు రక్కన నిమిత్తము పాపము నీకుంటా ప్రత్యక్యమైసి.

10

1 దర్మసాస్త్రము అయితల్లా మేలులురో నీడగలిగిలాటాక గాని సే వస్తువూనెరో సొత్తయిలా స్వరూపముగలిగిలాట నీ. ఈనె సే యాజకూనె ప్రతి బోచ్చోరో అర్పించిలా గుటె విదమైలా బలీనె సడానుకు దన్నెలాలింకు కెబ్బుకు పరిపూర్ణం కొరినారినె.

2 సాకిరి కొరిలాలింకు సేవించిలాలింకె గుటె సారి నుద్దికొరిలా తరువాతరె తంకమనసాక్కికు పాపం కోసం జ్ఞాపకం రొన్ని ఈనె సడకు అర్పించితె మానిపూసె నీ.

3 ఈనె సే బలీనె అర్పించివురో వల్లరె పాపోనె జ్ఞాపకము అయిలీసె.

4 కైంకిబుల్నే గయిలొ, మేకలురో, రొగొతో పాపోనెకు కడువురో అసాద్యము.

5 ఈనె యే కారనం వల్లరె సెయ్యె యే లొకొరె ప్రవేసించిలాబెల్లె యాకిరి కొయిలీసి.

“బలి కు అర్పనకు తువ్వు కోరిలాను గని
మెత్తె గుటె దేకు సిద్ధం కొరిను.

6 బలిపీటమంపరె గయినుకు పుడ్డువురో
ఇంకా పాపం కోసం బలీనె అర్పించువురో తొత్తె ఇస్టమైలాటనీ.

7 సెల్లె మియ్యి గ్రందపుచుట్టరె
మోగురించి రాసిలా ప్రకారము
దేవా, తో చిత్తము నెరవేర్చిలాపనికిరి ఇదిగొ మియ్యి అయించి.”

8 దర్మసాస్త్రం ప్రకారం అర్పించితల్లా యెడానల్లా ప్రకారం, బలీనె అర్పనానె బలిపీటమంపరె గయినె పుడ్డువురో పాపం కోసం బలీనె అర్పించివురో తువ్వు కోరిలాను బులి సడ తొత్తె ఇస్టమైలాటనీ బులి అగరె కొయిలాపనాక.

9 తరువాత సెయ్యె తో చిత్తము నెరవేర్చితె ఇదిగొ మియ్యి అయికిరి అచ్చి బులి కొయిలీసి. సెయ్యె అగరోటకు మరిపీకిరి దీటోటకు స్థిరపర్చిసి.

10 ఈనె యేసుక్రీస్తు గుటె దే రె గుటె సారాక సాబ్బిటి కోసం పురువుకు అర్పించిగివురో వలరె అమె అల్లా పాపందీకిరి పవిత్రపర్చబొడించొ.

11 ఈనె ప్రతీ యాజకుడు ప్రతీ దినె తా సేవరె, గుటె విదమైలా బలీనె బడేసార్లు అర్పించిసి కాని అర్పన ద్వారా పాపోనెకు కెబ్బుకూ కడువురో యీలానీ.

12 యెయ్యె ఈనె పాపోనె కోసం కెబ్బుకూ టారిలా గుట్టాక బలి అర్పించికిరి పురువు బత్తోకైలా అత్తో ఆడుకు బొసికిరి అచ్చి,

13 సెల్లె దీకిరి తా సత్తువూనె తా పాదమునెకు పాదపీటము కొర్లాజాంక కనిపెట్టిలీసి.

14 కైంకిబుల్నే గుటె అర్పనవల్లరె యెయ్యె పరిసుద్దపరిచిలాలింకు కెబ్బుకూ సంపూర్ణునెగా కొరిసి.

15 యే వినయంరె పరిసుద్దాత్మకూడ అముకు సాక్సం దిల్లీసి.

16 సెయ్యె అగరె యాకిరి కొయిసి.

ఈనె సె దినోయిలాబెల్లె తరువాత మియ్యి
తంకెదీకిరి కొర్లా నిబందన యెడ

మో దర్మనియమానెకు తంక హూదయమునెరె రొయిదీసె

తంక మనసూనె రాసుంచి బులి కొయిలా తరువాతరె.

17 తంక పాపోనెకు “తంక అక్రమమునెకు ఇంక కెబ్బుకూ జ్ఞాపకము కొరిగిన్నీ బులి” ప్రబువు కొయిలీసి.

18 యెడ క్షమాపన కేటె కలుగుసా సెట్టె పాపం కోసం బలీనె అర్పించివురో ఇంక కెబ్బుకూ రొన్ని.

ప్రోత్సాహం ఇంకా హెచ్చరిక

19 అన్నబయినె, అప్పబొయినీనె అమె అతిపరిసుద్దచోటురె ప్రవేసించితందుకు యేసు మొరొ ద్వారా పరిపూర్ణమైలా స్వాతంత్రం కలిగికిరి అచ్చి,

20 నోట, ఇంకా జీవంగలిగిలాటైలా, తా దే బుల్లా తెర ద్వారా అముకు బట్టో పిటిగీకిరచ్చి.

21 పురువురో గొరొంపరె అముకు గొప్ప యాజకుడు అచ్చి.

22 గనుక మనస్సాక్కిరె కల్మసము నీకుంటా ప్రోక్సింపబడిలా సుద్దప్రూదయము గలిగిలాలింకె, నిర్మలమైలాబొల్ల పనిసంగరె గద్దిగిల్లా దే సంగరె గలిగిలాలింకెపని రొకిరి, విస్వాసవిసయమురె సంపూర్ణ నిరీక్సన కలిగికిరి యదార్థమైలా ప్రూదయము సంగరె అమె పురువురో సన్నిదికి జెమ్మా.

23 వాగ్దానము కొర్లాట నమ్మకమైలాట ఈనె అమె నిరీక్సన విసయమైలాట అమె ఒప్పిగిన్నె కచ్చితంగా దరిగిమా.

24 ఇంకా ప్రేమించికుంట, బొల్లపైటీనె కొరితందుకు జొనెకు జొనె ప్రొత్సహించిగిమ్మండి.

25 కుండెలింకె సంగంగా కూడిగిల్లాపనికిరి తొమె కూడ సంగమురె కూడిగితై మానిగితెనాండి ప్రబువు అయిల దినో సమీపించిలీసి గనుక మరి బూతు జొనుకు జొనె ప్రొత్సహించిగిండి.

26 అమె సత్యము గురించి అనుబవజ్ఞానం పొందిగిల్లా తరువాత బుద్ధిపూర్వకముగా పాపము కొర్నే పాపొనెకు బలి ఇంక రొన్ని.

27 గాని న్యాయపు తీర్పుకు డొరొసంగరె ఎదురుదిగిమంచిబులి విరోదీనెకు నియ్యపనా సిక్స ఇంకా రొసి.

28 కేసెయినెను మోసే దర్మసాస్త్రముకు నా ఆచరించికుంటా రొన్నే దీలింకె తిల్లింకె సాక్సినెరో కోతంపరె, నాకనికరించికుంటా తంకు మొర్నొ సిక్స పొగుసె.

29 సాకిరితన్నుగా పురువురో పొకు గొడ్డొనెతోల్లె మండిపీకిరి, తాకు పవిత్రపర్చిలా నిబందన రొగుతో అపవిత్రం బులి బావించికిరి క్రుపకు మూలమైలా పురువురో ఆత్మకు దూసించిలాట కెత్తొ బూతు సిక్సకు పాత్తుడో తొమె ఆలోసించుగునోండి.

30 పగతీర్పువురో మోపైటి, మియాక ప్రతిపలం దూంచి బులి ప్రబువు కొయిలీసి. ఈనె ప్రబువు తా మనమానుకు తీర్పు తీర్చుచి బులికిరి కొయిలాట అముకు తెలుసు.

31 జీవముగలిగిలా పురువురో అత్తరె పొడువురో బడే గోరము.

32 ఈనె పురువు తొముకు వెలిగించిలాతర్వాతరె స్రమదీకిరి కూడిల గొప్ప పొరాటము సహించిగిల్లా పూర్వదినోనుకు జ్ఞాపకము దన్నెగిండి.

33 గుట విదముగా దిగినె, తొమె సొబ్బిలింకెదీకిరి నిందానె, బాదానె అనుబవించువురో వల్లరె, సే సమయంరె స్రమానె అనుబవించిలాలింకెదీకిరి పాలిబాగస్తులైసా.

34 క్యాకిరిబుల్నే తొమె కైదురె స్రమపొడిలాలింకు ఆదరించిసా తొమె ఇంకా స్నేష్టమైలాట స్తిరమైలాటకు వారసత్వం పొందిగిమ్మొ బులి జనికిరి, తొ ఆస్తికు వొరిదీగిత్తందుకంకా సంతోసముగా ఒప్పిగిచ్చొ.

35 ఈనె తొ దైర్యముకు సడదీతెనాండి. సడకు ప్రతిపలముగా గొప్ప బహుమానము మిలుసి.

36 తొమె పురువురో చిత్తముకు నెరవేర్చిలాలింకెకిరి తా వాగ్దానముకు పొందితె తొముకు ఓర్పు అవసరమైకిరి అచ్చి.

37 “లేకనానెరె కొయిలాపనికిరి ఇంక కలో బడే కొంచెమాక అచ్చి. అయితల్లాట ఆలస్యం నా కొరికుంటా ఆసి.

38 మోఅగరె నీతిమంతుడైలాట విస్వాసమూలంగాక జీవించుసి గాని సెయ్యె పొచ్చుకు బాజినే తా వల్లరె మెత్తె సంతోసము రొన్నొ.”

39 ఈనె అమె నసించిజీతందుకు పొచ్చుకుబాజిల్లాలింకెనింతో గాని ఆత్మకు రక్సించిగిత్తందుకు విస్వాసము కలిక్కిరి అచ్చొ.

11

విస్వాసం

1 విస్వాసము బుల్లాట నిరీక్సింపబడిలాట సత్యస్వరూపముకు, అంకికి నా దిగిదెల్లాట దిగిదిల్లీబులి రుజువైకిరి అచ్చి.

2 ఏ విస్వాసం ద్వారా అం పూర్వికులు పురువు దీకిరి మెప్పుపొందిగిచ్చె.

3 లొకొ పురువురో వాక్యము వల్లరె నిర్మానమైనకిరిఅచ్చి. సడబట్టాక అంకికి దిగిదిల్లాటల్లా నాదిగిదిల్లా పదార్థాలుసంగరె నిర్మించబడిసి బులి విస్వాసముసంగరె గ్రహించిగిలింబొ.

4 విస్వాసమునంగరె హేబెలు కయాను కన్నా స్త్రీష్టమైలా బలి పురువుకు అర్పించిసి. పురువు తా అర్చనానె కోసం సాక్సం దిల్లాబెల్లె సెయ్యె తా విస్వాసమునంగరె నీతిమంతుడుబులి సాక్సము పొందిసి. సెయ్యె మొర్లిన్నన్నా తా విస్వాసముగురించి కొతాలగిలీసె.

5 విస్వాసమునంగరె హానోకు నామొర్లిల్లా అగరాక పురువు కొనిగీబాజీసి. సెయ్యె కాకు దిగదిల్లానీ కైంకి బుల్నే లేకనానె కొయిలాపనాక సెయ్యె నామొర్లిల్లా అగరె పురువుకు ఇష్టంగా రొయితై.

6 విస్వాసమునీకుంటా పురువుకు ఇష్టంగా రొప్పురో అసాద్యము పురువుపక్కు అయిలాలింకె సెయ్యె అచ్చిబులికిరి తాకు కుజ్జిలాలింకె పలితం దూసిబులి నమ్మిమంచి.

7 విస్వాసమునంగరె నోవహు సడ నా దిగిలా సంగతీనె గురించి పురువునంగరె హెచ్చరించబోడిలా బెల్లె బయబక్తులు గలిగిలాలింకె తా గొరొలింకు రక్సన కోసం గుటె పడవ సిద్దం కొరిసి సడనంగరె సెయ్యె లొకొ ఉంపరె నేరం మోపికిరి విస్వాసము నంగరె కలిగిలా నీతికి వారసుడు యాసి.

8 పురువు అబ్రాహాము డక్కిలాబెల్లె విస్వాసము నంగరె సె డక్కుకు లోబోడికిరి సెయ్యె స్వాస్థ్యముగా కడిగిల్లా చోటుకు బయలుదేరికిరి జేసి. ఈనె కేటికి జెమ్మంచో సెడ నా తెలిసిగీకుంటా బయలుదేరికిరి జేసి.

9 విస్వాసము నంగరె సెయ్యె తా నంగరె సే వాగ్దానముకు సమాన వారసుడు యాలా ఇస్సాకు యాకోబు బుల్లాలింకె గుడారమురె రొల్లాబెల్లె పొదరెలింకెరె దెసారె రొల్లాపనాక వాగ్దాన దెసారె పరదేసులుగా జీవించిసె.

10 ఈనె పురువు కిడకు సిల్పిగా నిర్మానకుడైకిరి అచ్చొ సాస్వతమైల పునాదీనె పనికిరి సే పట్టుము కోసం అబ్రాహాము ఎదురు దిక్కికుంటా అచ్చి.

11 విస్వాసము నంగరె అబ్రాహాము మొంత్రకలోరె బో యాసి ఇంకా సారా గర్భము అయినెను సక్తి పొందిసి సెయ్యె పురువుకు నమ్మిసి తా వాగ్దానము నెరవేర్చిసి.

12 సెడనంగరె మొర్నొకు పక్కుయినెను సె జొన్నెదీకిరి సంక్యకు మెగొరె నక్సత్రములుపనికిరి, సొంద్రో బల్లిపనికిరి గొనినార్లా సంతానము కలిగిసి.

13 అంకె సె వాగ్దానము బుల్లా పలము నా అనుబవించుకుంటా బాజీసె, దూరుతీకిరి దిక్కిరి వందనము కొరికిరి సెయ్యె బూమి అంపరె పరదేసులైకిరి యాత్రికులైకిరి అచ్చెబులి ఒప్పిగీకిరి, విస్వాసము గలిగిలాలింకైకిరి మొరిజేసె.

14 యాకిరి కొయిలాలింకె తంకస్వదేసముకు కుజ్జిలింకో బులి తంకె నిరూపించిగిల్లీసె.

15 తంకె కే దెసోదీకిరి అయినెవో సే దెసాకు జ్ఞాపకం కొరిగిన్నే ఇంకా జేతందుకు తంకు అవకాసం కలిగికిరి అచ్చి.

16 ఈనె తంకె ఇంక స్త్రీష్టమైలా దెసా బులి పరలోకంబంబమైలా దెసాకు కొరిగిల్లీసె. సడనంగరె సెయ్యె తంకె పురువు బులిగిత్తందుకు పురువు తంకు కోసం లజ్జోపొడిని కైంకిబుల్నే తంకోసం గుటె పట్టుము సిద్దిపర్చికిరి అచ్చి.

17 పురువు వాగ్దానము కొరిలా అబ్రాహాముకు తా జొర్నైలా జొన్నె పో కు బలిదేబులి మగిలాబెల్లె సెయ్యె తాకు జొర్నైలా ఏకైక పోకు బలిదీతె సంతోసముగా ఒప్పిగిచ్చి.

18 ఈనె పురువు తానంగరె ఇస్సాకువలరె తొత్తై జొర్నైలా సంతానంవల్లరె కలిగిలాటాక మియ్యి వాగ్దానం కొరిలా సంతానం ఊసి బులి కొయిసి.

19 పురువు మొర్లిల్లాలింకంకా జీపించితందుకు సక్తిగల్లాటబులికిరి జనిలాటైలా అబ్రాహాము తా పో యాలా ఇస్సాకుకు మొర్నొత్తికిరి బుల్లికిరి దీసి.

20 విస్వాసమునంగరె ఇస్సాకుకు జరగవలిసిలా సంగతీనె విసయమైకిరి యాకోబుకు ఏసావుకు ఆసీర్వదించిసి.

21 విస్వాసమునంగరె యాకోబు మొర్నొ కలో అగరె యోసేపు పోనె జొనెజొనుకు ఆసీర్వదించికిరి తా అత్తోబడ్డి మొదలు ఉంపరె అనిగీకిరి పురువుకు పూజించిసి.

22 యోసేపు తాకు మొర్నొ కలో అయిలాబెల్లె విస్వాసమునంగరె ఇస్సాయేలు పోనె ఐగుప్తుకు సడదీకిరి జెవ్వరో గురించి కొతాలక్కిరి తా అస్తికానె తంకె నంగరె దనిజాండిబులి ఆజ్ఞాపించిసి.

23 మోసే జొర్నైలాబెల్లె తా మా బో సె సన్నిపిల్లకు బొల్లెరోపురో దిక్కిరి విస్వాసమునంగరె రొజాజ్జుకు నాడొరోకుంటా తింటమసోనె తాకు నుచ్చిదీసె.

24 మోసే బొట్ట యాలాబెల్లె విస్వాసమునంగరె రొజారో జో రొ పో బులి కొయిగితై ఇష్టపొడిలానీ.

25 కుండె కలో పాపబోగము అనుబవించువురోకన్నా పురువురో మానమానెదీకిరి కొస్టానె అనుబవించువురో బొల్లబులిగిచ్చి.

26 ఐగుప్తురో పలియ సంపద అల్లా అనుబవించువురొకన్నా క్రీస్తుకోసం గొప్ప అవమానం పొందితె బొల్లుబులి, అగురుకు పొందిగివ్వొలిసిలా బహుమానం కోసం ద్రుస్తిరెదీగీకిరి యాకిరి కొయిసి.

27 విస్వాసము సంగరె మోసే నాదిగదిల్లా పురువుకు దిక్కుంటా స్తిరమైలాబుద్ధికలిక్కిరి రొజా ఆజ్జుకు నాడొరికిరి ఐగుప్తుకు సడదీకిరి బాజీసి.

28 ఇస్రాయేలురో తొలిచూరు పిల్లానుకు మొర్నొదూత నామొరదీకుంటా విస్వాసముసంగరె పస్కాకు ఆచరించికిరి సే రొగుతోకు ద్వారాలుకు మక్కిసె.

29 విస్వాసముసంగరె తంకె ఆరిజిల్లా నేలంపరె సలిలాపనికిరాక గొర్ర సాంద్రొతీకిరి సలిగీకిరి బాజీసె. ఐగుప్తులింకె సాకిరికొరితెజీకిరి బుడ్డిజీసె.

30 విస్వాసముసంగరె సత్రదినోజాంక ఎరికో పట్టు చుట్టూ బుల్లిలా తరువాతరె యెరికో గోడానె కూలిజీసె.

31 విస్వాసముసంగరె రాహాబు బుల్లా దర్నింట దెసాకుపరిసీలింబిలాలింకు సమాదానంగా నుచ్చిదిల్లందరె అవిదేయులైలాలింకెదీకిరి నానసించుకుంటా తప్పించబొడిసి.

32 ఇంక కెడ కొయిమంచి? గిద్యోనుకు, బారాకు, సమ్నాను, యెప్తా, దావీదు, సమూయేలు తంకు గురించి ప్రవక్తానె గురించి వివరించితండుకు సమయం చాలిని.

33 తంకె విస్వాసముదీకిరి రాజ్యాలుకు జయించిసె. నీతికార్యమునెకు జరిగించిసె. వాగ్దానాలుకు పొందిగిచ్చె. సింహారురో తుండొనె బుజ్జిపించిసె.

34 నియ్యకు రొల్లా బలము చల్లార్చిసె. టికిలి బుసానెకు తప్పించిగిచ్చె. బలహీనునెగా రొయికిరి బలవర్చబొడిసె. యుద్ధంరె పరాక్రమసాలులైసె. సత్రుసేనలుకు పొక్కదీసె.

35 విస్వాసందీకిరి మొట్టానె మొర్నిజిన్నె తంకలింకు పునరుత్తానమువలరె ఇంకా పొందిగివ్వె. ఇంకాకుండెలింకె యీనె ఇంకా స్రీస్టమైలా పునరుత్తానము పొందిగిమ్మాసిబులికిరి విడుదల కావాలిబులి కొరిలాని.

36 ఇంక కుండె లింకె అవమానాలుకు, కొరడామడ్డొనె ఇంకా బందకాలుకు కైదికు అనుబవించిసె.

37 పొత్తొనె సంగరె మరిపించిసె, రంపాలుసంగరె కట్టిపించిగిచ్చె, సోదింపబొడిసె, కడ్లము సంగరె మొరిదీపించిగిచ్చె, గొర్రె చొమ్మొనె మేక చొమ్మొనె పొగ్గీకిరి, దరిద్రులుగా రొయికిరి కొస్టొనె పొడికిరి హింసించబొడిసె,

38 బొనొరె పొరోతొంపరె గొరోనెరె బూమి తొల్లె రొల్ల సారంగమురె బుల్లికుంటా అచ్చె. సాలింకు యే లోకొ యోగ్యమైకిరి నీ.

39 అంకె అల్లా విస్వాసముసంగరె సాక్సం కడిగిల్లాలింకె ఈనెను, అంకె పురువుసంగరె వాగ్దానపలము అనుబవించినారె.

40 కైంకిబుల్లె అమె నీకుంటా తంకె సంపూర్నునె యీనాసి బులి పురువు అం కోసము ఇంక స్రీస్టమైలాటకు అగరాక సిద్ధపర్చిసి.

12

అం బో యాల పురువు

1 ఎత్తె గొప్ప సాక్కిసమూహం అం చుట్టూ ఆవరించికిరితల్లండుకు తేలికగా చిక్కానె దిల్లా పాపముకు సడదీకిరి, అం అగరె రొయిదిల్ల పందెమురె ఓపికదీకిరి దొమిడిమా.

2 విస్వాసముకు కర్తెకిరి సడకు కొనసాగించిలా యేను ఆడుకు దిక్కుంటా, సెయ్యె అమె అగరె రొయిదిల్ల ఆనందం కోసం అవమానముకు లెక్కనాకొరుకుంటా సిలువుకు సహించికిరి పురువు సింహాసనంరొ బత్తోకైలా అత్తో ఆడుకు ఆసీనుడు యీకిరి అచ్చె.

3 తొమె నాఅలిసికిరి తొం పొర్నొనె నావినుకుపొడికుంట రొల్లపని పాపాత్ములు తాకు వ్యతిరేకముగా కొరిలాంచకు సహించిగిల్లాటకు గురించి ఆలోచించోడి.

4 తొమె పాపము సంగరె పొరాడుటరె రొగొతో గొలిలాపన ఇంక సడకు ఎదురించిలానీ.

5 పురువు తా పొనె జో నె సంగరె కొతాలగినె ప్రొత్సాహపరిచిలా కొతానె పసిరిజీసోనా?

మో పో ప్రబువు కొరిలా సిక్కుకు నాత్తునికరించికిరి

సెయ్యె తొత్తె హెచ్చిరించిలాబెల్లె విసిగితెనా.

6 కైంకి బుల్లె ప్రబువు సెయ్యె

ప్రేమించిలా పతీలింకు సిక్కించికిరి

తాకు స్వీకరించిలా ప్రతీ పోకు సరికొరుసి.

7 సిక్నాపలము పొందితె తోమె సహించిలీసా. పురువు పోనెపనాక తోముకు దిగిలీసి. బో నాసిక్సింఱిలా పో కేసైనా అచ్చెనా?

8 పో యీలాలింకె అల్లా సిక్నరె పాలుపొందిలీసె, తోమె నాపొందినె పొదర్లింకాక గాని పోనె నీ.

9 ఈనె దే సంబండులైకిరి బోనె తంకు సిక్సంఱిలాపన అచ్చె. తంకె బిత్తెరె డొరొబీతి కలిగికిరి అచ్చె సాకిరి ఈనె ఆత్మానెకు బో యీలా తాకు మరి బడే లోబొడికిరి జీమంచి నీ!

10 తంకె కుండె దినోనె తాకు యిస్టము యీలబెల్లె అముకు సిక్సింఱిసె గాని అమె తా పరిసుద్దతరె పాలుపొందిమంచిబులి అం మేలు కోసమాక నెయ్యె సిక్సింఱిలీసి.

11 ఈనె ఉంచినె సొబ్బిసిక్స బాదగా దిగదూసి సంతోసముగా దిగిదిన్నీ. ఈనె తాండె అబ్యాసము కలిగిలాలింకు సడ నీతిబులి సమాదానమైల పలాలు దూసి.

పురువురొ క్రుపకు నాఅంగీకరించిలాలింకు హెచ్చరిక

12 ఈనె అలిసిజిల్లా అత్తోనె నీరసించిజిల్లా మోకాల్లుకు బలపరచోండి.

13 ఈనె సొట్టగొడ్డె నా బెనుక్కుంటా బొల్లెయిజిల్లా నిమిత్తము తొ గొడ్డెనుకు బట్టోనె తిన్నగా కొరిగిండి.

14 సొబ్బిలింకె సంగరె సమాదానముగా పరిసుద్దత కలిగిరొయితండుకు ప్రయత్నించోండి. పరిసుద్దత నీకుంటా కేసె ప్రబువుకు దిగినంతె.

15 తోమె కేసెయినెను పురువురొ క్రుపకు నా పొందికుంటా తప్పుజూసుకివో బులి చేదు యీలా సెరొ కిరయినెను తొబిత్తరె మొలిచికిరి బడేలింకె అపవిత్రానె యీజోసా కీవో దిగ్గిండి,

16 గుటె పూట కద్దికోసం తా జ్యేస్టత్వపు హక్కు బిక్కిలా ఏసావుపనా దైవబీతినీలా దర్నిట పనాట అచ్చెకివో బులి జాగర్తగ దిగ్గిండి.

17 ఏసావు సే తరువాత బో పక్కరె ఆసిర్వాదము కడిగిమంచి బులి అంకినెరె పని సడదీకిరి కెత్తో స్రద్దసంగరె కుజ్జినన్నా సెయ్యె మారుమనుసు పొందితె అవకాసం మిల్లాని సెయ్యె సడదీసి బులి తోముకు తెలుసు.

18* తోమె ఇస్రాయేలులింకె అత్తో సంగరె సుంగీకిరి తెలిసిగిల్లపన, పుడ్డితల్లానియ్య, మొదారొ కమ్మిల మెగొకు సంగరె ఆక్రమించిలా, తుపానుకు కమ్మిల సీనాయి పొరొతో పక్కు అయిలనీ.

19 బూరసబ్బముకు, కొతానె సబ్బముకు తోమె అయికిరినింతో. సే సబ్బము సునిలాలింకె మరి కే కొతా కొయినాసి బులి బతిమాలిగిల్లీసె.

20 కైంకిబుల్లె తంకె సే కొయిలా ఆజ్ఞానెకు సునితె తట్టిగిన్నారినె ఇంకా సే పొరొతోకు సుంగిల్లా జంతువుయినెనూ పొత్తోనె సంగరె మరికిరి మొరదిమ్మాసీ.

21 ఈనె సడ దిగితే కెత్తో బయంకరముగా రొల్లందరె మోసే మియ్యి కెత్తో డొరిజేకిరి వొనికిలింఱి బులిసి.

22 ఉంచినెనె తోమె అయిలాట, సీయోను బుల్లా పొరొతోకు జీవం కలిగిలా పురువురొ పట్నము బుల్లా పరలోకపు యెరూసలేముకు హోజారొజారు కొల్లీ దేవదూతానె పక్కు అయిసా.

23 పరలోకమురె రాసికిరి రొల్లా పురువురొ అగరొ పొరొ సంగముకు, తంకె మహోత్సవముకు సొబ్బిలింకూ న్యాయాదిపతి యీలా పురువు పక్కరకు సంపూర్నస్తితి పొందిలా నీతిమంతునెరొ ఆత్మానె పక్కరకు అయిను,

24 నోనింబందనకు మొజిరెమనమైలా యేసుపక్కరకు హేబెలుకన్నా ఇంకా స్రేస్టముగా పలికిలా వొలికించిలా రొగుతో పక్కు తోమె అయికిరి అచ్చె.

25 తోముకు బుద్ధి కొయిలాలింకు ఎదురునాకొయికుంటా దిగ్గిండి. తంకె బూమంపరె తీకిరి బుద్ధి కొయిలాలింకు కొత నాసునుకుంటా తప్పించిగిన్నె పరలోకం దీకిరి బుద్ధికొయిలాటకు విసర్ణించిలా అమె తప్పించిగిన్నారొ బుల్లాట మరి సొత్తాకనీనా.

26 సెల్లె నెయ్యె సబ్బము బూమికి కదిలింఱిసి ఈనె ఉంచినె మియ్యి ఇంకగుటె సారి బూమికు మాత్రమాకనీ గని మెగొకూడ కదిలింఱిమి బులి కొతాదీసి.

27 “ఇంకగుటె బెల్లె” బుల్లా కొతా కెడ కొయిలీసి బుల్లె, కదిలించినాల్లాంచ మిగిల్లాపనికిరి, కదిలింఱిబొడిలంచకు బుల్లె స్రుస్థించబొడిలాంచకు కడివెవురాక.

* 12:18 నిర్గమకాండము 19, 16-22 20, 18-21 ద్వితీయా 4, 11, 12 5, 22-27

28 సడవల్లరె అమె నిచ్చులమైలా రాజ్యము పొందిగీకిరి, పురువుకు ఇస్తమీలపన తాకు హెచ్చించుకుంటా డొరొసంగరె క్రుతజ్జుతలు చెల్లించిమండి.

29 కైంకిబుల్నే అం పురువు దహించిలా నియ్యెకిరి అచ్చి.

13

పురువుకు ఇస్తమైలా బొల్లసేవ

1 క్రీస్తురె అన్నబయినె అప్పుబొయినీనె పనికిరి జోనుకు జోనె ప్రేమించిగీండి.

2 ఆతిద్యము కొరువురో పసిరిజేతెనాండి సడవలరె కుండెమంది నాజనికిరి దేవదూతానెకు ఆతిద్యం దీసె.

3 తోమె తంకె సంగరె బందింపబొడిలాపనాక బందకమురోల్లలింకు జ్ఞాపకము కొరిగీండి. తోమె స్రమలై అచ్చొబులిగీకిరి, ఈనె స్రమలై రొల్లాలింకు జ్ఞాపకము కొరిగీండి.

4 బ్యా సొబ్బి వినయాలై గనమైలాట, గొయిత, నెయిపొ దీలింకె జోనంపరె జోనె నమ్మకంగా రొమ్మంచి. నీతినిలాలింకు దర్పిపైటికొరిలాలింకు పురువు తీర్పు దూసి.

5 పలియాసనీకుంటా తోముకు కలిగిలాటదీకిరి త్రుప్తిపొందిగీండి తొత్తై కేమాత్రము సడిదిన్నీ, తొత్తై కెబ్బుకూ ఎడబాసిని బులి సెయ్యె కొయిసి.

6 ఈనె

ప్రబువు మెత్తై సాయం కొరిలాట.

మియ్యి డొరినీ

మెత్తై కేసైనెను కిడకొరిపారె?

బులి బొల్ల ధైర్యముదీకిరి కొయిపారి.

7 తోముకు పురువురో వాక్యము బోదించికిరి, తోవుంపరె బొడిలింకెగా రొల్లలింకు జ్ఞాపకము కొరిగీకిరి, తంకె మొరొజొంక తంకరో జీవించిలా ప్రవర్తనపలముకు స్రద్దగా తలంచిగీకిరి తంకె విస్వాసముకు అనుసరించొండి.

8 యేసుక్రీస్తు కాలె, ఆజి గుటపనాక అచ్చి కెబ్బుకు గుటపనాక తాసి.

9 బడెరకాలుయిలా పొదరో బోదనంగరె తొ బట్టోదీకిరి నాబుల్లిజాండి. కద్దివల్లరె నీకుంటా, క్రుపసంగరె ప్రూదయము బొల్లెకొరిగినె బొల్లెకద్దినెవల్లరె ప్రవర్తించిలాలింకు కిచ్చి ప్రయోజనము కలిగిలానీ.

10 యూదునెరో ప్రార్థన చోటురె సేవ కొరువురో యాజకూనెకు అమె బలిపీటము ఉంపరె అర్పించిలాట కైతె అదికారము నీ.

11 ఉంచినెజొంక పాపపరిహారార్థచోటురె యూదు ప్రదానయాజకుడు పసువుల రొగొతో దన్నెలిసె, సె జంతువుల కలేబరమునె గుడారము దోరె పుడ్డిపీలీసె.

12 సడవల్లరె యేసుకూడ తా రొగొతో సంగరె మనమానెకు పరిసుద్దం కొరితె పట్టుం దోరె కొస్టాపొడిసి.

13 ఈనె అమె తా నింద పొడికిరి బరించిగీకిరి గుడారము దోరకు తా పక్కు జెమ్మా.

14 స్తిరమైలా పట్టుము అముకు బూమంపరె నీ గాని అయితల్లా పట్టుం కోసం ఎదురు దిగిలించొ.

15 ఈనె తా సంగరె అమె పురువుకు కెబ్బుకు స్తుతియాగము కొరిమా బులి తా నామముకు ఒప్పిగిల్లా జిబ్బొపలము అర్పించించొ.

16 బొల్లకొరువురో, జోనుకు జోనె సాయం కొరువురో తోమె పసిరిజేతెనాండి. సాకిరి కొరువురో తాకు ఇస్తమైలా బలి.

17 తొం ఉంపరె నాయకులుగా రొల్లాలింకె లెక్క ఒప్పుకొయిలాలింకెపనికిరి తొం ఆత్మానెకు జొగిలీసె తంకె బాదనంగరె సే పైటి కొర్నే తొత్తై ప్రయోజనమునీ గని ఈనె బాదనంగరె నీకిరి ఆనందము సంగరె కొరిలాపనికిరి తంక కొతా సునికిరి తంకు లోబొడికిరి రొండి.

18 అం కోసం ప్రార్థనకొరండి అమె సొబ్బి వినయమురె యోగ్యముగా ప్రవర్తించిలాపని బొల్ల మనస్సాక్కి కలిక్కిరి అచ్చొ.

19 ఈనె మియ్యి మరి బేగా తొం పక్కు అయిలాపనికిరి బడె ప్రార్థన కొరుబులి తోముకు బతిమాలిగిల్లించి.

దండము, ఆకరు కొతానె

20 అం గొప్ప జొగులోతాయీలా యేసు బుల్లా అం ప్రబువు నిత్యమైలా నిబందన సంబంధమైలా రొగొతోవల్లరె మొరొదీకిరి ఉటిలా సమాదానకర్తైలా పురువు.

21 ప్రతీ బొల్టవినయమురె తా చిత్తప్రకారము కొరితందుకు తొముకు సిద్ధపరిచిమాసి. యేసు క్రీస్తుద్వారా తాకు అనుకూలమైలాంచకు తొబిత్తరె జరిగించిలీసి. యేసుక్రీస్తు ద్వారా యుగయుగములుకు మహిమ కలిగిమాసి.

22 అన్నబయినె అప్పబొయినీనె తొమె, ఈనె యే హెచ్చరిక కొతా సహించిగీండి తొముకు బతిమాలిగిల్లించి. సడకాక యెడకు బొడ్డూట కొరిలాని.

23 అం అన్నబయిల తిమోతికు విడుదల కలిగిసి బులి తెలిసిగీండి సెయ్యె బేగా అయిలాబెల్లె తా సంగరె అయికిరి తొముకు దిగుంచి.

24 తొమంపరె నాయకులైలాలింకల్లా పురువురొ మనమానెకు మో దండము కోండి. ఇటలీలింకంకా తొముకు దండమానె కొయిలీసె.

25 క్రుప తొ సొబ్బిలింకు తొడైకిరి రొమ్మాసి.

యోహాను రాసిన మొదటి పత్రిక యోహాను రాసిలా అగరె పత్రిక అగరె కొత్త

1 వ యోహాను పత్రిక క్రీ.స. 50-100 బొచ్చురోనే మొజికలై అపోస్తులుడైలా యోహాను రాసిసి. యోహాను తాకు రచయితగా గుర్తించిలాసి, ఈనె గుట్టో అద్యాయమురె సెయ్యె యేసురో జీవితముకు, పునరుత్థానముకు ప్రత్యక్షసాక్షి బులి దిగిపించిసి 1:1-3 1 వ యోహానురె రచనసైలి యోహాను సువార్తరె దిగిదిల్లా రచనాసైలికు కూడా పక్కరె పోలిక తాసి. యోహాను సువార్తకు రాసిసి ఇంకా ఎపెసురె రొయితల్లాబెల్లె 1 వ యోహాను, 2 వ యోహాను, ఇంకా 3 వ యోహాను బుల్లా తింట ఉత్తరాలు రాసికిరి రొవ్వొచ్చుబులి నమ్మిపారొ.

పురువు నీబులి “గొస్టిక్కు” బులి డక్కితల్లా మనమానొ గుంపు తీకిరి సంగముకు ఇబ్బంది దీతల్లా సమయంరె యోహాను యే పత్రిక క్రైస్తువులుకు రాసిసి. యే ప్రజానె యేసు పూర్తిగా పురువు బులి నమ్మిసె గాని సెయ్యె బూమి ఉంపరె రొల్లాబెల్లె మోసా ఇంకా రొగుతో కలిగిలా దే నియ్యి. యే కారనంగా యేసు జీవితముకు ప్రత్యక్షసాక్షిగా రొవ్వొరో ఇంకా తా అత్తోనె యేసుకు సూగిల్లాపనికిరి యోహాను రాసిసి 1:1-5. యే ఉత్తరం రాసిలాటరె యోహానురో ఉద్దేసం కిడబుల్లె, తా ఆనందముకు పూర్తి కొరితె 1 యోహాను 1:4, విస్వాసులుకు పాపం నాకొరుకుంటా నిరోదించువురో 1 యోహాను 2:1, తప్పుడు బోద తీకిరి విస్వాసులుకు రక్షించువురో 1 యోహాను 2:26, తంకె రక్షించబోడిసె బుల్లా నమ్మకం కలిగించువురో 5:13

సంగతీనె

1. యోహాను తా ఉత్తరముకు పరిచయం కొరిగీకిరి ఇంకా యెడ రాసితె గుటె ఉద్దేసముకు దీసి 1:1-4
2. సెయ్యె పురువు క్యాకిరి హల్లోగ అచ్చొ, యేసు జీలాపనాక అమంకా జీవాసిబులి వివరించిసి 1:5-3:10
3. తరవాత సెయ్యె జోనుకు జోనె ప్రేమించివాసి బుల్లా ఆజ్జకు గేపకం కొర్లిసి 3:11-5:12
4. సెయ్యె తా ఉత్తరముకు ముగించిసి 5:13-21

జీవం గల కొతా

1 జీవవాక్యము గురించి అగరె దీకిరి కిడ అచ్చివొ, అమె కెడ సునిలించొవొ అంకీనె పూరు కెడ దిగించొవొ కెడ పరిసీలించికిరి తెలిసిగించొవొ, అం అత్తోనె కెడకు సుంగీకిరి దిగిసేవొ సడ తొముకు తెలియపర్చిలించొ.

2 సే జీవం ప్రత్యక్షమైసి. బో పక్కరెదీకిరి ప్రత్యక్షమైలా సే నిత్యజీవము అమె దిక్కిరి సే జీవమును గురించి సాక్సం దీకుంటా, సడ తొముకు తెలియపర్చిలించొ.

3 అం దీకిరి కూడ తొముకు సహవాసం కలిగిలాపనికిరి అమె దిగిలాటకు సడ సున్లాటకు తొముకు తెలియపరిచిలించొ అమె సహవాసమీనె బో దీకిరి కూడ తా పోయాలా యేసుక్రీస్తు దీకిరి కూడ అచ్చి.

4 అం సంతోసము పరిపూర్ణమైసె అమె యే సంగతీనె రాసిలించొ.

పురువాక హల్లో

5 అమె తావల్లరె సునికిరి తొముకు ప్రకటించిలా వర్తమానం కిడబుల్లె పురువు హల్లోయికిరి అచ్చి తాసంగరె మొదారొ కే మాత్రం నీ.

6 తా దీకిరి కూడ సహవాసముగలిగిలింకె బులి కొయిగీకుంటా మొదారె సలిలాపనెనె అమె సారొకొతాలగినె సత్యంకు అనుసరించికిరి జీవించిలానింతొ.

7 ఈనె సెయ్యె హల్లోరెరొల్లా ప్రకారము అమ్మంకా హల్లోరె సల్లె అమె అన్యోన్యసహవాసము గలిగిలాపనికిరి రొమ్మా. సెల్లె సెయ్యె పోయాలా యేసురో రొగుతో సాబ్బిపాపముదీకిరి అముకు పవిత్రులుగా కొరుసి.

8 అమె పాపం కొర్లాలికె నీ బులి కొయిగిన్నె అముకు అమ్మాక మోసంకొరుగుంచొ ఇంకా అం బిత్తరె సత్యమురొన్నె.

9 అం పాపొనె అమె ఒప్పిగిన్నె సెయ్యె నమ్మకమైలాట నీతిమంతుడు గనుక సెయ్యె అమె పాపొనెకు క్షమించికిరి పవిత్రులుగా కొరుసి.

10 అమె పాపము కొరిలానింతొ బులి కొయిగిన్నె తాకు సారొకొతాలగిలాపన ఊంచొ. ఈనె తా వాక్యము అం సంగరె రొన్నె.

2

క్రీస్తాక అం సహాయకుడు

- 1 మో సన్నిపిల్లానె, తోమె పాపము నాకొరుకుంటా యే సంగతినె తోముకు రాసిలించి. కేసైనను పాపము కొర్నే నీతిమంతుడైలా యేసుక్రీస్తు బుల్లా సహాయకుడు అం తరువురె కొతలగిలాట బో పక్కరె అముకు అచ్చి.
- 2 నెయ్యొక అం పాపోనెకు పరిహారమైకిరి అచ్చి. అం పాపోనెకు మాత్రమాక నీ సర్వలోకముకు కృమించికిరి అచ్చి.
- 3 ఇంకా అమె తా ఆజ్ఞానెకు అమె పాటించినె యడ వల్లరె తాకు జనికిరి అచ్చో బులి తెలిసిగుంచో.
- 4 తాకు జనికిరి అచ్చో బులి కొయిగీకుంటా తా ఆజ్ఞానెకు నాపాటించులాట సారొకొతాలగిలాట. తా బిత్తరె సత్యము నీ.
- 5 తా వాక్యము కేసె సునివొయె తంకెబిత్తరె పురువో ప్రేమ సొత్తాక పరిపూర్ణమైవో.
- 6 తా బిత్తరె అచ్చోబులికిరి కొయిగిల్లాట నెయ్యొ క్యాకిరి సల్లీసో సాకిరాక నెయ్యొ సలిగివ్వొలిసిలాటైకిరి అచ్చి. అమె తా బిత్తరె అచ్చో బులి యడవల్లరె జనిలించో.

నో ఆజ్ఞ

- 7 ప్రేయమైలాలింకే, అగరెదీకిరి తోముకు రొల్లా పూర్వపు ఆజ్ఞాక గాని నోఆజ్ఞకు మియి తోముకు రాసివురోసి. ఏ పూర్వపు ఆజ్ఞ తోమె సునిలా వాక్యమాక.
- 8 ఈనె నోఆజ్ఞ తోముకు రాసిలించి. వొందారొ బాజెల్లీసి. సొత్తైలా హాల్లో ఉంచినె ప్రకాసించిలీసి ఈనె సడ తాబిత్తరె తొబిత్తరె సొత్తాక.
- 9 హాల్లోరె అచ్చిబులి కొయిగీకుంటా, తా అన్నబయికు ద్వేసించిలాట ఉంచినెజాంక వొందారొక అచ్చి.
- 10 తా అన్నబయికు ప్రేమించిలాట హాల్లరె అచ్చి. తాబిత్తరె అబ్యంతరం కిచ్చినీ.
- 11 ఈనె తా అన్నబయికు ద్వేసించిలాట వొందారె రొయికిరి, వొందారె సల్లీసి. వొందారొ తా అంకీనుకు గుడ్డిలింకె పని కొరికిరి నెయ్యొ కేటికి జెల్లీసివో తాకు తెలిసినీ.
- 12 సన్ని పిల్లానే, క్రీస్తువల్లరె తొ పాపోనె కృమించబొడిసి సడకు తోముకు రాసిలించి.
- 13 బోనె, తోమె అగుంతతీకిరి రొల్లాటకు జనికిరి అచ్చో సడకు తోముకు రాసిలించి. కుర్రానె, తోమె దుస్తుడుకు జయించికిరి అచ్చో సడకు తోముకు రాసిలించి.
- 14 సన్నిపిల్లానె, తోమె బోకు జనికిరి అచ్చో. గనుక తోముకు రాసిలించి. బోనే, తోమె అడకు అగరె తల్లాంచల్లా జనికిరి అచ్చో సడకు తోముకు రాసిలించి. కుర్రానే, తోమె బలమైలాలింకె, పురువురో వాక్యం తోమంపరె టారికిరి అచ్చి. తోమె దుస్తుడుకు జయించికిరి అచ్చో సడకు తోముకు రాసిలించి.
- 15 ఏ లోకముకైనన్నా లోకంరె తల్లాంచకైననూ ప్రేమించితెనాండి. కేసైననూ లోకముకు ప్రేమించినె బోరో ప్రేమ తాబిత్తరె రొన్నీ.
- 16 లోకమురె రొల్లాటల్లా, బుల్నే దేరో ఆస అంకీనె ఆస జీవితమురె కలిగికిరితల్లాంచ వల్లరె గర్వింఱువురో బో వల్లరె అయిలాట నీ. సడ లోకసంబందమైలాట.
- 17 లోకముకు సడరో ఆస గతించిజివ్వొ గాని, పురువురో చిత్తముకు జరిగించిలాట కెబ్బుకూ టారొసి.

క్రీస్తు విరోధి

- 18 సన్నిపిల్లానె, యెడ చివరి గడియ. క్రీస్తు విరోధి ఆసిబులి సునిసానీనా ఉంచినంకా బడేలింకె క్రీస్తు విరోధూనె బయలుదేరికిరి అచ్చె. ఎడ వల్లరె చివరి గడియ బులి తెలిసిగిల్లించో.
- 19 తంకె అం బిత్తరెదీకిరి బయలుదేరికిరి జేసె గాని తంకె అం సంబందూనె నీ. తంకె అమె సంబంధులైనె అం సంగరె కూడ టారికిరి రొయితె. ఈనె తంకల్లా అం సంబందీనెనీబులి తెలియవర్చబొడిలాపనికిరి తంకె బయలుదేరికి బాజీసె.
- 20 ఈనె తోమె క్రీస్తు వల్లరె పరిసుద్ధాత్యసంగరె పూరిలాలింకె గనుక సడవల్లరె తోమల్లా సత్యముకు తెలిసిగిచ్చి.
- 21 తోముకు సత్యము తెలిసినీబులి మీ రాసిలించినీ, గాని తోమె జనిలందరె కెడ సారొకొత కెడ సత్యముకు సంబంధించిలాంచవో తెలిసిగితె మీ రాసిలించి.
- 22 యెను, క్రీస్తు నీబులి కొయిలాట తప్ప కేసె సారొకొతాలగిలాట? బోకు పోకు నాబప్పిగిల్లాటాక క్రీస్తు విరోధి.
- 23 పోకు నా బప్పిగిల్లాట ప్రతిజొనె బోకు నాబప్పిగిల్లాట. పోకు బప్పిగిల్లాటాక బోకు బప్పిగిల్లాట.
- 24 ఈనె తోమె అగరెదీకిరి కిర సునిసెవో సడ తోమ తొబిత్తరె మనుసురె రొమ్మురోండి. తోమె అగరెదీకిరి సునిలాట తొ మనుసురె తన్నే, తోమెకూడా.

25 నిత్యజీవము దూంచి బులి కొయిలాటాక సెయ్యె అముకు దిల్లా వాగ్దానము.

26 తోముకు మోసపరిచిలాళికె దరికిరి ఏ సంగతినె తోముకు రాసిలించి.

27 ఈనె తావల్లరె తోమె పొందిలా అబినేకం క్రీస్తు వలన తోమె పరిసుద్ధత్యుసంగరె పూరికిరి అచ్చొ. గనుక సడకు కేసే తోముకు బోదించితె అవసరంనీ. సెయ్యె దిల్లా ఆత్మ సత్యమాక గానీ సారొకొతా నీ; సడ తోముకు బోదించిలా పనికిరి, క్రీస్తు బిత్తరె తోమె టారికిరి అచ్చొ.

28 ఈనె సన్నిపిల్లానె, సెయ్యె ప్రత్యక్షమైలాబెల్లె తా అయిలాబెల్లె అమె తా అగరె నాలజ్జోపొడికిరి దైర్యముగా తల్లాపనికిరి తోమె తా వల్లరె టారొండి.

29 క్రీస్తు నీతిమంతుడు బులి తోమె బుజ్జికిరి రొన్నే నీతికు జరిగించిలా ప్రతీజొనె పురువురో పో బులి డక్కబొడుసా.

3

పురువురో పిల్లానె

1 అమె పురువురో పిల్లానెబులి డక్కిలాపని బో అముకు కెత్తె ప్రేమ దిగదీసివో దిగొండి. అమె పురువురో పిల్లానాక. ఏ కారనము వల్లరె లోకము అముకు జన్మి, కైంకిబుల్లె సడ తాకు జన్మి.

2 ప్రేయమైలాళికె, ఉంచినె అమె పురువురో పిల్లానెయికిరి అచ్చొ. అమె యింకా కిర ఉంఁచోవో సడ యింకా పొదెరెపొడిలానీ గాని, సెయ్యె ప్రత్యక్షమైలాబెల్లె సెయ్యెతల్లాపనికిరాక తాకు దిగుంచో. సడకాక తాకు పోలికిరిఅచ్చొ బులి అమె తెలిసిగిమ్మె.

3 తాబిత్తరె యే నిరీకన దీగిల్లా సొబ్బిలింకె సెయ్యె పవిత్రుడైకిరి తల్లాపనికిరి తాకు పవిత్రుడుగా కొరిగివ్వొ.

4 పాపము కొరిలా ప్రతీజొనె ఆజ్జకు సునిలీనింతె. ఆజ్జకు నాసునువురాక పాపము.

5 పాపొనెకు కడితాక సెయ్యె అయిసి బులి తోముకు తెలుసు. తాబిత్తరె పాపముకిచ్చి నీ.

6 తాబిత్తరె తల్లాళికె కేసెనెనూ పాపము కొరినీ. ఈనె పాపముకొరిలాటకేసెనెనూ తాకు దిగిలానీ తెలిసిగిల్లానీ.

7 మో సన్నిపిల్లానె, కేసెనెన్నా తోముకు మోసము నాకొరుకుంటా దిగునొండి. సెయ్యె నీతిమంతుడైకిరి తల్లాపనికిరి నీతికు జరిగించిలా ప్రతీజొనె నీతిమంతుడు.

8 అపవాది అగరెటికిరి పాపము కొరిలీసి గనుక పాపము కొరిలాట అపవాది సంబంది. అపవాదిరో పైటినె నాసనం కొరితాక పురువురో పో అయివురో యిసి.

9 పురువు మూలముగా జొర్నెలా ప్రతీజొనెరె తా స్వబావం అచ్చొ గనుక సడకు సెయ్యె పాపము కొరిని. సెయ్యె పురువు వల్లరె జొర్నెలాట గనుక పాపము కొరిని.

10 యెడవల్లరె పురువురో పిల్లానెకేసెవో, అపవాది పిల్లానెకేసెవో పొదరెపొడ్డిసి. నీతికు జరిగించిలా ప్రతీజొనె, తా బయినెకు నాప్రేమించిలా ప్రతీజొనె పురువురో పిల్లానె యినింతె.

జొనంపరె జొనె ప్రేమ కలిక్కిరి రొండి

11 అమె జొనుకు జొనె ప్రేమించిగిమ్మంచి బుల్లాట అగరెదీకిరి తోమె సున్లా సందేసమాకనీనా.

12 అమె కయాను లింకె పనికిరి రొన్నాసి. సెయ్యె దుష్టుడిరో సంబందయికిరి తా బయికు మొరదీసి. సెయ్యె తాకు కిరుకు మొరదీసి? తా పైటినె చెడ్డాంచ, తా బయిరో పైటినె నీతియిలాంచ సడకాక నీనా?

13 అన్నబయినె అప్పబొయినీనె లోకము తోముకు ద్వేసింఁచిలాబెల్లె ఆచర్యపొడితెనాండి.

14 అమె బయినుకు ప్రేమించిలింఁచో సడకు మొర్నొదీకిరి జీవముకు దాటికిరి అచ్చొ బులి తెలుసు. ప్రేమనీలాట మొర్నొరె టారేకిరి అచ్చొ.

15 తా బయికు ద్వేసింఁచిలాట నరహంతకుడు. కే నరహంతకుడిరె నిత్యజీవము రొన్నీబులి తోముకు తెలుసు.

16 క్రీస్తు అమె సొబ్బిలింకు కొరకు తా పొర్నొ దీసి గనుక ఎడవల్లరె ప్రేమ క్యాటవో తెలిసికిరి అచ్చొ. అమెకూడ అన్నబయినె గురించి అమె పొర్నొకు దిల్లాపనికిరి తమ్మాసి.

17 యే లోకమురో సంపదకలిగికిరి రొయికిరి, తా బయినుకు కిచ్చి నీవురో దిక్కిరి, తాఉంపరె కే మాత్రము కనికరము నాదిగిదిల్లాళికె ఉంపరె పురువురో ప్రేమ క్యాకిరి టారునీ?

18 సన్ని పిల్లానె, కొతానెదీకిరి జిబ్బొదీకిరి నీకుంట పైటినె సంగరె సత్యముకు ప్రేమించు.

పురువు అగరె దైర్యంగా రొవురో

19 యెడ వల్లరె అమె సత్యసంబందమైలాలింకెబులికిరి అముకు తెలుస్సు. తా అగరె అమె మనుసూనె ప్రసాంతముగా రొయిదీగీపారొ.

20 అం ప్రుదయం అమంపరె నిందమోపితన్నే పురువు అం ప్రుదయంకన్నా గొప్పిట తాకు సొబ్బీ తెలుసు.

21 ప్రియమైలా అన్నబయినె అం ప్రుదయం అమంపరె నింద నామోపినే పురువు అగరె ధైర్యంగా రొయిపారొ.

22 ఈనె అమె తా ఆజ్జలకు ఒప్పిగీకిరి తాకు ఇస్టమైలాంచకు కొర్నే అమె కిర మగినన్నా నడ తావల్లరె అముకు మిలుసి.

23 తా ఆజ్జ కిరబుల్నే తా పోయాలా యేసుక్రీస్తు నాకు నమ్మిగిల్లాలింకు, సెయ్యె అముకుదిల్లా ఆజ్జ ప్రకారము జొనుకు జొనె ప్రేమించిగిమ్మాసి.

24 తా ఆజ్జానెకు ఒప్పిగిల్లాలింకె తా బిత్తరె టారికిరి తాసి. సెయ్యె తంక బిత్తరె టారికిరి తాసి; అం బిత్తరె అచ్చి బులి సెయ్యె అముకు అనుగ్రహించిలా ఆత్మవల్లరె తెలిసిగిల్లించొ.

4

పురువురొ ఆత్మ, క్రీస్తు విరోది ఆత్మ

1 ప్రియమైలలింకె, బడేలింకె సారొప్రవక్తానె లోకముబిత్తరకు బయలుదేరికిరి జేసె నడకు ప్రతి ఆత్మకు నానమ్మికిరి, నే ఆత్మానె పురువుకు సంబందమైలాటవొ నీవొ పరిక్సించొండి.

2 యేసుక్రీస్తు దేయికిరి అయిసిబులి, కే ఆత్మ ఒప్పుగివ్వొ సడ పురువురొ సంబందమైలాట బులి తెలుసుగునుంచొ.

3 కాని కే ఆత్మ యేసుకు నాబప్పిగివ్వొ సడ పురువురొ సంబందమైలాటనీ. ఎడవల్లరె పురువురొ ఆత్మకు తొమె తెలిసిగీపారొ. క్రీస్తు విరోది ఆత్మ అయిసిబులి తొమె నునిలా సంగతి యెడాక. ఎడకగరాక సడ లోకమురె అచ్చి.

4 మో పిల్లానె, తొమె పురువు సంబందూనె. తొబిత్తరె రొల్లా ఆత్మ లోకమురె రొల్లట ఆత్మ కన్నా గొప్పిట గనుక తొమె సారొప్రవక్తానె ఓడించికిరి జయించికిరి అచ్చొ.

5 సారొప్రవక్తానె లోక సంబందూనె నడకు లోకొ సంబందుయిలా పనికిరి కొతలగుసె, లోకము తంకె కొత నునుసి.

6 కాని అమె పురువు సంబందూనె; పురువుకు జనిలాట అం కొత నునుసి, పురువు సంబంది నీలాట అమె కొత నున్ని. ఎడకు అమె సత్య స్వరూపియైలా ఆత్మ కిరవొ, సారొఆత్మ కిరవొ అమె తెలిసి గిల్లించొ.

పురువాక ప్రేమ

7 అన్నబయినె, అమె జొనుకు జొనె ప్రేమకలిక్కిరి రొమ్మా. కిరబుల్నే ప్రేమ పురువు వల్లరె కలిగిలీసి. ప్రేమించిలా ప్రతిజొనె పురువు వల్లరె జొర్నైలాటైకిరి పురువుకు జనిసి.

8 పురువు ప్రేమాస్వరూపి, ప్రేమనీలాట పురువుకు జన్సి.

9 అమె తాదీకిరి జీవించిలాపనికిరి, పురువు తా గుట్టాక తల్లా పోకు లోకముకు పొడదీసి. యెడవల్లరాక పురువురొ ప్రేమ అంబిత్తరె ప్రత్యక్షపర్చబొడిసి.

10 అమె పురువుకు ప్రేమించిలింకెబులి నీ, సెయ్యె అముకు ప్రేమించిలీసి, అమె పాపోనెకు క్షమించికిరి కడిపితె తా పోకు పొడదీసి. యెడబిత్తరె ప్రేమ అచ్చి.

11 ప్రియమైలాలింకె, పురువు అముకు యాకిరి ప్రేమించినే అమె జొనుకు జొనె ప్రేమించిగిల్లా పనికిరి రొమ్మాసి.

12 కే మనమ పురువుకు కెబ్బుకు దిగిలానీ. అమె జొనుకు జొనె ప్రేమించిల్లాబెల్లె పురువు అమంపరె టారొసి. తా ప్రేమ అమంపరె సంపూర్ణంగా అచ్చి.

13 ఎడవల్లరె అమె తా బిత్తరె టారికిరి అచ్చొ బులి సెయ్యె అమె పక్కరె అచ్చిబులి జనికిరి అచ్చొ. క్యాకిరిబుల్నే సెయ్యె అముకు తా ఆత్మరె బాగం దీసి.

14 ఈనె బో తా పోకు లోకొ రక్కకుడు పని రొయితే పొడదిపురొ అమె దిక్కిరి, సాక్సం దిల్లించొ.

15 యేసు పురువు పోబులి కేసె ఒప్పిగుసెవొ, తాబిత్తరె పురువు టారికిరి అచ్చి. సెయ్యె పురువురె అచ్చి.

16 అమంపరె పురువుకు రొల్లా ప్రేమకు అమె జనిలా పనికిరి నడ నమ్మిగీకిరి అచ్చొ. పురువు ప్రేమైకిరి అచ్చి. ప్రేమరె రొల్లాట పురువురె టారికిరి అచ్చి. పురువు తాబిత్తరె అచ్చి.

17 తీర్పుదిసొరె అముకు ధైర్యము కలిగిలాపనికిరి ఎడవల్లరె ప్రేమ అంబిత్తరె పరిపూర్ణము కొరికిరి అచ్చి. క్యాకిరిబుల్నే యేలోకమురె అమె తాకు పోలికిరి అచ్చొ

18 ప్రేమరె డొరొ రొన్ని. సెత్తాకనీ, పరిపూర్ణమైలా ప్రేమ డొరొకు గొడ్డిదూసి. డొరొ సిక్కుకు సంబందమైలాట. డొరిలాట ప్రేమరె పరిపూర్ణము కొరిలాట నీ.

19 సెయ్యె అగరె అముకు ప్రేమించిసి గనక అమె ప్రేమించిలింఱొ.

20 కేసెనెనూ మియ్యి పురువుకు ప్రేమించిలింఱొబులి కొయిగీకిరి, తా బయికు ద్వేసించిలాబెల్లె సెయ్యె సారొకొతాలగిలాట ఊసి. సెయ్యె దిగిలా తా బయికు నాప్రేమించిలాట సెయ్యె నాదిగిలా పురువుకు ప్రేమించినారి.

21 పురువుకు ప్రేమించిలాట తా అన్నబయికు అప్పబొయినీనెకు కూడ ప్రేమించిమాసి బుల్లా ఆజ్జుకు అమె తావల్లరె పొందిగీకిరి అచ్చొ.

5

లోకమంపరె అం విజయం

1 యేసాక క్రీస్తుయికిరి అచ్చిబులి నమ్మిలా ప్రతిజొనె పురువు మూలమురె జొరైకిరి అచ్చి. బోకు ప్రేమించిలా ప్రతిజొనె తావల్లరాక జొరైలాటకు ప్రేమించుసి.

2 అమె పురువుకు ప్రేమించికిరి తా ఆజ్జానెకు నెరవేర్చిలాలింఱొ అయింఱొ పురువురొ పిల్లానెకు ప్రేమించిలింఱొ బులి నడవల్లరాక తెలిసిగింఱొ.

3 అమె తా ఆజ్జానెకు పాటింఱొవరాక పురువుకు ప్రేమించివురొ. తా ఆజ్జానె కస్టమైలాట నీ.

4 పురువు వల్లరె జొరైలా సొబ్బిలింఱొ లోకముకు జయించుసి. లోకముకు జయించిలా విజయమాక అం విస్వాసం.

5 యేసు పురువురొ పొబులి నమ్మిలాట తప్ప, లోకముకు జయించిలాట కేసె?

యేసుక్రీస్తు గురించి సాక్షం

6 పని ద్వారా రొగొతో ద్వారా అయిలాట యెయ్యాక, బుల్లె యేసుక్రీస్తుక. యెయ్యె తా బాప్టిసం పనిసంగరె మాత్రమాకనీ తా మొర్నొబుల్లా రొగొతో సంగరె అయిసి. ఆత్మ సత్యము గనక సాక్షం దిల్లాట ఆత్మాక.

7 సాక్షం దిల్లాలింఱొ తెల్లింఱొ,

8 బుల్లె ఆత్మ, పని, రొగొతో, ఏ తెల్లింఱొ గుట్టాక సాక్షం దిల్లీసి.

9 అమె మనమానొ సాక్షినె అంగీకరించిలింఱొనీనా! ఈనె పురువురొ సాక్షము బలమైలాట. నడవల్లరె పురువు తా పొ గురించి సాక్షం దిల్లీసి.

10 నడవల్లరె పురువురొ పొ ఉంపరె విస్వాముదిగిల్లాలింఱొ తంకల్లా యే సాక్షం కలిగికిరి అచ్చె. ఈనె పురువుకు నమ్మిలాలింఱొ సెయ్యె తా పొ గురించి దిల్లా సాక్షము నమ్మిలానీ గాని సెయ్యె పురువుకు సారొకొతా లగిలపనాక కొరిలాలింఱొ.

11 సే సాక్షము యెడాక పురువు అముకు నిత్య జీవముకు దీసి, యే జీవము తా పొ పక్కరె అచ్చి.

12 పురువు పొ అంగీకరించిలింఱొకె నిత్యజీవము గలిగిలాలింఱొ పురువు పొకు నాఅంగీకరించిలింఱొకె నిత్యజీవము నీలాలింఱొ.

నిత్యజీవం గురించి జ్ఞానం

13 పురువురొ పొరొ నారె విస్వాసము రొగ్గీకిరి తొమె నిత్యజీవము రొల్లాలింఱొ బులి తెలిసిగిల్లాపనికిరి మియ్యి యే సంగతినె తొముకు రాసిలింఱొ.

14 తా వల్లరె అముకు కలిగిలా దైర్యం కిరబుల్లె, తా ఇష్టప్రకారం అమె కెడ మగినెను సెయ్యె అం మనవి నునుసి.

15 అమె తాకు కిడమగినన్నా అం విన్నపం సునివొబులి అమె జనికిరి తన్నే తాకు మగిలాంఱొ మిలిసె బులి కూడ జనిమాసి.

16 తా బయి నామొరివొలిసిలా పాపము కొరిలాటకు సే మనమకు దరికిరి పురువు జీవం దూసి. మొర్నొకరమైలా పాపం అచ్చి నడకోసం సెయ్యె ప్రార్థించివాసి బులి మియ్యి కొయివురొనీ.

17 సొబ్బి దుర్నీతిరొ పాపము. ఈనె మొర్నొనీలా పాపము కూడా అచ్చి.

18 పురువురొ పిల్లానె బుల్లాలింఱొ పాపము కొరుకుంట తన్నితె బులి అముకు తెలుసు. ఈనె పురువుమూలంగా జొరైలాటకు బద్దము కొరుసి. దుష్టుడు తంకు నష్టము కొర్నీ.

19 అమె పురువురొ సంబందూనె బులి అముకు తెలుసు, ఈనె లోకమల్లా దుష్టుడురొ ఆదీనంరె అచ్చి బులి అముకు తెలుసు.

20 అమె సత్యమైలా పురువుకు తెలిసిగిమ్మాసిబులి, పురువురొ పొ అయికిరి అముకు బుద్ధి దీసిబులి అముకు తెలుసు. అమె పురువురొ పొ యీల యేసుక్రీస్తురె తల్లాలింఱొకెకిరి సత్య వంతులుగా అచ్చొ. సెయ్యాక సత్యమైలా పురువు నిత్యజీవమైకిరి అచ్చి.

21 మో పిల్లానె సారొ పురువునుకు దూరుగా రోడి.

యోహాను రాసిన రెండో పత్రిక యోహాను రాసిలా దీటో పత్రిక అగరో కొత

దీటో యోహాను పత్రిక అపోస్తలుడైలా యోహాను క్రీ .స. 50-100 బొచ్చురోనె మొజికలై రాసిసి. యోహాను రచయితగా గుర్తించిగిల్లాని. ఈనె నడకు బదులుగా సెయ్యె బొట్టా బులి డక్కిపించిగిచ్చి. 2 వ యోహానురో సంగతినె ఇంకా యోహాను సువార్తరో సంగతినె కూర్పురె సంబంధము కలిక్కిరి తల్లాపనికిరి దిగదూసె. ఆండ్రె ముక్యముగా యేసు జోనుకు జోనె ప్రేమ కలిక్కిరి తమ్మాసిబుల్లా ఆజ్ఞకు కొయిలా పనికిరి యెయ్యె తా ఆజ్ఞానె పాటించివురో యేసుకు ప్రేమించిలాలింకు కొయిసి 1:5-6, యోహాను 15:9-10 యెడకుదరికిరి యోహానాక, యోహాను సువార్త ఇంకా 1 వ యోహాను 2 వ యోహాను 3 వ యోహాను ఎపెస్సిరె రొయితల్లాబెల్లై రాసిసిబులి నమ్ముసె.

యోహాను బచ్చిగిల్లా మొట్ట తా పిల్లానెకు యే ఉత్తరం రాసిలీసి. యెయ్యె సంగముకు ఉద్దేసించికిరి రాసిలీసి. యోహాను యే ఉత్తరము ద్వారా సంగముకు ప్రోత్సాహించుకుంటా సారోబోదకులు గురించి హెచ్చరించిలీసి.

సంగతినె

1. యోహాను దండము కొయికుంటా, సెయ్యె కేసెవో పాటకులుకు పరిచయం కొరిగిచ్చి 1:1-3
2. తర్వాతరె సెయ్యె సంగముకు ప్రోత్సాహించుకుంటా, గొప్ప ఆజ్ఞానెకు గేపకం కొర్లిసి 1:4-6
3. ఇంకా సారో బోదకులు గురించి హెచ్చరించువురో 1:7-11
4. యోహాను సెయ్యె రొల్లా సంగవిస్వాసులుకు దండము కొయికుంటా పత్రికకు ముగించువురో 1:12-13

సుబం

¹ బొట్ట యాలా మియి, పురువు ద్వారా బచ్చిగిల్లా మాకు తా పిల్లానుకు సుబం బులి కొయికిరి రాసిలించి. మియ్యాక, మియి మాత్రమాక నీ గని సత్యము జనిలా సాబ్బిలింకె, అమె, అం దీకిరి కెబ్బుకూ రొల్లాలింకె తొముకు ప్రేమించిలీసి.

² కిరకుబుల్నే సత్యము అం దీకిరాక అచ్చి. సడ కెబ్బుకూ అం సంగరాక తాసి.

³ సొత్తెల ప్రేమానె అంబిత్తరె రొల్లాబెల్లై బో యాల పురువు పక్కరె దీకిరి, బోరో పో యాలా యేసుక్రీస్తు పక్కరె దీకిరి క్రుప, కనికరము, సమాదానము అం సంగరె తాసి.

సత్యము ఇంకా ప్రేమ

⁴ బో వల్లరె అమె ఆజ్ఞకు పొందిలా పనికిరి తో పిల్లానె కుండెలింకె సత్యముకు అనుసరించికిరి చలిగివురో జనికిరి బడే సారదపొడిలించి.

⁵ ఈనె మా, నో ఆజ్ఞ తొత్తై రాసిలాపనికిరి నీ గని, అగరెదీకిరి అముకు కలిగిలా ఆజ్ఞాక రాసికిరి, అమె జోనుకు జోనె ప్రేమించిమంచెబులి తొత్తై బతిమాలిగిల్లించి.

⁶ అమె తా ఆజ్ఞానె ప్రకారంగా చలువురాక ప్రేమ; తొమె అగరెదీకిరి సునిల పనికిరి ప్రేమరె చలిమంచె బుల్లాటాక సే ఆజ్ఞ.

⁷ యేసుక్రీస్తు దేకు దరించిగినికిరి అయిసిబులి నాబప్పిగిల్లా సత్తుమానె బడేలింకె లోకమురె బయలుదేరికిరి అచ్చె. సాకిరినీబులి కొయిలాలింకె క్రీస్తుకు విరోదులైకిరి అచ్చె.

⁸ అమె తొ మొజిరె పూర్తికొరిలా పైటినె నాచెడిదీకుంటా, తొమె పూర్తిపలము పొందిలాపనికిరి జాగర్తగా దిగ్గునోడి.

⁹ క్రీస్తు బోదరె నాటారేకిరి నడకు నడికిరి అగురుకు జేతల్లా ప్రతి మనమ, పురువుకు నాబప్పిగిల్లాట. సే బోదరె టారెలాట బోకు, పోకు ఒప్పిగిల్లాట.

¹⁰ కేసెనెను ఏ బోదకు నాదన్నెకిరి తొ పక్క అయిలబెల్లై తాకు తో గొరొబిత్తరె చేరిగినితెనాండి;

¹¹ సుబం బులి తాసంగరె కొయిలాట తా దుస్థపైటినిరె బంటిగునుసి.

ఆకరి కొతానె

¹² బడే సంగతినె తొముకు రాసివురో అచ్చి గని, సిరాసంగరె కాగితము సంగరె రాసితె మనస్సునీకిరి తొ సంతోసము పూర్తయిలాపనికిరి తొముకు మిసిగీకిరి ప్రత్యక్షంగా కొతలగితె ఆసగా అచ్చి.

¹³ బచ్చిగిల్లా తొ, ప్రియమైలా తొ అప్పబోయినిరో పిల్లానె తొముకు సుబానె కొయిలీసి.

యోహాను రాసిన మూడవ పత్రిక యోహాను రాసిన తొమ్మిదో పత్రిక అగరో కొత్త

3 వ యోహాను పత్రిక క్రీ. స. 50-100 బొచ్చురోనె మొజికలై అపొస్తులుడైలా యోహాను రాసిన. తాకు సెయ్యె రచయితగా గుర్తించిగిల్లని. బదులుగా తాకు సెయ్యె బొట్టా బులిపించిగిచ్చి 1:1 సెయ్యె 2 వ యోహాను 1:1 రె కూడా సాకిరాక కొయిసి. యోహానాక యోహాను సువార్త ఇంకా 1 వ యోహాను, 2 వ యోహాను, 3 వ యోహాను ఎపెసురె తల్లాబెల్లె తింట ఉత్తరాలు రాసిన బులి నమ్మితోసె.

యోహాను యే పత్రికకు గయు బుల్లా నాగలిగిలా విస్వాసికు రాసిన. సెయ్యె గయుకు గుటె స్నేహితుడుగా బావించిగికిరి ఇంకా యే ప్రాంతమంపరెత్తికిరి ప్రయానంకొరితల్లా క్రొస్తవ్యం యీనుకు ఆతిద్యం కొరుబులి ఆదేసించిలీసి.

సంగతీనె

1. యోహాను తా ఉత్తరముకు పరిచయం కొరిసి 1:1
2. సెల్లె సెయ్యె గయుకు ప్రోత్సహించుకుంటా సోదరులుకు ఆతిద్యం దిగదివ్వాసిబులి ఆదేసించువురో 1:2-8
3. తర్వాతరె, సెయ్యె దయమెత్తి ఇంకా దెమెత్తిబుల్లా ఇంకాదీలింకె వొండ్రలింకె గురించి కొతలగుసి 1:9-12
4. ఆకరుగా సెయ్యె తా ఉత్తరముకు ముగించిసి 1:13-14

దండము

- 1 బొట్టయాలా మియి సత్యమువల్లరె ప్రేమించిలా ప్రీయుడైలా గాయుకు సుబం బులి రాసినలాట కిరబుల్లె.
- 2 ప్రీయుడా, తో ఆత్మ వర్తిల్లిలాపనికిరి తువ్వు సొబ్బి వినయాలై వర్తిల్లికిరి బొల్లె రొమ్మించిబులి ప్రార్థించిలింపి.
- 3 తువ్వు సత్యముకు అనుసరించికిరి సలిగిల్లీను బులి సడకోసం బయినె అయికిరి తో సత్యప్రవర్తన కోసం సాక్సం కొయిలాబెల్లె సునికిరి బొల్లె సంతోసించింపి.
- 4 మో పిల్లానె సత్యముకు అనుసరించికిరి చలిగిల్లీసె బులి సునిలకన్నా మెత్తె ఎక్కువైలా సంతోసము నీ.

సహకరించివురో ఇంకా వ్యతిరేకతలు

- 5 మో జట్టుకారీనె, తంకె పరదేసులైనన్నా బయినెపనికిరి రొల్లాలింకు తువ్వు కొరిలాటల్లా విస్వాసికు తగిలాపనికిరి కెత్తె నమ్మకముగా సాయం కొరిలీసు.
- 6 తంకె తో ప్రేమ కోసం సంగము అగరె సాక్సం కొయిసె. తంకె సాకిరాక పురువురె హెచ్చింపబొడిలాపనికిరి తంకు సాయం కొరు.
- 7 ఈనె తంకె క్రీస్తురో సేవరె కొనసాగించితె బచ్చిగికిరి అచ్చె. అవిస్వాసులైలాలింకు పక్కరె కేవిదమైలా సాయం ఆసించిలానింతె.
- 8 అమె సత్యము వినయంరె తంకె దీకిరి పాటు పాలిబాగస్తులైలాపనికిరి సాలింకు ఆతిద్యం దేండి.

దియొత్రిపే ఇంకా దేమేత్రియు

- 9 మియి సంగముకు గుటె సంగతి రాసించి. ఈనె తంకె బిత్తరె దియొత్రిపే నాయకుడుగా తమ్మాసి బులి కొయిగికిరి అముకు ఒప్పిగిల్లీని.
- 10 సెయ్యె అం కోసం సెడ్డకొతానె కొయికుంటా, సడ నాసలిలాపనికిరి, బయినుకు సెయ్యాక నాచేర్చిగికిరి, తంకు చేర్చిగిల్ల మనస్సుగల్గలింకు కూడ ఆటంకం కొరికుంటా సంగముదీకిరి తంకు వెలివేసిపిలీసి సడకు మియి అయిలబెల్లె సెయ్యె కొరితల్లా పైటీనెకు గుర్తు కొరుగుంపి.
- 11 ప్రీయమైలా స్నేహితుడా, సెడ్డపైటీనె నీకిరి బొల్ల పైటీనె అనుసరించికిరి సలండి. మేలు కొరిలాట పురువు సంబంది, కీడు కొరిలాట పురువుకు దిగిలాటని.
- 12 దేమేత్రియు సొబ్బిలింకె వల్లరె సత్యమువల్లరె బొల్ల సాక్సము పొందిలాట, అమె కూడ తాకు సాక్సం దిల్లీంచొ అం సాక్సం సత్యమైలాటబులి తువ్వు తెలుసు.

ఆకరి దండము

- 13 బడే సంగతీనె తొత్తె రాసివురో అచ్చి ఈనె సిరా సంగరె, కలము సంగరె తొత్తె రాసివురో మెత్తె యిష్టము నీ.

14 బేగా తొత్తె దిగితందుకు ఎదురుదిగిలించి సెల్లె మూకు మూ కొతలగ్గిమ్మండి.

15 తొత్తె సమాదానము కలిగిమాసి, అం జట్టుకారీనె తొత్తె దండమానె కొయిలీసె. తో పక్కరె రొల్లా జట్టుకారీనెకు నా, నారె వరసగా వందనములు కో.

యూదా రాసిన పత్రిక యూదా రాసిలా పత్రిక అగరో కొత

యూదా బుల్లా పత్రికకు సడరాసిలా రచయితరొ నా లొగిసె. యూదా తాకు సెయ్యె యాకోబు సోదరుడు, యేసురో సోదరుడుగా గుర్తించిగిల్లీసి. గనక సెయ్యె యేసు సోదరులురె జొనె బులికిరంకా నమ్ముసె 1. యే పత్రిక గుటె ప్రత్యేకమైలా సంగము కోసం ఉద్దేశించిలాటక నీనా ఇంకా యెడ పుర్నునిబందనరో సూచనలు కారనంగా, యెడ యూదునెకు ఉద్దేశించికిరి అచ్చిబులి కొయిపారో. కిరబుల్లున్నా, సెయ్యె తా ఉత్తరముకు “డక్కిలాలింకల్లా, బో యీలా పురువురె ప్రేమించబొడిసి ఇంకా యేసుక్రీస్తు కోసం టారిసి” సొబ్బిలింకూ ఉద్దేశించికిరి రాసిలీసి 1. యే ఉత్తరం ఇంచుమించు క్రీ. స. 60 వ బొచ్చురె రాసికిరి రొవ్వొచ్చు.

యెయ్యె క్రైస్తువులుకల్లా ఉద్దేశించికిరి, సారొబోదకులురొ బోద ద్వారా నాతప్పిజేకుంటా తంకు హెచ్చరించిలీసి యూదా 4 సెయ్యె తా వాదనానెకు బలం కూర్చితె పుర్నునిబందన సంగటనలు ఇంకా సంగతీనెకు ప్రస్తావించిలీసి. యే పత్రిక 2 వ పేతురు పత్రిక పనాక సారొబోదకులుకు వ్యతిరేకముగా హెచ్చరిక యూదా 4, 2 పేతురు 2, 1 దీకిరి పాటు దేవదూతన ఇంకా సొదొమ ఇంకా గొమొర్రాలుకు సంబందించిలా సూచనలుకు బంటిగిచ్చి.

సంగతీనె

1. యూదా అగరె తా పాటకులుకు ఉద్దేశించిసి 1-2
2. తరవాత, సెయ్యె రాసితె తా కారనముకు కొయివొ, యె తప్పుడు బోదకులుకు వ్యతిరేకముగా తంకు హెచ్చరించువురో 3-4
3. సే తర్వాతరె సెయ్యె పుర్నునిబందనరో మనమానె దీకిరి ఇంకా సంగతీనె దీకిరి ఉదాహరణలు దీసి 5-16
4. సెల్లె హెచ్చరికకు తంక స్పందన క్యాకిరి తమ్మాసొ సెయ్యె తంకు కొయివొ 17-23
5. ఆకరుగా సెయ్యె పురువుకు స్తుతించుకుంటా ఉత్తరముకు ముగించిసి 24-25

దండము

- 1 యేసుక్రీస్తు దానుడు, యాకోబు బయిలా యూదా, బోయిలా పురువురె ప్రేమించికిరి, యేసుక్రీస్తురె బద్రముకొరికిరి డక్కిలాలింకు నుబం బులి కొయికిరి రాసివురో.
- 2 తొముకు కనికరము సమాదానం ప్రేమ కలిగిమాసి.

సారొ బోదకులుకు తీర్పు

3 మో ప్రీయవైలా స్నేహితులూనె, అం సొబ్బిలింకు కలిగిలా రక్తనకోసం తొముకు రాసిమాసి బులి, ఆసక్తి సంగరె ప్రయత్నించితల్లాబెల్లె తా ప్రజానెకు గుటెబెల్లాక అప్పగించిలా బోద గురించి తొమె పొరాడిమాసిబులి ప్రొత్సాహపర్చికుంటా తొముకు రాసివురొయీసి.

4 క్యాకిరిబుల్లె కుండిలింకె రహస్యముగా చొరబొడికిరి అచ్చె. తంకె బక్తిహీనులైకిరి అం పురువు క్రుపకు కామాతురత్వముకు దుర్వినియోగ పరిచ్చికుంటా, అమె అద్వితీయనాదుడు ప్రబువైలా యేసు క్రీస్తుకు వినర్ణించిలీసి; ఏ తీర్పుపొందితె తంకె యెడకు అగరె రాసికిరి అచ్చి.

5 ఏ సంగతులల్లా తొమె అగరాక తెలిసికిరి రొన్నన్నా, మియి తొముకు జ్ఞాపకం కొరిలించి కిరబుల్లె, ప్రబువు ఐగుప్తుదీకిరి మనమానుకు రక్సింఛినెను, తంకె బిత్తరె నానమ్మిలాలింకు తర్వాతరె నాసనము కొరిసి.

6 ఈనె తంకె ప్రదానత్వము నాటారదీకిరి, తంకె రొల్లచోటు నడిదిల్లా దేవదూతానెకు, మహాదినోరె, జరిగితల్లా తీర్పుజాంక కటికవొందారె కేసె నా సొడిల బందకాలు సంగరె సెయ్యె బందించికిరి బద్రముకొరిసి బులి గుర్తుదీగిండి.

7 సొకిరి సొదొమ గొమొర్రానుకు సడ చుట్టూతల్లా గానుకు యంకె పనికిరి దర్పిపైటికొరుకుంటా, పొదరలింకె పనికిరి దేఆనానెకు తొలిగిజెల్లలింకెగా తల్లావల్లరె, కెబ్బుకూ పుడ్డితల్లా నియ్యరె అనుబవించితల్లాట తొముకల్లా గుటె హెచ్చరికపనికిరి గుర్తు రొయిదిగిండి.

8 సొకిరాక యంకె కూడా సొప్పొనె పైకుంట, దేకు అపవిత్రం కొరిగీకుంటా, పురువురో అదికారముకు నిరాకరించికుంటా, ఉంపరెతల్లా మహిమగల్గాలింకు దూసించికుంటా అచ్చె.

9 ఈనె ప్రదాన దూత యీల మికాయేలు అపవాది దీకిరి వాదించికుంటా మోసేరో దే గురించి తర్కించిలాబెల్లె, దూసించికిరి తీర్పు తీర్చితె నాతెగించికిరి ప్రబువు తొత్తె గద్దించిమాసి బులిసి.

10 అంకె ఈనె తంకె నా గ్రహించినర్లా సంగతీనె గురించి దూసించిలాలింకె వివేక సూన్యములింకె మ్రుగముపనికిరి కేటకు స్వాభావికముగా జనినె నడ వల్లరె తంకు తంకాక నానము కొరిగిల్లీనె.

11 అయ్యో తంకు న్రమ తంకె కయాను సలిలా బట్టోరె సలిసె, బహుమానము పొందిమాసిబులి బిలాము సలిలా తప్పుబట్టోరె ఆసక్తిగా దొమిడిసె, కోరహు కొర్లాపనికిరి తిరస్కారము కొరికిరి నసించిజీసె.

12 యంకె లజ్జోనీకుంటా తొ సంగరె కద్ది కొరుకుంటా, తంకె తంకాక బొల్లకిరి పోసించిగికుంటా, తొ ప్రేమకద్దినిరె సారొ పొత్తొనె పనికిరి అచ్చె. యంకె బాసంగరె యాడుకు సాడుకు మరిగిబాజిల్లా నిర్జల మెగొనె పనికిరి, కాయానె జొడిలా పొగలానె నీకిరి, దీటోసారి మొరిజీకిరి సెరోనె సంగరె జింకిపీలా గొచ్చొనెపనికిరి.

13 తంకరో అవమానము సొంద్రొరొ నురగ ఒక్కిల్లా ప్రచండమిల్లా ఆలలుపనికిరి, బట్టో తప్పిజీకిరి బుల్లిలా చుక్కలుపనికిరి అచ్చె. తంకె కోసం గాడాందకారం కెబ్బుకూ బద్దము కొరికిరి అచ్చె.

14 ఆదాము మొదలుదీకిరి సత్తొయిటయిలా హనోకుకూడా యంకె కోసం ప్రవచించికిరి యాకిరి కొయిసి ఇదిగొ సొబ్బిలింకు తీర్పు తీర్చితె,

15 తంకె బిత్తరె బక్తిహీనమైలా పైటినె సొబ్బిటికోసం, బక్తిహీనూనె యీల పాపోనె తాకు విరోదంగా కొయిల కటినమైలా కొతానెల్ల తంకు ఒప్పించితె, ప్రబువు తా వొజారొజారు పరిసుద్ద దూతానె సంగరె అయిసి.

16 తంకె తంకరో దురాసలవల్లరె సలుకుంటా, లవొ గురించి మనమానుకు పొగిడికుంటా, సొనిగిలాలింకె తంకె స్తితికు నిందించిలాలింకె పనికిరి అచ్చె తంకె తుండో బడాయి కొతానె పలుకుసి.

హెచ్చరికలు, సూచనలు

17 ఈనె మో ప్రియమైలా స్నేహితులూనె, అమె ప్రబువైలా యేసుక్రీస్తు అపొస్తులు పూర్వంరె తొ సంగరె కొయిలా కొతానె జ్ఞాపకము కొరిగిండి.

18 అంత్యకలోరె తంకె బక్తిహీనమైలా దురాసలు దీకిరి సలిగిల్లాలింకె, అవమాన పర్చిలా సొబ్బిలింకె సెట్టె దిగదూసె.

19 సాలింకె ప్రక్రతి సంబంధమైలా పురువు ఆత్మనీకుంటా ప్రజానెకు యిడమర్చీసె.

20 ఈనె మో ప్రియమైలా స్నేహితులూనె, తొమె తొమ్మాక విస్వసించిలా అతిపరిసుద్దమైలాటంపరె తొముకు తొమె బందిగికుంటా,

21 ఇంకా తొముకు తొమ్మాక పురువురొ ప్రేమ సంగరె ప్రార్థనకొరికుంటా, తా నిత్యజీవార్థమైలా అం ప్రబువుయిలా యేసుక్రీస్తు కనికరము కోసం కనిపెట్టిగికుంటా, తా ప్రేమసంగరె జొక్కుంటా ఎదురు దిగిండి.

22 అనుమానం పొడిలాలింకంపరె కనికరము దిగదేండి.

23 నియ్యబిత్తరెతీకిరి జింకిలాపనికిరి కుండిలింకు రక్సింఱొండి, దేసంబందమైలా అపవిత్ర ప్రవర్తనకు కే మాత్రము నాబప్పిగీకుంటా నడకు అసహ్యించిగీకుంటా డొరొసంగరె కుండిలింకు కరునింఱొండి.

స్తుతి ప్రార్థన

24 నా తడబొడికుంటా తొముకు కాపాడితె, తా మహిమ అగరె ఆనందంసంగరె తొముకు దోసం నీకుంటా టారదీతె,

25 సక్తిగల్గా అం రక్కుకుడైలా అద్వితీయ పురువుకు, అం ప్రబువువైలా యేసుక్రీస్తు వల్లరె, మహిమ మాహాత్మ్యముకు ఆదిపత్యముకు అదికారముకు యుగములకు పూర్వముకు ఉంచినె సర్వయుగములకు కలిగిమాసి.

యోహాను రాసిన ప్రకటన గ్రంథము యోహాను రాసిన ప్రకటన గ్రంథము అగరో కొత

ప్రకటన పుస్తకము నో నిబంధనరె ఆకరుపుస్తకము. యడ క్రీస్తుజొర్నెలా తరువాత 95 బొచ్చొరొ అపొస్తులుయాల యోహాను సంగరె రాసివురొయిసి. 1:1సెయె యోహాను నువార్త యింక గుట్టె యోహాను, దీట యోహాను, తింట యోహాను బుల్లి కూడ డక్కుసెయోహాను 13:23 ఆకు పద్దుసు దీపముబిత్తురుకు కొడిగీకిరి జెల్లాపరె సెట్టె యేసుక్రీస్తు నువార్తకు ప్రకటించిల వినియమురె యె ప్రకటన పుస్తకముకు రాసిని 1:9.

యె ప్రకటన పుస్తకముకు రాసివురొ యోహానురొ ఉద్దేసం కిరబుల్నే యేసుక్రీస్తురె విస్వాసముసంగరె టారెకిరి తొత్తె చదివిలలింకు ప్రొత్సహించితె రాసిల. కిరుకుబుల్నే యేసుక్రీస్తు బులికిరి అయిల సమయము సమిపించికిరి అచ్చి. 1:3-22:7సెయె సాదరనముగా క్రీస్తువులుకల్ల ఇంక సత్ర ప్రత్యకమీల సంగమునుకు దీట, తింట అద్యాయాలుకు రాసివిరొ జరిగిల. యోహాను తా రచనరె ప్రవచనలు ఇంక సెయె రాసిల వినియలు యింక బడే బొమ్మనెగూరించి ఉపయోగించికిరి రాసిల. యె పుస్తకమురె పురననిబంధనరె కుండె బాగలు గుట కొయివురొ జరిగిల. సె ప్రత్యేకంగా జెకర్యా 6:1-8. వ అద్యాయం 1:3 వచనాలు యింక నిర్గమ కాండమురె సత్ర బాకలు సత్ర పాత్రలు యింక పురువు ఐగుప్తు ఉంపురుకు పొడిదిల్ల తెగుల్లు యె సమానమీల వినయెనె యె పుస్తకమురె గుట రాసివిరియాల. నిర్గమ 7 దీకిరి 9 వ అద్యాయమునె జాంక. యె ప్రకటన గ్రంథమురె ఆకరి సమయము గురించి తా ఉంపరె నమ్మకము రొగ్గిలింకెల్ల తాసంగరెపాటు సాస్యతంగా జీవించిసొ బుల్లి ఆండ్రె కొయివురొపూసి. యె పుస్తకము తొముకు ఎచ్చరించికిరి యేసు బేగా బుల్లికిరి ఆసి బులి నిరీక్సిన కలిగిలీసి.

సంగతీనె

1. యోహాను కేసెవొ, యే ప్రవచన దర్శనం క్యాకిరి పొందిసొ కొయివురొ ద్వారా ఆరంభించిసి 1:1-20
2. సెయ్యె యేసు ద్వారా యేడు సంగాలుకు నూటిగా గుట సందేసముకు దిల్లీసి 1:1-3:22
3. సెత్తెలె సెయ్యె యేడు ముద్దలుకు 4:1-8:5 ఇంకా యేడు పుంకిలా బాకాలు 8:6-11:19 గురించి వివరించిసి.
4. యెడ తర్వాతరె యోహాను యేడు ముండోనెరొ గటనర్పము ఉంపరె వొడ్రపోనెరొ యుద్దముకు వివరించిసి 12:1-14:20
5. తర్వాతరె సెయ్యె రగ్గొరొ యేడుపాత్రలు గురించి రాసిసి 15:1-16:18
6. తర్వాతరె యోహాను పరలోకంరె తా సత్రువూనె ఉంపరె క్యాకిరి జయం పొందిసొ వివరించిసి. 17:1-20:15
7. ఆకరుగా చివరె యోహాను నో మెగొకు నో బూమి గురించి వివరించువురొ. 21:1-22:21

¹ యే పుస్తకమురొ సంగతీనె యేసుక్రీస్తు తా దాసునుకు దిగిపించితె పురువు తాకు అనుగ్రహించిలా ప్రత్యక్షత. సంగతీనె అగురుకు సంబవించుసె బులి పురువు తా దూత సంగరె వర్తమానం పొడిదీకిరి తా దాసుడైలా యోహానుకు తెలియపర్చిసి.

² యోహాను పురువురొ వాక్కు గురించి, యేసుక్రీస్తురొ సాక్సము గురించి సెయ్యె దిగిలత్తెమట్టుకు సాక్సం కొయిసి.

³ కైంకిబుల్నే సమయము సమిపించిలిసి గనుక యే ప్రవచన వాక్కులుకు చదివిలాట, సడానె సునికిరి సడకు లోబొడికిరి సలిగిల్లాలికె దన్యూనె.

సత్ర సంగాల్లింకు దండము

⁴ ఆసియరె తల్లా సత్తర సంగలుకు యోహాను సుబాలు కొయికిరి రాసివురొ కిరబుల్నే, జరిగితల్లా కలో జరిగిజిల్లా కలో అయితల్లా కలోరె తల్లా తా తీకిరి, తా సింహాసనం ఎదురుగా తల్లా సత్తర ఆత్మల తీకిరి,

⁵ నమ్మకమైలా సాక్సిగా, మొర్జిల్లాలికె తీకిరి సే అగరె తీకిరి ఉటిలాట, రొజానుకు అదిపతి యీలా యేసుక్రీస్తు తీకిరి క్రుప, సమాదానాలు తొముకు కలిగిమాసి. అముకు ప్రేమించికిరి తా రొగొతో వల్లరె అం పాపోనె తీకిరి అముకు చొడిపించితె.

⁶ అముకు ప్రేమించికుంట తా రొగొతోవలరె అం పాపము దీకిరి మహిమ ప్రబావములు యుగయుగాలు కలిగిమాసి ఆమేను. సే అముకు తా బొ యీల పురువుకు గుట రాజ్యముపనికిరి యాజకూనెపనికిరి కొరిసి.

7 ఇత్యో సెయ్యో మెగోనంపరె అయిలీసి. ప్రతి అంకి తాకు దిగుసి. తాకు బుసిలాలింకె కూడా దిగుసె. బూమంపరె మనమానల్లా తాకు దిక్కిరి గుండెలు బాదుగుచ్చె. యడ జరిగివాసి.

8 అగరె మియ్యాక చివరె మియ్యాక, జరిగితల్లా జరిగిజిల్లా అయితల్లా కలొరె తల్లాట మియ్యాక బులి సర్వసక్తుడైలా ప్రబువు కొయిలీసి.

క్రీస్తురో దర్శనము.

9 యోహాను బుల్లా మియ్యి తొ బయి. యేసువల్లరె కలిగిలా న్రమరె రాజ్యంరె సహానంరె పాలిగిల్లాట మియ్యి పురువురో వాక్కు గురించి యేసురో సాక్సం గురించి పత్తాసు దీవిరె పరవాసైకిరచ్చి.

10 పురువురో దినొరె మియ్యి పురువు ఆత్మసంగరె తన్నుగా బూర సబ్బంపనాట మో పొచ్చాడె బొట్టగొలాసంగరె కొతలగివురో సుందీసి.

11 తు దిగిలాట పుస్తకమురె రాసికిరి, ఎపెసు, స్యుర్ను, పెర్గము, తుయత్తెర, సార్దీసు, పిలదెల్వియ, లవొదికయ బుల్లా సత్తర సంగలుకు పొడిదే.

12 సడ సున్లాబెల్లె మో సంగరె కొతాలగితల్లా గొలా కిడవొబులి బుల్లిలాబెల్లుకు సున్నసంగరె కొర్ల సత్తర సున్న బొత్తి స్తంబలు దిగించి.

13 సీ సత్త సున్న బొత్తి స్తంబలు మొజిరె మనమరో పో పనాటకు జోనుకు దిగించి. సెయ్యో పాదాలంపరెకు పొడిలా కొన్న పిందిగీకిరి బుక్కొఉంపరె సున్నకొన్న పట్టి బందిగీకిరి అచ్చి.

14 తా ముండో ముండ్రొబల్లో దొగలా ఉన్నపనికిరి మంచు పనికిరి దొగలైకిరి అచ్చి. తా అంకినె నియ్య జోలానె పనికిరి అచ్చె.

15 తా పాదాలు కొలిమిరె పుడ్డికిరి మెరిస్తల్లా కంచుపనికిరి అచ్చె. తా సొరము విస్తార జలప్రవాహము ద్వని పనికిరి అచ్చి.

16 సెయ్యో తా కైలత్తరె సత్తర నక్కిత్తమునెకు దరిగీకిరి అచ్చి. తా తుండొత్తికిరి దీట అంచునె గల పదునైలా గుటకడ్లం పొదరుకైలీసి. తా మూ తేజస్సు సంగరె ప్రకాసించితల్లా సూరిడు పనికిరి అచ్చి.

17 మీ తాకు దిగిలాసంగరాక మొర్లాటపనికిరి తా పాదానె పక్కరె పొడిజేంచి. సెయ్యో తా కైలత్తోకు మో ఉంపరె లొక్కిరి మెత్తె యాకిరి కొయిసి “డొరితెనా! మీ అగరోట, ఆకరువీట.”

18 గాని వుంచినె జీతల్లాట మియ్యాక! మొరిజీంచి గాని ఇత్యో యుగయుగాలుకూ జీకుంటా అచ్చి. ఇంకా మొర్నొ, పాతాలమురె తాలం అదికారం మోపక్కరాక అచ్చె.

19 ఈనె తూ దిగిలాటల్ల, తల్లటల్ల, అడతర్వాతరె ఈవలిసిలా సంగతీనెకు రాసు.

20 తూ మోకైలత్తరె దిగిలా సత్త నక్కిత్రాలు, సె సత్త సున్న బొత్తిస్తంబాలునె కిరబుల్చే, సె సత్త నక్కిత్రాలు సత్త సంగాలుకు దూతానె. తూ దిగిలా సె సత్త బొత్తిస్తంబాలునె కిరబుల్చే సతర సంగాలునె.

2

ఎపెస్సి సంగముకు సందేశం.

1 ఎపెసురె తల్లా సంగం దూతకు యాకిరి రాసు, సత్తర నక్కిత్రాలు తా కైలత్తరె దరిగీకిరి సత్తర బొత్తిస్తంబానె మొజిరె బుల్లితల్లాట కొయితల్లా సంగతీనె కిరబుల్చే,

2 తో పైటీనె తో కొస్టానె తో ఓర్పు మెత్తె అరక, తూ దుస్టులుకు సహించినారు బులి, అపోస్తులు నీకిరాక తంకె అపోస్తులు బులికిరి కొయిగీకుంట మాయ కొరితల్లాలింకు పసిబందుసుబులి మెత్తెరక.

3 తూ ఓర్పు సంగరె మో నా కోసం బారం బరించుకుంటా అలిసిజిల్లాను బులి మెత్తెరక.

4 ఈనెను అగరె తొత్తె తల్లా ప్రేమ తూ సడదీసుబులి తో ఉంపరె మెత్తె గుట అబ్యంతరం అచ్చి.

5 సడుకాక తూ కే పరిస్తితిరె పొడిజేసివొ సడకు జ్ఞాపకం కొరిగీకిరి మనుసు మార్చిగీకిరి సె అగరె పైటీనె కొరు. సాకిరి తూ మనుసు మార్చిగిన్నే సాకిరి; నీనె మీ తో పక్కు. అయికిరి తో బొత్తిస్తంబముకు సడపక్కరతికిరి కడుపూంచి.

6 ఈనె తొబిత్తరె గుట అచ్చి. సడ కిరబుల్చే, నీకొలాయితునె బుల్లాలింకెరొ పైటీనుకు తూ అసాయ పొడ్డిను. సాకిరాక మియ్యంకా అసాయించిగిల్లించి.

7 కన్నోనె రొల్లాట ఆత్మ సంగలు సంగరె కొయిలా కొత సునుమాసి. జయించిలాటకు పురువు పరదేసిరె తల్లా జీవగొచ్చొరో పొగలానుకు కయిపించుంచి.

స్మర్తుల సంగముకు సందేశం.

8 స్మర్తుల తల్లా సంగమురో దూతకు యాకిరి రాసు. అగరోట ఆకరిట, మొర్నొత్తికిరి ఇంకా జీకిరితల్లాట కొయితల్లా సంగతీనె కిరబుల్నే,

9 తూ పొడితల్లా స్రమకు బీదరికముకు మీ జని. ఈనెను తూ పలియతల్లాటాక. తంకె యూదునె నీనన్నా యూదునె బులికిరి కొయిగిల్లాలింకు యే సాతాను సంబందకులుకు తొత్తె కలిగితల్లా దూసన మెత్తె తెలుసు.

10 తొముకు అయితల్లా కొస్టానె గురించి డొరిజీతెనాండి. సునొండి, తొముకు పరీక్సించితె సాతాను తొబిత్తరె కుండెలింకు చెరరె పొగిపించుసి. దొస్టదినో స్రమ కలుగుసి. ఈనన్నా మొర్నొదాకా నమ్మకంగా తా. మీ తొత్తె జీవకిరిటం దూంచి.

11 సంగలు సంగరె ఆత్మ కొయితల్లా కొతా కన్నీనె తల్లాట సునుమాసి. జయించిలాతాకు దీటో మొర్నొవల్లరె కెటువంటి బాద తన్నీ.

పెర్గము సంగముకు సందేశం

12 పెర్గమురె రొల్లా సంగమురో దూతకు యాకిరి రాసు. పదునైల దీటాంచురో కత్తి తల్లాట కొయితల్లా సంగతీనె కిరబుల్నే,

13 సాతాను సింహాసనం ఉంపరె తల్లా చోటునురె తూ కాపురం తల్లీసుబులి మీ జని. ఈనె సాతాను కాపురం తల్లా సె చోటునురె, మో ఉంపరె విస్వాసిగా తైకిరి మో కోసం సాక్సియాల అంతిపయ బుల్లాటతా.

14 ఈనన్నా మెత్తె నానచ్చిలా పైటీనె తూ కొరిలీసు. సడానె కిరబుల్నే విగ్రహాలునుకు బలి దిల్లటకు కైలపనికిరి, దర్మిపైటికొరితె, తంకు బట్టోమల్లించితండుకు బాలాకు సుక్కిలా బిలామురో బోద సున్లాలికె తొ మొజిరె అచ్చె.

15 సాకిరాక నీకొలాయితునె బుల్లా మనమానురో కొతానె సున్లాలికె తొబిత్తరె అచ్చె.

16 ఈనె మారుమనుస్సు పొందొండి; నొయినె మీ తొవక్కు బేగా అయికిరి మో తుండొడికిరి అయిల కడ్గముసంగరె అంకె సంగరె యుద్ధముకొరిమి.

17 సంగముసంగరె ఆత్మ కొయిల కొత కన్నొత్తల్లాట సునుసి గాక. జయించిలాటకు మరుగైకిరి తల్లా మన్నాకు కైపించుసి. యింక తాకు దొగల పొతోరో దూంచి; సె పొతోరోఉంపరె చెక్కికిరితల్ల గుట నోట నా తాసి; పొందిలతాకు తప్ప యింక సడ కాకు తెలిసిని.

తుయత్తెరె తల్లా సంగముకు సందేశం

18 తుయత్తెరె తల్లా సంగరో దూతకు యాకిరి రాసు అగ్నిజొలపని అంకీనె అపరంజికు పొలికిరి తల్లా పాదమూనె గలిగిలా పురువురో పో కొయిల సంగతీనె కిరబుల్నే,

19 తో పైటీనె, తో ప్రేమకు, తో విస్వాసముకు, తో పరిచర్యకు, తో సహనముకు మెత్తెఅరక; తో అగరె పైటీనె కన్నా తో పొచ్చాడె పైటీనె యింక బడెంచ యాసెబులి తెలుసు.

20 ఈనెను తో ఉంపరె తప్పు గుట మీ మోపివాసెబులి అచ్చి; కిరబుల్నే, సే ప్రవక్తిబులి కొయిగిల్లాట యెజెబేలుకు బుల్ల తిల్లామొట్టకు తూ రొయిదిల్లీసు, దర్మిపైటి కొరితండుకు, విగ్రహాలకు అర్పించిలాంచ కయవురో సుక్కిదీకుంట తంకు మోసం కొరుకుంట అచ్చి.

21 మారుమనుస్సు పొందుబులి మీ తాకు సమయముదించిగాని సడ తా దర్మిపైటికి సడిడికిరి మారుమనుస్సు పొందిగిన్ని.

22 ఇత్తో మీ తాకు మొంచదరిపించికిరి సడ సంగరె నీ బులి దర్మిపైటి కొర్లలింకె తా పైటీనెవిసయమురె మారుమనుస్సు కడిగిన్నె నొయినె తంకు కెత్తో స్రమానె కొరుంచి.

23 సే మొట్టరో పిల్లనాకు కచ్చితముగా పొర్నొకడిమి. సడవల్లరె అంతరింద్రియములుకు మనుసునుకు పరిక్సించిలట మీయాకా బులి సంగమునె సాబ్బి తెలిసిగినివో. యింక తొబిత్తరె సాబ్బిలింకు తా, తా పైటీనెవల్లరె ప్రతిపలము దూంచి.

24 ఈనె తుయత్తెరె ఆకరిలింకెయాల తొమెసంగరె, ఈనెమాకు యె బోదకు నాఅంగీకరించికిరి సాతాను గుట గూడమైల సంగతీనుకు తెలిసినీబులి కొయిగిత్తల్ల సాబ్బిలింకు సంగరె మీ కొయిలాట కిరబుల్నే తొమంపరె యింక కే బారం నొగినీ.

25 మీ అయిలజాంక తొముకు కలిగికిరితల్లాట గట్టిగా దరిగినోండి.

26 మీ మో బోవల్లరె అదికారం పొందిలపనికిరి జయించుకుంట, అంతముదాకా మో పైటీనె జాగర్తాగ కొరిలాటకు మనమానె ఉంపరె అదికారం దూంచి.

- 27 సె ఇనుముదండము సంగరె తంకు ఏలుసి; తంకె కుమ్మరతారొ పాత్రనెపనికిరి బంగిపేవురొపూసి;
 28 ఈనె మి మో బోవలరె పొందిగిల్లాట మి తాకు వేకువ చుక్కకు దూంచి.
 29 సంగమునె సంగరె ఆత్మ కొయిల కొతకిరబుల్నె కన్నొ తల్లాట సునుసి.

3

సార్దీసు సంగముకు సందేసం

- 1 సార్దీసురె తల్లా సంగము దూతకు యాకిరి రాసు సత్ర నక్కత్రమునెకు పురువురొ సత్ర ఆత్మానెకు గల్లాట కొయిల సంగతీనె కిరబుల్నె తో పైటినె మెత్తె అరక. కిరబుల్నె, జీవించిలు బులి నాక అచ్చిగాని తూ మోరిజెల్లటాక.
 2 తో పైటినె మో పురువు పారె సంపూర్వమీలటపనికిరి మెత్తె దిగిదీవిని ఈనె జాగర్త పొడికిరి, మోరిజేతెత్లటకు కన్నా తక్కిలాటల్లాకు బలపరుచు.
 3 తూక్యాకిరి ఉపదేసం పొందిసివొ క్యాకిరి సునిసివొ జ్ఞాపకం కొరిగినికిరి సడకు పాటించుకుంటు మారుమనుస్సు పొందు. తూ జాగర్తగా తైకిరి తన్నె మీ సొరొపనికిరి ఆంచి; కే గడియకు తో ఉంపురుకు ఆంచొవొ తొత్తె అరకనీకుంట తాసి.
 4 ఈనె తంక కొన్నానుకు అపవిత్రం నాపరుచుకుంట కుండెలింకె సార్దీసురె తోపారె అచ్చె. తంకె అర్దులు గనుక దొగలాట కొన్నానె పిందిగినికిరి మో సంగరెకూడ సంచరించునె.
 5 జయించిలాట సాకరాక దొగల కొన్నానె పిందిగినికిరి; జీవ గ్రందంరె తీకిరి తా నా కెత్తెమాత్రం పుంచిపేని, మో బో పారె కూడ తా దూతనె పారె కూడ తా నా మీ ఒప్పుగినిమి.
 6 సంగముసంగరె ఆత్మ కొయిల కొత కన్నొనెత్లట సునుసి.

పిలిదెల్పియ సంగముకు సందేసం

- 7 పిలిదెల్పియరె తల్లా సంగము దూతకు యాకిరి రాసు దావీదురా తాలము తల్లటకు, కేసెకూడ నా పొక్కుండ కడ్లాటకు, కేసెకూడను నాకడుకుంట పొగిలితాకు సత్య స్వరూపియాల పరిసుద్దుడు కొయిలా సంగతీనె కిరబుల్నె.
 8 తో పైటినె మెత్తె తెలుసు; తొత్తె తల్లా సక్తి కుండెయీకిరి తన్నెను; తూ మో వాక్యముకు తెలిసిగీకిరి మో నారె ఎరకనీ బులికిరి; ఇత్తో తలుపు తో అగరె కడికిరి అచ్చి; సడకు కేసెనేను తిరస్కరించిలానింతె.
 9 యూదునె నొయిలలింకె తంకె యూదునెబులి సొరొకొత లగిల సాతాను సామజమురె తల్లలింకు దన్నెపించుసి; తంకె అయికిరి తో పాదామూనె ఉంపరె పొడికిరి నమస్కారము కొరికిరి, ఇత్తో, మీ తొత్తె ప్రేమించిలింబిబులి తెలిసిలాపనికిరి కొరుంచి.
 10 తూ మో ఓర్పు వినయమురె తెలుసుగినిను గనుక బూమి ఉంపరె జీవించిలాలింకు సోదించితె లొకొఉంపురుకు అయిల సోదన కలొరె మీకూడ తొత్తె కాపాడుంచి.
 11 మీ బేగా అయిలించి; కేసెనెను తు గెలిసిగిల్లా బహుమానం జాగర్తగా నొగ్గును.
 12 గెలిసిలతాకు మో పురువురొ మందిరంరె గుటె స్తంబముపనికిరి కొరుంచి; తాండె బిత్తరె తీకిరి సే యింక కెబ్బుకు పొదురుకు జెన్ని. యింక మో పురువురొ నా, పరలోకమురె మో పురువు తీకిరి ఒల్లికిరి అయితల్లాట నాటయాల యెరూసలేముకు మో పురువురొ పట్టనపు నాకు, మో నాట నాకు తాఉంపరె రాసుంచి.
 13 సంగముసంగరె ఆత్మ కొయిల కొత కన్నొతల్లాట సునివొగాక.

లవొదికయ సంగముకు సందేసం

- 14 లవొదికయరె తల్లా సంగము దూతకు యాకిరి రాసు ఆమేను బుల్లతాకు నమ్మకమైలా సత్య సాక్సీయాల పురువురొ ద్రుస్టికి అగుంత యాల తాకు కొయిల సంగీతీనెకిరబుల్నె.
 15 తో పైటినె మెత్తెఅరక, తూ కకొరొ యీకిరియినెను తత్తికిరి యినెను నీ తు, మొజిరె రకముగా అచ్చు, తూ కకొరొ యీకిరియినెను తత్తికిరి యినెను తన్నె మేలు.
 16 తూ తత్తికిరి యినెనెను కకొరొ యికిరి యినెను నాత్తెకుంట, కే పొక్క నా పైటికైలతాపనికిరి అచ్చు యినె మీ తొత్తె మో తుండెతీకిరి సొప్పొ పొగిమి బులి కొయిగిల్లించి.
 17 తూ దొర్బాగ్యుడవుకు దిక్కుమాలిట బులి గుడ్డితాబులి కొన్నానె నొయికుంట అచ్చిబులి నా తెలిసికిరి మీ పలియతాబులి, పలియ సంపదించిగించి బులి, మెత్తెకిచ్చి కొదువనీబులి కొయిగిల్లను.

18 తూ పలియగాలత యీతె జోలరె పుటముపొగిలా సున్నాకు, తో అవమాన మీల దేకు లజ్జో నాదీదిల్లపనికిరి పిందిగినితుకు దొగలాట కొన్నానెకు, తోతై ద్రుస్థికలిగినిపనికిరి తో అంకినెకు కాటుకనె మోపారె గినుబులి తోతై బుద్ధికొయిలించి.

19 మీ ప్రేమించిలాలింకల్ల గద్దించికిరి సిక్కించిలించి గనుక తూ ఆసక్తి కలిగికిరి మారుమనుసు పొందుగును.

20 ఇత్తో మీ తలుపు పక్కరె టారెకిరి తలుపుకు మల్లించి, కేసెనెను మో గొల సునికిరి తలుపు కడ్చె, మీ తాపక్కు అయికిరి తాసంగరె మీకూడ, మోసంగరె సేకూడ కద్ది కాంచో.

21 కేసె గెలిసెలవో తాకు మో బోసంగరె కూడ తా సింహాసనమురె బొస్సికిరి తల్లా పనికిరి గెలిసెలతాకు మోసంగరె కూడ మో సింహాసనమురె బొసిపించుచి.

22 “సంగముసంగరె ఆత్మ కొయిల కొత కిరబుల్పా కన్నొత్తలాట సునివో.”

4

పరలోకారె ఆరాదన

1 యే సంగతినె జరిగిల తరువాతరె మీ యింకగుటె దర్శనము దిగినాక, అత్తో పరలోకమురె గుటె తలుపు పిటికిరిఅచ్చి. యీనె మీ అగరె సున్లి గొల బూరసబ్దముసంగరె మోసంగరె కొతలగిలీట సునించి. సె కొతలగిలీట ఎట్టికి ఉటికిరి అయిబులి యింకగరె జరిగిలాట గురించి తోతై దిగి దూంచి

2 వెంటనాక మీ ఆత్మసంగరె పూరికిరి, అత్తో పరలోకమురె గుటె సింహాసనము పొక్కిరి అచ్చి. సింహాసనమురె జోనె ఆసీనుడుయికిరి అచ్చి.

3 సాకిరి బోసిల మనమా ద్రుస్థికి నూర్యకాంత పనికిరి కెంపు పద్మరాగమునె బుల్ల విలువైల వజ్రాలు పొతోరొనె పనికిరి పోలికిరి అచ్చి. సే సింహాసనము చుట్టు ఇంద్రదనుస్సు పనికిరి అలంకరించికిరి ప్రకాసించుకుంట బొసికిరి అచ్చి.

4 ఇంకా సే సింహాసనముచుట్టు ఇరువది నాలుగు సింహాసనములు అచ్చి, యే సింహాసనములు పక్కరె ఇరువది నలుగురు బొడిలింకె దొగలాట కొన్నానె పిందిగినికిరి, తంక ముండొనెంపరె సువర్న కిరీటమునె నొగ్గినికిరి బొసికిరిఅచ్చి.

5 సే సింహాసనముతీకిరి మెరుపునె ద్వనులు ఉరుమునెకూడ అయిలీసి. యింక సే సింహాసనము అగరె సత్రబొత్తినె లక్కుంటఅచ్చి; సడ పురువురొ సత్ర ఆత్మానె.

6 యింక సే సింహాసనము అగరె స్పటికాన్ని పోలికిరి గాజు పనికిరి సాందొరొపనికిరి అచ్చి. సింహాసనము మొద్దిరె, సడ చుట్టు చార జీవజంతువూనె అచ్చి, సే జీవీనెకు అగరె పొచ్చుకు సాబ్బిటికి అంకినె అచ్చి.

7 అగరె జీవి బగో పనికిరి అచ్చి దీట జీవి దూడ పనికిరి అచ్చి తింట జీవి మనమార మూపనికిరి మూయాకిరి అచ్చి సారోట జీవి ఉడ్డిల పక్కిరొజ పనాట.

8 యే చార జీవులురె ప్రతి జీవికి సోట రెక్కానె అచ్చె, సడ చుట్టూకూడ రెక్కనెండ్రె బిత్తరె అంకినె సంగరె పూరికిరి అచ్చె. సడ రత్తి దూసి నామానుకుంటా యాకిరి కొయిలీసి.

“పూర్వంరె అచ్చి ఉంచినె కూడ అచ్చి బవినత్తు కలొరె తల్లా

పురువుయాల ప్రబువు పరిసుద్దుడు, పరిసుద్దుడు, పరిసుద్దుడు” బులి కొయిలీసి.

9 సే సింహాసనమురె బొసికిరి యుగయుగములు జీవించిల తాకు మహిమయు గనతయు క్రుతజ్ఞతా స్తుతులు కూడ గలిగిమాసి బులి సే జీవినె గయికుంట,

10 సే ఇరవై నలుగురు బొడిలింకె సింహాసనము పారె బొసికిరి తల్లతాకు అగరె సాగిలపొడికిరి, యుగయుగములు జీవించికిరి తల్లాటకు నమస్కారము కొరుకుంటా,

11 ప్రబువా, మో దేవా, తూ సాబ్బికూడ

స్రుస్థించిలు తో చిత్తమువల్లరె సడచ్చి

సడబట్టాక సుస్థించిబొడిసి గనుక తో

వల్లరాక స్రుస్థింపబొడిసి ఈనె మహిమ గనత తువ్వక.

5

గ్రందము యింక గొరిపిల్ల.

1 యింక బిత్తరె పొదిరి రాసికిరితల్ల, సత్ర ముద్రనె గట్టిగా పొక్కిరి తల్లా గుటె గ్రందము సింహాసనమురె బొసికిరితల్లతాకు కైలత్తో దిగించి.

2 యింక తాండ్రో ముద్దనె కడికిరి సే గ్రందము పిటితె యోగ్యుడు యాలట కేసెబులి బలిస్తుడి యాల గుట దేవదూత గట్టిగా కొయిలాట దిగించి.

3 యానె పరలోకమురె గాని బూమిఉంపరెగాని బూమితొల్లెగాని సే గ్రందము పిటితెయినెను దిగితెయినెను కాకు హక్కు నీ.

4 సే గ్రందము పిటితెకినెను దిగితెయినెను యెగ్యుడుకేసె నా దిగిదిలందుకు మీ బూతుగా కందితన్నుగా,

5 సె బొడిలింకెబిత్తరె జొనె కందితెనా; ఇత్తో దావీదుకు వంసమైల యూదా గోత్రముకు సింహము సత్ర ముద్దనె కడికిరి సే గ్రందముకు పిటితె జయముపొందుసిబులి మో సంగరె కొయిసి.

6 యానె సింహాసనముకు సే సారా జీవికిను బొడిలింకె మొజరె, బలియాకిరి తల్లా గొరిపిల్ల టారేకిరి తల్లాట దిగించి. సే గొరిపిల్లకు సత్ర కొమ్మునె సత్ర అంకీనె అచ్చి. సే అంకీనె బూమిఉంపురుకు పొడిదిల్ల పురువురొ సత్ర ఆత్మానె.

7 సే అయికిరి సింహాసనమురె బొసికిరి తల్లటతాకు కైలత్తోరె తీకిరి సే గ్రందముకు కడిగినిసి.

8 సే సడనుకు కడిగిల్లాబెల్లె సే సారాజీవినుకు; వీననె, దూప ద్రవ్యము సంగరె పూరిల సువర్నుపాత్రనుకు దరిగికితల్ల సె ఇరువది నలుగురు బొడిలింకె, సే గొరిపిల్ల పారె సాగిలికిరి పొడిసె. యే పాత్రనె పురువురొ ప్రజానాండ్రా ప్రార్థనానె.

9 సే బొడిలింకె తూ
సే గ్రందముకు కడిగీకిరి తాండ్రో
ముద్దనె పిటితె యోగ్యుడవు,

తూ బలిదీతుకు తో రొగొత్తో దీకిరి,
ప్రతి వంసమురె, వేరు వేరు

బసానె కొతలగిలింకెబిత్తరె,
ప్రతి మనమానె బిత్తిరె, ప్రతిజనమురె,

పురువు కోసం మనమానుకు గినికిరి,

10 అం పురువుకు సేవ కొరితె తంకు
గుట రాజ్యంగాను యాజకూనెపనికిరి కొరిసు.

కాబట్టి తంకె బూలోకొరె ఏలుసె బులి నా గిత్తో గాసె.

11 మీ యింక దిగినాక సింహాసనముకు జీవీనెకు, బొడిలింకె ఆవరించి తల్లా బడె దూతనె స్వరము సుందిల, తంక లెక్క కోట్లు సంగరె అచ్చి.

12 తంకె బలియాల గొరిపిల్ల,
సక్తి ఐస్వర్యముకు జ్ఞానముకు

గనత మహిమకూడ స్తోత్రమునె
పొందిగినితె అర్దుడుబులి గొప్పు స్వరముసంగరె కొయిలీసె.

13 సెత్తిలె పరలోకమురె

బూలోకమురె బూమి తొల్లె సాందొరెబిత్తిరె
తల్లా ప్రతి సుస్థించికిరిబొడిల,

ఈనె తాండె బిత్తరె తల్లా సొబ్బి
సింహాసనము ఉంపరె బొసికిరి తల్లటకు గొరిపిల్లకు స్తోత్రం.

14 సె సారా జీవినె ఆమేను బులి కొయినాక సె బొడిలింకె సాగిలపొడికిరి నమస్కారముకొరె.

6

ముద్దనె.

1 సె గొరిపిల్ల సె సత్ర ముద్దండ్రె అగరెతల్లాట పిటిలంపరె మీ దిగినాక సె సత్ర జీవిండ్రె గుటె అయిబులి ఉరుముపనికిరి స్వరముసంగరె కొయిలాట సునించి.

2 యానె మీ దిగినాక ఇత్తో గుటె దొగలాట గొడ దిగిదిల్ల; సడంపరె జొనె బాసం దరిగినికిరి బొసికిరి అచ్చి. తాకు గుటె కిరీటం దీసె; సే జయించికుంట బయలుదేరిసి.

3 సె దీట ముద్ద పిటిలంపరె అయిబులి దీట జీవి కొయిలాట సునించి.

4 సెత్తిలె గొర్రటయాల ఇంకగుటె గొడ బయిలుదేరికిరి జేసి; మనమానె జొనెకుజొనె పొర్నొ కడిగిల్లాపనికిరి బూలోకమురె సమాదానమునీకుంటు కొరితె యే గొడంపరె బొసిరికిరి తల్లాటకు అదికారం దీకిరి అచ్చి. యానె తాకు బొట్ట కడ్లము దివ్వొరొ యాల.

5 సె తింట ముద్ద పిటిలబెల్లె ఆయిబులి తింటజీవి కొయిలాట సునించి. మీ దిగినాక, ఇత్తో గుటె కలియాట గొడ దిగిదిల్ల; సడంపరె జొనె తక్కిడి అత్తరె దరిగినికిరి బొసికిరి అచ్చి

6 యానె గుటె వెండినానెముకు గుటె సేరు గోదుమబులి, గుటె వెండినానెముకు దీట సేర్లు యవలుబులి, తెల్లొ ద్రాక్కారసముకూడ పాడుకొరితె నా బులి, సె సారా జీవినె మొజిరి గుటె గొల పలికిల పనికిరి మెత్తె సుందిల

7 సే సారా ముద్ద పిటిలంపరె ఆయిబులి సారా జీవి కొయిలాట సునించి.

8 సెత్తిలె మీ దిగినాక, ఇదిగొ పోసో రంగు బుల్ల గుటె గొడ దిగిదిల్ల; సడంపరె బొస్సికిరితల్లటర నా మోరొనొ. పాతాల లోకము తా సంగరె జెల్ల. కడ్లముసంగరె యినెను, కరవు సంగరె యినెను, జబ్బునె సంగరె యినెను, క్రూరజంతువు సంగరె యినెను పొర్నొకడితె బూమిఉంపరె సారోబాగమంపరె తాకు అదికారం దివ్వొరొ జరిగిల

9 సే పాట ముద్దకూడ పిటిలంపరె, పురువురొ వాక్యము కోసం, తంకె దిల్లట సాక్యము కోసం మొరిజిల్లాలికె ఆత్మానె బలిపీటము తొల్లె దిగించి.

10 తంకె నాదా, సత్యవంతుడు, పరిసుద్దడా, ఎత్తెవరుకు తీర్పు నా కొరుకుంటు, అం రొగొతో గురించి బూమి ఉంపరె జిలాలింకు ప్రతిదండన నాకొరుకుంటు తాసుబులి గట్టిగా కేకానె పొగించి.

11 దొగలాట కొన్నానె తంకెబిత్తరె సొబ్బిలింకు దివ్వొరొ జరిగిల; ఈనె తంక పనికిరాక మొరివలిసిలలింకె కూడ దాసునెసంగరె అన్నబయినెసంగరె లెక్క పూర్తిలవరుకు యానె కుండె కలో విస్తమించివాసెబులి తంక సంగరె కొయిపురొ యాసి.

12 సె సోట ముద్ద పిటిలబెల్లె మీ దిగినాక బొట్ట బూకంపము జరిగిల. సూర్యుడు గొంగలి దుప్పటిపనికిరి కలియాకిరి మారిజెసి. చంద్రబింబ అల్లా రొగొతో పనికిరి గొరైకిరి యాజేసి.

13 బొట్ట బాసంగరె ఊపుకుంటతల్ల అంజూరపు గొచ్చొతీకిరి కొంచ కాయనె జొడిలాపనికిరి మెగొరెతల్ల నక్కత్రములు బూమిఉంపరె జొడి జేసి.

14 ఇంక మెగొ చుట్టిల కైతొపనికిరి అద్దుస్యమైజిసి. పర్వతాలూ, సారపక్కరె పనిసంగరెతల్ల బాగం సొబ్బికూడ తాండె చోటుతీకిరి కదిలిజెల్ల.

15 సెత్తిలె బూరోజానె, ప్రముకునె, దనికునె, సైన్యాదివతీనె, బలిమీలలింకె, ప్రతి దాసుడు ప్రతి స్వతంత్రుడు గుహండ్రె, పొరోతొనె బండనె మొజిరి నుచ్చిపొల్లె.

16 బండనెసంగరె, పొరోతొనెసంగరె తంకె యాకిరి కొయిసె; అం ఉంపరె పొడొండి, సింహాసనం ఉంపరె బొస్సికిరి తల్లా సడరొ మూ తీకిరి గొరైపిల్ల రగ్గొతీకిరి అముకు నుచ్చిదొండి. రగ్గొకు మహా గొప్పదినొ ఆసి; సడకు ఎదిరించిలాట కేసి?

17 సె మహాఉగ్రత దినొరె సడకు ఓర్పుకగిలాటాత కేసి.

7

144 వేలు మంది ఇస్రాయేలీయులు.

1 సే తరువాత బూమి చార దిక్కుండ్రె చార దేవదూతనె టారేకిరి, బూమి ఉంపరెనెను సొంద్రొ ఉంపరెనెను కే గొచ్చొ ఉంపరెనెను బా నా అయిలాపనికిరి బలంగా అడ్డిగిచ్చె.

2 ఈనె సజీవుడుయాల పురువురొ ముద్దయాల ఇంకగుటె దూత సూర్యోదయ దినతీకిరి ఉంపురుకు అయిలాట దిగించి, బూమికి సొంద్రొకు హాని కొరితె అదికారం పొందిల సే సారా దూతనెసంగరె సెయ్యె బొట్ట స్వరంసంగరె కొయిలాట సునుంచి.

3 యే దూత అమ్మె అం పురువురొ దాసునె తంక చిత్తంరె ముద్రించిలజాంక బూమికినెను సొంద్రొకినెను గొచ్చొనె కినెను హాని నా కొరుబులి కొయిసి.

4 ఈనె పురువురొ ముద్ద తంక చిత్తంపరె ముద్రింపబొడిల లెక్క కొయినాక సునించి, తంకె లెక్కకు గుటె లక్క నలపై నాలుగువేల మంది. తంకె ఇస్రాయేలు గోత్రమురె తల్లలింకె.

5 యూదా గోత్రంరె ముద్రించిలింకె పండెండువేలమంది. రూబేను గోత్రంరె పండెండు వేలమంది, గాదు గోత్రంరె పండెండు వేలుమంది,

6 ఆసేరు గోత్రంరె పండెండు వేలుమంది, నఫ్తాలి గోత్రంరె పండెండు వేలుమంది, మనస్సే గోత్రంరె పండెండు వేలుమంది.

7 సీమ్యోను గోత్రం పండ్రెండు వేలుమంది, లేవి గోత్రం పండ్రెండు వేలుమంది, ఇస్సాకారు గోత్రం పండ్రెండు వేలుమంది,

8 జెబూలూను గోత్రం పండ్రెండు వేలుమంది, యోసేపు గోత్రం పండ్రెండు వేలుమంది, బెన్యామీను గోత్రం పండ్రెండు వేలుమంది,

ప్రతి దెసారె దీకిరి అయిల గొప్ప సముహము.

9 సె తరువాత మి దిగినాక, ఇత్తో, ప్రతిమనమానెబిత్తితీకిరి ప్రతివంసముతీకిరి ప్రజలతీకిరి, బడే బసానె కొతలగిలలింకెబిత్తరె తీకిరి అయికిరి అచ్చె. తంకె దొగలా కొన్నానె పిందిగినికిరి అత్తోనెరె కర్ణూరం మట్టనె దరిగికిరి అచ్చె. గొప్ప సముహము మెత్తె దీదిల్ల.

10 సింహాసనము ఉంపరె బొస్సికిరి తల్లా అం పురువుకు గొరెపిల్లకు అం రక్కనగూరించి సోత్రంబిలి మహాసబ్బంసంగరె ఎలుగెత్తికిరి కొయిలె.

11 దేవదూతనె సొబ్బిలింకె సింహాసనముచుట్టుకూడ బొడిలింకెచుట్టు సె చార జీవినె చుట్టుకూడ టారెకిరి అచ్చె. తంక మూనె బూమికి ఆనిగీకిరి పురువుకు ఆరాదించిలీసె.

12 యుగయుగమునె జాంక అం పురువుకు సోత్రముబిలి మహిమ జ్ఞానముకూడ క్రుతజ్ఞతా స్తుతి గనతకు సక్తికి బలము కలిగివాసి బులి కొయికుంట పురువుకు ఆమేను బులి కొయిసె;

13 బొడిలింకెబిత్తిరె జొనె దొగల కొన్నానె పిందిగినికిరితల్ల యేకేసె? కేటితీకిరి అయిసిబులి మెత్తె పొచ్చిరిసి.

14 సడకు మీ అయ్యా, తొత్తాక తెలుసుబులి కొయినాక సే యాకిరి మో సంగరె కొయిల అంకె మహోస్త్రమతీకిరి అయిలలింకె; గొరెపిల్లరొగొత్తరె తంక కొన్నానె కచ్చిగినికిరి సడకు దొగలకొరిగిల్లె.

15 సడవల్లరె తంకె పురువురొ సింహాసనము అగరె తీకిరి రత్తిదూసి తా మందిరంరె తాకు మొక్కికుంట అచ్చె. సింహాసనము ఉంపరె బొస్సికిరి తల్లతా సేయాక తా గుడారము ఉంపరెతల్లలింకు బుజ్జిపీసి.

16 తంకు ఇంక బొక్కొయినెను గొలారివురొ తన్ని, సూరిడురొ కొరె యానెను కే వడబా యానెను తంకు బైని,

17 కిరబుల్నే సింహాసనము మొజిరె బొసికిరి తల్లా గొరెపిల్ల తంకు కాపరియాకిరి, జీవజలముల బుగ్గనెపక్కు తంకు సలిపించుసి, పురువాక తంక అంకీనెతీకిరి ప్రతి బాస్పబిందువుకు వుంచిపోసి.

8

సత్ర ముద్ర.

1 సె సత్ర ముద్రకు పిటిలబెల్లె పరలోకమురె ఇంచుమించు అరగంట సేపు నిస్సబ్బముగా అచ్చి.

2 సెత్తిలె మీ పురువు అగరె టారెకిరి తల్లా సత్ర దూతనుకు దిగించి; తంకు సత్ర పుంకిల బొట్ట తూతురునె దిల్లె.

3 ఇంక సువర్ణ సాంబ్రాని దివిటి అత్తరె దరిగికిరి తల్లా ఇంకగుటె దూత అయికిరి బలిపీటము అగరె టారెకిరి తన్నుగా సింహాసనము అగరె తల్లా సున్న బలిపీటము ఉంపరె పురువురొ ప్రజానెకు ప్రార్థనానె సంగరె మిసితె తాకు బడే దో ద్రవ్యమునె దివ్విరొయిల.

4 సెత్తిలె సాంబ్రాని దివిటిరె దో పురువురొ ప్రజానె ప్రార్థననెసంగరె మిసికిరి దూత అత్తరెతీకిరి ఉంపురుకుజేకిరి పురువురొ సన్నిదికి బాజెల్ల.

5 సే దూత సాంబ్రాని దివిటి కడిగినికిరి, బలిపీటము ఉంపరె తల్లా నియానెసంగరె సడకు పూరుదీకిరి, బూమిఉంపరె పొక్కిదిన్నకా ఉరుమునె ద్వనినె మెరుపునె బూకంపములు కలిగిల.

పుంకిల తూతురునె. బాకాలు

6 సెత్తిలె సత్ర పుంకిల తూతురునె దరిగినికిరి తల్లా సే సత్రలింకె దూతనె పుంకితె సిద్ధపొడిలె.

7 అగరె దూత బూర పుంకిల బులి రొగొత్త సంగరె మిసికిరి తల్లా నియ్యా వడగండ్లనె కలిగిల, సడకు బీ ఉంపురుకు పొక్కిదివురొ జరిగిసి, సెత్తిలె గొచ్చొనె తింటబాగం పుడ్డిజేసి, పచ్చగస్సా సొబ్బిపుడ్డిజేసి.

8 దీట దూత తూతురునె పుంకిలబిలె నియ్యాసంగరె మండికుంటతల్ల బొట్ట బొనొపనికిరితల్ల గుటె సాంద్రొరె పొక్కిదివ్వొరొ జరిగిల, సడవల్లరె సాంద్రొరె తింటబాగం రొగొత్తె యాజెల్ల.

9 సాంద్రొరెబిత్తిరె పొర్నొకలిగికిరి తల్లా జంతువాండ్రె తింట బాగం మొరిజెల్ల, వడవానెండ్రె తింట బాగం నాసనము యిల.

10 తింట దూత తూతురు పుంకిలపారె దివిటినెపనికిరి మండితల్ల గుటె బొట్ట నక్సత్రం మెగొతీకిరి రాలికిరి నదినె తింటబాగం ఉంపరె పనిబుగ్గనె ఉంపరెకు పొల్ల.

11 సె నక్కత్రముకు చేదుబులి నా, సడవల్లరె పనిబిత్తిరె తింటబాగం చేదు యిజెల్ల; పని చేదు యిజెల్లొ సె పని పీలలింకెల్ల బడె మంది మనమానెబిత్తరె కూడా మొరిజెల్లె.

12 చార దూత తూతురు పుంకిలబులి సూర్య చంద్ర నక్కత్రమురె తింటబాగం వొందారొ కమ్మిలపనికిరి, దూసిబెల్లె తింటబాగముకు సూరిడు నా ప్రకాసింపలపనికిరి, రత్తిరె తింటబాగం చంద్ర నక్కత్రములు నా ప్రకాసింపలపనికిరి తాండె బిత్తరె తింటబాగం హల్లో నీకుంట యిజెల్ల.

13 యింక మీ దిగినాక మెగొమొజ్యరె గుటె పక్కిరోజా ఉడ్డుకుంట తూతురునె పుంకెతె తల్లా తిల్లింకె దూతనె తూతురునె సబ్బమునెబట్టి బూమిఉంపరె జీలాలింకు అయ్యో, అయ్యో, అయ్యో బులి గొప్ప స్వరము సంగరె కొయిలాట సునించీ.

9

1 పాట దూత తూతురు పుంకిలబులె మెగొతీకిరి బుమిఉంపరె రాలిల గుటె నక్కత్రముకు దిగించి, అగాదమురొ తాలము తాకు దీకిరి అచ్చి.

2 సె అగాదము పిటినాక బొట్ట కొలిమితికిరి ఉటిలా దోపనికిరి దో సె అగాదముతికిరి ఉటిసి; సే అగాదముబిత్తరె దోసంగరె సూరుడుకు వాయుమండలముకు వొందారొ కమ్మిల,

3 సే దో బిత్తరె తీకిరి మిడతానె బూమిఉంపురుకు అయిసి, బూమిరె తల్లా పొటినుకు బలముతల్లపనికిరి సడనుకు బలము దివ్వరొయిల.

4 ఈనె చిత్తంపరె పురువురొ ముద్దనీల మనమానుకు తప్ప బూమి ఉంపరెతల్ల గసాకు యినెను కే మొక్కనెకు యినెను ఇంక కే గొచ్చొకు యినెను నస్తము యానాసె బులి సడకు ఆజ్జ దివ్వరొ యిల.

5 ఈనె తంకు మొరిదీతె అదికారం దివ్వినీంతె యానె పాట మసాజాంక బాదనొగితె సడకు అదికారం దివ్వరొ యిల. సడవల్లరె కలిగిలా బాద, పొటియ మనమకు బుసిలాబెల్లె తల్లా బాదపనికిరి తాసి.

6 సె దినోండ్రెరె మనమానె మొరిజెమ్మ బులి కుజ్జుసె యానె సడ తంకు మిలిని; మొరిజెవ్వాసెబిలి ఆసపొడుసె యానె మోరొనొ తంకతీకిరి పొలిజోసి.

7 సె మిడతానె రూపునె యుద్దముకు సిద్దపొడికిరితల్ల గొడానెకు పోలికిరి అచ్చి సున్నాపనికిరి మెరిసిల కిరిటముపనికిరితల్ల సడరొ ముండొనొంపరె తాసి; తాండ్రొ మూనె మనమారొ మూనెపనికిరి తాసి.

8 తిల్లాంట ముండొరొబల్లోపనికిరి బల్లోనె సడనాకు అచ్చి, తాండ్రొ దాంతోనె సింహము కోరనెపనికిరి తాసి.

9 సడనెకు ఇనుము బుక్కొరొ కవచము పనికిరి కవచానె అచ్చి. తాండ్రొ రెక్కనె చప్పుడునె యుద్దముకు దొండుకుంట తల్లా బడె గొడానె తల్లా రదమునె చప్పుడుపనట.

10 పొటియ లెంజొనె పనికిరి లెంజొనె కొంటానె సడనుకు అచ్చి. పాట మసాజాంక తాండ్రె లెంజొనె సంగరె మనమానుకు హాని కొరితె సడనాకు అదికారం అచ్చి.

11 పాతాలపు దూత సడనెంపరె రొజాగా అచ్చి; హెబ్బీ బాసిరె తాకు సారొరాట నా, గ్రీనుదెసా బాసరె తా నా అపొల్లయోను. సడకు అర్దం నాసనము కొరిలాట బులి.

12 అగరె స్రమ గతింబిజెల్ల; ఇత్తో ఇంక దీట స్రమనె తరువాత ఆసి.

13 సోట దూత తూతురు పుంకిలబిలె పురువు అగరె తల్లా సున్న బలిపీటము మూలనె తీకిరి గుటె స్వరము సుందిల.

14 సె స్వరం మహనది “యూప్రటీసు పక్కరె బందిల చార దూతనుకు సడిదే” బులి తూతురు దరిగినికిరి తల్లా సోట దూతసంగరె కొయిలాట సునించి.

15 మనమానెబిత్తిరె తింటబాగముకు పొర్నొ కడివాసిబులి సె బొచ్చొరొకా సె మసారాక సె దినొకా, సె గంటకు సిద్దపొడికిరి తల్ల సె చార దూతానె సడిదివ్వొరొ యిల.

16 గొడానె రెతుల సైన్యముర తల్లా దలం సంక్య ఇరువై కోట్లు, తంక సంక్య యడబులి మీ సునించి.

17 యానె మెత్తె కలిగిల దర్శనమురె యాకిరి దిగించి, సె గొడానుకు తాండ్రెంపరె బొస్సిలలింకు, నియపనికిరి గొర్రాట వర్షము, నీలవర్షము, గందకవర్షమునె కవచము అచ్చి, సె గొడానె ముండొనె బగినె ముండొనెపనట, తాండ్రొ తుండొనె తీకిరి నియ్య దో గందకమూనె బయలు జేతవ్వి.

18 యే తింట మడ్డొనె వల్లరె, బుల్నొ ఆండ్రె తుండొనెతీకిరి బయలు జేతల్ల నియ్య దో గందకమూనె సంగరె, మనమానె బిత్తిరె తింటబాగం మొరిజెవొరొ యాసి.

19 సె గొడానె బలము సడరొ తుండొరె తాండ్రె లెంజొనెండ్రె అచ్చి, కిరుకుబుల్నొ తాండ్రె లెంజొనె సప్పొనెపనికిరి తైకిరి ముండొనె తల్లందుకు సడసంగరె సడ నస్తము కొరుసి.

20 యే మణ్ణెనెవల్లరె నా మొరిజీకుంట మిగిలలింకె మనమానె, బుత్తోనొకు, దుగుసె సునుసె సలుసె సక్తి నీకుంట, సున్నా వెండి కంచు పొత్తోరో కట్టొనెసంగరె కొరిల తంక అత్తోనెసంగరె కొరిల విగ్రహాలు నా పూజించికుంట సడదిల్లపనికిరి మారుమనుసు పొందివీనీంతె.

21 ఈనె తంకె కొరుకుంట తల్లా నరహత్యనుకు మాయమంత్రమునెకు సార్పిపైటిసె, సోరోపైటిసె నా కొరుకుంట తంకె మారుమనుసు పొందివీ నీంతె.

10

దేవదూత యింక సన్ని గ్రందము.

1 బడె బలమీల ఇంకగుట దూత పరలోకముతీకిరి వల్లిలట దిగించి. సె మెగో దరించిగినికిరి అచ్చి, తా సిరస్సుంపరె ఇంద్రదనుస్సు అచ్చి; తా మూ నూర్యబింబముపనికిరి తా పాదమునె నియ్య స్తంబమునె పనికిరి అచ్చి.

2 తా అత్తరె పిటికిరి తల్ల గుట సన్ని పుస్తకం అచ్చి. సెయె తా కైలపాదము సొంద్రొంపరెను బాగొడ్డె పాదము బూమింపరె మోపికిరి రొయిదీసి.

3 బగో గర్జించిలపనికిరి గొప్ప సబ్బము సంగరె దొందిరిల, సె దొందిరిల పారె సత్ర ఉరుమునె సెడ సడరో సబ్బమునె పలుకుసి.

4 సె సత్ర ఉరుమునె పలికిల బెల్లె మీ రాస్తన్నాగా సత్ర ఉరుమునె పలికిల సంగితిసెకు ముద్రపొగు, సడనకు నారాసుబులి పరలోకము తీకిరి గుట స్వరము పలికిలట సునించి.

5 ఇంక సొంద్రొంపరె బూమింపరె టారేకిరితన్నుగా మీ దిగిల సే దూత తా కైలత్తో మెగోకాసి టెక్కిల.

6 పరలోకమురె తాండె బిత్తరె తల్లాట గురించి, బూమికి తాండె బిత్తరె తల్లాట గురించి, సొంద్రొంపరె తాండె బిత్తరె తల్లాట గురించి, యుగయుగములు జీవించి తల్ల సడంపరె ఒట్టునొక్కరి ఇంక ఆలస్యం యీనిబులి దూత కొయిసి!

7 తెలిసిలా ఈనె సత్ర దూత పలికిల దినొరె సె తూతురు పుంకితన్నుగా, పురువు తా దాసునుకు ప్రవక్తనుకు సువార్తప్రకారం పురువురో నుచ్చిల ప్రనాలిక సమస్తము యీలపనికిరి కొయిసి.

8 సెత్తెలె పరలోకము తీకిరి మీ సునిల స్వరము ఇంక మో సంగరె కొతలగుకుంట “తూ జేకిరి సొంద్రొంపరెను బూమింపరెను టారేకిరితల్ల సే దూత అత్తరె పిటికిరి తల్లా సే సన్ని పుస్తకము పిటికిరి అచ్చిబులి మెత్తె కొయిసి.”

9 మీ సె దూత పక్కు జేకిరి యే సన్ని పుస్తకము మెత్తె దేబులి మగినాక సే సడకు కడిగినికిరి కాబులి, సడ తో పెట్టొకు అసాయంపనికిరి యినె తో తుండొకు తేనెపనికిరి మదురుముపనికిరి తాసిబులి మోసంగరె కొయిసి.

10 సెత్తిలె మీ సే సన్ని పుస్తకము దూత అత్తరెతీకిరి కడిగినికిరి సడకు కైపించి; సడ మో తుండొకు తేనెపనికిరి మదురుగా తాసిగాని మీ సడకు కైపీల తరువాతరె మో పెట్టొకు అసాయమైల.

11 సెత్తిలె తంకె తూ మనమానె గురించిగాని, జనమునె గురించి గాని, వేరు వేరు బసానె కొతలగిలలింకు గురించి, బడేమనమానెకు రొజానె గురించి, ఇంక పురువురో సందేసము కొయివాసి బులి మో సంగరె కొయిసె.

11

దీలింకె సాక్సినె.

1 ఇంక జొనె అత్తోబడ్డివంట నప్పిలాబడ్డి మెత్తెదీకిరి తూ టారేకిరి పురువురో మందిరముకు బలిపీటముకు నప్పాపొక్కిరి, మందిరంరె పూజించిలలింకు లెక్కకొరు.

2 మందిరముకు పొదిరె ఆవరనముకు కొలత పొగివిని సడిదె; సడ అన్యమనమానెకు దిప్పిరియీసి, తంకె చార దొస్టంపరె దీట మసో పరిసుద్ద గాకు గొడ్డొసంగరె మండివె.

3 మీ మో దీలింకు సాక్కులింకు అదికారం దిమ్మి; తంకె గోనిసంచి పిందిగినికిరి పండ్రెండు వందలు అరవై దినొనె పురువురో కొతనె ప్రవచించుసె.

4 అంకె బూలోకొకు ప్రబూయీల తా అగరె టారేకిరితల్ల దీట సాక్సినె ఒలీవగొచ్చొనుకు బొత్తి స్తంబము పనికిరి అచ్చె.

5 కేసెనెను తంకు నస్తము కొరిమంచె బులి కొయిగిన్నె తంక తుండొ దీకిరి నియ బయలుదేరికిరి తంక సత్రువూనెకు పుడ్డిపోసి గనక కేసెనెను తంకు నస్తము కొరుమండి బులి కొయిగిన్నె సాకరాక సె మొరిజెవొరో వూసి.

6 తంకె ప్రవచించిల దినొనె బొరోసా నా అయికుంటా మెగోకు బుజ్జితె తంకు అదికారం అచ్చి. యీనె తంకు ఇస్తమీలబెల్లె పనికి రొగొతోపనికిరికొరితె, నానావిదమైల తెగులుసంగరె బూమికి బాదనొగితె తంకు అదికారం అచ్చి.

7 తంకె సాక్కుము కొయితె ముగించినాక అగాదము తీకిరి అయిల క్రూరముగము తంకెసంగరె యుద్దము కొరికిరి జయించికిరి తంకు మొరిదివ్వె.

8 తంక మొడనె నె మహోపట్టనముకు సంత సైయినెండ్రె పొడికిరితాసి; తంకు ఉపమానము పనికిరి సొదోమ బులిగినికిరి నా; సెట్టె తంక ప్రబువుకు కూడ సిలువపొగివొరొయాల.

9 యీనె ప్రజలకు, వంసోనెకు, వేరు వేరు బసానె కొతలగిలలింకు, మనమానుకు సంబందించులలింకు తింట దినొన్నార సంగరె తంక మొడనుకు దిక్కుంట తంక మొడనుకు సమాదిరె నొగిపించినెంతె.

10 యే దీలింకె ప్రవక్తనె బూమిఉంపరె తల్లమనమానుకు బాద నొగిలందుకు బూమిరె జీలలింకె తంక గతి దిక్కిరి సంతోసించుకుంట, ప్రోత్సహించుకుంట, జొనుకు జొనె బహుమతినె పొడిదిగునుసె.

11 యీనె నె తింట దినొన్నార యీల తరువాత పురువుపారె తీకిరి జీవాత్మ అయికిరి తంకె బిత్తిరె ప్రవెసించుసి గనుక తంక పాదాలునె డొరొసంగరె టారెనె; తంకు దిగిలలింకు మిగుల డొరొ కలుగుసి.

12 సెల్లె ఎట్టికి ఉటికిరి అయిబులి పరలోకముతీకిరి గొప్పస్వరము తంకెసంగరె కొయిలాట తంకె సునికిరి, మెగొనె దీకిరి పరలోకముకు బాజెల్లె; తంకె జేతన్నుగా తంక సత్తువునె తంకు దిగిసె.

13 సే గడియరాక గొప్ప బూకంపము కలిగిలవలరె సే పట్టుమురె దొస్టబాగం కూలిజేసి, సె బూకంపమువలరె సత్తవెయ్యి ప్రజనె మొరిజెవ్వొరొ యీసి, మిగిలలింకె డొరొజేకిరి పరలోకమురె తల్లా పురువుకు మహిమపరిచిలె.

14 దీట స్రమ గతించిల; ఇత్తో తింట స్రమ బేగా అయిలీసి.

సత్ర తూతురులు

15 సత్ర దూత తూతురు వుంకిలబిలె పరలోకమురె గొప్ప సబ్బము వుట్టిసి, సె సబ్బములు యే లొకొ రాజ్యము అం ప్రబువు రాజ్యముకు సే క్రీస్తు రాజ్యముకు యీల; సే యుగయుగమునె జాంక ఏలుసి బులి కొయిసి.

16 సెత్తిలె పురువు అగరె సింహాసనమురె బొసిలలింకు సే యిరువది చారలింకె బొడిలింకె సాస్థాంగ పొడికిరి పురువుకు నమస్కారము కొరిసి.

17 జరిగితల్లా కలొరె జరిగిజెల్లారె కలొరె

తల్లా పురువు యీల ప్రబూ,

సర్వాదికారి, తూ తో మహాబలముకు

స్వీకరించికిరి ఏలిలీసు యీనె

అమె తొత్తె క్రుతజ్ఞతా స్తుతులు చెల్లించిలించొ.

18 మనమానె రగ్గొ పొడిలందుకు తొత్తె రగ్గొ అయిసి,

మొరొజిలింకె తీర్పు పొందిగినితుకు,

తో దాసునెయీల ప్రవక్తానెకు పరిసుద్దులకు,

తో నా కు డొరొజెల్లాలింకు తగిలా పలము దీతె,

గొప్పలింకె యీనెను నొయిలలింకె యీనెను

బూమికి నాసనము కొరిలాలింకు నాసనము

కొరితె సమయము అయిల బులి కొయిల.

19 యీనె పరలోకమురె పురువురొ మందిరము పిటినాక పురువురొ నిబందనమందసము తా మందిరంరె దీదిల్ల, సెత్తిలె మెరువునె సబ్బమునె ఉరుమునె బూకంపమానె గొప్ప వడగండ్లునె కూడ వుట్టిసె.

12

తిల్లామొట్ట యింక రెక్కనెసంగరె గల సప్పొ.

1 సెత్తిలె పరలోకమురె గుటె గొప్ప అద్భుతం దీదిల్ల; సడకిరబుల్లె సూరిడికు దరించిగిల్ల గుటె మొట్ట తా పాదమానె తొల్లె చంద్రుడుకు సిరస్సుంపరె పండ్రెండు నక్కత్రములడ్ర కిరీటం అచ్చి.

2 సే మొట్ట గర్భివతి యీకిరి ప్రసవవేదన పొడుకుంట సే బొత్తనుకు కేకానె పొగిలీసి.

3 సెత్తిలె పరలోకము తీకిరి యింగుటె దిగిదీల్ల. ఇత్తో గొర్రాట రక్కెసంగరె తల్లా బొట్ట సప్పొ; సడకు సత్ర ముండొనె దొస్ట కొమ్మునె అచ్చి; తాండె ముండొనంపరె సత్ర కిరీటమునె అచ్చి.

4 తాండె లంజో మెగొ నక్కత్రములురె తింట బాగం యీడ్చికిరి సడకు బూమిఉంపరె పొక్కిదిల్ల. బేవలిసిలా సే మొట్ట బేలాబెల్లె, సె మొట్ట సిసువుకు గిల్లిమంచి బులి సే రెక్కనె సంగరె తల్లా గొర్ర సప్పొ సే మొట్ట అగరె టారేకిరి అచ్చి.

5 సొబ్బి దెసొనుకు ఇనుము దండము సంగరె ఏలితె తల్లా గుటె సిసువుకు సె మొట్ట బేకిరి, సె మొట్ట సిసువుకు పురువు పక్కకు తా సింహాసనముకు దరిగినికిరి బాజెల్ల.

6 సె మొట్ట బోనుకు పొలిజెల్ల; సెట్టె తంకె పండ్రెండు వందలు అరువది దినొనె సె మొట్టకు పోసిందిమాసెబులి పురువు సె మొట్టకు గుటె స్తలము సిద్దము కొరికిరి నొగిసి.

7 సెత్తిలె పరలోకమురె యుద్దము జరిగిల. మికాయేలుకు తా దూతనుకు సె రెక్కనెసంగరె తల్లా సప్పొ యుద్దము కొరివాసె బులి తన్నుగా,

8 సె రెక్కనె సంగరె తల్లా సప్పొ సడరొ దూతనె యుద్దము కొరిసి గాని గెలిసినారెసె గనుక పరలోకమురె తంకు స్తలము నొయికుంట యాజెల్ల.

9 ఈనె సర్వలోకముకు మోసము కొరుకుంట, అపవాదిబులి సాతానుబులి నా బుల్లట ఆదిసర్పమైల సె బొట్ట రెక్కనె సంగరె తల్లా సప్పొ పొక్కిదిల్లె. సడకు బూమిఉంపరె పొక్కిదివ్వొరొయాల; తాండె దూతనె సడసంగరాక పొక్కిదివ్వొరొయాల.

10 యానె గుటె గొప్ప స్వరము పరలోకమురె యాకిరి కొయిలాట సునించి, రత్తిదూసి అం పురువు అగరె అం అన్నబయినంపరె నేరము మోపేలాట యాల అపవాదికు పొక్కిదివ్వొరొ జరిగిల గనుక ఉంచినె రక్కనకు పొక్కిదికిరి అచ్చి గనుక యించినె రక్కన సక్తి రాజ్యముకు అం పురువురొ యాల; వుంచినె అదికారం తా క్రీస్తురోట యాల.

11 తంకె గొరెపిల్ల రొగొత్తో వల్లెను, సె దిల్ల సాక్సమువల్లరె తాకు జయించికిరి అచ్చి గాని, మోరొనొజాంక తంక పొర్పొనుకు ప్రేమించిలలింకె నీంతె.

12 సడవల్లరె పరలోకము, పరలోకమురె జీలలింకె, సంతోసము పొడొండి; బూమి, సొంద్రో, తొముకు స్రమ; అపవాది తాకు సమయము కుండెకా అచ్చి బులి తెలిసిగినికిరి బడె రగ్గొగల్లట యాకిరి తొమపక్కు ఒల్లికిరి అయిసి.

13 సె రెక్కనెసంగరెతల్ల సప్పొనె సె బూమిఉంపరె పొక్కిదిల్లాట దిక్కిరి, సె సిసువుకు బేలా సె మొట్టకు హింసించిల;

14 సడవల్లరె సె మొట్ట బొనొరె తల్లా తా చోటుకు ఉడ్డిలపనికిరి గొప్ప పక్కిరొజా రెక్కనె దీట సే మొట్టకు దివ్వొరొయాల. సెత్తిలె సే రెక్కనెసంగరె తల్లా సప్పొ నాదిక్కికుంట సే మొట్టకు చారదొస్థంపొరె దీట మసా పోసిందివొరొ ఏర్పాటుయాల.

15 యానె సె మొట్ట, ప్రవాహముకు మరిగినికిరి బాజెమంచె బులి సె రెక్కనెసంగరె తల్లా సప్పొ తా తుండొదికిరి పనికి సదిప్రవాహముపనికిరి సె మొట్ట పొచ్చాడె పొడిదీసి

16 కాని బూమి సె మొట్టకు సహాయము కొరిల. తా తుండొ పిటికిరి సె రెక్కనె సంగరె తల్లా సప్పొ, తా తుండొదికిరి ఒక్కిల్ని ప్రవాహముకు మింగిపేల.

17 సడవల్లరె సే రెక్కనె సంగరె తల్లా సప్పొ రగ్గొ దనెగినికిరి, పురువురొ ఆజ్జానె తెలిసిగినికిరి యేసుగూరించి సత్యముకు కొయిల తల్లలింకు సే మొట్టొ సంతసముసంగరె మిసిలలింకు యుద్దము కొరితె బయలుదేరిల.

18 సెత్తిలె సె రెక్కనె సంగరె తల్లా సప్పొ సొంద్రో ఒడ్డురె టారెకిరి అచ్చి.

13

దీట బయంకరమైల జంతువునె.

1 ఈనె దొస్థ కొమ్మానె సత్ర ముండునె బిల్ల గుటె క్రూరముగము సొంద్రొతీకిరి ఉంపురుకు అయిలాట దిగించి. తాండె కొమ్మానుంపరె దొస్థ కిరీటమునె తాండె ముండునెంపరె దేవదూసనకరమైల నానే అచ్చి.

2 మి దిగిల సె మ్రుగము చిరుతబగొకు పోలికిరి అచ్చి. సడరొ పాదమునె ఎలుగుబంటి పాదమునెపనట, తాండె తుండొ బొడబగొ తుండొపనట, సడకు సె రెక్కానె సంగరె తల్లా సప్పొ తా బలముకు తా సింహాసనముకు గొప్ప అదికారం దీసె.

3 తాండె ముండొనెరె గుటెకు మొరిజెల్లమడ్డొ బైలపనికిరి అచ్చి; ఈనె సే మొరిజెల్లమడ్డొ మానిజెల్ల గనుక బూ జనుమునల్ల మ్రుగము పొచ్చడె జేకుంట ఆచర్యపొల్లె.

4 సె మ్రుగముకు అదికారముదిల్లందరె తంకె రెక్కనె సంగరె తల్లా సప్పొకు నమస్కారము కొరిసె. ఈనె తంకె యే మ్రుగము సంగరె సాటి కేసె? సడసంగరె యుద్దము కొర్లట కేసె? బులి కొయిగినికుంట సె మ్రుగముకు కూడ నమస్కారము కొరిసె.

5 పోజు కొతనుకు పురువుకు దూసిందివొరొ పలికిలాట గుటె తుండొ సడకు దివ్వొరొ యాల. ఈనె చార దొస్థంపొరె దీట మసానె తా పైటి జరిపిగిల్ల అదికారం సడకు దివ్వొరొ యాల.

6 గనుక పురువుకు దూసిందివొరొ, తా నామముకు, తా గుడారముకు, పరలోకమురె జీలలింకు దూసిందివొరొ సడ తా తుండొ పిటిల.

- 7 ఈనె పురువురో ప్రజానె సంగరె యుద్ధము కొరిని తంకు జయించిని సడకు అదికారం దివ్వోరో యాల. ప్రతి వంసము ఉంపరెకు ప్రతి ప్రజంపరెకు వేరువేరు బసానె కొత లగిలలింకుంపరెకు ప్రతి జనముంపరెకు సడకు అదికారం దివ్వోరో యాల.
- 8 బూమి ఉంపరె జీలా లింకల్ల, బుల్నె నుస్తి మొదులుతీకిరి వదింప బొడికిరితల్ల గొరెపిల్లరో జీవగ్రందమురె కా నా రాసికిరి నీవో తంకె, సె మ్ముగముకు నమస్కారము కొరుసె.
- 9 కేసెనెను కన్నొనె తల్లటత యానె సునుసె గాక.
- 10 కేసెనెను చెరబిత్తురుకు జెవ్వలిసిలాట చెరబిత్తురుకు జోసి. కత్తిసంగరె హతం యీవలసిలటతా సెయె కత్తిసంగరాక హతమూసి. పురువురో ప్రజానె వినయమురె సహనం, విస్వాసము కలిగికిరి తాసె.
- 11 ఈనె బూమిరె తీకిరి ఇంకగుటె క్రూరముగము ఉంపురుకు అయిలాట దిగించి. గొరెపిల్ల కొమ్ముపనికిరి దీట కొమ్మునె సడకు అచ్చి; సడ రెక్కనె సంగరె తల్లా సప్పొపనికిరాక కొత లగిలిసి;
- 12 సడ సె అగరె క్రూరముగముకు తల్ల అదికారం చేస్టలల్ల తా అగరె కొరిలీసి; ఇంక మొరిజెల్ల మడ్డె బైకిరి బొలి యీజేకిరి తల్లా సె అగరె మ్ముగముకు బూమిరె తాండె బిత్తరె జీలాలింకెల్ల బలవంతము కొరిల.
- 13 దీటట మ్ముగము మెగొ తీకిరి బూమికి మనమానె అగరె నియ్య బల్లిలపనికిరి గొప్ప అద్బుతానె కొరిలీసి.
- 14 కత్తి మడ్డె బైనెనూ జీల యే క్రూరముగముకు విగ్రహాలు కొరివాసి బులి సడ బూమింపరె జీలాలింకు సంగరె కొయికుంట, అగరె మ్ముగము అగరె కొరితె తాకు దిల్ల అద్బుతకార్యోనె వల్లరె బూమింపరె జీలలింకు మోసము కొరిలీసి.
- 15 ఈనె సె మ్ముగమురా బొమ్మకు కొత లగిలపనికిరి, సె మ్ముగమురా బొమ్మకు నమస్కారము నా కొర్లలింకు హతము కొరిలాపనికిరి, సె దీట మ్ముగమురొ బొమ్మకు పొర్నొ దీతండుకు సడకు అదికారం దివ్వోరో యాల.
- 16 సడ నీకుంట, మనమానె కిరి తక్కువ లింకె కిర దనికునె కిర దరిద్రునె కిర స్వతంత్రునె కిర దాసునె కిర సొబ్బిలింకు తంక కైలత్తోంపరె నెత్తింపరె ముద్రపొల్ల పనికిరి సె బలవంతము కొరుకుంట అచ్చి.
- 17 సె ముద్ర, బుల్నె సె మ్ముగము నా యానెను తా నారె సంక్యయానెను తల్లటతా తప్ప, బిక్కితె గినితె కొరితె ఇంక కాకు అదికారం నోయికుంట యీజెల్ల.
- 18 బుద్దితల్లాట తా మ్ముగమురా సంక్యకు లెక్కకొరుమురు; సడ గుటె మనమార సంక్యకా; సె సంక్య అరువందల అరవై ఆరు; ఆండ్రె జ్ఞానము అచ్చి.

14

1, 44, వేలు మందిరో గిత్తో

- 1 ఈనె మీ దిగినాక, ఇత్తో, సె గొరెపిల్ల సీయోను పర్వతముంపరె టారేకిరి అచ్చి. తా నామముకు తా బో నామముకు నొసల్లపారె రాసికిరి తల్ల, సాయి సారా దొస్టంపారె సారా వేల మంది తాసంగరె కూడ అచ్చె.
- 2 ఈనె విస్తారమీల జలముల ద్వనిసంగరె గొప్ప ఉరుము ద్వనిసంగరె సమానమీల గుటె సబ్బము పరలోకము తీకిరి అయిలాటకు సునించీ. మీ సునిల సె సబ్బము వీనానె వాయించిల లింకెరో సబ్బముపనికిరి పోలికిరి అచ్చి.
- 3 తంకె సింహాసనము అగరె, సె చార జీవి అగరె, బొడిలింకె అగరె గుటె నాట కీర్తన గైలీసె; బూలోకము తీకిరి గినిల సే సాయి చార దొస్టంపారె చారవేయి మంది తప్ప యింక కేసెను సే కీర్తన సుక్కగిన్నంతె.
- 4 అంకె తిల్లాపిల్ల సాంగత్యముకు అపవిత్రానె నాయాలలింకె, తిల్లాపిల్ల సాంగత్యముకు నాతెలిసిలాలింకె పనికిరి తైకిరి, గొరెపిల్ల కేటికి జోసివో సెట్టికి తాసంగరె జోసి; అంకె పురువు కోసం గొరె పిల్ల కోసం ప్రదమ పలము పనికిరి తొత్తె మనమానె బిత్తరె తీకిరి రక్కనపొందిలలింకె.
- 5 అంకతుండొ దీకిరి కే సుచ్చుటకు దిగిదిలాసి; అంకె కే నిందనె నొయిలలింకె.

తింట దూతలరో సందేసం.

- 6 సెత్తిలె ఇంకగుటె దూతకు దిగించీ. సె బూ నివాసులుకు, బుల్నె ప్రతి జనముకు ప్రతి వంసముకు వేరు వేరు బసానె లగిలలింకు ప్రతి ప్రజకు ప్రకటించిల పనికిరి సాస్వత సువార్త కొడిగీకిరి మెగొరె ఉడ్డిలీసి.
- 7 సెయె, తొమె పురువుకు డొరికిరి తాకు మహిమపరుచొండి; సె తీర్పు తీర్చిల గడియ ఆసి గనుక మెగొకు బూమికు సొంద్రొకు పనిదారానెకు కొరిలతాకు తాకాక ఆరాదించొండి బులి గొప్ప సొరము సంగరె కొయిసి.
- 8 ఇంకగుటె దూత, బుల్నె దీట దూత తా సంగరె అయికిరి కామము ఎక్కువ సంగరె కూడిల తా దర్మిపైటికు మొడ్డొకు సమస్త జనముకు పీదిల్ల యే మహా బబులోను కూలిజోసి, కూలిజోసి బులి కొయిసి.

9 ఈనె ఇంక గుటె దూత, బుల్నె తింట దూత అంకె పొచ్చుడె అయికిరి గొప్ప స్వరము సంగరె యాకిరి కొయిసి. సె క్రూర ముగముకు గాని తాండె బొమ్మకు గాని కేసెనె నమస్కారముకొరినె, తా చిత్తంపరెకిర అత్తొంపరెకిర సె ముద్దపొగ్గెనె.

10 కిచ్చి నామిసికుండ పురువురో ఉగ్రతపాత్రరె పొగిల పురువురో రగ్గొబుల్ల పాత్రామొద్దొకూడ సే పూసి. పరిసుద్ద దూతానెపారె గొర్లిపిల్ల అగరెకు నియ్య గందకమూనె సంగరె తంకె బాదించిపొడువొ.

11 తంక బాదసంబందమీల దో యుగయుగములుకు ఉటుసి; సె క్రూర ముగముకు గాని తాండె ప్రతిమకుగాని నమస్కారముకొరిల లింకె, తా నా గల ముద్ద కేసెనెను పొగ్గెనె సెయెకూడ రత్తిదూసి బాదనెసంగరె తాసె.

12 పురువురో ఆజ్జలకు యేసు గురించి నమ్మకముగా తెలిసిగించి పురువురో ప్రజానెరె యడబట్టి ఓర్పు దీదుసి.

13 సాకిరి వుంచినె తీకిరి ప్రబువు పైటి కోసం మొరిజిల్లాలింకె దనూనెబులి రాసుబులి పరలోకము తీకిరి గుటె స్వరము కొయినాక సునించి. సొత్తాక; తంకె తంక ప్రయాసానె మానికిరి విస్తాంతి పొందుగునుసె క్షెంకిబుల్నె తంకె కొర్ల పైటినె తంకెసంగరె జోసిబులి ఆత్మ నమదానుము కొయిలీసి.

బూమింపరె పంట కట్టివురో.

14 ఈనె మి దిగినాక, ఇత్తో దొగలాట మెగొ దీదిల్ల. మనమారొ పొకు పొలికిరి తల్లా జొనె సె మెగొంపరె బొసికిరి అచ్చి. తా ముండొంపరె సున్న కిరీటం, అత్తరె పదును యీల కొడవలి అచ్చి.

15 సెత్తిలె ఇంకగుటె దూత దేవాలయము తీకిరి పొదురుకు అయికిరి బూమిపంట పండికిరి అచ్చి, కట్టిలా కలో అయిసి, తో కొడవలి నొక్కిరి కట్టు బులి గొప్ప స్వరము సంగరె సె మెగొంపరె బొసికిరి తల్లలింకెసంగరె కొయిసి.

16 మెగొంపరె బొసికిరితల్లటతా తా కొడవలి బూమింపరె పొగినాక బూమిపంట కట్టివురో యీల.

17 సెత్తిలె ఇంకగుటె దూత పరలోకముతీకిరి తల్లా మందిరం తీకిరి పొదురుకు అయిసి ఆ పక్కరె గుటె పదునీల కొడవలి అచ్చి.

18 ఇంకగుటె దూత బలిపీటము తీకిరి పొదురుకు అయిల. ఆకు నియ్యంపరె అదికారం పొందిగిల్లట; యే పదునీల కొడవలిగల తాకు గొప్ప స్వరముసంగరె డక్కికిరి బూమింపరె తల్లా ద్రాక్సపొగలానె వచ్చిలబులి; పదునీల తో కొడవలి నొక్కిరి తాండె గెలిసినె కట్టుబులి కొయిల.

19 ఈనె సె దూత తా కొడవలి బూమింపరె పొక్కిరి బూమింపరె తల్ల ద్రాక్సపొగలనే కట్టికిరి, పురువురో రగ్గొబెల్ల ద్రాక్సనె తొట్టిరె పొయిదిపేసి.

20 సె ద్రాక్సనె తొట్టి పట్టుముకు పొదిరె మండొవురో జరిగిసి; దీట మీటరు ఎత్తురె తింట సాయి కిలోమీటరు దూరు గొడానె కల్లెము మట్టుకు ద్రాక్సనె తొట్టిరె తీకిరి రొగొతో పారిసి.

15

ఆకరు తెగులు సంగరె దూతనె.

1 సెతెలె ఆచర్యమైల ఇంకగుటె గొప్ప అద్బుతానె మెగొరె దిగించి, సడ కిరబుల్నె, సత్ర తెగుల్లు అత్తరె దరిగికిరి తల్లా సత్రలింకె దూతనె, యడక చివరితల్ల తెగుల్లు; యడసంగరె పురువురో రగ్గొ సమాప్త మీల.

2 ఈనె నియ్యసంగరె మిసికిరితల్ల స్పటికపు సొంద్రొపనికిరి గుటె మీ దిగించి. సె క్రూరముగముకు తా పలితముకు తా నాగల సంక్యకు నా లోబొడికిరి సడకు జయించిలాలింకె పురువు దిల్ల వీనానె సంగరె టారెవురో, సె స్పటికపు సొంద్రొపారె టారెకిరి తల్లాట దిగించి.

3 తంకె ప్రబువా, దేవా, సర్వదికారి,

తో క్రియానె గనమిలాట, ఆచర్యమైలాట;

యుగయుగమునుకు రొజా,

తో బట్టొనె న్యాయము యీకిరి సత్యము యీకిరి అచ్చి;

4 ప్రబువా, తూ మాత్రము పవిత్రమైలాట,

తోత్తె నా డొరిలాతా కేసె? తో నామముకు మహిమపర్చిలతా కేసె?

తో న్యాయవిదులు ప్రత్యక్సమీల యీనె జనమునె సొబ్బలింకె

అయికిరి తో సన్నిదికి నమస్కారము కొరుసెబులి కొయికుంట,

పురువురో దాసుడీల మోసే కిర్తనకు గొర్లిపిల్ల కిర్తనలు గైలీసె.

5 సె తరువాత మి దిగినాక, పరిసుద్ద గుడార సంబందమీల మందిరము పరలోకమురె పిటివురో పూసి.

6 సత్ర తెగుల్లు అత్తరె దరిగినికిరి తల్లా సె సత్ర దూతనె, నిర్మలమైల మెరిసిజెల్ల నారకొన్ననె పిందిగినికిరి, గుండెంపరె సున్నా బెల్లు బందిగినికిరి సె మందిరంతీకిరి పొదురుకు అయిసి.

7 సెత్తిలె చార జీవిండ్రె గుటె జీవి, యుగయుగమునె జీవించిల పురువురో రగ్గొసంగరె పూరికిరితల్ల సత్ర సున్నా పాత్రలకు సె సత్రలింకె దూతనుకు దిల్లె.

8 సాకిరి పురువురో మహిమతీకిరి తా సక్తితీకిరి అయిల దోసంగరె మందిరము పూరికిరితవ్విరో సె సత్ర దూతానెరె తల్లా సత్ర తెగుల్లు పూర్తి యాలవరుకు మందిరముకు కేసె జెన్నారిసె.

16

పురువురో రగ్గొబెల్లట పాత్రనె.

1 ఈనె తోమె జేకిరి పురువురో రగ్గొసంగరె పూరిల సే సత్ర పాత్రనెకు బీ ఉంపరె పొగుబులి మందిరంతీకిరి గొప్ప స్వరము సె సత్ర దూతనె సంగరె కొయిలాట సునించి.

2 సాకిరి అగరె దూత పొదురుకు అయికిరి తా పాత్రకు బూమిఉంపరె పొగినాక సె క్రూర ముగమురో ముద్దగల్లటాకు సడరో ప్రతిమకు నమస్కారము కొర్లలింకు బాదకరమైలా, వికారమైలా కురుపు పుట్టిల.

3 దీట దూత తా పాత్రకు సొంద్రోరె పొగినాక సొంద్రో మొరిజెల్ల మనమరో రొగొతో పనికిరి యాల, సడవల్లరె సొంద్రోరె తల్లా జీవ జంతువూనె మొరిజెల్ల.

4 తింట దూత తా పాత్రకు నదినెబిత్తిరె జలదారులురె పొగినాక సడ రొగొతో యాజెల్ల.

5 సెత్తిలె జలములకు అదికారమీల దేవదూత యాకిరి కొయిలాట సునించి యించిని యే కలొరె జరిగిజెల్ల కలొరె తల్లా పవిత్రుడా! తు న్యాయవంతుడు.

6 సడకు పురువురో మనమానెండ్రా రొగొతో ప్రవక్తానెరో రొగొతుకు తంకె కార్చిలందుకు తీర్పు తీర్చికిరి తంక రొగొతో తంకు పీపించిపేసు సడకు తంకె అర్దులాక.

7 సడకు సాకరాక ప్రబువా, దేవా, సర్వాదికారి, తో తీర్పునె సత్యమీకిరి న్యాయములుకిరి అచ్చిబులి బలిపీటము దీకిరి గుటె సొరము కొయిలాట సునించి.

8 చార దూత తా పాత్ర సూరిడిఉంపరె పొగినాక మనమానుకు నియ్యసంగరె పుడ్డితె సూరిడికు అదికారం దివ్విరో యాల.

9 యానె మనమానె తీవ్రమైల తత్తిలాట సంగరె పుడ్డిజెల్లె, యే తెగుల్లుంపరె అదికారముసంగరె పురువురో నామముకు దూసించికిరి గాని, తాకు మహిమ పరిచిలపనికిరి తంకె మారుమనుస్సు పొందిల లింకెనీంతె.

10 పాట దూత తా పాత్రకు సె క్రూరముగమురో సింహాసనముంపరె పొగినాక, తా రాజ్యం వొందారొ కమ్మిపేసి; మనమానె తంకు కలిగిల బాదనెసంగరె తంక జిబ్బొనె కమిడిగిల్లె.

11 తంకు కలిగిల వేదనానెబట్టి కురువూనె బట్టి పరలోకమురెతల్ల పురువుకు దూసించిసె గాని తంక పైటినె మానికిరి మారుమనుస్సు పొందిలలింకె నీంతె.

12 సోట దూత తా పాత్రకు యూప్రటీసు బుల్ల మహోనదింపరె పొగినాక తూర్పుదీకిరి అయిల రొజానుకు బట్టో సిద్ధపొల్లపనికిరి నదిరొపని సుక్కిజెల్ల.

13 ఈనె సె రెక్కనెసంగరె తల్లా సప్పొ తుండోదీకిరి క్రూరముగము తుండోదీకిరి సారొప్రవక్త తుండోదీకిరి కప్పానెపనికిరి తింట చెడు ఆత్మానె బయలుకు జెల్లాట దిగించి.

14 సడ అద్బుతానె కొరిలాపని బుత్తొనె ఆత్మనాక; సడ సర్వదికారమైల పురువురో మహోదినొరె జరిగిల యుద్ధముకు లొకొరె తల్లా రొజానుకు పొగుకొరివాసె బులి తంకుపక్కు బయలుజెల్ల ఆత్మలాక.

15 ఇత్తో మి సారొపనాక అయిలించి; సె సుచ్చదేరె సంచరించిలందురె మనమానె సె కొన్నానె నొయికుంట తల్లాట దిగివొకీవో బులి సతనీకిరి తెకిరి తా కొన్న కాపాడిగిల్లాట దన్యుడు.

16 సే దూతానె రొజానెకల్ల కొడిగీకిరి హెబ్రీ బాసెరె హారమెగిద్దోను బుల్ల చోటుకు తంకు పొగు కొరిల.

17 సత్ర దూత తా పాత్రకు వాయుమండలుంపరె పొగినాక పూర్తియాజెల్లబులి కొయితల్ల గుటె గొప్పస్వరము మందిరమురెతల్ల సింహాసనము తీకిరి అయిల.

18 సెత్తిలె మెరువూనె ద్వనినె ఉరుమునె పుట్టిల, బొట్ట బూకంపము కూడ కలిగిల. మనమానె బూమింపరె జొర్నొలదీకిరి సాట మహాబూకంపము కలిగివినీ, సెడో బూకంపము సడ.

19 గొప్ప మహోపల్గుము తింట బాగలు యీల, సొబ్బి దెసోనుడై పల్గుములు కూలిజెల్ల, తా అదికమైల రగ్గొకు మద్యముమైల పాత్రకు మహో బబులోనుకు దివ్వాసేబులి సడకు పురువు పారే జ్ఞాపకము కొరిసి.

20 ప్రతి ద్వీపాకండలు పొలిజేసి, పొరుతోనె నాదిదికుంట యీజేసి.

21 పాంట మనుగులు గొబ్బిరి యీల బొట్ట వడగండ్లునె మెగోడికిరి మనమానెంపరె పొడిసె; సే వడగండ్లునెరో మడ్డె బడే గొప్పీట యీలందరె మనమానె సె మడ్డెనె బట్టి పురువుకు దూసుంచితె.

17

గొప్ప దర్మిపైటి యింక క్రూరముగము.

1 సె సత్ర పాత్రనె దరిగినికిరి తల్లా సత్రలింకె దేవదూతండ్రె జొనె అయికిరి మో సంగరె కొతలక్కుంట యాకిరి కొయిసి. తు ఎట్టికి ఆయి, బడె నదినెంపరె బొసీలా గొప్ప నా పొందిల వేస్యకు పొగిలా సిక్కు తొత్తె దిగుదూంచి.

2 బూమంపరె రొజానె సె మొట్ట సంగరె దర్మిపైటికొరై, బూమింపరెతల్ల మనమానె సె మొట్టసంగరె దర్మిపైటికి బిల్ల మొడ్డొకు మత్తులీతె.

3 సెత్తిలె సెయె ఆత్మకు పూనిగీకిరి తల్లా మెత్తె బొనుకు కొడిగీకిరిజెన్నాక, పురువుకు దూసన నామముసంగరె పూరుకిరి, సత్ర ముండొనె దొస్టకొమ్మునెతీకిరి గొర్రాట మ్రూగముంపరె బొసీకిరి తల్లా గుటె మొట్టకు దిగించి.

4 సె మొట్ట గొర్ర రంగు కొన్నానె పిందిగినికిరి, సున్నసంగరె రత్నము సంగరె ముత్యమునె సంగరెను అలంకరించికిరి, అసాయమైల పైటినె సంగరె సె మొట్ట కొరితల్ల దర్మిపైటికి సంబందమీల చెడుపైటినె సంగరె పూరిల గుటె సువర్న గిన్నెకు తా అత్తరె దరిగినికిరి అచ్చి.

5 తాండె సిత్తంపరె తాండె నా యాకిరి రాసికిరి అచ్చి రాహస్య మీల అర్థం కిరబుత్తై? దర్మినుకు బుమి బిత్తరె వ్యర్థమీలటకు మా యీల మహో బబులోను.

6 యీనె సే మొట్ట పురువురో ప్రజానెకు రొగొతోసంగరెను, యేసురో హతసాక్సిండ్రా రొగొతోసంగరెను మత్తికిరి తవ్వరో దిగించి. మీ సడకు దిక్కిరి బడె ఆచర్యపొడించి.

7 సె దూత మోసంగరె యాకిరికొయిసి, తూ కైంకి ఆచర్యపొల్లు? యే మొట్టగూరించి రాహస్యముమీల, సత్ర ముండొనె దొస్ట కొమ్మునె తల్లా సడకు బొయిగినికిరితల్ల క్రూరముగముకు తల్లా రాహస్యమీలట తొత్తె తెలియపరుచుంచి.

8 తు దిగిల సె మ్రూగము అచ్చి యీనె యించిని నీ; యీనె అగాద జలమురె తీకిరి ఉంపురుకు అయితండుకు నాసనముకు జేతండుకు సిద్ధముయికిరి అచ్చి. బుమింపరె జీల మనమానె స్రుస్తి అగరెతీకిరి జీవగ్రందంరె కా నా రాసికిరి నీవొ తంకె, సె మ్రూగముకు దిక్కిరి ఆచర్యపొడినె సడ అగరె తవ్వి గాని యించినీ సడ బులికిరి ఆసి.

9 అండెబిత్తరె అర్థం కొరిగితె జ్ఞానము అచ్చి. సె సత్ర ముండొనె సె మొట్ట బొస్సిల సత్ర పొరుతోనె; తంకాక సత్ర రొజానె.

10 ఇంక సత్రలింకె రొజానె కేసెబుత్తై? పాంటలింకె కూలిజేసె, జొనె అచ్చి, ఆకరితా ఇంకా అయిలాని, అయిలాబెల్లె సెయె కుండె కలో పరిపాలించుసి.

11 తల్లాట యించిని నొయిలట యీల యే క్రూరముగము సె సత్రలింకెసంగరె కూడ జొనెయాకిరిత్తైకిరి, సెయెక అట్ట రొజా యాకిరి నాసనము యీజొసి.

12 తూ దిగిల పది కొమ్మునె దొస్ట మంది రొజానె. తంకె యడ అగరె రాజ్యము పొందిగినివినింతె యీనె గుటె గంటరె క్రూరముగము సంగరె కూడ రొజానెపని అదికారం పొందుగునుసె.

13 అంకె గుట్టాక అబిప్రాయం గలలింకె యాకిరి తంక బలముకు సె మ్రుగముకు అప్పగించుసె.

14 అంకె గొర్మిపిల్లసంగరె యుద్ధము కొరుసె గాని, గొర్మిపిల్ల ప్రబువుకు ప్రబువు రొజానుకు రొజానీకిరి తల్లందెరె, తాసంగరెకూడ తల్లలింకె డక్కిగిల్లలింకె యాకిరి, ఏర్పర్చిలాలింకె యాకిరి, నమ్మకమీలలింకె పనికిరి తల్లందెరె, సెయె సె రొజానుకు జయించుసి.

15 యీనె సె దూత మోసంగరె యాకిరి కొయిసి. సెయె దర్మి బొసికిరితల్ల చోటు, తు దిగిల జలములు దెసోనె ప్రజనె జనసమూహమునెకు వేరు వేరు బసానె కొతలగిలలింకె.

16 తూ సె దొస్ట కొమ్మునె తల్లా సె మ్రూగముకు దిగిసిను, తంకె సె వేస్యకు దేసించికిరి, సడకు దిక్కు నొయిలటపనికిరి సుచ్చదేరె తల్లపనికిరి కొరికిరి, తా మోసా కైకిరి నియ్యసంగరె సడకు కిచ్చి నొయికుంట పుడ్డిపోసి.

17 పురువురో కొతనె నెరవేరిల జాంక తంకె గుట్టాక అబిప్రాయం సంగరె తైకిరి తంక రాజ్యముకు సె మ్రూగముకు అప్పగించితండుకు తా సంకల్పము కొనసాగించిలపనికిరి పురువు తంకు బుద్ధి పుట్టించుసి.

18 యీనె తూ దిగిల సెయె మొట్ట బూరొజానుకు పాలించిలట సే మహోపల్టనమాక.

18

బబులోను పొడిజెవోరో

1 సె తరువాత బడె అదికారముగలిగిల ఇంకగుటె దూత పరలోకముతీకిరి ఒల్లికిరి అయిలాట దిగించి. తా మహిమసంగరె బూమి ప్రకాసించిల.

2 సె గొప్ప స్వరముసంగరె దొందిరికిరి యాకిరి కొయిసి. గొప్ప బబులోను కూలిజేసి; సడ బుత్తోనుకు తొత్తె చోటు యిజెల్ల, ప్రతి చెడుఆత్మకు నివాస స్థలము యిల. చెడుకు అసహ్యము యిల ప్రతివక్కికి గూడు యిల.

3 కిరుకుబుల్చే సమస్తమీల దెసోనె సెయె మొట్టరో మొద్దో పీలె. సడ బడె బూతు కామంసంగరె కూడిల సెయె మొట్టరో దర్పిపైటికి బుల్ల మొద్దోకు పీకిరి పొడిజెల్లె, బూరోజానె సడసంగరె దర్పిపైటి కొర్లినె, బూలోకొరె వర్తకునె సెయె మొట్టరో సుకబోగములు వల్లరె పలియ గల తా ఈసి.

4 యీనె ఇంకగుటె స్వరము పరలోకము తీకిరి యాకిరి కొయిలాట సునిలింబో బులి మో ప్రజానె!
 తోమె సెయె మొట్టరో పాపమురె పాలిబాగస్తులు నాయిండి,
 సెయె మొట్టరో తెగుల్లరె కెడగుటె తోముకు పాలిబాగస్తులు
 నాయీకుండ సడకు సడిదీకిరి అయిండి.

5 సె మొట్టరో పాపోనె మెగొజాంక జేసి,
 సె మొట్టరో తప్పునె పురువు జ్ఞాపకము కొరిగిచ్చి.

6 సెయె మొట్ట దిల్లప్రకారము సెయె మొట్టకు దేండి;
 సెయె మొట్టరో పైటినె చొప్పురె సడకు రెట్టంపు కొరండి;
 సెయె మొట్ట మిసిల పాత్రరె
 సెయెమొట్టకొరుకు దీటవంతు మిసికిరి నొగొండి.

7 సెమొట్ట మి రానిపనికిరి బొసికిరి తల్లతాని!
 మి విదవరాలు నీ, దుక్కొ దిగిని దిగినిబులి
 సెమొట్టరో మనస్సురె కొయిగిచ్చి గనుక,
 సడ తా మట్టుకు సె కెత్తోవో గొప్పకొరిగినికిరి
 సుకబోగమునె అనుబవించివో,
 సెతె తాకు దుక్కము బాదాలు కలుగుసి.

8 సడవల్లరె గుట్టె దినోరాక తా తెగుల్ల,
 బుల్చె మొరోనో దుక్కొ కరువు కూడ అయిల;
 సెమొట్టకు తీర్పుతీర్చిల పురువు యిల
 ప్రబువు బలిమీలట గనుక సడ
 నియ్యసంగరె పూర్తికిరి పుడ్డిజోసి.

9 సడ సంగరె దర్పిపైటి కొరికిరి సుకబోగానెకు అనుబవించిల బూ రోజానె సె మొట్టరో బాద దిక్కిరి సె మొట్టరో దహానం కొర్ల దోకు దిగిలాబెల్లె సె మొట్ట కోసం గుండె బాదిగీకుంటా కందునె.

10 సె మొట్టరో వినయమీకిరి రొమ్ము మరిగినికుంట కందికుంట అయ్యో, అయ్యో, డోరోపొడికిరి దూరురె టారెకిరి బబులోను మహాపట్టనమూ, బలమీలపట్టనమూ, గుట్టె గడియరాక తొత్తె తీర్పు అయిలాని బులి కొయిగునునె.

11 లోకొరె బొజో బిక్కిలలింకె, సడ తంకె దిక్కిరి కందికుంట, తంక వస్తూవూనె గిల్లాలింకె నీంతె బులి దుక్కంచిలిసె.

12 తంక సరుకూనె బుల్చె ఊదారంగు కొన్నానె సున్న వెండి రత్నలు ముత్యమునె సన్ని నారకొన్నానె బుల్చె ప్రతివిదవైల దబ్బువూనుకు ప్రతి విదవైల దంతోనెరో వస్తువునె, బడె విలువీల బడ్డినె ఇత్తడి యినుము చలువపొత్తొనె బడెంచసంగరె కొరిల ప్రతివిదమీల వస్తువునె.

13 ఈనె దాల్చినచెక్క, దూపమునె పొగిల తెల్లో, అత్తరు, సాంబ్రాని, ద్రాక్సరసం, ఓలీవతెల్లో, మెత్తలటపిండి, గోదుమూనె, పసువునె గొర్రెనె, రదుమూనె, గొడనె దానునెకు, మనమాండ్రా పొర్లొనె యింక కేసె గిన్నింతె.

14 తో పొర్లొకు యిస్టమీల పొగలానె తొత్తె సడిదీకిరి బాజెల్ల, రుచి యిలటల్ల దివ్యమైలటల్ల తొత్తె నామిలికుండ నసించిజెల్ల, సడ యింక దిగిదిన్ని బులి తంకె కోసె.

15 సె పట్టనమునకు సరుకునె బిక్కిల నడవల్లరె సంపాదన కూర్చిగిల్ల బొజ్జొలింకె దూరికిరి టారెకిరి సెయె మొట్టకు నాజరిగిల స్రమకు దిక్కిరి డొరొసంగరె తంకె కందికుంట దుక్కించుకుంట,

16 అయ్యో, అయ్యో, నన్నిట నారకొన్నానె ఊదారంగు కొన్నానె పిందిగినికిరి, సున్నాసంగరె, రత్నములుసంగరె ముత్యమునెసంగరె అలంకరించికిరి తల్లా గొప్పపట్టుమా, ఎత్తె ఐస్వర్యం గుట గంటరాక మాయమీజెల్ల బులి కొయిగునుసె.

17 ప్రతి నావికాడుకు, కేటెకెనెను ప్రయనము కొరిల ప్రతి తా, ఓడలింకె, సాంద్రొంపరె పైటికొరికిరి జీవనముకొర్ల సొబ్బిలింకె,

18 టారెకిరి సెమొట్టరొ పుడ్డితల్ల దేకు దిక్కిరి, యే గొప్పపట్టుం సంగరె సమానమీల కెడ బులి కొయిగినికుంట కేకానె పొగుసె.

19 తంక ముండొంపరె దుల్లిపొగ్గికిరి కందుకుంట, దుక్కొపొడుకుంట అయ్యో, అయ్యో, నే మహోపట్టుము; తాండె బిత్తరె సాంద్రొంపరెతల్ల ఓడలులింకెల్ల, తాపక్కరె బూతు లవొసంగరె పలియగలట ఈసి; నడ గుట గడియరాక పాడియాజివొ బులి కొయికుంట కేకానెపొక్కిరి దుక్కొపొల్లె.

20 పరలోకొరె, పురువురొ మనమానె, అపొస్తులు లింకె, ప్రవక్తానె లింకె నడగూరించి ఆనందముపొడొండి, కిరబుల్లె తాసంగరె తొముకు కలిగిల తీర్పుకు బదులుగా పురువు సె పట్టనముకు తీర్పు తీర్చికిరి అచ్చి.

21 తరువాత బలమీల గుట దూత రుబ్బురొలు వనట పొతొరొ టెక్కికిరి సాంద్రొం పొక్కిడికిరి యాకిరి మహాపట్టుమీల బబులోను బడె బేగ పొక్కిదివ్వురొ యీల ఇంక కెబ్బుకు దిగిదిన్ని.

22 ఈనె వాయింపిలలింకె, గైలాలింకె, పిల్లనగ్రోవి పుంకిలలింకె, తూతురునె పుంకిలాలింకె సబ్బము ఇంక కెబ్బుకు తోబిత్తరె సుందిన్ని. ఇంక కే సిల్పముకు కొరిల కేసెనెకు తోబిత్తరె కెత్తెమాత్రం దిగిదిన్ని. బుల్లటద్వని ఇంక కెబ్బుకు తోబిత్తరె సుందిన్ని.

23 తో బొజ్జొలింకె బూమింపరె గొప్ప ముక్క్యమికిరి అచ్చె; జనమునె సొబ్బిలింకె తో మాయమంత్రోనె సంగరె మోసజోసె. బొత్తిరొ హల్లో తోబిత్తరె ఇంకకెబ్బుకు ప్రకాసించిని, బ్యా బొరొరొ స్వరము బ్యా కొనియపిల్ల స్వరముకూడ తోబిత్తరె ఇంక కెబ్బుకు సుందిన్ని బులి కొయిసి.

24 ఈనె ప్రవక్తానెరొ, పురువురొ ప్రజానె, బూమింపరె మొరిజెల్లసొబ్బిలింట రొగొతొనె నే పట్టుమురె దిగిదిసి బులి కొయిసి.

19

1 సే తరువాత బడెజనుమునె సబ్బము బిల్లట గుట గొప్పస్వరము సంగరె పరలోకొముతీకిరి యాకిరి కొయిలాట సునించి ప్రబువుకు స్తుంచుచో, రక్సనమహిమ ప్రబావములు అం పురువుకాక చెల్లుసి;

2 తా తీర్పునె సత్యమునె న్యాయమీకిరి అచ్చి; తా దర్పిపైటిసంగరె బూలోకొకు చెరిపిల గొప్ప దర్పికి సే తీర్పు తీర్చికిరి తా దాసునె రొగొతో వల్లరె నడకు బదులుగా సిక్స కొరిసె;

3 ఇంక దీట సారి ప్రబువుకు స్తుతించో బులి కొయిసె. సె పట్టుపు దో యుగయుగమునె ఉంపరుకు ఉటిలిసి.

4 సెత్తిలె సె ఇరువది నాలుగురు బొడిలింకెను చార జీవీనెకు సాగిలపొడికిరి ఆమెను, ప్రబువుకు స్తుతిసించు బులి కొయికుంట సింహాసనముంపరె బొస్సికిరితల్ల పురువుకు నమస్కారము కొర్లె.

గొరిపిల్లరొ బ్యా కద్ది

5 ఇంక అం పురువురొ దాసులింకె, తాకు డొరొపొడిలాలింకె, బీదలింకె కిర గొప్పలింకె కిర తొమల్లా పురువుకు స్తుతించొండి బులి కొయితల్ల గుట స్వరము సింహాసనముతీకిరి అయిసి.

6 సెత్తిలె గొప్ప జననముహమురొ సబ్బముకూడ, విస్తరామీల జలమునె సబ్బము, బలమీల ఉరుమునె సబ్బముకు పొలికిరి తల్లా గుట స్వరము సర్వదికారము ప్రబువురొ యీల అం పురువు ఏలిలిసి .తాకు స్తుతించొండి

7 గొరిపిల్ల బ్యా సంతోసం సమయము అయిసి, తా నైపో తా మట్టుకు సె సిద్ధపొడికిరి అచ్చి; ఈనె అమ్మె సంతోసము పొడికిరి ఉత్సహించికిరి తాకు మహిమ పరిచిమా బులి కొయిలాట సునించి.

8 ఈనె సెయె మొట్ట పిందిగినువురొ మెరిసిల సొచ్చుమీల సన్నపు నారకొన్నె సెయె మొట్టకు దివ్వరొయిసి; నడ పురువురొ ప్రజానెరొ నీతిక్రియనె.

9 ఈనె సెయె మోసంగరె యాకిరి కొయిసి, గొరిపిల్ల బ్యా కద్దికు డక్కిలలింకె దన్యానె బులి రాసు; ఈనె యే కొతనె పురువురొ యదార్తమైలా కొతనెబులి మోసంగరె కొయిల.

10 సడకు మి తాకు నమస్కారము కొరితందుకు తా పాదమునె అగరె సాగిలిపొన్నకా సెయె నా బిల్ల, మి తోసంగరె, యేసు గురించి సాక్ష్ము కో తో అన్నబయినె సంగరె సమానుత బులి కొయిసి.

దొగల గొడంపరె బొసికిరి తల్లాట

11 ఇంక పరలోకము పిటికిరి తల్లాట దిగించి. సెత్తిలె సడ, దొగలాట గొడగుటె దిగిదిల్ల. సడంపరె బొసికిరితల్లాట నమ్మకమీలటతా సత్యమీలటతా బిల్ల నామముగలట, తా నీతిబట్టి విమర్శకొరుకుంట, యుద్దము కొరుకుంట అచ్చి.

12 తా అంకినె నియ్యపనట, తా సిరస్సుంపరె కెత్తో కిరీటమునె అచ్చె. రాసికిరి తల్లా గుటె నా తాకు అచ్చి, సడ తాకాక గాని ఇంక కాకు కూడ తెలిసిని.

13 రొగొత్తొరె బుడ్డుకిరి తల్లా కొన్నా సెయె పిందిగినికిరి అచ్చి. ఈనె పురువురో వాక్యము బిల్ల నామము తాకు నొక్కిరిఅచ్చి.

14 పరలోకమురె తల్లా సేనానె సుబ్రమీల దొగలనారకొన్నానె పిందిగినికిరి దొగలాట గొడానె ఉటికిరి తాసంగరె జేకుంట అచ్చె.

15 జనములుకు మరితె తా తుండొత్తికిరి పదునీల కడ్లము బయలు దేరిలిసి. సెయె ఇనుము సంగరె తంకు ఏలుసి; సెయ్యకా సర్వదికారిబిల్ల పురువురో ఎక్కువ రగ్గొ బిల్ల మొద్దొబిల్ల బుట్టి తొక్కుసి.

16 రొజానుకు రొజా ప్రబువూనుకు ప్రబువు బిల్ల నామము తా కొన్నంపరె తొడంపరె రాసికిరిఅచ్చి.

17 ఈనె గుటె దూత సూర్యబింబముసంగరె టారేకిరి తల్లాట సెయె గొప్పసబ్బము సంగరె కేకానె పొక్కిరి మెగొరె ఉడ్డితల్ల సమస్త పక్కినె పురువురో గొప్పవిందుకు అయిండి.

18 రొజానె మోసానె సహస్రాదిపతిండ్రొ మోసానె బలమైలలింకెరో మోసానె గొడండ్రొ మోసానె సడంపరె బొసిలాలింకెరో మోసాకు, స్వతంత్రమైకిరి కైమండి బులి కొయిసి.

19 ఈనె సె గొడంపరె బొసికిరితల్లాటతాసంగరె తా సేనా సంగరె యుద్దము కొరితె సె క్రూరముగముకు బూ రొజానుకు తంక సేనానెకు కూడికిరితన్నుగా దిగించి.

20 సెత్తిలె సె మ్రుగము, సడ అగరె సూచక క్రియానె కొరికిరి తా ముద్దకు పొగ్గిలలింకు సే బొమ్మకు నమస్కారించిలింకు మోసపరిచిల సె సారొప్రవక్తకు, మిలిజేకిరి యే దీలింకె గందకము సంగరె మండికిరి తల్లా నియ సరుసురె పొర్వొసంగరాక పొక్కిదివ్వొరొయిసి.

21 ఆకరి తా గొడంపరె బొసికిరి తల్లాటరో తుండొదీకిరి అయిల కడ్లముసంగరె వదించిబొడిలె; తంక మోసాకూడ పక్కినెల్ల పెట్టొపుల్లగా కైసె.

20

వెయ్యి బొచ్చొరోనె.

1 ఈనె బొట్ట గొలుసూనె అత్తరె దరిగినికిరి అగాదమురో తాలము గల గుటె దేవదూత పరలోకముతికిరి అయిలాట దిగించి.

2 సె అగరెతల్ల సప్పొకు, బుల్లె అపవాదికు సాతానుకు బుల్ల సె రెక్కనెసంగరె తల్లా సప్పొదరిగినికిరి వెయ్యిబొచ్చొరోనె తాకు బందిచికిరి అగాదమురె పొక్కిదిసి.

3 సె వెయ్యి బొచ్చొరోనె యాలజాంక ఇంక మనమానుకు నామోసముకొరుకుంట అగాదము బుజ్జికిరి సడకు ముద్దపొగిలె; సడతరువాత సెయె కుండెకలో సడిదీవ్వొరో యాల.

4 సాకరాక సింహాసనమునె దిగించి; సడంపరె బొసికిరి తల్లలింకు విమర్శకొరితె అదికారం దివ్వొరొయాల. యేసుకోసం తంకె కొయిల సాక్ష్ముకోసం, పురువురో వాక్యము ప్రకటించిలందుకు ముండొ అనిపించిగిల్లా బక్తిగలలింకెరో ఆత్మానె దిగించి. తంకె క్రూర మ్రుగముకు గాని, తా బొమ్మకు గాని మొక్కివినీంతె. తంక చిత్తంపరె గాని అత్తొంపరె గాని ముద్ద నాపొగ్గిల్లాలింకె, తంకె ఉంచినె సజీవూలుయికిరి క్రీస్తుసంగరె మిసికిరి వెయ్యిబొచ్చొనె పరిపాలించినె.

5 సె వెయ్యిబొచ్చొరోనె యాలజాంక చివరి మొడనె జీలానీ; యడక అగరె పునరుత్థానము.

6 యే అగరె పునరుత్థానమురె పాలిగిల్లలింకె దన్యానె బులి పరిసుద్దలీకిరి తానె. యాలింకెంపరె దీటో మొర్వొకు అదికారమునీ; అంకె పురువుకు క్రీస్తుకు యాజకానెకిరి క్రీస్తుసంగరె కూడ వెయ్యి బొచ్చొరోనె రాజ్యము పాలించునె.

సాతానుకు ఓడించివురో.

7 వెయ్యి బొచ్చొరోనె యాల తరువాత సాతాను సెయెతల్ల చెరతీకిరి సడిదివ్వొరొయాల.

8 బూమి చార మూలండ్రేతల్ల మనమానుకు, లెక్కకుసాంద్రొర బల్లివనక తల్లా గోగు మాగోగు బుల్లలింకు మోసముకొరికిరి తంకు యుద్దముకు పొగుకొరితికి తంకె బయలుదేరిలె.

9 తంకె బూమిల్ల చెదిరికిరి అచ్చె, పురువురో ప్రజానెరో గోరోనెకు ప్రీయమీల పట్టముకు ముట్టడికొర్చూ పరలోకొముతీకిరి నియ ఒల్లికిరి తంకు పుడ్డివేల.

10 తంకు మోసముకొర్ల అపవాది నియ్య గందకమానె బుల్ల గుండమురె పొక్కిదివ్వోరో యీల, సెట్టె సె క్రూరముగముకు సారోప్రవక్తబుల్లలింకె అచ్చె; తంకె యుగయుగములుతీకిరి రత్తిదూసి బాదపొడుసె.

గొప్పగా దొగల సింహాసనము అగరె తీర్పుతీర్చి బొడివో.

11 ఈనె దొగలయీలాట మహా సింహాసనముకు సడంపరె బొస్సికిరి తల్లా జోనుకు దిగించి; బూమి మెగోనె తా అగరెదీకిరి పొలిజెల్ల; సడకు తల్లా చోటు దిగిదిల్లనీ.

12 ఈనె గొప్పలింకె కిర బీదలింకె కిర మొరిజెల్లలింకెల్ల సె సింహాసనము అగరె టారేకిరి తల్లాట దిగించి. సెత్తిలె గ్రందమునె పిటిలట దిగించి; ఈనె జీవగ్రందము ఇంగుట గ్రందము పిటివురోవూసి; సె గ్రందంరె రాసికిరితల్లా సడనె గురించి తంక క్రియనెవల్ల మొరజలలింకె తీర్పు పొందిలె.

13 సాంద్రొ తా బిత్తిరె తల్లా మొడనె అప్పగించిల; మోడనుకు పాతాలలోకొకు తాండె వసమురె తల్లా మొడనె అప్పగించిల; తంకెబిత్తరె ప్రతి మనమా తా పైటినె వల్లరె తీర్పుపొందుసె.

14 మొర్నొకు మొడనె లొకొకు నియగుండమురె పొక్కిదివ్వోరో యీసి; యే నియగుండమాక దీట మొరోనో.

15 కా నాయీనెనెను జీవగ్రందమురె రాసికిరి నా తల్లపనికిరి తన్నె సె నియ గుండమురె పొక్కిదివ్వోరో వూసి.

21

నో మెగో నో బూమి

1 సాకిరి మీ నో మెగోకు నో బూమికి దిగించి, అగరె మెగోకు, అగరె బూమి గతించిజోసి. సాంద్రొ బుల్లట ఇంకా నీ.

2 ఈనె మీ నోటయీల యెరూసలేము బుల్ల సే పరిసుద్ద పట్టము తా గొయిత కోసం అలంకరించికిరితల్ల కొనియప్పిల్లపనికిరి సిద్దపొడికిరి పరలోకొరె తల్లా పురువుతీకిరి ఒల్లికిరి అయిలాట దిగించి.

3 సెత్తిలె ఇత్తో పురువురో నివాసము మనమానె సంగరంకా అచ్చి, సే తంకెసంగరె మిసికిరి తాసి. తంకె తా ప్రజలీకిరి తాసె, పురువు తంక పురువు యీకిరి తంకు తోడు యీకిరి తాసి.

4 ఈనె తంక అంకీనెరో పని అల్లా పుంచిపోసి, మొర్నొ ఇంక తన్ని, దుక్కొ యీనెను, కందివురో యీనెను, కిరయీనెను ఇంక తన్ని, అగరె సంగతీనె గతించిజోసిబులి సింహాసనముతీకిరి అయిల గొప్ప స్వరము కొయిలాట సునించి.

5 సెత్తిలె సింహాసనముంపరె బొసికిరి తల్లాట ఇత్తో సొబ్బికుడ నోట యీలపనికిరి కొర్లించి బులి కొయిసి; ఈనె యే కొతనె నమ్మకమీకిరి సొత్తాక యీకిరి అచ్చి గనుక రాసుబులి మోసంగరె కొయిసి.

6 ఈనె సెయె మోసంగరె యీకిరి కొయిసి సమస్తమీలట; మియ్యక అల్పాయు ఓమెగయు, బుల్లె అగుంతతీకిరి అంతము యీకిరి తల్లటతా; గొలారిలాలింకు జీవజలమురో బుగ్గతీకిరి జలముకు మీ సుచ్చరాక అనుగ్రహించుంచి.

7 జయించిలాటతా యడకు సొంతము కొరుగునిసి; మీ తంకు పురువు యీకిరి తాంచి తంకె మెత్తె పోనె యీకిరి తాసి.

8 పిరికిలింకె, అవిస్సాసములింకె, అసహ్యలుకు, మనమానుకు పొర్నొకడిలలింకు, దర్మిపైటినెకొర్లింకు, మంత్రించిలింకు, బోమ్మలకు వూజించిలింకు, సారొకొతనె లగిలలింకుల్ల నియగ్రందముసంగరె పుడ్డల గుండమురె పొగువురో వూసి; యడ దీట మొరోనో.

నో యెరూసలేము.

9 సాకిరి సే చివరి సత్ర తెగుల్లుసంగరె పూరిల సత్ర పాత్రనుకు దరిగినికిరి తల్లా సత్రలింకె దేవదూతనె జోనె అయికిరి ఏ పక్కు ఆయి; కొనియప్పిల్లకు, బుల్లె గొర్లిప్పిల్లరో నైపొకు తొత్తె దిగిదుంచి బులి కొయిసి.

10 ఆత్మసంగరె పూరికిరితల్ల మెత్తె ఎత్తెలా గొప్ప పొరుతోపరెకు దంజీకిరి, యెరూసలేము బిల్ల పరిసుద్ద పట్టనము పురువురో మహిమగలట పరలోకొరె తల్లా పురువు తీకిరి ఒల్లికిరి అయిలాట మెత్తె దిగిదీసె.

11 యెరూసలేముపారె హల్లో దగదగ మెరిసిల సూరుడురో కాంతి పనాట అమూల్యమైలా రత్నముకు పోలికిరిఅచ్చి.

12 సే గాకు ఎత్తె బొట్ట గోడ, పండ్రెండు దోరమునె అచ్చి; గుట, గుట దోరముకు గుట, గుట దేవదూతనె అచ్చె.

ఇస్రాయేలీయుల పండ్రెండు గోత్రమునె నామమునె సే దోరానెంపరె రాసికిరి అచ్చి.

13 తూర్పు ఆడుకు తింట గుమ్మానె, ఉత్తరము ఆడుకు తింట గుమ్మానె, దక్కినం ఆడుకు తింట గుమ్మానె, పచ్చిమం ఆడుకు తింట గుమ్మానె అచ్చి.

14 సీ గారో గోడ వండ్రెండు పునాదులు గల్లాట, సీ పునాదీనె ఉంపరె గొర్రిపిల్లరో వండ్రెండు అపొస్తులురో వండ్రెండు నానె దీదిల్లిసి.

15 సీ పట్టుముకు తాండ్రె దోరమునె గోడకు నప్పితె మోసంగరె కొతలగిలాట తాపక్కరె సున్నాకొలత బడ్డి అచ్చి.

16 సె పట్టుము చార పక్క నమానంగా అచ్చి, తాండ్రె డెంగ ఎడల్పు సంగరె సమానము, సెయె సె కొలబడ్డిసంగరె పట్టుముకు నప్పినాక తాండ్రె నప్పిలాకొలత దీట వెయ్యింపరె సారా సోయి అచ్చి; తాండ్రె డెంగ ఎత్తుకు వెడల్పులు సమానముకిరి అచ్చి.

17 ఇంక సె గోడకు నప్పినాక సడ మనమరొ కొలత చొప్పురె సాయి చార దొస్టంపరె చార మూరలీకిరి అచ్చి; సె కొలత దూత కొలతాక.

18 సె పట్టుము గోడ సూరిడురో కాంతినె సంగరె తల్లా పొత్తోరో సంగరె బందికిరి అచ్చి; పట్టుము స్వచ్చమీల స్పటికముసంగరె సమానమీల సుద్దసువర్షమీలపనికిరి అచ్చి.

19 సె పట్టనము గోడ పునాదీనె ఆమూల్యమైల వేరు వేరు రకానె రత్నమునె సంగరె అలంకరించికిరి అచ్చి, అగరె పునాది సూరిడురో కాంతియాల పొత్తోరో, దీటట నీలము, తింటట యమునా పొత్తోరో, చారట పచ్చట.

20 పాంటోట వైడూర్వము, సోటట కెంపు, సత్రట సువర్షరత్నము, అట్టట గోమేదికము, నోటట పుస్పరాగము, దొస్ట సువర్షలసునీయము, పదకొండుట పద్మరాగము, వండ్రెండుట సుగందకము.

21 సడరో వన్నెండు దోరానె పన్నెండు ముత్యమునె; గుటె, గుటె దోరము గుటె, గుటె ముత్యమునెసంగరె బందికిరి అచ్చి. పట్టుమురో రొజసై స్వచ్చమీల సున్నకు స్వచ్చమీల స్పటికముకు పోలికిరి అచ్చి.

22 తాండ్రె కే దేవాలయం మెత్తె దీదివి నీ. గొప్ప అదికారి యాల పురువు యాల ప్రబువుకు గొర్రిపిల్లరో సడకు దేవాలయము యాకిరి అచ్చె.

23 సీ పట్టుమురె ప్రకాసించితె సూరిడు యానెను చంద్రుడు యానెను సడకు అక్కర నీ; పురువురో మహిమాక తాండ్రె ప్రకాసించిలీసి, గొర్రిపిల్లాక సడకు బొత్తి.

24 జనమునె సడరో హల్లోరె చలుసె, బూ రొజానె తంక సంపద తాండ్రె బిత్తురుకు కొడిగికిరి ఆసె.

25 సెట్టె రత్తినొయిలందరె సడరో దోరమునె దూసిబెల్లె కెత్తెమాత్రం బుజ్జికిరి తన్ని.

26 దెసోనె ప్రజనె మహిమాకు గనతకు తాండ్రెబిత్తురుకు కొడిగినికిరి ఆసె.

27 గొర్రిపిల్లరో జీవగ్రందమురె రాసికిరి తల్లలింకాక తాండ్రె బిత్తురుకు జోసె. ఈనె వ్యర్థమైల కెడ్రెనీకీ, అనహ్యమైలాటకు సారొకొత్తెలాట జరిగించిలాటతా యానెను సడరో బిత్తురుకు జెవ్వోరో యాని.

22

1 ఈనె స్పటికముపనికిరి మెరిసీల జీవజలమునె నది పురువురో గొర్రిపిల్లరో సింహాసనముతీకిరి, సె నది బయలుదేరికి, సె దూత మెత్తె దిగిదీసి.

2 సె పట్టుము సైయి మొజిరె ప్రవహించిలాట దిగిదీసి. సె నదిరో ఏపొక సేపొక జీవగొచ్చొ తవ్వి; సడ మసా మసాకు పలింపికుంట వన్నెండు పచ్చానె పచ్చుసి. సె గొచ్చోరో ఆకూనె మనమానుకు బొలికొరితండుకు వినియోగించుసె.

3 ఇంక సాకరాక సాపగ్రస్తుమైల కెడగుటెకూడ తాండ్రె తన్ని, పురువురో గొర్రిపిల్లరో సింహాసనము తాండ్రె తాసి.

4 తా దాసునె తాకు సేవించుకుంట తా మూ దిక్కుకుంట తాసె; తా నామము తంక చిత్తనెంపరె అచ్చి.

5 రత్తి ఇంక కెబ్బుకు తన్ని; బొత్తిహల్లోయానెను సూరిడురోహల్లో యానెను తంకు అక్కర నీ; పురువు యాల ప్రబువాక తంకెంపరె ప్రకసించుసి, తంకె యుగయుగమునె దెసా పరిపాలించుసె.

యేసు అయివురో

6 ఈనె సీ దూత యాకిరి మోసంగరె కొయిసి, యే కొతనె నమ్మకముమీకిరి సత్యముమీకిరి అచ్చి; ప్రవక్తానె ఆత్మానెకు పురువు యాల ప్రబువు, బేగా జరిగిలాటకు సడకు తా దాసునుకు దిగిదీతె తా దూతకు పొడిదీసి.

7 ఇత్తో మి బేగా అయిలించి, యే గ్రందమురె ప్రవచన వాక్యమునుకు తెలిసిగిల్లట దన్యూడు.

8 యోహాను బుల్లట మి యే సంగీతినె సునిలాట దిగిలాట; మీ సునికిరి దిగిలాపరె సడకు మెత్తె దిగిదిల్ల దూత పాదాలునె అగరె సమస్కారము కొరితె సాగిలిపొడించి.

9 సెయ్యో నాబులి, మీ తోసంగరె, ప్రవక్తానె యీలలింకె తో అన్నబయినె, యే గ్రందమురెతల్ల వాక్యమునె తెలిసిగిల్లలింకెసంగరె సహదాసుడు; పురువుకు నమస్కారము కొరుబులి కొయిసి.

10 ఈనె సెయె మో సంగరె యాకిరి కొయిసి యే గ్రందమురెతల్ల ప్రవచనవాక్యమునెకు ముద్ర పొగితనా; యీనె కలో సమిపించికిరి అచ్చి;

11 అన్యాయముకొల్లాట ఇంక అన్యాయము కొరుమురో, అపవిత్రుడు యీలాట ఇంక అపవిత్రుడు పనికిరాక తమ్మురో, నీతి మంతుడు ఇంక నీతిమంతుడు పనికిరాక తమ్మురో. పరిసుద్దలింకు ఇంక పరిసుద్దలుపనికిరి తమ్మురో.

12 ఇత్తో బేగా అయిలించి, తా, తా పైటిచొప్పురె ప్రతిమనమాకు దీతె మీ సిద్దము కొర్ల బహుమతినె మో పారె అచ్చి.

13 మీ అల్పాయు ఓమెగయు, అగరెతా ఆకరితా, అగుంతా అంతమైకిరి అచ్చి.

14 జీవ గొచ్చొకు హక్కుగలలింకె యీకిరి, దోరములుదీకిరి సె పట్టుము బిత్తురుకు ప్రవెసించిలపనికిరి తంక కొన్నానెకు కచ్చిగిల్లలింకె దన్యానె.

15 కుక్కురోనుకు, మంత్రించిలింకు, దర్మిపైటికొర్లలింకు, మనమానుకు పొర్నొకల్లలింకు, బొమ్మనుకు పూజించిలలింకె, సారోరాటకు ప్రేమింకిరి జరిగించిల ప్రతిమనమ పొదెరె తాసి.

16 సంగమునె కోసం యే సంగతినెగూరించి తొముకు సాక్సం దీతెకు యేసు బిల్ల మీ మో దూతకు పొడిదీకిరి ఆంచి. మీ దావీదు వంసముతీకిరి సె వంసము సొబ్బిలింకు, హల్లొయాల వేకువ చుక్కయీకిరి ఆంచి.

17 ఆత్మ ఇంక బ్యాకొనియ అయిబులి కొయిలీసె; సునిలటతాకూడ అయిబులి కొయివాసె; గొలారిలలింకు అయిమురో; యీవలసిటకు జీవజలము సుచ్చరాక కడిగిమ్మురు.

ఆకరి కొతానె

18 యే గ్రందమురెతల్ల ప్రవచనవాక్యములుకు సునిల ప్రతితాకు మీ ఎచ్చరించలాట కిరబుల్నె కేసైనా అడసంగరె ఇంక కిరయీనెను మిసినె, యే గ్రందంరె రాసికిరి తల్లా తెగుల్లు పురువు తాకు కలిగిదివో;

19 కేసైనా యే ప్రవచన గ్రందమురెతల్ల వాక్యమురె కిరయీనెను కడిపెనె, పురువు యే గ్రందమురె రాసికిరి తల్లా జీవగొచ్చొండ్రె పొగలానె కైపించినీ సెయ్యో పరిసుద్దపట్టుముకు తాకు అయిపించినీ.

20 యే సంగీతినె గురించి సాక్సం దిల్లటతా వై, బేగా అయిలించి బులి కొయిలీసె, ఆమేను; ప్రబూవీల యేసు, అయి.

21 ప్రబుయీల యేసురో క్రువ పురువురో ప్రజలల్లకు తోడుయీకిరి తమ్మాసి ఆమేను.